

# Egvu-Ọma

## 1

- 1 Ọnu-ọma bụ k'onye yẹle  
 ndu akirishi ẹ-ta achịdu idzu lanu;  
 too tsoje l'idzu ndu ẹjo iya ono;  
 tọ dọ iphe yẹle ndu ẹ-ta  
 gụbedu Nchileke iphe jigba;
- 2 mbụ onye bụlephu ekemu  
 Ojejoje aduje iya mma;  
 bụru iya anọduje iya l'oriri: eswe l'enyashi.
- 3 Onye ono dọ l'ọ bụ oshi,  
 e yeru l'iku nggele.  
 Ọonoduje amị nebyi l'oge iya;  
 ọphu ẹkwo iya  
 'akụ-gbehujedu akụ-gbehu.  
 Iphe bụ iphe o yeru ẹka abujeru iya ọpete.
- 4 Obenu l'ẹ t'ọ budu ẹge ono  
 bẹ ọodujeru ndu akirishi.  
 Ẹphebedua dọ l'ọ bụ ẹswa witu,  
 pherephere ephekashije.
- 5 Ọo ya bụ ẹ ndu akirishi bẹ  
 ikpe a-nma l'ifu Nchileke;  
 ọphu o dobedu ndu eme  
 ẹjo iphe l'ẹke ndu doberu ẹka ndoo nọ.
- 6 Kẹle Ojejoje anọduje eduzi  
 ndu doberu ẹka ndoo ọzo.  
 Obenu l'ọzo kẹ ndu akirishi e-me;  
 ẹphe aburu kpurupyata.

## 2

- 1 ?Bụ ngunu meru iphe  
 iphe bụ mbakeshi achị  
 ẹjo idzu kẹ okwefuru Ojejoje íkè?  
 ?Bụ ngunu meru iphe ndiphe  
 achị idzu ìphòró?
- 2 Ndu eze, achị mgboko  
 ajikobe onwẹphe k'ọgu;  
 ndu ishi l'edzukobe;  
 t'ẹphe tso Ojejoje ọgu;  
 tsokwaphu onye ono,  
 ọ fọtaru t'ọ bụru eze ono ọgu.
- 3 Ẹphe sụru: “Unu t'ayi  
 lọ-bushia mkpa ono,  
 ẹphe gude tųgbabe ayi ono!  
 Unu t'ayi gbabushia ẹgbirigba ono,  
 ẹphe gude kee ayi ono.”
- 4 Ọ bụ ọchi bẹ onye ono,  
 nọ l'aba-eze l'imigwe ono achị ẹphe;  
 mbụ l'ọo ọchi; bẹ oozì Nnajiufu.
- 5 Oo-gude iphe-eghughu  
 baaru ẹpha mba;  
 gude oke ẹhu-eghughu yee ẹphe egvu.
- 6 Nchileke asụ ẹphe lẹ  
 ya fọfutawaru eze;  
 dobe iche lẹ Ugvu Záyọnu,  
 bụ ugvu ono, ya doberu nsọ ono.
- 7 Onye ono, ọ fọtaru ono asụ  
 lẹ: “Ekemu Ojejoje;  
 bẹ ya a-ra tororo;  
 kẹle Ojejoje sụru iya:  
 'L'ọo ya bụ Nwatibe iya kẹ nwoke.  
 Dụbe ntañu;

- bẹ ya bụakwa Nna iya.  
 8 Ya e-woru iphe bụ mbakeshi  
 nụ iya t'ọ bụru òkè-iphe iya;  
   woru mgboko  
   mgburumgburu nụ iya  
   t'ọ bụru iya iphe-enweru;  
   m'ọ -bụru lẹ ya rọru iya ẹya.  
 9 Yọ bụru ẹka-ike;  
   bẹ mu e-gude achi ẹphe;  
   gude iya kua ẹphe  
   yọgiri-yogiri l'ọ bụ ite-ura.' ”  
 10 Ọo ya bụ; unubẹ ndu eze;  
   unu kwakwaa ẹnya!  
   Unubẹ ndu ishi kẹ mgboko-a;  
   unu ngabekwa nchi l'okwa  
   ono, aanmaru unu ono!  
 11 Unu gude ọtsu egvu;  
   mẹ ẹhu-anmanma ejeru Ojejoje ozi!  
 12 Unu tsuta Nwa iya nwoke  
   ọnu l'okpa; e menyaa;  
   ẹhu awata iya oghu  
   eghughu; yo mee;  
   unu aburu kpurupyata lẹ mbaduzo;  
   kẹ l'ọ kwa nwiphe, ẹ-ta badu ishi;  
   akpatsuje iya iwe.  
   Ọnu-ọma bụ kẹ ndu gbakfuru  
   iya nụ t'ẹphe zeeru ndzụ.

### 3

Egву-ọma, Dévidi deru teke ọogbalaru nwa iya,  
 bụ Abusolomu

- 1 Nggube Ojejoje;  
   ndu ọhogu mu zakwaru l'igwe!

- Ndu, wụ-lihuru etso mu  
okfu abụru 'aguta aguta.
- <sup>2</sup> Ndu, ekfu lẹ Nchileke  
ta adzọfutadu mu hakwa l'igwe.
- <sup>3</sup> Obenu l'ọ bụ nggubedua,  
bụ Ojejoje bụ onye egbobutaje mu nụ.  
Ọ bụ nggu bụ onye emeje  
t'a kwabẹ mu ugvu;  
bụru nggu emesaje mu ifu.
- <sup>4</sup> Mu woliru olu mu raku Ojejoje.  
Yo shi l'ugvu ono,  
o doberu nsọ ono zaa mu.
- <sup>5</sup> Mu azejeru azẹe kua mgbenya; tehu;  
kẹ l'ọ bụ Ojejoje gude ndzụ mu.
- <sup>6</sup> Igweligwe ndu ono,  
kwagebetsuaru; nọ-pee mu  
mgburumburu ono;  
bẹ mu ta atsudu egvu.
- <sup>7</sup> Nggube Ojejoje;  
byiko kwolihuru dzọo mu;  
kwolihu dzọfuta mu;  
nggube Nchileke mu!  
Hụa ndu ọhogu mu àhùhù;  
k'ọphu ike ta anọhedu ẹphe.
- <sup>8</sup> Ọ bụ nggube Ojejoje adzọfutaje madzụ.  
Gonuaru ndu nke ngu onu.

## 4

Egvu-ọma, Dévidi deru nụ onye ishi egvu; t'a  
kpọru une ye iya

- <sup>1</sup> Zanu mu teke mu kuru ngu;  
nggube Nchileke mu,  
bụ onye doberu ẹka ndoo.

I gbaru mu mkpu teke  
 iphe-ẹhuka byaru mu.  
 Byiko; phunuaru mu imiko;  
 nggu angaberu mu ru nchi  
 l'ekfukfu, mu ekfu anu ngu!

<sup>2</sup> ?Bu teke ole; be unube unwu  
 eliphe a-ha ogude ugvu,  
 a kwaberu mu eme iphe-iphoro?  
 ?Bu teke ole; be unu  
 e-yeberu obu  
 l'iphe e-te nwedu ishi;  
 mbu woru onwunu haaru  
 iphe e-ta budu okpobe iphe?

<sup>3</sup> Unu makwaru le Ojejoje  
 fotawaru ndu ophu  
 yeru iya obu doberu onwiya.  
 Mu -kua Ojejoje;  
 be ozajekwa mu.

<sup>4</sup> Unu be ekwekwa  
 t'ehu-eghughu nwuru unu ye l'iphe du eji.  
 Unu -zeru azee;  
 unu too nwehu ria ya ariri; daa ashi.

<sup>5</sup> Te ngweja, unu egwo anu  
 Nchileke bujekwaru  
 ngweja, du iya mma.  
 Unu adakobeje Ojejoje.

<sup>6</sup> Epe du l'igwe; mbu ndu  
 asuje: "Nggube Ojejoje;  
 mebanuaru ayi iphe-oma;  
 munuaru ayi onu-ochi!"

<sup>7</sup> Obenu l'ehu-otso-ena ophu  
 i yeru mu l'obu kakwa nk'ephe  
 teke iphe epe meberu l'ali mehuru ohuma.

8 Mu egudeje ẹhu-otso-ena laa l'ulo;  
 kua mgbenya l'ẹhu-agu;  
 ke l'ọ bu nggube Ojejoje nwenkinyi ngu;  
 bu onye emeje te mu buru  
 le domangu rimangu.

## 5

Egvu-oma, Dévidi deru nu onye ishi egvu; t'a  
 phuru opu ye iya

1 Nggube Ojejoje;

ngabenu nchi nua olu mu;  
 ude, mu atsu erua ngu nchi!

2 Nggube Nchileke mu,

bu Eze mu; ngabenu nchi; nua mkpu,  
 mu echi echiku ngu;  
 ke l'ọ bu nggu be mu ekfu anu.

3 Nggube Ojejoje;

utsu mboku-mboku;  
 be inuje olu mu.  
 Utsu mboku-mboku;  
 be mu ewojeru mkpa mu  
 dooru ngu giriri l'ifu;  
 daa ngaberu ngu.

4 Nchileke; e ti budu onye

iphe du eji aduje mma.  
 Ophu iikwejedu te ndu eme  
 ejo iphe nodu l'eke ino.

5 Ndu eku onwephe ege ephe

e-ta hadu te evudoghekwa ngu l'ifu.  
 Iphe bu ndu eme iphe e-ta  
 adudu mma dukwa ngu ashị.

6 Ndu ntumatu be iimeje t'ephe buru kpurupy-  
 ata.

- Ndu mgbugbu-madzu;  
 mę ndu ejire; bę nggube  
 Ojejoje akpořu akpořu.
- 7 Obenu lę mbędua e-shi lę  
 n-yomobu ngu l'ęke mu nu;  
 abya l'ulo ngu.  
 Mu e-gudeje ọtsu egvu;  
 ghaa ifu l'eze-ulo ngu, du nsọ;  
 baaru ngu eja.
- 8 Nggube Ojejoje;  
 keshinu ořhu i bu onye doberu ęka ndoo;  
 duzinua mu ọzo;  
 l'ogvu ndu ořogu mu.  
 Menua t'o doo mu ęnya;  
 mbu ọzo, iicho tę mu shia.
- 9 E tọ dudu okfu, shi ęphe  
 l'onu m'oo nanu, e gude ęka.  
 Iphe jiru ęphe obu bu mkpaka.  
 ęphe egudeje onu ęphe aja madzu ajaja;  
 obenu l'iphe nọ ęphe l'obu  
 anọduje eshi l'obu ili, gheru onu.
- 10 Nggube Nchileke;  
 menua t'ęjo iphe ęphe  
 meshiru tukoru ęphe l'ishi;  
 tę idzu, ęphe chiru nma ęphe l'o bu ọnya.  
 Chifukota ęphe Nchileke;  
 kę l'iphe ęphe meshiru ghatawaru aghata;  
 shi iya kwa iya phu  
 l'ekwefuru ngu ikę!
- 11 O lę tę ęhu-ọtso-ęna bukwaru  
 kę ndu agbabaję ngu l'ime; zeeru ndzu.  
 T'egvu ęhu-ọtso-ęna buru  
 nk'ęphe jeye lę tutu yoyo.

Gbochita ẹphe Nchileke;  
k'ọphu iphe bu ndu yeru  
ẹpha ngu obu e-te ẹswa.

- 12 Ọ bu nggube Ojejoje  
agojeru ọnu-ọma nū ndu doberu ẹka ndoo.  
Iigudeje ke l'ẹphe nọ ngu  
l'obu gbochita ẹphe.

## 6

Egvu-ọma, Dévidi deru nū onye ishi egvu; t'e  
gude olu, ede edede gụa ya; t'a kpọru une ye iya

- 1 Nggube Ojejoje;  
be egudekwa ẹhu-eghughu baaru mu mba;  
ọphu i gudekwa  
oke ẹhu-eghughu ngu hùa mu àhùhù!
- 2 Nggube Ojejoje;  
phụaru mu rụ imiko;  
ke l'ike gvụwaru mu.  
Nggube Ojejoje;  
menea te mu ka mma;  
ke l'ẹhu mu l'ọ ha  
anmakotakwa mu kwẹkwekwe.
- 3 Meji atọfukwa mu atọfu.  
Nggube Ojejoje;  
?bu teke ngunu meru;  
temanu nggu agbaaru mu mkpu?
- 4 Laphuta azu; Ojejoje;  
bya bya adzọo mu!  
Gude ke n-yemobu ngu ono,  
bu 'onwe agvugvu ono dzọo mu!
- 5 Ke l'onye nwuhuru nū  
ta anyatahekwa ngu.  
?Bu onye a-nọdu l'alì-maa l'ekele ngu ekele.



- 6 Mu tsuakwaru ude jeye ike agvụ mu.  
 Mu -laa l'ulo  
 mbọku-mbọku;  
 mu akwaa ẹkwa jeye nchi abọhu;  
 ọphu 'onwedu mbọku,  
 a nojeru tẹ ẹnya-mini mu  
 ba tsọ l'iphe mu echebeje ishi.
- 7 Aphụ, byaru mu nụ mewaru;  
 mu akwaa ẹkwa kwata ẹnya-ìshì.  
 O mewaru; ẹnya ekoshia mu ekoshi.  
 Yọ bụru iphe ndu ọhogu mu kpataru mu.
- 8 Unu gbeshi mu l'ifu;  
 unubẹ ndu ẹjo iya ono;  
 kele Ojejoje nụwaru ẹkwa mu akwa.
- 9 Ojejoje nụwaru arọro, mu rọru iya.  
 Ọ nụwaru ekfukfu, mu ekfu anụ iya.
- 10 Ndu ọhogu mu l'ẹphe ha;  
 bẹ ee-kpu ifu lẹ ntụ;  
 meji atọshihu ẹphe.  
 Ẹphe a-ghakọbe;  
 gude iphere laphushia azụ.

## 7

Egvu-aphụ, Dévidi gụru nụ Ojejoje lẹ k'iphe  
 Kúshi, bụ o-shi-l'eri Bénjaminu kfuru

- 1 Nggube Ojejoje,  
 bụ Nchileke mu;  
 ọ kwa l'ime ngu bẹ mu gbatataru;  
 tẹ mu zeeru ndzụ.  
 Dzọnua mu;  
 l'ẹka iphe bụ ndu achị mu nụ;  
 byiko nafuta mu rụ!
- 2 Ọdumeka bẹ ẹphe e-gudekwa

mu l'ọ bụ agu; labushia nanu nanu;  
l'ẹ b'ọ nwe onye ọdo,  
mu nweru a-gbaru mu mkpu.

<sup>3</sup> Nggube Ojejoje,  
bụ Nchileke mu;  
a gufukwa l'ọ nweru  
iphe dụ eji, mu mejeru;

<sup>4</sup> mbụ l'ọ nweru m'ọ bụ  
onye okfu ẹ-ta dudu mu l'iya,  
mu mejeru iphe dụ eji.  
Ọdudu bụru lẹ mu natajeru  
ndu ọhogu mu iphe k'ẹhuka;  
l'ẹ b'ọ dụ iphe kparu iya nụ;

<sup>5</sup> ọo ya bụ; tẹ ndu ọhogu mu,  
achi mu nụ gude mu;  
dzọo mu pyakapyaka;  
Ephe ewowaruru ugvu ono,  
aakwabẹ mu ono gwọo lẹ ntụ.

<sup>6</sup> Nggube Ojejoje;  
gude nụ ẹhu-eghughu kwolihu!  
Gbeshi nụ; nọ-chia ephe ọzo;  
mbụ ndu ọhogu ono,  
gude ẹhu-eghughu achi mu ono.  
Kwoliuru Ojejoje;  
kẹ l'ọ kwa nggubedua turu ekemu;  
sụ tẹ ndiphe kpeje ikpe, dụ maa.

<sup>7</sup> Chikobenu mkporo-ọha ono,  
dzukoberu nụ ono;  
t'ephe gbaa ngu mgburumburu;  
nggu anọdu l'aba-eze ngu l'ephekerephe.

<sup>8</sup> Ọ bụ nggube Ojejoje  
e-kpe ndu ono ikpe.  
Kpee ya; kperu yeru mu;

- kele mu bu onye doberu ẹka ndoo;  
 to nwe ẹke ọta du mu l'ehu.
- 9 Nggube Nchileke,  
 bu onye doberu ẹka ndoo;  
 nggube onye enyochaje  
 ime obu madzu;  
 me oriri iya;  
 byiko menua t'ọ kfuhi;  
 mbu iwe-iwe ono,  
 ndu akirishi eme ono!  
 Mee te ndu doberu ẹka ndoo  
 nguru anguru!
- 10 Nchileke bu iya  
 egbochitaje mu nu.  
 O bu iya adzofutaje ndu obu guru iphoro.
- 11 Nchileke bu onye ekpeje ikpe, du maa;  
 buru onye ekoshije ndu  
 ejo madzu  
 oke ehughu iya mboku-mboku.
- 12 O -buru le madzu ta atadu  
 onwiya ọta iphe du eji iya;  
 be ọo-bakwa nkogo iya  
 tee ya nkọ; kwee ọta iya;  
 ye iya akfu goberu ndu ono.
- 13 O kwakookwaru ejo  
 ngwa-ogu iya dobe;  
 bya edozikotawa akfu iya, enwu oku.
- 14 Lewaru ege ejo iphe jiru ndu akirishi obu.  
 Ejo iphe ono, jiru ephe obu  
 ono aburu eregede.  
 Iphe e-shi l'eregede ono  
 lufuta aburu ntuphu-ire.
- 15 Ephe turu iduma;

- tumia ya atumi.  
 Obenu l'ọ bụ ẹphe  
 e-mekochaa dalahụ l'iduma ono.
- 16 Ẹregede, ẹphe agba  
 e-mekochakwaa bya  
 atukoru ẹphe l'ishi.  
 Iphe-kpaa, ẹphe meshiru  
 ndu ọdo a-laphukwaru ẹphe azụ.
- 17 Mbẹdua a-nọduplephu ekele Ojejoje ekele;  
 kẹ l'ọ bụ onye doberu ẹka ndoo.  
 Mu agụa egvu;  
 gude tua onye ono,  
 bụ Okaribe-Kakọta-Nụ ono ẹpha.

## 8

Egvu-ọma, Dévidi deru nụ onye ishi egvu; t'e  
 gudeje ngwa-egvu gítitu gụa ya

- 1 Nggube Ojejoje,  
 bụ Nnajiufu ayi;  
 ẹge ẹpha ngu dụ-bekwanu  
 ugvu lẹ mgboko gbaa mgburumgburu;  
 meru ọdu-biribiri ngu;  
 yọ ghaa imigwe.
- 2 I mewaru unwegirima nshịi;  
 mẹ ndu angụ ẹra;  
 ẹphe awata ngu oja ajaja;  
 l'ogvu ndu ọhogu ngu;  
 shi ẹge ono mee tẹ ndu  
 ọhogu ngu;  
 mẹ ndu eme t'ẹphe gwata  
 ngu ụgwo daa shikongu.
- 3 Teke mu leri ẹnya l'igwe;  
 phụ iphe i gude

mkpushi-eka ngu meshia;  
mbu onwa;  
me mkpo-kpodo,  
bukota iphe i meshiru dobe;

4 mu ajilahaa; su: “?Bu ngunu  
be madzu bu; ke t'i rivu iya l'oriri?  
?Bu ngunu be madzu mmanu bu;  
ke t'ii iya enya?”

5 I meru iya; iphe unwu  
imigwe gude ka iya ta aha l'o bu inyi-nvo.  
I kpuberu iya odu-biribiri  
l'o bu okpu; bya akwabẹ  
iya ugvu, ha nshinu.

6 I nuru iya ike t'o letaje  
iphemiphe obule i keru ekeke enya;  
bya emekwaaphu te  
iphemiphe obule nodukota iya l'eka;

7 mbu l'i meru te aturu;  
me egu; me eswi;  
me iphemiphe obule,  
bu anu-egu-egbudu l'ephe ha;

8 me unwu enu, ephe l'eli;  
me ema, bu le mini;  
mekpo iphemiphe obule,  
bu le mini l'ephe ha  
nodukota iya l'eka.

9 Nggube Ojejoje,  
bu Nnajiufu ayi;  
ege epha ngu du-bekwanu  
ugvu le mgboko-a l'o ha.

## 9

Egву-ọma, Dévidi deru nù onye ishi egву. T'e gude olu egву “Èkwa Nwa” gụa ya

<sup>1</sup> Nggùbe Ojejoje;

mu e-gude obu mu l'ọ ha ekele ngu ekele.

Mu a-nọdu ekfukashi ke

iphe dụ biribiri, iimeshibebe.

<sup>2</sup> Èhu a-nọdu atso mu ẹna;

mu egude ngu ete ẹswa.

Mu a-gụ egву gude

jaa ẹpha ngu ajaja; nggùbe

Ọkaribe-Kakọta-Nụ!

<sup>3</sup> Ndu ọhogu mu tsuphuwaru azụ!

Èphe kpakotawaru iphe dashia;

tugbushia onwẹphe l'ifu ngu!

<sup>4</sup> Kẹ l'ikpe, i kperu

b'i kperu ọhuma;

hawaru mu enge.

Ị nọwa l'aba-eze ngu

kpee ikpe, dụ maa.

<sup>5</sup> Iphe bụ mbakeshi b'ị bawaru mba;

bya emewa ndu akirishi;

ẹphe aburu kpurupyata.

I mewaru tẹ ẹpha ẹphe

chihu gbururu jeye ẹ gbururu.

<sup>6</sup> Ndu ọhogu mu; bẹ nk'ẹphe gvụaru.

Ufu ẹphe a-bukotaru

ọkpu-ufu gbururu jeye ẹ gbururu.

Mkpukpu ẹphe b'ị vụwaru l'ógbaragba;

k'ọphu bụ l'ẹ to nwedu onye

ephotajekwadu iya nù.

<sup>7</sup> Ojejoje a-buru eze jeye tutu yoyo.

O mewaru aba-eze iya ono;

- yọ nguru anguru;  
 k'ọphu ọo-nọdu iya kpee ikpe.  
 8 Oo-kpe ndu mgboko ikpe ọhuma.  
 Ikpe iya adabujeru adaburu.  
 9 Ojejoje bu a -gbaba;  
 e zeeru ndzụ kẹ ndu aakpa ẹhu;  
 ndu iphe-ẹhuka byaru  
 agbabajẹ iya phụ l'ẹka je edomia onwẹphe.  
 10 Iphe bu ndu maru ngu nụ  
 bu nggu bẹ ẹphe adakobeje;  
 kele nggube Ojejoje ta  
 ahabukwaa ndu agbakfuta ngu nụ.  
 11 Unu gụa egvu gude jaa  
 Ojejoje ono,  
 bu lẹ Záyọnu ono ajaja.  
 Unu raaru iphe bu  
 mbakeshi iphemiphe ọbule ono,  
 o meshiru ono.  
 12 Kẹ l'onye ono,  
 agwatajẹ ugwo ọchi ono  
 bẹ nyatakwarua ẹphe.  
 Ndu iphe-ẹhuka byaru -chia mkpu;  
 b'ẹ tọo dahujekwa ẹphe nkichi.  
 13 Nggube Ojejoje;  
 phunuaru mu imiko!  
 Lewaru ẹge ndu ọhogu mu akpabe mu ẹhu!  
 Nafutanu mu l'ẹka anwuhu ono;  
 14 k'ọphu mu anọdu l'ẹke eeshije  
 abahụ Záyọnu jaa ngu ajaja;  
 tee ẹswa l'ị dzofutaru mu.  
 15 Iphe bu mbakeshi  
 dalahuakwaru l'iduma,  
 ẹphe turu l'onwẹphe.

- Ẹphe nmakwaruphu l'ọnya, ẹphe gbaru.  
 16 Iphe e gude maru Ojejoje  
     bụ kẹ ikpe, dụ mma, ookpeje.  
     Obenu lẹ ndu akirishi;  
     bẹ iphe dụ eji, ẹphe eme  
     abuje ọnya hata ẹphe.  
 17 Ndu eme ẹjo iphe a-lakọta maa;  
     mbụ l'iphe bụ mbakeshi,  
     zaharu Nchileke aa-lakọta alị-maa.  
 18 Obenu lẹ ndu, nọ lẹ mkpa  
     b'ẹ ta zahadu jeye lẹ tutu yoyo;  
     ọpflu iphe ndu ụkpa ele ẹnya  
     lẹ Ojejoje e-meru ẹphe  
     ta abyadụ bya abụ kẹ mmanu.  
 19 Zilihu nggube Ojejoje!  
     T'ẹ b'ọ búbukwaa madzu  
     e-gbe ka ngu ike!  
     T'ẹ kpee iphe bụ mbakeshi ikpe l'ifu ngu!  
 20 Nggube Ojejoje; yenua ẹphe egvu!  
     Te iphe bụ mbakeshi ono  
     maru l'ọ bụ madzụ mmanu bẹ ẹphe bụ.

## 10

- 1 Nggube Ojejoje;  
     ?bụ ngunu kparu iphe i je akfuru gegerege?  
     ?Bụ ngunu kparu iphe  
     i woharu onwongu l'oge iphe-ẹhuka-a?  
 2 Ndu akirishi egudeje ekuku  
     l'achị nta ndu ụkpa.  
     Tẹ ẹjo idzu, ẹphe chịru  
     doberu ndu ọdo  
     bukwaru ọnya; nma ẹphe!  
 3 Iphe ndu akirishi egudeje asa



- nsasa bu iphe du eji, l'agu e phe.  
 E phe anoduje aja ndu iphe  
 e-te edzujedu edzudzu ajaja;  
 gbe l'ekfubyishi Nchileke.
- 4 E phe egudeje oku onwephe  
 jika ocho Nchileke.  
 E phe ta arivujedu  
 Nchileke l'oriri le phuu.
- 5 Iphemiphe obule, e phe eme  
 abujeru e phe upete.  
 E phe akakputaje ndu  
 ohogu e phe l'enya.  
 E phe ta aphujedu ikpe ono,  
 Ojejoje e-mekochaa kpee e phe ono.
- 6 I phe e phe arije bu l'e phe  
 buwa 'enwuribe enwuribe;  
 l'e t'o nwedu l'e phe ejee iphe-ehuka.
- 7 I phe ejije e phe onu bu iphu;  
 me ugho; me ohashi enu  
 ejo iphe e phe e-me madzu.  
 I phe e phe akpuje l'onu bu  
 eregede; me ejo iphe.
- 8 E phe anoduje l'iku mkpukpu;  
 domishia onwephe;  
 kwaaruru ndu e-ta adudu iphe  
 e phe meru; l'egbushi e phe.
- 9 O bu ege agu edomije  
 onwiya l'egbushi  
 unwu-anu; bu ege e phe  
 edomije onwephe kwaberu ndu ukpa.  
 E phe hatalaphu e phe;  
 e phe akpuru e phe lashia.
- 10 Ndu e phe hataru;

- bẹ ẹphe egweje rakaraka;  
 jeye nk'ẹphe agvu.  
 Ẹphe egudeje k'ẹhuka  
 kua ndu ukpa pyaapya.
- 11 Ẹphe arije lẹ Nchileke  
 zahawaru iphe ẹphe meru;  
 l'ọ ghawaru ẹphe azu;  
 l'ẹ t'ọo phuhedu ẹji ono, ẹphe eme ono.
- 12 Nggube Ojejoje;  
 gbeshikpoduaphu egbeshi!  
 Nggube Nchileke;  
 palikpoduaphu ẹka ngu apali!  
 Ba azahakwa ndu ono, aakpa ẹhu ono!
- 13 ?Bụ ngunu meru iphe ndu  
 iwe anọduje ekfubyishi Nchileke?  
 ?Nanu ẹge ọ du bẹ ẹphe  
 anọduje ari l'ẹ to nwedu  
 iphe Nchileke emeghe ẹphe?
- 14 Obekwanu l'ị phukotaje iphemiphe ọbule.  
 Iphuje ndu eje iphe-ẹhuka; mẹ ndu, agụ  
 aphụ.  
 Ẹ tii hajekwa ẹphe.  
 Ndu ukpa bu nggu;  
 bẹ ẹphe turu ume tukobe.  
 Ndu nna ẹphe ta anohedu  
 aburu nggu agbajeru ẹphe mkpu.
- 15 Nyakwonua ndu iwe ẹka;  
 mẹ ndu eme ẹjo iphe.  
 Vokwaa ẹjo iphe ẹphe  
 meshiru l'ọ ha.  
 Ba ahakwa m'ọo nanu.
- 16 Ojejoje bu Eze jeye  
 lẹ tutu yoyo.

Ndu ọhodo a-chihu l'alì Ojejoje.

- 17 Nggube Ojejoje;  
 iphe ndu dụ agu rọru ngu b'ì nọwaru.  
 Ọ bụ nggu aduje ẹphe ike;  
 bụru nggu anuje ẹkwa, ẹphe ara.
- 18 Haaru ndu nna ẹphe ẹ-ta  
 nọhedu enge;  
 mẹ ndu aakpa ẹhu;  
 k'ọphu ndiphe a-hakwanu  
 ẹphe ọkpa ẹhu.

## 11

Egvu, Dévidi deru nọ onye ishi egvu

- 1 Ọ bụ l'ẹka Ojejoje;  
 bẹ mu domiru onwomu.  
 ?Bụ ngunu kparu iphe  
 unu sụru tẹ mu phehu l'ọ bụ nwenu  
 je edomia onwomu l'ẹke egvu nọ?
- 2 Lekpoduanu!  
 Lẹ ndu akirishi setaakwaru  
 uta ẹphe; mẹ akfụ ẹphe  
 gọberu iya ndu obu gụru iphoro.
- 3 Keshinu e mebyishiwari ekemu,\*  
 bụ iya gude mkpukpu;  
 ?buhunu ngunu b'a sụru  
 tẹ onye doberu ẹka ndoo mee?
- 4 Ojejoje nọkwa l'eze-ulo iya, dụ nsọ.  
 Ọ bụ l'imigwe; bẹ aba-eze iya nọ.  
 Yọ nọdu l'ẹke ono; ẹnya  
 iya anọdu lẹ mgboko-a;  
 tuko ndiphe l'ẹphe ha l'enyocha.

\* 11:3 11:3 Iphe e kfu okfu iya l'ẹka-a bụ ekemu; ome-l'alì; mẹ gọvumentì, gude mkpukpu.

- 5 Ojejoje enyochajekwa ndu  
 obu ọ́ruru iphoro;  
 mẹ́ ndu akirishi.  
 Obenu lẹ́ ndu, bú iphe-kpaa  
 aduje ẹ́phe mma  
 adujekwanu iya ashị.
- 6 Ndu akirishi; bẹ́ oo-mekochaa  
 kpukposhi icheku-ọ́ku;  
 mẹ́ ọ́ku nshị-egbe  
 l'ọ́ bú igwe achị mini.  
 Yọ́ búru ẹ́jo phẹ́rẹ́phere,  
 ekpo ọ́ku a-búru òkè-iphe ẹ́phe.
- 7 Ojejoje bú onye  
 doberu ẹ́ka ndoo.  
 Ndu eme iphe vudo  
 nhamunha aduje iya mma.  
 Ndu obu ọ́ruru iphoro;  
 bẹ́ e-mekochaa phụ ifu iya.

## 12

Egvu-ọ́ma, Dévidi deru nù onye ishi egvu; t'e  
 gude olu, ede edede ọ́ya ya

- 1 Nggube Ojejoje;  
 bya agbaa mkpu  
 lẹ́ ndibe ngu gvụakwaru!  
 Ẹ́ to nwehekwa ẹ́ke  
 onye ire-lanụ nọkwadu!
- 2 Onyemonye adzuru ibe iya ẹ́jo-ire.  
 Ẹ́phe egudeje ajaja-njagbu  
 eduphushi ibe ẹ́phe.
- 3 Nggube Ojejoje;  
 menua t'ire nyaru ẹ́phe l'akpo;  
 mbụ́ ndu ono, anọduje

aja ibe ẹphe ajaja-njagbu;  
 mẹ ndu ono, anọduje  
 atụ ọnu onwẹphe ẹge ẹphe ẹ-ta hadu ono.

<sup>4</sup> Mbụ ndu ono, asụje l'ọo  
 iphe dụ ẹphe mma;  
 bẹ ẹphe ekfufe;  
 l'ẹ to nwedu onye  
 a-gbọ-bugheru okfu ye ẹphe l'ọnu.  
 ?Bụ onye a-tụkwanuru  
 ẹphe iphe ẹphe e-kfu?

<sup>5</sup> Obenu lẹ Ojejoje byaru  
 bya eyeeru ẹphe ọnu; sụ:  
 “L'o ruakwaru teke ya  
 a-byakfuta unu;  
 kele ndu ụkpa;  
 bẹ unu kpatashiwaru ẹhu;  
 ndu, nọ lẹ mkpa agụwaru unu aphụ.  
 Nta-a b'o ruwaru teke  
 ya a-dzọ ẹphe ẹge ẹphe ele ẹnya iya.”

<sup>6</sup> Iphe Ojejoje kfuru bụ ọkpobe okfu.  
 Okfu iya ono dụ l'ọ bụ  
 ọkpobe mkpọla-ọcha,  
 a hụru l'ọku-ụzu ugbo ẹsaa  
 t'o gbuchafu egbuchafu.

<sup>7</sup> Ọ bụ nggube Ojejoje;  
 bẹ eche ayi;  
 bụru nggu anọduje eletaje  
 ayi mkpụrumkpuru  
 tẹ ẹka ndu akirishi be ru ayi l'ẹhu.

<sup>8</sup> Ndu akirishi chikowa  
 ẹkemeke ọbule tụa;  
 iphe ndiphe gharu ifu abụwaru ẹjo iphe.

**13**

Egvu, Dévidi deru nụ onye ishi egvu

- <sup>1</sup> Nggụbe Ojejoje;  
     ?bụ jeye teke ole;  
     b'ii-zahabeta mu ẹge-a,  
     ii-zaharu mu-a?  
     ?Ii-zahawa mu rụ jeye ịe tutu yoyo ọo?  
     ?Bụ jeye teke ole;  
     be ịi-ghaberu mu azụ?
- <sup>2</sup> ?Bụ jeye teke ole;  
     be mu a-takpoo nshi tabebe?  
     ?Bụ jeye teke ole be  
     nggumaphu a-lufu mu  
     l'okpoma: eswe l'enyashi?  
     ?Bụ jeye teke ole;  
     be ndu ohogu a-tu-bebe  
     okokooko kpua mu?
- <sup>3</sup> Lenua mu enya; nggụbe  
     Ojejoje, bu Nchileke mu; yeeru mu onu!  
     Menua te mu phu uto;  
     e menyaa; mu nwuhu!
- <sup>4</sup> Ndu ohogu mu a-sukwa  
     l'ephe mekputawaru mu;  
     ndu mu du ashi etee eswa le mu daru.
- <sup>5</sup> Obenu l'o bu n-yemobu ngu;  
     be mu atu ume atukobe.  
     Mu ete eswa; kele mu maru l'ii-dzofuta mu.
- <sup>6</sup> Mu a-gu egvu nu Ojejoje;  
     ke l'o menukaru mu  
     iphe-oma.

**14**

Egvu, Dévidi deru nụ onye ishi egvu

- 1 Ndu eswe anọduje ari ọ ọ Nchileke ta anọdu.  
 Ọphe mebyishiwari  
 onwephe; mewaa iphe  
 Nchileke kpọru ashị.  
 Ọ tọ dudu m'ọo onye lanu, eme iphe du mma.
- 2 Ojejoje shi l'imigwe l'ele  
 ndiphe enya ọ ọ mgboko-a;  
 te ya maru;  
 ọo nweru onye maru iphe?  
 Mbụ t'ọ maru;  
 ọo nweru onye achọ yẹbe Nchileke?
- 3 Obenu l'ephe l'ephe ha  
 tukowaru haa ọzo; jephuhu.  
 Ọphe l'ephe ha tukowa mebyishihu.  
 Ọ tọ dudu m'ọo onye lanu,  
 eme iphe du mma.\*
- 4 Ndu ono, anọduje eme  
 ejo iphe ono; ọephe te  
 nwedu egomunggo tọo.  
 Mbụ; ndu ono, anọduje eri  
 ndibe mu l'ọ bu onye eri nri ono;  
 ọephe te ekfujedu anu Ojejoje tọo.
- 5 Ọle e -megee;  
 be egvu e-gude ephe;  
 kele Nchileke nokwaa;  
 swiru ndu doberu eka ndoo.
- 6 Ọobuje; ndu ukpa -chi-gee  
 idzu; unube ndu akirishi akposhia ya.  
 Obenu l'ọ bu l'ime Ojejoje;  
 be ephe agbabaje;  
 zeeru ndu.
- 7 Haa! A sukwanu l'e shi ọ

---

\* 14:3 14:3 Egvu 53:1-6; Róm 3:10-12.

Záyọnu bya adzọfuta ndu Ízurèlu!  
 Jékọpu e-tekwa ẹswa;  
 ẹhu atsoo ndu Ízurèlu ẹna;  
 mẹ Ojejoje dobephu ndu  
 nk'iya azu l'ọnodu ẹphe.

## 15

Egvu-ọma, Dévidi deru

- 1 Nggube Ojejoje;  
 ?bu onye e-buru l'ulo-ékwà ngu?  
 ?Bukwanu onye du idagha  
 e-buru l'ugvu ngu, du nsọ?
- 2 O bu onye ẹ-te nwedu ẹke  
 aata iya uta;  
 onye bulephu iphe  
 vudo nhamunha;  
 b'o meje;  
 mbu onye ire-lanu;
- 3 onye ẹ-te ekfujeduru  
 ibe iya okfu-azu;  
 too meje ibe iya iphe du eji;  
 ọphu ookfubyishidu ibe iya ekfubyishi.
- 4 Onye akpoje ndu,  
 du Nchileke eji ashị.  
 Obenu le ndu atsu  
 Nchileke egvu;  
 be okwabeje ugvu;  
 onye abuje;  
 o -ribua le ya e-me iphe;  
 yo mee ya; m'o -ruhuru;  
 o buru l'ọo-tabuta iya anu.
- 5 Onye bu; o -jee madzu ugwo;  
 too ledu ẹnya ọ-muru-nwa;



ọphu ọonadu ẹka-azu  
 t'e gude kpaphua onye  
 ẹ-te nwedu iphe o meru.  
 Onye eme ege ono;  
 b'ẹ to nwedu l'e nwuribe iya  
 enwuribe gbururu jeyewaru.

## 16

Egvu-ọma, Dévidi deru

- <sup>1</sup> Gbochita mu nggube Nchileke;  
 kele mu gbabawaru ngu l'ẹka te mu zeeru  
 ndzu.
- <sup>2</sup> Mu suru Ojejoje l'ọo ya bu Nnajiufu nke mu.  
 Iphe bu iphe du mma,  
 mu nweru bu Ojejoje b'o shi l'ẹka.
- <sup>3</sup> A bya le ndu duru Nchileke nsọ, bu l'alì-a;  
 ọo ẹphe bu ndu du ugvu;  
 buru ẹphe kagee mu ọduta mma l'obu.
- <sup>4</sup> Ndu, suru l'ọ bu iphe aagwa  
 agwagwa bu Nchileke ẹphe;  
 be iphe-ẹhuka ẹphe  
 a-nọdukwa aka nshinu eje ejeje.  
 Mee anu, shi mu l'ẹka  
 te erudu agwa ẹphe ono l'ọnu.  
 T'o nwe le mu egude  
 ọnu mu ọwaa kpọ-ku agwa ẹphe ọbu.
- <sup>5</sup> Ọ bu Ojejoje bu ọkè-iphe mu;  
 bya aburu iya buwa mu mkpakọ-lìtoli;  
 mbu l'ọo nggube Ojejoje;  
 be iphe mu a-buru nọ l'ẹka.
- <sup>6</sup> Iphe e ketaru mu dukpoo  
 mma nshinu;  
 mbu l'ọkè-iphe nke mu du ọkpobe mma.

- 7 Mu a-nọduje etu Ojejoje ẹpha;  
mbu onye akpọ-zijeru mu ọzo.  
Oobujeru; o -be l'enyashi;  
obu mu ezilahaa mu iphe.
- 8 Mu anọdujelephu ari ke Ojejoje tekenteke.  
Tekenteke b'ọ nọ mu  
l'eka-utara;  
k'ophu ẹ te enwubatadu mu enwubata.
- 9 O bu iphe ono meru iphe ẹhu  
anọduje atso mu ẹna.  
Mu ete ẹswa l'ime obu;  
ke l'ẹ t'o nwedu iphe emebata mu nu.
- 10 Ishi iya aburu le mu mawaru  
l'ẹ tii hadu mu l'ali-maa;  
l'ẹ tii hadu onye nke ngu,  
du nsọ t'o rehu erehu.
- 11 Obenu l'i koshichiaru mu  
uzo ndzu.  
L'ifu ngu, mu anọduje  
tekenteke emeje t'ẹhu atso mu ẹna.  
Anono, mu anọduje  
l'eka-utara ngu e-me t'ẹhu  
tsọ mu ẹna jeye le tutu yoyo.

## 17

Ekfufu, Dévidi kfuru nu Nchileke

- 1 Nggube Ojejoje; ngabe nchi!  
Nuaru olu, mube onye doberu ẹka ndoo!  
Gebe nchi nua mkpu,  
mu echiku ngu!  
Gebe nchi nua ekfufu, mu ekfu anu ngu;  
ke l'ẹ t'ọ budu ejo-ire;  
be mu adzuru ngu.

- <sup>2</sup> Byiko; byaru bya ahaaru mu enge!  
 Byaru bya elee ya ẹnya;  
 maru onye iswi dụ mma!
- <sup>3</sup> Ọ -buru l'i nyocharu mu obu;  
 lelee mu l'enyashi;  
 mbụ; ọ -buru l'ị -bya  
 egbua mu igo ọkpobe egbugbu;  
 b'ẹ to nwekwa iphe dụ ẹji,  
 ị phụ mu l'ẹhu;  
 kele mu kfuwaru iya kepyia ya akụ;  
 l'ẹ tọ dudu ejo okfu,  
 e-shi mu l'ọnu lufuta.
- <sup>4</sup> A -bya l'iphe ndiphe emeshi;  
 be mu mekwaruphu iphe i kfuru;  
 buru ụba yeru ndu akirishi.
- <sup>5</sup> Ọ bu ọkpa, ị tọru;  
 be mu etso;  
 ọphu o nwekwanu  
 teke ọkpa chifujewaru mu.
- <sup>6</sup> Iphe mu gude ekfu anụ ngu  
 Nchileke kwaa l'iigebejeru mu nchị.  
 Gebenu nchị; nua olu mu!
- <sup>7</sup> Byiko; menua tẹ mu phụ  
 n-yemobu ngu ono,  
 dụ biribiri ono;  
 nggube onye egudeje  
 ike ngu dzofuta ndu  
 gbabaru ngu l'eka t'ephe zeeru ndzụ; tẹ ndu  
 ọhogu ephe be egbu ephe.
- <sup>8</sup> Dobe nụ mu lẹ mù bu  
 nwandodo-ẹnya ngu;  
 t'ẹnya ngu nọdu l'ẹke mu nọ.  
 Gudenu ẹbà ngu kpuchita mu;

- 9 t'ẹka ndu ejo iya ono;  
 be eru mu l'ẹhu;  
 mbu ndu ọhogu ono, tupheru mu  
 mgburumgburu;  
 l'eme t'ẹphe gbua mu ono.
- 10 Imiko madzụ ta adujedu ẹphe;  
 ẹphe ekfu iphe ka ọnu ẹphe.
- 11 Nta-a abuje; iphe bu ẹke,  
 mu shiru; ẹphe etsoru mu;  
 gbaphee mu mgburumgburu;  
 kwabe t'ẹphe nwutsua mu.
- 12 Ẹphe du l'ọ bu agu,  
 ẹgu guderu;  
 yo kwaberu anu, oo-gbu;  
 mbu l'ọ bu ejo agu,  
 nmakpuru anmakpuru  
 kwaberu iphe e-shita iya ifu.
- 13 Gbeshinu nggube Ojejoje;  
 fuaru ẹphe; mekputa ẹphe;  
 nggu egude ogu-mbeke ngu  
 dzofuta mu l'ẹka ndu akirishi ono!
- 14 Gudenu ike nke ngu dzo  
 mu l'ẹka ndu ono;  
 mbu l'ẹka ndu ono,  
 bu iphe ke mgboko-a bu mkpa ẹphe ono;  
 mbu ndu ono, i nuru ẹku;  
 nu iya ẹphe k'anyinyi;  
 k'ophu unwu ẹphe;  
 me unwunwa ẹphe e-nwe;  
 nwee k'etsutsu iya.
- 15 Obenu le mbedua e-gude  
 kele mu doberu ẹka ndoo phu ngu ifu.  
 Mu -tehulephu;

bẹ ẹhu a-tso mu ẹna;  
kele mu a-phu ẹge i gbaru.

## 18

Egву, Dévidi, bu nwozi Ojejoje deru nu onye ishi egву

Egву-wa b'ọ guru gude kele Ojejoje mboku, Ojejoje nafutaru iya l'eka ndu ohogu iya l'ephe ha; o swikposhia ke Solu

<sup>1</sup> Mu yeru ngu obu Ojejoje.

Ọ bu nggu bu ike mu.

<sup>2</sup> Ọ bu nggu bu agbara mkpuma mu;

buru nggu bu

a-gbabe-a-dzuru nke mu;

bukwaru ngu phu anafutaje mu.

Ọ bu nggu bu oke mkpuma,

mu agbabaje je edomia onwomu.

Ọ bu nggu egbochitaje mu

t'e b'ọ du iphe e-me mu nu;

buru nggu egbochitaje mu;

buru nggu egudeje ike ngu dzoo mu.

Ọ bu nggu bu ulo, shihuru ike,

mu agbabaje; zeeru ndzu.

<sup>3</sup> Ọ bu Ojejoje, bu onye gbaru

t'aajaje iya ajaja be mu arakuje;

yo bya adzofuta mu l'eka ndu ohogu mu.

<sup>4</sup> Onwu yewaru mu eri l'ekpiri.

Ọ-la-l'iyi atso-kputawa mu l'ọ bu utso.

<sup>5</sup> Ali-maa yewaru mu eri l'ekpiri.

Anwuhu agbabewa onya kwaberu mu.

<sup>6</sup> Teke mu eje iphe-ehuka;

be mu rakuru Ojejoje.

- Mu rakuru Nchileke mu t'ọ gbaaru mu mkpu.  
 Yo shi l'eze-ulo iya nua olu mu.  
 Mkpu, mu chiru chiku iya ruru iya le nchi.
- 7 Tọ du iya bu; iphe bu  
 mgboko etehu kfukakfuka;  
 nmakota jijiji.  
 Iphe bu okpa ugvu etekota kpakpakpa;  
 kele Nchileke;  
 be ehu eghu eghughu.
- 8 Enwuru-oku eshi iya l'imi l'akpo ke tututu.  
 Oku, shi iya l'onu l'enwu phophopho.  
 Icheku-oku, shi iya nu  
 atalephu kfukfukfu.
- 9 Yọ dojaa akpamigwe  
 parakatangu; gbazita.  
 Urukpu, gbahuru ke  
 tsabalangu anodu iya le mkpuli okpa.
- 10 Yọ nodu l'eli cherobimu; phefu.  
 Yọ buru l'eswi pherephere b'o degeru l'ephe.
- 11 Yo gude ekpuru-ochi kpuchia onwiya;  
 mbu l'urukpu, mini jiru ejiji  
 no-pheru iya mgburumburu.
- 12 Urukpu; me aka-mini;  
 me icheku-oku, ata kfukfukfu  
 eshi l'o-gbu-nwii-nwii ya awushi.
- 13 Ya ndono;  
 Ojejoje anodu l'imigwe gbaa egbe-igwe;  
 a nua olu onye ono,  
 bu Okaribe-Kakota-Nu ono;  
 bya aphua aka-mini;  
 me icheku-oku, ata kfukfukfu.
- 14 O gbaru akfu iya;

- gude chikashia ndu ọhogu iya.  
 Yo kua ebemu-igwe, ekua ke meremu;  
 ephe eze ọso; gbalashia.
- 15 Nggube Ojejoje azua ume;  
 baaru ndu ọhogu ngu mba.  
 Eze Enyimu ekekahu ebo;  
 a phukota akpakparama ali iya;  
 ntọ-l'ali mgboko adaburu ebedere-badara.
- 16 Ojejoje shi l'imigwe tufu eka  
 zu mu gbirimu; gufuta mu l'ebo mini.
- 17 O dzofutakwaru mu phu  
 l'eka oke ọhogu mu;  
 me l'eka iphe bu ndu mu du  
 ashị, kariru mu eka.
- 18 Ephe tsoru mu okfu teke ono,  
 umuruku muru mu ono.  
 Obenu l'ọo Ojejoje buru mu agbarike.
- 19 O dufutaru mu; dobe mu  
 l'eke ehu a-du mu agu.  
 O yeru mu eka dzofuta mu l'ogu;  
 kele mu no iya l'obu.
- 20 Ojejoje buru mu nggo;  
 kele mu bu onye doberu eka ndoo;  
 O buru mu nggo;  
 ke l'e to nwedu eke, mu yesweru eka.
- 21 Ke l'ọ bulephu uto,  
 Ojejoje toru; be mu etso.  
 Mu ta aghabuaru Nchileke azu.
- 22 Ekemu Ojejoje;  
 be mu elezitaje enya l'ọ ha;  
 mu ta ajikabua ome iphe o suru t'e mee.
- 23 E to nwedu eke uta no mu l'ehu l'ifu iya.  
 Mu sefukotaru eka mu l'iphe du eji.

- 24 Ojejoje buru mu nggo;  
 kele mu bu onye doberu eka ndoo.  
 O buru mu nggo;  
 ke l'e to nwedu eke,  
 mu yesweru eka l'eke oono.
- 25 Ndu yeru ngu obu;  
 be iikoshije l'i yeru epe obu.  
 Ndu uta e-ta duduru;  
 b'e tii mejedu iphe aa-ta  
 nggube Ojejoje uta.
- 26 Ndu obu epe guru iphoro;  
 be iidobejeru obu iphoro.  
 Obenu le ndu ugho;  
 be iinuje aphu.
- 27 Ndu wozitaru onwephe ali; be idzofutaje.  
 Obenu le ndu eku onwephe  
 ege epe e-ta hadu;  
 be iiwozitaje ali.
- 28 O bu nggube Ojejoje eyejeru  
 mu oku l'uroku mu.  
 Iimeje te iphoro noduru mu l'eke ochi gbaru.
- 29 O bu l'ike nke ngu;  
 be mu e-gude mekputa  
 igwe-oha ndu soja;  
 buru ike nke ngu;  
 be mu e-gude nyia upho-mkpuma  
 mkpukpu;  
 je anaa mkpukpu obu.
- 30 Nnajiufu; uzo ngu du-kota mma.  
 Okfu ngu te nwedu ntupo.  
 Oogbobutaje ndu gbabaru  
 l'ime ngu je anodu ezeru ndzu.
- 31 ?Bu onye ole odo bu



- Nchileke, nọnu; a gụfu Ojejoje?  
 ?Bụ onye ole ọdo bụ  
 Eze Oke Mkpuma;  
 gbahaa Nchileke ayi?
- 32 Ọ bụ Nchileke emeje tẹ ike dụ mu;  
 bụru iya emeje t'uzo mu;  
 be enwe ntụpo.
- 33 Oomeje; mu akfụ  
 bugengu-bugengu l'ọ bụ mgbada.  
 Mbụ l'oomeje tẹ mu  
 vudoshia ike l'eli ugву.
- 34 Ọozuje mu; mu amaru ẹge aaluje ọgu;  
 k'ophu bụ m'o -ruhuru;  
 ọ bụru akfụ igwe;  
 mu adulee ike gbaa ya.
- 35 Ọ bụ nggube Ojejoje  
 egbochitaje mu;  
 shi ẹge ono adzo mu.  
 Yọ bụru ike ngu;  
 bẹ iigudeje gudeshia mu.  
 Ẹka, iiyeru mu emeje;  
 tẹ mu bụru eze madzụ.
- 36 Iimeje ụzo mu t'ọ ha ụsa; tẹ ọkpa be echifu  
 mu.
- 37 Mu chiru ndu ọhogu mu; gude.  
 Mu ta tsuladu azụ; jeye  
 ẹphe aburu kpurupyata.
- 38 Mu gweru ẹphe rakaraka;  
 k'ophu bụ l'ẹphe te egbeshihedu ọdo.  
 Ẹphe adashia;  
 wushiru mu l'iku ọkpa.
- 39 Ọ bụ ike ngu;  
 bẹ mu gude je ọgu.

- Nngu emee ndu ọhogu mu;  
 t'ishi rua ẹphe aḷi l'ifu mu.  
 40 Ndu ọhogu mu b'i meru;  
 ẹphe eche ọkpa l'ọso; gbaphu azu.  
 Ndu, mu du ashi b'i meru; mu egbushikota.  
 41 Ẹphe chiru mkpu;  
 to nwe onye gbaru ẹphe mkpu.  
 Ẹphe araku Ojejoje;  
 t'o yeru ẹphe ọnu.  
 42 Mu gweru ẹphe ogwe ujimu;  
 mee ẹphe t'ẹphe du l'ọ bu udzu-ẹja,  
 pherephere ephekashi.  
 Mu wushiru ẹphe l'ọ bu ẹpoto l'esu-uzo.  
 43 I nafutaru mu l'ẹka ndu etso mu ọgu;  
 bya emee mu;  
 mu aburu ishi iphe bu mbakeshi;  
 k'ọphu bu le ndu, mu te  
 shidu maru;  
 byaru bya anodu mu l'ẹka.  
 44 Ẹphe -nua l'owaa iphe mu suru t'e mee;  
 ẹphe eeme ya ẹgwegwa.  
 Iphe bu ndu, shi eshishi efozikotajeru mu.  
 45 Meji atofukota iphe bu ndu  
 ono, shi eshishi ono;  
 ẹphe eshi l'ẹke ẹphe nogbaa l'ezeru ndzu;  
 furu kwekwekwe byakfuta mu.  
 46 Ojejoje nokwa ndzu;  
 te ajaja buru ke oke mkpuma mu ono!  
 T'e kutsee Nchileke, bu onye adzofutaje mu nu!  
 47 O bu Nchileke ejeje ogwata  
 ugwo iphe ndu ọhogu mu meru mu.  
 O meru unwu eliphe;  
 ẹphe anodu mu l'ẹka.

- 48 Ọnafutaje mu l'ẹka ndu ọhogu mu;  
mbụ wolia mu eli;  
woghaa ndu ọhogu mu.  
Ọnafutaje mu l'ẹka ndu iphe-kpaa.
- 49 Ọo ya meru iphe mu e-vudo  
l'edzudzu iphe, bụ  
mbakeshi jaa Ojejoje ajaja.  
Mu e-gude egvu jaa ya.
- 50 Onye ọ ọtaru t'ọ bụru eze;  
bẹ oomeje t'ọ lụ-gbua l'ọgu.  
N-yemobu iya bẹ ọonoduje  
ekoshi onye ọ wụru manụ l'ishi; mbụ Dévidi;  
mẹkpo iphe bụ eri iya jeye lẹ tutu yoyo.

## 19

Egvu-ọma, Dévidi deru nụ onye ishi egvu

- 1 Igwe l'ọ ha bẹ atụ ọnu  
ọdu-biribiri Nchileke.  
Akpamigwe ekoshi  
ẹge oometabe nka.
- 2 Iphe bụ mbọku, mụtaru  
amuta anọduje atụ ọnu iya.  
Iphe bụ ẹnyasi, sweru  
esweswe eme t'a kabaa ya amaru.
- 3 Ẹ taa nudu ẹphe olu;  
taa nụ iphe ẹphe ekfu.
- 4 Obenu l'olu ẹphe tuko eliphe ngaa.  
Ozi, ẹphe ezi atuko mgboko dzuru.  
Ọ bụ Nchileke meru ọlo  
doberu ẹnyanwu l'imigwe.
- 5 Ẹnyanwu eshije l'ọlo iya  
kpufuta l'ọ bụ nwoke,  
luru nwanyi k'ophungu.

- Ẹhu anọduje atso iya l'ọ bu  
 mkparawa, eje ọma ọso.
- 6 Ọowafutaje l'akpamigwe ishi lanu;  
 yo jee jeye l'ishi iya ọphu.  
 To nwe iphe a-su le ya  
 no l'ẹke okpomoku iya te erudu iya ẹhu.
- 7 Ekemu Ojejoje dukota mma;  
 oomeje te obu shihu madzu ike.  
 Nso, Ojejoje doberu  
 ta angajedu anganga.  
 Oomeje te onye mmamiphe pehuru maru  
 iphe.
- 8 Iphe Ojejoje toru okpa iya kfu ru akfu ru.  
 Oomeje t'obu atso madzu ena.  
 Ekemu Ojejoje; be ekworo ta anodu.  
 Oomeje t'enya rua madzu ali.
- 9 Ọ du mma t'a tsuje Ojejoje egvu;  
 ke l'oo-dugburu ege ono tugburu.  
 Iphe Ojejoje turu l'iwu;  
 b'e ta atungadu atunga.  
 Ọonguru anguru.
- 10 Ọ ka mkpola-ododo ore ire;  
 mbu okpobe  
 mkpola-ododo;  
 ka manu-engu otso ena;  
 mbu manu-engu,  
 shi l'ebaku-engu.
- 11 Ọonoduje alo mube  
 nwozi ngu aka le nchi.  
 Obunggo bu ke onye eme iphe o kfu ru.
- 12 Ọlobu; ?bu onye amaje teke ya eme eji?  
 Byiko; safukwa mu ejo iphe,  
 mu meru l'amaga ama.

- 13 Yetaru mube nwozi ngu ẹka;  
 tẹ mu ba akwabẹ ẹnya mee ẹjo iphe.  
 Be ekwekwa t'ẹjo iphe kpua mu lẹ ndzu;  
 k'ophu uta ẹ-ta dudu mu;  
 a haaru mu enge; l'ẹka mu ta dudu lẹ njo.
- 14 Tẹ okfu, shi mu l'onu;  
 mẹ iphe mu ari l'obu mu  
 dujekwa ngu mma;  
 ke l'ọ bu nggu bu oke mkpuma mu;  
 buru nggu bu onye agbafutaje mu nu.

## 20

Egvu-oma, Dévidi deru nu onye ishi egvu

- 1 Tẹ Ojejoje zakwaa ngu oku  
 teke iphe-ẹhuka byaru ngu!  
 Tẹ Nchileke ke Jékọpu  
 byiko gbochitajekwa ngu!
- 2 T'o shikwa l'ulo iya,  
 du nsọ bya agbaaru ngu mkpu!  
 T'o shikwa lẹ Záyonu  
 bya bya eyetaru ngu ẹka!
- 3 T'ọ nyatakwa iphemiphe obule,  
 i sweru ẹnya nu iya!  
 T'ọ natakwa ngweja-ukfuru,  
 i gworu nu iya!
- 4 T'ọ nukwa ngu iphe bu uche ngu!  
 Yo mekwaaphu t'iphe  
 i tuberu buru upete!
- 5 Ayi a-tu uzu;  
 ẹhu atsọ ayi ẹn teke ayi  
 nuleruphu l'i mekputawaru.  
 Ayi achiliaru Nchileke ayi ẹkwa-ọhubama.  
 Tẹ Ojejoje mekwaaru ngu

- iphe bu iphe i roru iya!  
<sup>6</sup> Nta-a; be mu mawaru le  
 Ojejoje dzofutawaru onye nk'iya,  
 a wuru manu l'ishi.  
 Ooshije l'imigwe ono,  
 du nsọ ono za iya oku.  
 O bu ike iya;  
 be oogudeje mee te ẹka  
 onye eze ono kangoo.
- <sup>7</sup> O nweru ndu achijeru  
 ukfu kwee l'ugbo-inya.  
 Nweru ndu ophu  
 akpojeru obu ye l'inya-ogu ephe.  
 Obenu l'ayibedua bu epha  
 Ojejoje, bu Nchileke ayi be ayi dakoberu.
- <sup>8</sup> Ephe e-vukota iphe dashia.  
 Obenu l'ayibedua e-gbeshi; vudoshia ike.
- <sup>9</sup> Nggube Ojejoje;  
 menua te ẹka onye eze ayi kangoo!  
 Nggu anujee olu ayi teke ayi rakuru ngu!

## 21

Egvu-ọma, Dévidi deru nu onye ishi egvu

- <sup>1</sup> Agburu-ẹhu nggube Ojejoje;  
 be mewaru te ẹhu atso eze ẹna;  
 ke l'agburu-ẹhu ngu ha nshinu.  
 Lewaru egbe eswa, oote l'i meru;  
 yo lu-gbua l'ogu!
- <sup>2</sup> I meru iya iphe no iya l'obu;  
 ophu o nwedu iphe  
 o gude onu su ti meru iya,  
 e ti meduru iya.
- <sup>3</sup> I gude iphe-ọma, nyiberu

- anyibe bya iya ndzuta;  
 bya eworu okpu-eze,  
 e gude ọkpobe  
 mkpọla-ododo mee kpube iya.
- 4 Ọ rọru ngu ndzụ;  
 nggu anụ iya ẹya;  
 mee tẹ ndzụ iya buru ojejoje.
- 5 Emekputa ono, i meru;  
 yo mekputa ono;  
 meru; aakwabe iya ugvu, ha nshinu.  
 I meru iya; yọ dọ biribiri;  
 l'egbu nwiiinwii.
- 6 Mbụ l'ị gowaru iya onu ojejoje;  
 mekwaaphu t'ehu tsoje iya ẹna;  
 ke l'ị nọ swiru iya.
- 7 Keshinu ọphu eze dakoberu Ojejoje;  
 Ọkaribe-Kakọta-Nụ  
 eyeru iya obu;  
 b'ẹ te enwubatakwa iya enwubata.
- 8 Ẹka ngu a-kparua ndu ọhogu ngu l'ẹphe ha.  
 Ndu ị dọ ashị; be ii-gude ike ngu zua kfuu.
- 9 Teke ii-me t'a phụ ngu;  
 be ii-hụ ẹphe l'ọku, enwu phophopho.  
 Ojejoje a-tụ-koshi ẹphe oke ẹhu-eghughu  
 iya;  
 gude ọku dzupuyashikota ẹphe.
- 10 Ii-me tẹ ọkpu ẹphe kpọhu l'iphe;  
 kpọhu lẹ maa; mee t'awa  
 ẹphe chihu lẹ mgboko.
- 11 Ọ -buru l'ẹphe chiru ngu ẹjo idzu;  
 m'ọ -bụ riaru ngu ẹjo ọriri;  
 b'ẹ to nwedu ọphu ere nụ.
- 12 Ke l'ii-me t'ẹphe ye ọkpa l'oso;

m'i setalephu akfụ ngu t'ị gbaa ẹphe.

- 13 Nggube Ojejoje;  
 t'a jaa ngu ajaja;  
 ke l'agburu-ẹhu ngu paru ẹka.  
 Ayibedua a-nọdu agu egvu;  
 l'etu ngu ẹpha l'ike ha ngu nshinu.

## 22

Egvu-ọma, Dévidi deru nụ onye ishi egvu; t'e gude olu egvu "Ele Nchi-abọhu" gụa ya

- 1 Nchileke mu! Nchileke mu!  
 ?Bụ ngunu meru iphe  
 ị haru mu nkinyi mu?  
 ?Bụ ngunu meru iphe  
 ị haru mu adzọfuta  
 je anọdu mu ote-ẹnya.  
 Nggụ eje anọdu l'ẹke ude,  
 mu atsụ te erudu ngu nchi.
- 2 Nggube Nchileke mu;  
 eswe l'enyashi be mu  
 anọduje araku ngu;  
 tịi yeru mu onu.  
 ?Obekwanu le mu te  
 edobedu onu ndoo.
- 3 Obenu l'ị bu Nchileke,  
 du nsọ ẹge ị bu iya;  
 mbụ onye eze ndu Ízurẹlu  
 anọduje aja ajaja.
- 4 O bu nggu;  
 be nna ayi phe dakoberu.  
 Ẹphe dakoberu ngu;  
 nggu adzọfuta ẹphe.
- 5 Ẹphe rakuru ngu;



- nggu adzoo ephe.  
 Ephe adakobe ngu;  
 t'i kpu ephe ifu le ntụ.
- 6 Obenu le mbedua  
 bu mbashiride;  
 mu ta budu madzu.  
 Mu bu onye unwu  
 eliphe emeje iphe-iphere;  
 onye te nwedu iphe madzu guberu iya.
- 7 Iphe bu onye phuru mu nu  
 anoduje achi mu ochi.  
 Ephe anoduje azuru mu ukwe;  
 l'aja mu ewena; su:
- 8 "Mgbe o suru l'oo Ojejoje;  
 be ya dakoberu;  
 te Ojejoje obu dzofutanu iya!  
 T'o dzofutanu iya;  
 keshinu o suru le ya no Ojejoje l'obu."
- 9 Obenu l'oo nggu kufutaru mu  
 l'epho nne mu;  
 buru nggu meru;  
 mu adakobe ngu;  
 keshinu teke mu angukwaduru era.
- 10 A muru mu; kuru mu ye ngu l'eka.  
 Dubekpooru teke mu no  
 l'epho nne mu bi buhawa Nchileke mu.
- 11 Ba nodukwa mu ote-enya;  
 ke l'iphe-ehuka nokwa mu ntse;  
 ophu o nwedu onye a-gbaru mu mkpu.
- 12 Ndu ohogu no-pheru mu  
 mgburumburu l'o bu  
 igwe oke-eswi.  
 Ephe gbaru mu mgburumburu

- l'ọ bu oke-eswi ndu Báshanu, eme ẹnu.
- 13 Ephe sagbaaru ọnu;  
l'ederu mu ekiri;  
l'ọ bu agụ, ejekfu anụ,  
oo-gbu; taa.
- 14 Nke mu gvụakwaru l'ọ bu  
mini, a wushiru awushi.  
Iphe bu ọkpu, nọ mu l'ẹhu  
sweshihuakwaru.  
Nta-a; bẹ meji tofuakwaru mu.
- 15 Ike gvụawaru mu;  
uvo ta dūhe mu.  
Ire nyawaru mu l'akpo.  
I togbowaru mu l'ẹja tẹ mu nwuhu.
- 16 Nkuta nọ-phewaru mu mgburumgburu.  
Ndu iwe gbaru mu mgburumgburu;  
kpọ-fushia mu ẹka l'ọkpa.
- 17 Nta-a; bẹ nggara agụwa mu ọgu.  
Ndiphe achiru ẹnya  
dzebe l'ele mu phophopho.
- 18 Uwe mu; bẹ ẹphe keru onwẹphe;  
ọphube iphe mu eyeje l'ime ẹhu;  
bẹ ẹphe turu ẹnwa  
t'ẹphe maru onye ọo-laru.\*
- 19 Byiko; nggube Ojejoje;  
ba anọdukwa mu ote ẹnya!  
Nggube mkpakọ ike mu;  
bya nta-a bya agbaaru mu mkpu!
- 20 Dzọfuta ndzụ mu t'ẹ be gude  
ogu-mbeke gbua mu!  
Dzọfutaru mkpakọ iphe ono,

---

\* **22:18** 22:18 Mát 27:35; Mak 15:24; mẹ Jọn 19:24.

- mu nweru ono,  
 bu iya bu ndzu mu;  
 te nkuta ba ata mu!
- 21 Byiko; dzofuta mu l'onu agu;  
 me le mgbaku mpo atsụ.  
 Keshinu i zawarụ mu oku;
- 22 be mu a-ra epha ngu arara  
 t'unwunna mu phe nukota iya.  
 Mu a-nodu l'edzudzu oha jaa ngu ajaja.
- 23 Unube ndu atsụ Ojejoje egvu;  
 unu jaa ya ajaja!  
 Iphe bu l'unu ha buru ndu eri Jekopu;  
 unu kwabeje iya ugvu!  
 Unube ndu ikfu Izurelu l'unu ha;  
 unu bageru iya eja!
- 24 Ke l'onye iphe-ehuka byaru;  
 be to legbujedu l'enya;  
 to gbadojedu iya;  
 ophu o ghajeduru iya azu;  
 onujechia olu,  
 o gude chiku iya.
- 25 Mu a-nodu l'edzudzu oha  
 jaa ngu ajaja ke iphe i meru.  
 Mu a-nodu ndu atsụ ngu egvu l'ifu;  
 mekota iphemiphe obule,  
 mu riburu le mu e-me.
- 26 Ndu ukpa be e-riji epho.  
 Ndu achọ Ojejoje a-ja iya ajaja.  
 "Te ndzu unu bukwaru ojejoje."
- 27 Unwu eliphe l'ephe ha  
 e-mekochaa nyata iphe meru nu;  
 ghakobe lakfuta Ojejoje.  
 Mbu l'iphe bu ikfu,

- nọ l'iphe bụ mbakeshi  
 e-mekochaa bya ebyiaru iya ikpere l'alị.  
 28 Kẹ l'iphe bụ alị-eze ndiphe  
 l'ọ ha bụkota kẹ Ojejoje;  
 bụru iya achikota iphe bụ mbakeshi.  
 29 Iphe bụ ndu nweru iphe  
 lẹ mgboko-a e-mekochaa baaru iya phụ ẹja.  
 Iphe bụ madzụ  
 nwigbaleke-oma, bụ ndu  
 e-mekochaa nwuhu anwuhu  
 e-byishiru iya ikpere.  
 30 Ogbọ, nọ l'ifu e-jeru iya ozi.  
 Ogbọ, a-bya nụ; bẹ aa-kọru kẹ Nnajiufu.  
 31 Aa-raru iya ndu ẹ ta mụdua amumu:  
 lẹ Nnajiufu bụ onye doberu ẹka ndoo.  
 Oo yẹbedua tuko iphe ono l'ọ ha mekota.

## 23

Egvu-oma, Dévidi deru

- 1 Ojejoje bụ iya eche mu;  
 l'ọ bụ onye eche aturu.  
 E t'o nwedu iphe  
 ụko iya bya aduru mu.  
 2 Oomeje tẹ mu zẹ-zita;  
 tuta ume l'ẹke iru ẹwu nọ.  
 Oodujeru mu je l'iku mini,  
 ẹ ta chidu oku nshinu.  
 3 Oomeje t'obu rua mu alị.  
 Yọ bụru ụzo kẹ  
 odobe-ẹka-ndoo;  
 bẹ oodujeru mu shia l'ògvù ẹpha iya.  
 4 E t'o nwedu; m'o -ruhuru;  
 ọ bụru lẹ nsuda, gbaru

tsukiribangu; bẹ mu eshi;  
 b'ẹ to nwedu iphe mu atsu egvu iya;  
 kẹ l'ị nọ swiru mu eswiru.  
 Mgboro ngu;  
 mẹ oshi-mpaleka ngu  
 anọduje adu mu ike.

<sup>5</sup> Iigwoshijeru mu nri  
 l'ifu ndu mu du ashi.  
 Iiteje mu manu l'ishi.  
 Okoro mu; bẹ iimeje;  
 yo ji ejiji;  
 l'awushihu awushihu.

<sup>6</sup> Ọ bulephu k'oma;  
 mẹ n-yemobu Ojejoje  
 a-nọdu etso mu  
 jeye teke mu a-nọ-bebe.  
 Mu eburu l'ulo Ojejoje  
 jeye lẹ tutu yoyo.

## 24

Egvu-oma, Dévidi deru

<sup>1</sup> Mgboko; mẹ iphe, bu iphe,  
 nọ iya nọ bu kẹ Ojejoje;  
 mbu mgboko;  
 mewaru ndu, bu iya nọ;

<sup>2</sup> kẹ l'ọ bu l'eli eze ẹnymu;  
 b'ọ toru okpa iya;  
 bya emekwaa ya phu  
 t'o shihu ike l'eli ẹnymu ime-ali.

<sup>3</sup> ?Bu onye a-du ike nyihu ugvu Ojejoje?  
 ?Bu onye a-du ike vudo  
 l'ẹke o doberu nsọ?

<sup>4</sup> Ọ bu onye doberu ẹka ndoo;

obu agwa ya iphoro;  
 onye ẹ-te woduru obu  
 ziberu iphe ẹ ta buda ire-lanu;  
 too gudeje ugho agu enwa.

- 5 Onye ono;  
 be Ojejoje a-goru onu.  
 Nchileke ono, bu onye  
 adzoje iya nu ono  
 ahaaru iya enge.
- 6 O bu ege ono; be ephe aduje;  
 mbu ogbo ophu l'achọ ngu nu;  
 mbu ndu achọ t'ephe phu  
 ifu nggube Nchileke ke Jekopu.
- 7 Unu guhaa ogu-nggamgbo ono t'o gheru onu!  
 Unu guhashia ibo ndiche ono;  
 k'ophu eze ono,  
 du biribiri ono a-bata.
- 8 ?Bu onye bu eze ono,  
 du biribiri ono?  
 O bu Ojejoje ono,  
 bu onye ha nshinu;  
 nweru agburu-ehu;  
 mbu Ojejoje ono,  
 bu onye ejeje ogu lu-gbua.
- 9 Unu guhaa ogu-nggamgbo ono t'o gheru onu!  
 Unu guhashia ibo ndiche ono;  
 k'ophu eze ono,  
 du biribiri ono a-bata.
- 10 ?Bu onye bu eze ono,  
 du biribiri ono?  
 O bu Ojejoje,  
 bu Okaribe-Kakota-Ike.  
 O bu iya bu eze ono, du biribiri ono.

## 25

Egvu, Dévidi deru

- 1 Ọ bụ nggùbe Ojejoje;  
bẹ mu gude obu mu ekfu anụ;
- 2 bụru nggùbe Nchileke mu;  
bẹ mu dakoberu.  
Be kwekwa t'e kpua mu ifu ọ ntu.  
Ọphu i kwekwa ọ ndu  
ọhogu mu ọtu okoo kpua mu.
- 3 Ẹ tii kwekwa t'e kpua ya ifu ọ ntu;  
mbụ onye ọnya iya nọ l'ẹke ị nọ.  
Ọ bụ; mekwaa t'ifu kpua ẹphe ọ ntu;  
mbụ ndu ekwefuru ngu íkè.
- 4 Byiko; Ojejoje;  
koshi nụ mu ọzo ngu;  
menea t'ọzo ngu doo mu ọnya!
- 5 Dunua mu ọ mu meje ọkpobe okfu ngu;  
nggu ezia mu iphe l'onwongu;  
kẹ l'ọ bụ nggu bụ Nchileke, adzoje mu nụ;  
bụru l'ẹke ị nọ;  
bẹ ọnya mu anoje: eswe l'enyashi.
- 6 Nggùbe Ojejoje;  
nyatakwa obu-imiko ngu;  
mẹ n-yemobu ngu;  
bụ ọphu shi ngu l'ede-nwede.
- 7 Ba anyatakwa iphe dụ ẹji,  
mu meshiru l'okoro bya;  
ọphu ị nyatakwa íkè,  
mu shi kwefuru ngu.  
Gude kẹ l'i yeru mu obu nyata mu;  
kẹ l'ị dụ mma;  
nggùbe Ojejoje.
- 8 Ojejoje dụ mma;

- ọburu onye obu ọuru iphoro.  
 Ọ bu iya meru iphe  
 ọonoduje akpo-ziru  
 ndu ejo iya ono ọzo ke yebe Ojejoje.
- 9 Ndu wozitaru onwephe ali  
 l'ifu Nchileke;  
 be ọonoduje edu t'ephe mee iphe du mma;  
 Ọonodujekwaphu ezi ephe ọzo iya.
- 10 Ndu eme iphe no l'ogba-ndzu Ojejoje;  
 l'eme iphe o suru t'e meje;  
 be Ojejoje ekoshije le ya yeru obu;  
 buru o-me-g'o-kfuru.
- 11 Iphe du eji, mu meshiru ha nshinu;  
 olobu; Ojejoje;  
 gudenu okfu k'epha ngu ọuru mu nvu.
- 12 ?Bu onye bu onye atsu Ojejoje egvu?  
 Ọ bu onye ono;  
 be ọo-kpo-ziru ọzo,  
 gbaru iya l'eshishi.
- 13 Onye ono be iphe a-ndu aduru le mma;  
 yo buru eri iya e-nweru ali ono.
- 14 Ndu Ojejoje kporu obu yeru  
 bu ndu atsu iya egvu.  
 Yo buru ndu ono;  
 be oomeje t'ephe maru ndzu,  
 ephe l'iya gbaru.
- 15 Ọ bu eke Ojejoje no;  
 be mu edobeje enya;  
 ke l'o bu iya nwenkinyi iya  
 bu onye a-du ike hafuta mu l'onya.
- 16 Ghanuru mu ifu;  
 nggu aghuru mu imiko;  
 kele mu no nkinyi;



- iphe aduru mu ẹhuka.
- 17 Iphe byaru mu nu hakwa l'igwe.  
Dzonua mu l'iphe-ẹhuka, mu eje!
- 18 Lenua ẹnya l'egbe  
iphe-ẹhuka, byaru mu nu  
yele ẹjo onodu, mu no;  
guaru mu nvu l'iphe du ẹji mu l'o ha!
- 19 Lewaru ẹge ndu ohogu mu habe igwe!  
Nngu aphwaru ẹge mu dutabe ẹphe ashì!
- 20 Chejenu mu nche;  
nggu adzo mu;  
t'e b'e kpu mu ifu le ntụ;  
ke l'o bu l'ime ngu;  
be mu no;  
ezeru ndzu.
- 21 Te iphe a-nodu adzo mu nu  
buru kele mu bu onye,  
uta e-ta duduru;  
onye obu guru iphoro;  
ke l'o bu l'ẹke i no;  
be ẹnya mu no.
- 22 Nngube Nchileke;  
gbafutanu ndu Izurelu  
l'iphe-ẹhuka ẹphe l'o ha!

## 26

Egvu, Dévidi deru

- 1 Haaru mu enge  
nggube Ojejoje;  
ke l'e to nwedu ẹke uta duru mu.  
O bu nggu;  
be mu dakoberu Ojejoje;  
ophu o nwedu teke obu bojeru mu ẹbo.

- 2 Nggube Ojejoje; daa mu;  
 nggu enyochaa mu enyocha!  
 Gbunua mu igo l'obu;  
 mę l'egomunggo.
- 3 Kę l'ọ bu obu, i yeru mu  
 anọduje akpọ-ziru mu ọzo;  
 mu eme iphe i kfuru.
- 4 Mu lę ndu ẹregede  
 ta ayikwa ayiyi;  
 ọphu mu lę ndu  
 o-kfuru-iche-eme-iche 'achigbakwa idzu.
- 5 Ndzuko ndu ẹjo madzu;  
 bę mu akpọ-yiru ukuvu;  
 ọphu mu lę ndu akirishi 'anogbajekwa.
- 6 Mu akwoje ẹka  
 je ejephee ẹnya-ngweja  
 nggube Ojejoje mgburumburu;  
 gude koshi l'ekworo ta nọdu lę ndzụ mu.
- 7 Mu ekfukwaaphu k'iphe dų biribiri,  
 iinoduje emeshi;  
 raa ya arara; kele ngu ekele.
- 8 Eze-ulo ngu; bę mu yeru obu;  
 mbu ẹke ọdu-biribiri ngu nọ.
- 9 Ba asakobekwa mu lę ndu ẹjo iya ono ọ-sa-  
 nkfu;  
 ọphu i dobekwa mu lę  
 ndu egbu ọchi l'oshi lanu.
- 10 Ndu bulephu ẹjo iphe;  
 bę ẹphe maru ememe;  
 buru ọna ẹka-azu bu iphe doru ẹphe ẹnya.
- 11 Obenu lę mbedua;  
 b'ẹ to nwedu ẹke uta duru mu.  
 Ọo ya bu; phunuaru mu imiko;

nggu agbafuta mu!

- 12 Mu e-vudo l'ẹke ọkpa ruru mu ali;  
 noḍu l'edzudzu ọha jaa Ojejoje ajaja.

## 27

Egvu, Dévidi deru

- 1 Ọo bu Ojejoje bu iphoro,  
 duru mu nu; bya aburu  
 onye adzoje mu nu;  
 ?Bu onye; be mu a-noḍu atsukwa nu egvu.  
 Ọ bu Ojejoje bu  
 ulo-ozeru-ndzu mu.  
 ?Buhunu onye; be mu  
 a-noḍu atsu egvu odo.
- 2 Teke ndu ejo iya ono;  
 mbu ndu ohogu mu;  
 me ndu mu du ashị zaru  
 gidigidi bya t'ephe vua anu mu avuvu;  
 be ephe a-kpakota iphe  
 dagbushia onwephe.
- 3 Ọ -buru le ndu soja no-pheru  
 mu mgburumgburu;  
 be obu te etedu mu etete.  
 Mbu; o -buru le ndu ohogu  
 mu wu-lihuru tso mu oḡu;  
 be mu a-dakobele Nchileke.
- 4 Ọ bu iphe lanu kpau;  
 be mu arọ Ojejoje;  
 buru iphe ono; be mu achọ.  
 Iphe obu bu te mu noḍu  
 l'ulo Ojejoje gbururu jeye  
 ege mu a-no-bebe le mgboko-a;  
 te mu noḍukpelephu egbu

- igo l'ọ-dụ-ugvu kẹ Ojejoje;  
 nọdukwapu l'eze-ulo  
 Nchileke kpatajẹ iya ishi iphe.
- 5 Kẹle mbọku, iphe-ẹhuka  
 byaru mu; bẹ oo-dobe mu l'ẹke ọ nọ;  
 domia mu l'ime ulo-ékwà iya;  
 woru mu tukobe l'eli mkpuma, ha l'eli.
- 6 Ọo ya bụ; mu emekputa ndu  
 ọhogu, nọ-pheru mu mgburumgburu.  
 Mu anọdu l'ulo-ékwà Nchileke;  
 tụa okokooko gude gwaa Ojejoje;  
 gude egvu; gude nkwa;  
 tua ya ẹpha.
- 7 Nggube Ojejoje; nūnua olu  
 mu teke mu rakuru ngu!  
 Phunuaru mu imiko;  
 za mu rụ oku!
- 8 Iphe obu mu kfuru mu;  
 bụ tẹ mu chọo ifu ngu.  
 Yọ buri ifu nggube Ojejoje;  
 bẹ mu achọ-a.
- 9 Ba aghakwaru mu azụ;  
 ọphu i gudekwa  
 ẹhu-eghughu ngu nwufu mube nwozi ngu;  
 kẹ l'ọ bụ nggu bụ onye  
 shi keshinu yetataru mu ẹka.  
 Byiko; ba ajikakwa mu;  
 ọphu i leswetakwa mu;  
 nggube Nchileke,  
 bụ onye adzoje mu nū!
- 10 Ọ -buri le nne mu; mẹ nna mu jikawaru mu;  
 bẹ Ojejoje e-leta mu-a ẹnya.
- 11 Byiko kpoziaru mu ọzo ngu; nggube Ojejoje!

Dunua mu shia ụzo,  
vudo nhamunha l'ogvu ndu akpa mu ẹhu.

- 12 Ba ahakwa mu tẹ ndu  
ohogu mu mee mu ẹge, dụ ẹphe mma;  
kele ndu ẹjo-ekebe  
wu-lihuru ebo mu ibo;  
l'ahashi ẹnu ishi mu.
- 13 Obenu l'iphe mu chiru ukfu kwẹ  
bụ lẹ mu a-nodu ndzụ;  
phụ iphe dụ mma,  
shi Ojejoje l'ẹka.
- 14 Nodu ngaberu Ojejoje!  
T'obu shia ngu ike;  
ẹka eshia ngu ike;  
nggu angaberu Ojejoje.

## 28

Egvu, Dévidi deru

- 1 Ọ bụ nggube Ojejoje, bụ  
oke mkpuma nke mu;  
bẹ mu araku.  
Ba dahukwa mu nkichi;  
ke l'ị nodu nggujunguji;  
bẹ mu lẹ ndu, a tųwaru ẹja a-dụkokwa.
- 2 Nųaru mkpu, mu echiku ngu;  
ẹge-a mu chiliru ẹka;  
mabẹ l'uzo  
Eke-Kakọta-odu-Nsọ nke ngu-a.
- 3 Ba tųkokwa mu lẹ ndu  
akirishi kpụta kpufu;  
mbụ ndu anọduje eme iphe dụ ẹji;  
ndu okfu ẹphe anọduje  
atsọ ẹna lẹ nchị;

- obenu l'obu ẹphe bụ ọkpoma-nshi.
- <sup>4</sup> Kfua ẹphe ụgwo iphe ẹphe meru;  
 mẹ ụgwo iphe dū ẹji,  
 ẹphe shi anọduje eme.  
 Kfua ẹphe ụgwo iphe ẹphe  
 gude ẹka ẹphe meta.  
 Nnggu emee ẹphe ẹge gbaru ẹphe.
- <sup>5</sup> Keshinu ẹ to nwedu iphe  
 ẹphe guberu ozi,  
 Ojejoje jeru;  
 mbụ iphe Ojejoje gude  
 ẹka iya mee l'onwiya;  
 bẹ oo-gude ẹka iya gwaa ẹphe maa;  
 ọphu ọ byadụ bya  
 abyakọbe ẹphe abyakọbe ọdo.
- <sup>6</sup> Unu tua Ojejoje ẹpha;  
 kẹ l'ọ nwaru mkpu,  
 mu chikuru iya sụ t'ọ phụaru mu imiko.
- <sup>7</sup> Ọ bụ Ojejoje bụ ike mu;  
 bụru iya bụ onye  
 egbochitaje mu nụ.  
 Ọ bụ iya bẹ mu dakoberu;  
 yoo yeru mu ẹka.  
 Mu egudeje obu mu ete ẹswa.  
 Mu a-gụ egvu gude kele iya.
- <sup>8</sup> Ọ bụ Ojejoje bụ ike kẹ ndu nk'iya;  
 bụru ụlo-ozeru-ndzụ onye o teru manụ.
- <sup>9</sup> Dzọfutanu ndibe ngu;  
 gọnuru ọnu-ọma nū ndu,  
 bụ ọkè-iphe ngu!  
 Chejenu ẹphe l'ọ bụ onye  
 eche aturu;  
 nnggu ehee ẹphe jeye lẹ tutu yoyo!

## 29

Egvu-ọma, Dévidi deru

- 1 Unube ụnwu imigwe;  
     unu kwabe Ojejoje ugvu!  
     Unu kfu a ege ike iya habe!
- 2 Unu kwabe Ojejoje ugvu, gbaru epha iya!  
     Unu baaru Ojejoje eja;  
     mbu onye ono,  
     du nsọ bya adu biribiri ono.
- 3 Olu Ojejoje tukuru  
     eze enyimu ngashia angashi.  
     O bu Nchileke ono,  
     du biribiri ono atu  
     egbe-igwe.  
     Ojejoje atu egbe-igwe  
     l'eli eze enyimu.
- 4 Ojejoje be olu iya adakwa ike-ike ike-ike;  
     mbu le Ojejoje be olu iya ada ke kpaa kpaa.
- 5 Olu Ojejoje agbawashije oshi sida;  
     Ojejoje agbawashije oshi sida,  
     noglobaa l'ugvu ugvu Lebanonu viriviri.
- 6 Oomeje ugvu ugvu Lebanonu;  
     t'o nmahu jijiji l'o bu  
     nweswi, ebu nggada;  
     l'emejekwaphu Ugvu Siriyonu;  
     yo tehu kfu kaku l'o bu  
     nwa atsụ, akfu nkfu.
- 7 Olu Ojejoje echije taa l'o bu ebemu-igwe.
- 8 Olu Ojejoje emeje te echi-egu nmahu jijiji.  
     Ojejoje emeje te echi-egu  
     Kedeshi nmahu jijiji.
- 9 Olu Ojejoje anmaje achi yikayika.  
     Oomeje t'oswa laa ekwo;

daburu karaphongu.

Iphe bu onye, no l'eze-ulo iya e-bu mkpu;  
su: "Nchileke dukwa biribiri."

10 Ojejeje no l'aba-eze iya  
dzopyabe utso l'okpa.  
Oo-buru eze gbururu  
jeye le gbururu.

11 Ojejeje emeje te ike du ndibe iya.  
Yo goru onu ehu-agu nu ndibe iya.

## 30

Egvu-oma, Dévidi deru

A guru iya gude woru eze-ulo Nchileke ye  
Nchileke l'eka

1 Mu a-nodu ekutse nggube Ojejeje;  
ke l'i sefutaru mu l'iduma;  
ti kwe te ndu ohogu mu zuru mu ukwe.

2 Nggube Ojejeje, bu Nchileke mu;  
mu rakuru ngu t'i yeru mu eka;  
Nggu emee; mu akorohu.

3 Nggube Ojejeje;  
o bu nggu lofutaru mu l'ali-maa,  
I meru mu; t'e ba tu mu eja.

4 Unu gua egvu gude tua  
Ojejeje epha;  
unube ndu nk'iya, du nso!  
Unu kele iya ekele; l'epha iya du nso!

5 Ke l'e to dojedu iphe l'okpoma.  
Obu-oma iya anoje jeye ege madzu a-no-  
bebe.  
Ekwa bu-a l'enyashi;  
be aa-kwa iya kpuu;  
o -be l'utsu; ehu-otso-ena adalaha.



- 6 Teke mu nọ l'ẹke ẹhu dọ mu agu; bẹ mu sọru:  
 “L'ẹ to nwedu iphe bya  
 enwubata mu enwubata.”
- 7 Nggube Ojejoje;  
 teke ayi shi eshi ọnya;  
 b'i meru tẹ mu buru  
 'enwuribe enwuribe l'ọ bọ ugву.  
 Obenu lẹ teke ị gharu mu azu;  
 bẹ meji tọfuru mu.
- 8 Ọ bọ nggube Ojejoje;  
 bẹ mu rakuru;  
 buru nggube Nnajiufu;  
 bẹ mu rọru t'i phuru mu imiko.
- 9 Mu sọru: “?Bọ uru ngunu;  
 bẹ ii-rita teke mu nwuhuru?  
 Mbọ; ?nanu uru, ii-rita iya; mẹ a tọa mu ẹja.  
 ?Bọ ẹja, nọ l'alì a-wata ngu ajaja tọ.  
 ?Bọ iya a-ra iya arara l'ị bọ o-me-g'o-kfuru.
- 10 Nggube Ojejoje;  
 nuru olu mu;  
 phuru mu ru imiko!  
 Nggube Ojejoje;  
 yeru mu ru ẹka!”
- 11 Ẹkwa, mu raru  
 b'i gbanweru; mee ya;  
 yọ buru mu ote ẹswa.  
 I yefuru mu uwe-aphu,  
 mu yeru; woru;  
 ẹhu-otso-ena ye mu l'ọ bọ uwe.
- 12 Iphe ono buplehu ẹge ee-me  
 t'obu mu gulahaa egву  
 gude etu ngu ẹpha;  
 t'ẹ b'ọ nọhe nwanggingiji.

Nggube Ojejoje,  
 bu Nchileke mu;  
 o bu nggu;  
 be mu a-noḍu  
 ekele ekele jeye le tutu yoyo.

### 31

Egvu-ọma, Dévidi deru nu onye ishi egvu

- <sup>1</sup> O bu nggube Ojejoje;  
 be mu no l'eka ezeru ndzu.  
 Be kwekwa t'e kpua mu ifu le  
 ntụ gbururu jeye gbururu.  
 Gude ke l'i bu onye,  
 doberu eka ndoo nafuta mu.
- <sup>2</sup> Ngabenuru mu nchi.  
 Bya egwegwa bya agbafuta mu.  
 Buru mu agbara-mkpuma,  
 mu a-gbabaje zeeru ndzu;  
 mbu a-gbabe-a-dzuru,  
 a-dzofuta mu nu.
- <sup>3</sup> Keshinu o bu nggu bu  
 agbara-mkpuma mu;  
 buru a-gbabe-a-dzuru nke mu;  
 dunua mu l'onwongu;  
 kpoziaru mu uzo;  
 l'ogvu epha ngu.
- <sup>4</sup> Hafuta mu l'onya ono,  
 a gbaru mu ono;  
 ke l'o bu nggu bu  
 a -gbabe-e-zee-ndzu mu.
- <sup>5</sup> Mu yeru ngu ume mu l'eka.  
 Gbafutanu mu;  
 nggube Ojejoje,

- bụ Nchileke,  
bụ o-me-g'o-kfuru.
- 6 Ndu akpojeru obu yeru  
ọla l'iyi ono; mbụ agwa;  
adujekwa mu ashị.  
Onye mbèdua dakoberu bụ Ojejoje.
- 7 Mu ete ẹswa; ẹhu l'atso  
mu ẹna l'i yeru mu obu;  
kẹ l'ì phụwaru iphe-ẹhuka, mu jeru;  
maru iphe-otsu-l'anụ mu;
- 8 ọphu i woduru mu ye  
l'ẹka ndu ọhogu mu;  
nggu egbe kutachia mu  
dobe l'ẹke ọkpa ruru mu alị.
- 9 Byiko nggube Ojejoje;  
phụnuaru mu imiko;  
kele mu nọkwa l'oke mkpamehu.  
Mu ratawaru ẹkwa;  
l'aphuwaa ragaraga.  
O mekwaruphu;  
ike agvushikotawa mu.
- 10 Aphụ gbuakwaru mu.  
Mu tsutawaru ude; kahụ l'ọkpehu.  
Ike gvukotawaru mu;  
kele mu menukawaru ẹjo iphe.  
Ọkpu, nọ mu l'ẹhua erishi mu avurukpa.
- 11 Ndu ọhogu mu l'ẹphe ha mewaru mu;  
ndu obutobu mu akpọlahaa mu ẹbo-ẹbo-  
l'afụ.  
Ndu mu l'ẹphe shi eshi  
ònyà atsukotawa mu egvu;  
k'ọphu bụ lẹ ndu phuru mu l'ụzo  
anọduje agbaru mu ọso.

- 12 Ẹphe zahawaru mu ẹge  
 aazahajẹ onye nwuhuru anwuhu.  
 Mu dụwa l'ọ bụ ite,  
 tųkposihuru atųkposihuhu.
- 13 Kẹle mu nuwaru ẹjo idzu,  
 ẹphe dụ l'igwe achiru mu.  
 Nta-a ta dudu ẹke mu nọ;  
 tẹ mu ba anọdu atsụ egvu.  
 Ẹphe anọduje achiru mu ẹjo idzu.  
 Iphe ẹphe tųberu aburu  
 t'ẹphe wofu ndzụ mu.
- 14 Obenu l'ọ bụ nggu;  
 bẹ mu dakoberu nggube Ojejoje.  
 Mu ekfu: "L'ọ bụ nggu bụ Nchileke mu!"
- 15 Ẹge mu a-nọ-bebe ẹ  
 mgboko-a bụ nggu b'ọ nọ l'ẹka.  
 Nafutanu mu l'ẹka ndu ọhogu mu;  
 mẹ l'ẹka ndu, achị mu nụ.
- 16 Lenua mụbe nwozi ngu ẹnya-ọma!  
 Guderu n-yemobu ngu dzọfuta mu!
- 17 Nggube Ojejoje;  
 be ekwekwa t'e kpua mu ifu ẹ ntụ;  
 kẹ l'ọ bụ nggu bẹ mu rakuru.  
 Ọ bụ ndu akirishi ono;  
 bẹ ee-kpuchia ifu ẹ ntụ;  
 t'ọnu buru ẹphe kpurumu l'alị-maa.
- 18 T'ọnu ono, ẹphe gude adzụ ejire ono;  
 buru ẹphe kpurumu;  
 kẹ l'ẹphe gude oku  
 onwẹphe iphe ẹphe,  
 ẹ ta hadu l'ọbu iya;  
 mẹ ọkpo madzụ ẹbo-ẹbo-l'afu;  
 l'ekfubyishi ndu doberu ẹka ndoo.

- 19 Haa! I dụnukakwaru mma  
 adunuka; mbu mma ono,  
 i kwakoberu ndu atsu ngu egvu ono.  
 Yọ buru l'ifu unwu eliphe be i-nodu;  
 meeru epehe k'oma;  
 mbu ndu gbatataru ngu l'ime; zeeru ndzu.
- 20 Iidutaje epehe domia l'iku eke, i no;  
 t'ejo idzu unwu eliphe achi;  
 be eru epehe l'ehu.  
 Yọ buru l'ulo ngu;  
 be iidobeje epehe;  
 t'e ejo-okfu be eru epehe l'ehu.
- 21 T'e tua Ojejoje epha;  
 ke l'o koshiru mu  
 n-yemobu iya, du biribiri  
 teke ndu ohogu mu  
 yechiru mu ege ono,  
 eeyechije mkpukpu ono.
- 22 Mu echia mkpu; su:  
 "A laa mu-o!"  
 Nggū anu mkpu ono;  
 bya agbaaru mu mkpu.
- 23 Unu yeru Ojejoje obu;  
 unube ndu nsọ ke Ojejoje l'unu ha;  
 kele ndu Ojejoje eletaje  
 enya; kwa ndu bu  
 o-me-g'o-kfuru phe.  
 Obenu le ndu eku onwephe  
 ege epehe e-ta hadu;  
 be okfuje ugwo kfuru ya epehe l'ishi.
- 24 Unu shihukwa ike;  
 unu egude eka l'okpoma;  
 unube ndu echeru Ojejoje!

## 32

Évù, Dévidi raru

<sup>1</sup> Ọnu-ọma bụ k'onye Nchileke  
guru nvụ l'emeswe,  
o mesweru iya;  
mbụ onye Ojejoje safuru  
iphe dụ ẹji, o meru.

<sup>2</sup> Ọnu-ọma bụ kẹ onye Ojejoje  
ta agukoduru iphe dụ ẹji,  
o meru;  
mbụ onye ẹ-te nwedu  
ẹregede, nọ iya l'ẹhu.

<sup>3</sup> Teke mu te kfudu iphe mu meru;  
bẹ ọkpụ, nọ mu l'ẹhu  
tsụ-gwoshihukotaru mu atsu-gwoshihu.  
Ishi iya aburu kẹ ude,  
mu anọduje atsu  
mbọku-mbọku.

<sup>4</sup> Eswe l'enyashi  
mbọku-mbọku;  
bẹ ịinoduje ebyi mu ẹka l'ẹhu.  
Nggụ eshi ẹge ono mịchata  
nwike, nọ mu l'ẹhu l'ọ bụ  
onye ụguru guderu.

<sup>5</sup> Tọ dụ iya bụ; mu abya emee  
t'ị maru iphe dụ ẹji, mu meshiru.  
E to nwedu iphe dụ ẹji,  
mu meru ọphu mu domiru ngu edomi.  
Mu asụ lẹ mu a-koshikotaru  
Nchileke ejeswe,  
mu jesweru.  
Nggụ abya aguaru mu nvụ  
l'iphe dụ ẹji, mu meshiru.

- 6 Ọo ya bụ; tẹ iphe bụ ndu  
eme iphe dụ nggube  
Nchileke mma kfuje nụ ngu  
teke ẹphe nọ lẹ mkpa;  
k'ọphu bụ teke iphe-ẹhuka  
ono a-bya l'ọ bụ utso;  
too rudu ẹphe l'ẹhu.
- 7 Ọ bụ nggu bụ ẹke mu edomije onwomu.  
Yọ bụru nggu anọduje eleta mu  
t'iphe-ẹhuka ba dakfuta mu;  
nggu egude egvu, e gude  
atụ okokooko gude gbaa mu mgburumg-  
buru.
- 8 Ị suru l'ii-nọdu atụ-ziru mu ẹka;  
l'ezikwa mu phụ ụzo, mu a-nọdu eshi.  
Ii-nọdu akpọ-ziru mu ụzo;  
l'eletakwa mu phụ ẹnya.
- 9 Wo mu tẹ mu ba adukwa  
l'ọ bụ inya; m'ọ bụ  
inya-mulu; kẹ l'ẹphe te  
nwedu egomunggo.  
Iphe eegudeje agọ ẹphe bụ ajaba;  
mẹ odogoro.  
Teke ẹ tii medu iya ẹge ono;  
tịi gọkotadu iya.
- 10 Ndu akirishi; bẹ anọduje  
eje iphe-ẹhuka,  
dụ l'igwe!  
Obenu l'onye dakoberu  
Ojejoje bẹ n-yemobu iya  
anọ-pheje mgburumgburu.
- 11 T'ẹhu tsọo unu ẹna k'iphe  
Ojejoje anọduje emeshi;

unu etekwaaphu ẹswa;  
 unubẹ ndu doberu ẹka ndoo!  
 Unu agua egvu ẹhu-ẹna;  
 unubẹ ndu obu guru iphoro!

### 33

- 1 Unu gua egvu ẹhu-ẹna  
 nu Ojejoje; unubẹ ndu  
 doberu ẹka ndoo!  
 Tẹ ndu obu guru iphoro jaa ya ajaja.
- 2 Unu kpoọ une  
 gude kele Ojejoje ekele!  
 Unu gude ogumogu gularu  
 iya egvu, atsọ ẹna!
- 3 Unu gularu iya egvu ophungu!  
 Unu kumataru iya ẹya akumata;  
 unu atularu iya uzu ẹhu-ẹna!
- 4 Kẹ l'okfu Ojejoje vudo nhamunha.  
 O bu o-me-g'o-kfuru  
 l'iphe bu iphe oome ememe.
- 5 Iphe aduje Ojejoje mma bu ikpe, du mma;  
 me odobe-ẹka-ndoo.  
 N-yemobu Ojejoje jiru  
 mgboko tsubo etsubo.
- 6 O bu okfu, shi Ojejoje l'onu  
 b'o gude mee igwe;  
 buru ume, o turu atutu  
 b'o gude mee iphe bu iphe, no iya nu.
- 7 Yo bya awukobe mini,  
 no l'enyimu ye l'ekalanu.  
 Eze Enyimu b'o kparu oge ẹke oo-jebetsua.
- 8 Tẹ mgboko l'ophu tsuje Ojejoje egvu.  
 Tẹ iphe bu ndu no le



- mgboko kwabejekwa iya ugву;  
 9 ke l'o kфuru okfu; mgboko abya adu.  
 Yo tua ekemu;  
 iphemiphe obule abya adu.  
 10 O bu Ojejoje emeje te idzu,  
 iphe bu mbakeshi chiru buru iphe mmanu;  
 buru iya akposhije iphe  
 ndiphe tuberu k'ememe.  
 11 Obenu l'idzu ophu Ojejoje  
 chiru akfujeru gbururu jeye le gbururu.  
 Iphe o tuberu k'ememe;  
 be oomeje;  
 yo shi l'ogbo sweru ogbo.  
 12 Onu-oma bu ke mba,  
 bu Ojejoje bu Nchileke ephe;  
 bu iya bu ndu, o fotaru;  
 ephe aburu okè-iphe iya.  
 13 Ojejoje anoduje l'imigwe lee  
 enya le mgboko-a  
 phu unwu eliphe l'ephe ha.  
 14 Onoduje l'eke,  
 o bu l'imigwe phukota ndu,  
 bu le mgboko l'ephe ha.  
 15 O bu yebdua meru oriri nu ephe.  
 Iphe bu iphe ephe eme  
 ememe edokotaje iya enya.  
 16 Iphe meru iphe onye eze  
 emekputaje l'ogu ta bukwa  
 okfu le ndu soja iya ha igwe.  
 Ophu mkparawa  
 'egudejekwa ike k'eka iya nahu.  
 17 Inya-ogu bu iphe-mmanu;  
 e to o dzofutadu madzu l'egu ogu;

- ọphu 'onwedu ẹge ike iya  
 hatabe, ọo-dzọ-ghe ndzụ.  
 18 Obenu l'ẹnya Ojejoje nọkwa  
 l'ẹhu ndu atsu iya egvu;  
 mbụ ndu ono,  
 dakoberu n-yemobu iya;  
 19 kẹ l'ọo-nafuta ẹphe l'ẹka anwuhu;  
 dobe ẹphe ndzụ teke  
 ẹjo-ẹgu byaru.  
 20 Ayi nọ ngaberu Ojejoje;  
 kẹ l'ọo ya bụ onye agbaru ayi mkpu;  
 buru iya egbochitaje ayi.  
 21 Oomeje t'ẹhu tsọo ayi ẹna;  
 kẹ l'ọ bụ l'ẹpha iya,  
 dū nsọ bẹ ayi dakoberu.  
 22 Nggube Ojejoje;  
 byiko koshinu l'i yeru ayi obu;  
 kẹ l'ọ bụ nggu bẹ ayi dakoberu.

## 34

Egvu, Dévidi deru teke ọ wataru ome l'ọ bụ onye  
 ọgvu l'ifu Abímeleku; Abímeleku achifu iya

- 1 Mu a-nọdu ekutse Ojejoje tekenteke.  
 Tekenteke bẹ mu a-nọdu aja iya ajaja.  
 2 Ọ bụ Ojejoje; bẹ mu gude eku onwomu.  
 Tẹ ndu aakpa ẹhu nua ya;  
 k'ọphu ẹhu a-tsọ ẹphe ẹna.  
 3 Bya tẹ ayi chiko tua ọnu ẹge  
 Ojejoje habe nshinu;  
 bya t'ayi chiko kutsee ya.  
 4 Mu rakuru Ojejoje;  
 yọ za mu; bya emee;  
 mu atsu-buhu egvu.

- 5 Ndu ele ẹnya iya amuje  
 ọnu-ọchi;  
 ọphu o nwedu l'iphere emee ẹphe.
- 6 Mube onye ẹta dudu ẹge  
 ọ haru mu chiru mkpu;  
 Ojejoje azaa mu;  
 bya adzofutakota mu  
 l'iphe-ẹhuka, mu eje l'ọ ha.
- 7 Ojozi-imigwe Ojejoje  
 anọ-pheje ndu atsụ  
 Ojejoje egvu mgburumgburu.  
 Ọonoduje adzọ ẹphe tekenteke.
- 8 Unu dataduduphu Ojejoje;  
 unu aphụ l'ọ dụ mma.  
 Ọnu-ọma b'a gọru nụ ndu  
 gbabaru iya l'ẹka je ezeeru ndzụ.
- 9 Unu tsuje Ojejoje egvu;  
 unube ndu nsọ Ojejoje;  
 kele ndu atsụ iya egvu  
 ta dukwa iphe ọko iya adujeru ẹphe.
- 10 Unwu agụ; be mkpa akpaje;  
 ẹgu l'eme ẹphe.  
 Obenu le ndu acho  
 Ojejoje;  
 be ọko iphe-ọma ta akọdu.
- 11 Unu byaduduphu;  
 unube unwegirima.  
 Unu bya angabe nchi;  
 te mu zia unu iphe ọ bu;  
 mbu ọtsu Ojejoje egvu.
- 12 ?Nanu onye ndzụ atsọ ẹna;  
 yọ dụ iya tọ kaa nka;  
 mbọku-mbọku aburu iya k'ọma.

- 13 T'onye ono wofukwa ọnu  
l'ejo iphe; yọ haa ejo-ire.
- 14 Gbakutaru iphe dụ eji azu;  
watachia ome iphe dụ mma.  
Kebe ẹhu chojee iphe e-me tẹ nchị dụ ndoo;  
ba atụ-gbekwa iya ẹka.
- 15 Ojejoje bẹ ẹnya iya  
anojekwa l'ẹke ndu doberu ẹka ndoo nọ.  
Ọongabejekwa nchị teke  
ẹphe ara araku iya.
- 16 Obenu lẹ ndu eme iphe dụ eji;  
b'ẹ too lejedu ẹnya ọma;  
k'ọphu ẹpha ẹphe a-chihu lẹ mgboko.
- 17 Ndu doberu ẹka ndoo abuje;  
ẹphe -raku Ojejoje;  
yọ za ẹphe;  
bya anafuta ẹphe  
l'iphe-ẹhuka, ẹphe eje l'ọ ha.
- 18 Ojejoje anonyabeje ndu ọzo chiru.  
Ọodzofutaje ndu ẹta  
amahedu ẹge ẹphe e-me iya.
- 19 Iphe-ẹhuka onye doberu ẹka  
ndoo aduje l'igwe;  
obenu lẹ Ojejoje  
anafutakotaje iya l'iphe-ẹhuka ono l'ọ ha.
- 20 Ọkpu, nọ iya l'ẹhu bẹ ooletaje ẹnya.  
E tọ dudu ọkpu, nọ iya l'ẹhu m'ọ nanu,  
a bya l'akukwo akukwo.\*
- 21 Obenu l'ẹjo madzụ bu  
ejo iphe iya ono e-gbu iya.  
Ndu kporu ndu doberu

---

\* 34:20 34:20 Jọn 19:36.

ẹka ndoo ashi; bẹ aa-nma ikpe.

- 22 Ojejoje adzoekwa ndu ejeru iya ozi.  
 Ẹ to nwedu m'ọo onye lanu,  
 gbabaru l'ime iya je ozeru  
 ndzu, a bya anma ikpe.

## 35

Egvu, Dévidi deru

- 1 Nggube Ojejoje;  
 tso ndu etso mu okfu okfu!  
 Tsokwaphu ndu etso mu ọgu ọgu!
- 2 Gwota nu ngwa-ọgu ngu;  
 me iphe eegudeje egbochita  
 onwonye l'ọgu;  
 gude bya agbaaru mu mkpu!
- 3 Palia arwa ngu; me akfu ngu  
 gude kfu-chia ndu achi mu nu ọzo!  
 Kfunuru mu l'ii-dzofuta mu!
- 4 T'iphere bukwaru ke ndu  
 achọ ọzo, epe e-shi gbua mu.  
 T'a chiphukwa epe azu;  
 mbu ndu achiru mu ejo idzu.  
 Te iphe jikwa epe enya.
- 5 T'epe dukwa l'ọ bu eswa witu,  
 pherephere zikashiru  
 teke ojozi-imigwe Ojejoje  
 a-ọdu achi-phi epe achi-phi.
- 6 T'uzo epe gbakwaa  
 tsabalangu; chikotakwaphu eturu  
 teke ojozi-imigwe Ojejoje  
 a-ọdu achi epe  
 agada-eru-ali.
- 7 Keshinu epe gbaru mu onya;

- l'ẹ b'ọ dọ iphe mu meru ẹphe;  
 bya atọa iduma doberu mu;  
 l'ẹ b'ọ dọ iphe mu meru;
- 8 ẹ ọ-la-l'iyi tųkwaa ẹphe l'ųkfu.  
 Tẹ ọnya, ẹphe gbaru hatakwa ẹphe;  
 ẹphe adalahọ l'iduma, ẹphe  
 tųru; bųru kpurupyata.
- 9 Teke ono; bẹ mu e-tee ẹswa l'ime Ojejoje.  
 ẹhu atsọo mu ẹna  
 k'adzọfuta, ọ dzọfutaru mu.
- 10 Mu e-gude obu mu l'ọ ha; sọ:  
 ?Bų onye dọ l'ọ bų nggube Ojejoje.  
 Ọ bų nggu adzọfutaje  
 ndu ųkpa l'ẹka ndu ka ẹphe;  
 nafuta ndu ųkpa;  
 mẹ ndu ẹ te nwedu ẹge  
 ọ haru ẹphe l'ẹka ndu ana nfu.
- 11 Ndu ẹjo ekebe wų-lihuru l'ẹbo mu ibo.  
 ẹphe akpakọ iphe mu ta  
 madu teke o meru bobе mu.
- 12 ẹphe gude iphe dọ ẹji  
 kfua mu ųgwo iphe-ọma;  
 shi ẹge ono mee;  
 ike agvų mu.
- 13 Obenu lẹ teke ẹhu dųru ẹphe ẹji;  
 bẹ mu yeru uwe-aphų;  
 wozita onwomu ali;  
 swia aswiswi; kfua nų Ojejoje.
- 14 Mu raru ẹkwa; gųa aphų ẹhu ẹphe;  
 l'ẹphẹ bų unwunne mu;  
 m'ọ bų ọnya mu.  
 Mu anọduje dẹe ẹka l'agba  
 l'ọ bų onye ara ẹkwa nne iya.

- 15 Obenu lẹ teke iphe-ẹhuka byaru mu;  
 bẹ ẹphe gbaru mu mgburumgburu  
 l'aja mu ewena; mbụ ndu mu ta madu;  
 gude ẹjo okfu asa mu ọsa ẹkfu.
- 16 Ndu ono, ẹ ta madu Ojejoje ono  
 anọdu aja mu ewena;  
 l'atagbaaru mu ikireze.
- 17 Nggube Ojejoje;  
 ?bụ teke ole bẹ ii-chi-bebe  
 ẹnya yeru ayi ẹge-a?  
 Dzonua mu; a nonyaa;  
 ẹphe emee mu;  
 mu aburu ọ-la-l'iyi!  
 Dzofutaru mkpakọ iphe ono,  
 mu nweru ono, bụ iya bụ  
 ndzụ mu l'ẹka ẹjo agu phe ono!
- 18 Ọ bụ l'edzudzu ọha;  
 bẹ mu a-nọdu keke ngu ekele;  
 mu a-nọdu l'edzudzu ọha jaa ngu ajaja.
- 19 Be ekwekwa tẹ ndu ọhogu mu  
 zọaru mu ukwe;  
 mbụ ndu ono, mu dụ ashị;  
 l'ẹ b'ọ dụ iphe mu meru ẹphe ono.  
 Ọphu i kwekwa tẹ ndu ono,  
 mu dụ ashị l'ẹ ba dụ iphe  
 mu meru ẹphe ono vọru mu eze.
- 20 Kẹ l'ẹphe te ekfujedu okfu nchi-ọdu-ndoo.  
 Iphe ẹphe evutachijee l'ishi  
 bụ okobe ndu, dụ agu l'ali-a okfu.
- 21 Ẹphe ghecharu ọnu eghecha l'ebo mu ibo:  
 l'azụ mgbede l'ẹphe gude  
 ẹnya ẹphe phua mu teke mu eme iya!
- 22 Obenu lẹ nggube Ojejoje

- phụwaru-a iphe ono l'ọ ha.  
 Byiko; b'e leswetakwa mu;  
 ọphu ị nọdukwa mu ote-ẹn्या!
- 23 Tehu etehu. Zilihu bya adzọo mu!  
 Gbaaru mu ọdzori;  
 nggube Nnajiufu,  
 bụ Nchileke mu!
- 24 Gude odobe-ẹka-ndoo ngu  
 haaru mu enge;  
 nggube Ojejoje,  
 bụ Nchileke mu!  
 Be ekwekwa t'ẹphe zụaru mu ukwe!
- 25 Be ekwekwa t'ẹphe ịa l'obu ẹphe; sụ:  
 "Ha! Lẹ nta-a; bẹ ẹphe  
 chọ-vuwaru iphe ẹphe achọ!"  
 M'ọ bụ t'ẹphe sụ: "Nta-a bẹ  
 ẹphe menwuwaru iya ẹhu!"
- 26 Tiphere bukwaru ke ndu  
 azuru mu ukwe l'iphe, byaru mu nụ;  
 ẹphe akpọo beru.  
 Tẹ iphere; mẹ ewena jikwa ẹphe ifu;  
 mbụ ndu ono, eku onwẹphe  
 iphe ẹphe ẹ-ta ahadu l'ọ bụ iya ono!
- 27 Tẹ ndu ele ẹn्या t'a haaru mu  
 enge gụa egvu ẹhu-atso-ẹn्या tee ẹswa!  
 T'iphe ẹphe a-kpụjeru l'ọnu bukwaru:  
 "T'a tụa ọnu Ojejoje l'ọ ha nshinu;  
 mbụ Ojejoje ono,  
 ọduje mma mẹ nwozi iya  
 buru l'ẹhu-agu ono."
- 28 Ọo ya bụ; mu egude ọnu mu  
 kfuа k'odobe-ẹka-ndoo nke ngu.  
 Yọ bukwaruphu ẹge ono;



be mu a-ndu etu ngu epha mboku-mboku.

## 36

Egvu, Dévidi, bu nwozi Ojejoje deru nu onye ishi egvu

- <sup>1</sup> O bu ejo iphe anoduje ekfu  
okfu l'obu ndu ejo iya ono.  
Epehe jikaru Nchileke;  
epehe ta atsụ iya egvu le phuu.
- <sup>2</sup> Ke l'oonoduje aja onwiya ajaja-njagbu;  
mbu jatabe onwiya;  
k'ophu bu l'e too phujedu  
iphe du eji, oome;  
k'ophu oo-kpo iya ashi.
- <sup>3</sup> Iphe, eshije iya onu  
bulephu ejo okfu; me ugho.  
E too mejedu l'o bu onye maru iphe;  
too me iphe du mma.
- <sup>4</sup> Oozeje azee rikobe iphe du eji, ya e-me.  
O bulephu ejo uzo;  
be ootsochitaje;  
to du iphe du eji, oojikaje ememe.
- <sup>5</sup> Nngube Ojejoje; n-yemobu ngu  
chikowa igwe l'o ha gvua kfurukfuru.  
O-me-g'o-kfuru, i bu eruwa akpamigwe.
- <sup>6</sup> Odobe-eka-ndoo nke ngu  
akpa origodo l'o bu eze ugvu.  
Ikpe nke ngu aha ogvu l'o  
bu ebo eze enyimu ime-ali.  
Nngube Ojejoje; o bu nggu  
doberu madzu; dobe anu, bu l'egbudu.
- <sup>7</sup> Lewaru ege n-yemobu ngu  
bu-be iphe vu oke aswa!

- Ọ bụ iya meru iphe ndiphe  
gbabaru l'agu ngu je anọdu ezeru ndzụ.
- 8 Ẹphe anọduje l'ulo ngu eri gwọogwoo.  
Iimeje t'ẹphe ngua mini  
l'enyimu ẹhu-ọtso-ẹna nke ngu.
- 9 Kẹ l'ọ bụ l'ẹka ngu bẹ ndzụ futaru.  
Yọ buru l'ẹke iphoro  
nke ngu nọ;  
bẹ ayi a-nọdu phụ iphoro.
- 10 Byiko yekpelekwaruphu  
ndu maru ngu nụ obu ẹge i yeru iya ẹphe.  
Nngu edobekpelekwaphu  
ẹka ndoo ẹge  
ị doberu iya l'ẹhu ndu obu guru iphoro.
- 11 Be ekwekwa tẹ ndu eku  
onwẹphe ekuku dzọo mu ọkpa.  
Ọphu i kwekwa tẹ ndu akirishi  
gude ẹka ẹphe nwufu mu.
- 12 Phọaru ẹge e nwutsushiru  
ndu ẹjo iya ono;  
ẹphe adabutsuaru;  
ọphu ẹphe e-gbeshihedu ọdo.

## 37

Egvu, Dévidi deru

- 1 Ba aphujekwaru ndu  
eme ẹjo iphe ẹnya-uphu;  
ọphu i kojekwaru ndu  
ẹ te dobedu ẹka ndoo okopho.
- 2 Kẹ l'ẹ ta aa-nọkwa ọphu baru ishi;  
ẹphe anwua kpaa l'ọ bụ ẹwu;  
kpọshihu nkụ l'ọ bụ iru oshi.
- 3 Dakobe Ojejoje; meje iphe dụ mma!

- Buru l'alì ono buru  
o-me-g'o-kfuru!
- 4 Tẹ ẹhu-ọtso-ẹna ngu buru lẹ Ojejoje;  
k'ophu ọo-nụ ngu iphe,  
agụ ngu nụ.
- 5 Woru iphe, bu iphe, iime  
ememe ye Ojejoje l'ẹka.  
Dakobe iya; oo-meru ngu iya-a.
- 6 Oo-me tẹ odobe-ẹka-ndoo  
ngu nwua l'ọ bu iphoro;  
mbụ lẹ Ojejoje a-haru ngu enge;  
mee tẹ iswi-odu-mma ngu  
gbua nwìnwii l'ọ bu  
echi-oke-eswe.
- 7 Taa nshì; nggu achìru ụkfu kwẹe Ojejoje.  
Ba aphụkwa ẹnya-ụphu  
teke iphe duru ndu ẹjo iya ono lẹ mma;  
mbụ teke ẹjo idzu,  
ndu akirishi chìru eje l'ẹge ẹphe chìru iya.
- 8 Ba avujekwa ọvuma;  
ọphu ẹhu eghujekwa ngu eghughu!  
Ba aphujekwa ẹnya-ụphu;  
kẹ l'oodubajekwa madzụ l'ome ẹjo iphe;
- 9 kẹle ndu ẹjo iya ono;  
bẹ ee-me t'ẹphe chìhu  
Obenu lẹ ndu chìru ẹnya  
pyoo lẹ Ojejoje bu ẹphe  
e-nweru mgboko.
- 10 E ta anọhedu ọphu baru ishi;  
e mee tẹ ndu akirishi gvụ.  
I -chọo ẹphe; tii phụ ẹphe.
- 11 O bu ndu dụ agu e-nweru mgboko-a.  
Epehe enweru ẹhu-agu;

- nweru iya k'etsutsu iya.
- 12 Ndu ẹjo iya ono a-nọduje  
achiru ndu doberu ẹka ndoo ẹjo idzu;  
l'ataru ẹphe ikireze iphe ẹphe e-me ẹphe.
- 13 Obenu l'ọo ọchi bẹ Ojejoje  
anọduje achi ẹphe;  
kẹ l'ọ maru lẹ teke  
ee-mebyishi ẹphe; dụwa ntse.
- 14 Ndu akirishi mịtaru  
ogu-mbeke ẹphe;  
t'ẹphe gbushia ndu ifu dụ npho;  
bya esee akfụ ẹphe t'ẹphe  
gbatsushia ndu ụkpa;  
mẹ ndu ẹ-tọ dudu ẹge  
ọ haru ẹphe.
- 15 Obenu l'ọ bụ ogu-mbeke  
ẹphe ono ee-mekochaa ria ẹphe ishi;  
e woru akfụ ẹphe ono nyakwoshia.
- 16 Nwiphe ẹ-ta badu ishi,  
onye doberu ẹka ndoo nweru;  
bẹ kakwa mma;  
ma l'ẹku, ndu ẹjo iya ono,  
dụ l'igwe kparu kùbe.
- 17 Kẹle ndu akirishi;  
bẹ aa-nafu iphe ẹphe gude eze igidi.  
Obenu l'ọo Ojejoje  
bụ agbarike ndu doberu-ẹka-ndo.
- 18 Ọ bụ Ojejoje maru ẹge ndu  
uta ẹ-ta dudururu a-nọ-bebe.  
Obenu l'òkè, gbaru ẹphe  
a-buru nk'ẹphe gbururu jeye.
- 19 Iphe-ẹhuka -bya;

- bẹ ifu te ekpuduru ẹphe  
 lẹ ntụ.  
 Ejo-ẹgu -bya;  
 ẹphe enweru nri;  
 nweru k'etsutsu iya.
- 20 Obenu lẹ ndu akirishi  
 a-buru kpurupyata.  
 Ndu ọhogu Ojejoje  
 a-dụ l'ọ bụ iphe,  
 e meberu l'alị, vuru; ji ejiji;  
 a bya ele ẹnya;  
 yo kpofu l'ọ bụ  
 ẹnwuru-ọku.
- 21 Ndu ẹjo iya ono abuje;  
 ẹphe -jita ụgwo; ẹphe eria ya.  
 Obenu lẹ ndu doberu  
 ẹka ndoo bụ o-me-l'uko.
- 22 Ọ bụ ndu Ojejoje ọ́ru  
 ọ́nu-ọ́ma nụ e-nweru mgboko-a.  
 Obenu lẹ ndu ọ́ turu ọ́nu  
 a-chịhu.
- 23 Onye eme iphe, dụ Ojejoje mma  
 bụ iya akpọ-zijeru onye ono ẹge  
 oo-gude aha ọkpa.  
 Yo mee onye ono t'o vudo vudoshia ike.
- 24 Ụkfu -dụkpoo ya nụ;  
 b'ẹ tọo darudu alị;  
 kele Ojejoje a-wọta iya.
- 25 Mu shikwa bụru nwata;  
 nta-a bẹ mu bụwa ọgurennya.  
 Ọ bụ lẹ mu ta aphubua ẹke  
 Ojejoje gbadoru onye doberu ẹka ndoo;  
 m'ọ bụ ẹke ụnwu iya arọ nri.

- 26 Onye doberu ẹka ndoo  
 abuje o-me-l'uko;  
 l'eje ndu ọdo ụgwo.  
 Ụnwu iya aburu iya ọnu-ọma.
- 27 Gbakataru ejo iphe azụ;  
 wata ome iphe ụmma;  
 ẹge ii-buru l'alị-a jeye ẹ tutu yoyo.
- 28 Iphe ụmma Ojejoje ụmma bu  
 t'e ekpeje ikpe, ụmma.  
 Ẹ tọ gbadojekwa ndu yeru iya obu.  
 Ọkwa-chije ẹphe jeye ẹ tutu yoyo.  
 Obenu ẹ ndu akirishi;  
 be oomeje t'awa ẹphe chihu.
- 29 O bu ndu doberu ẹka ndoo  
 e-mekochaa nweru alị-a;  
 buru iya jeye ẹ tutu yoyo.
- 30 Okfu, eshije onye doberu  
 ẹka ndoo ọnu bu mmamiphe.  
 Iphe eshije iya ọnu aburu iphe, ụmma.
- 31 Iphe anọje iya l'obu  
 tekenteke bu ekemu Nchileke.  
 Ẹ tọ dakajedu iya adaka.
- 32 Ndu ejo iya ono ejeje  
 je akwaaru ndu doberu ẹka ndoo;  
 l'achọ ẹge ee-shi t'ishi ẹphe phuhu.
- 33 Obenu ẹ Ojejoje  
 te ekwejedu t'ẹphe daba ẹphe l'ẹka.  
 Ọphu o nwedu l'a nma  
 ndu doberu ẹka ndoo ikpe;  
 m'a kpuru ẹphe bya  
 l'ulo-ikpe.
- 34 Nodu ngaberu Ojejoje!  
 Tsoje ụzo iya!

Ọo ya a-pali ngu ifu;  
 mee ngu t'i nweru ali-a.  
 li-gude ẹnya ngu  
 phụ teke ee-me  
 tẹ ndu akirishi chihu.

35 Mu phujewaru ẹjo madzụ, obu taru mini.  
 Yoo vu l'ọ bụ oshi,  
 nọ l'ẹke ẹhu dụ iya mma.

36 Obenu l'ẹ ta nọdu ọphu baru ishi; tọ nọhe.  
 Mu achọo ya nta; chọo ya imo;  
 mu ta aphuhe iya.

37 Lenua ndu uta ẹ-ta nọdu l'ẹhu ẹnya;  
 nggu egbua ndu obu guru iphoro igo;  
 nggu aphụ lẹ ndu eme tẹ  
 nchị dụ ndoo e-dobe akọ.

38 Obenu lẹ ndu eme iphe dụ ẹji;  
 bẹ ee-me t'ẹphe bụru kpurupyata.  
 Iphe bụ unwu ndu akirishi  
 l'ẹphe ha; a-chihukwa.

39 Ọ bụ Ojejoje adzọfutaje  
 ndu doberu ẹka ndoo.  
 Ọ bụ iya abujeru ẹphe  
 agbarike teke ẹphe eje iphe-ẹhuka.

40 Mbụ lẹ Ojejoje eyejeru  
 ẹphe ẹka nafuta ẹphe.

Ọonafutaje ẹphe l'ẹka  
 ndu akirishi; shi ẹge ono  
 dzọfuta ẹphe;  
 kẹ l'ẹphe gbabaru l'ime iya je ezeeru ndzụ.

## 38

Egvu-ọma, Dévidi guru gude nyataru Ojejoje  
 iphe

- 1 Nggube Ojejoje; be egudekwa  
 ọvuma baaru mu mba;  
 ọphu i gudekwa  
 oke ẹhu-eghughu  
 hùa mu àhùhù!
- 2 Kẹ l'akfụ ngu baakwaru mu l'ẹhu kẹ tųu.  
 I meruwaru mu ẹhu.
- 3 Ẹhu-eghughu ngu mewaru;  
 ẹhu ta adujehe mu npho.  
 Ẹjo iphe, mu meshiru;  
 emewa; ọkpụ, nọ mu l'ẹhu  
 amikota mu wongu-wongu.
- 4 Kẹ l'ẹjo iphe, mu meshiru  
 ripyabeekwaru mu.  
 Ọnyitabewa mu ẹra;  
 k'ọphu bụ lẹ mu ta  
 dūhedu ike evuvu iya.
- 5 Ọnya, aba mu nụ  
 rehuwaru erehu; l'eshi nshi.  
 Ishi iya aburu eswe, mu meru.
- 6 Mu kpọ-kfuwaru-a  
 akpọ-kfuru; dẹ ẹka l'agba.  
 Mkpurumkpuru;  
 bẹ mu agukota aphụ.
- 7 Okpurukpu-azụ tųkokwa  
 eshi mu nwaranwara.  
 E t'o nwehekwa ẹke ẹhu  
 dū mu npho; m'ọo nanụ.
- 8 Ụvo ta dūhekwa mu;  
 ike agvụwa mu.  
 Obu te gvuhewaru mu egvuru;  
 k'ọphu bụ l'ọ bụwaa ude bẹ mu atsu.
- 9 Nggube Ojejoje; iphe bụ iphe



- agụ mu nụ b'ì makọtaru.  
 Ude, mu atsụ bẹ ta bụhedu k'edomi.
- 10 Obu akfụ mu  
 gbudungu-gbudungu;  
 ọphu ike aduhedu mu.  
 Mu te egbe aphuhedu ụzo l'anya.
- 11 Ndu ọnyà mu phẹ;  
 mę ndu ọyi mu phẹ ezewaru mu ezeru.  
 Ishi iya aburu iphe-ẹhuka ono,  
 dakfutaru mu nụ ono.  
 Ndu obutobu mu phẹ  
 jewaru je evudo ote-anya.
- 12 Ndu achọ ishi mu  
 gbashiwaru mu ọnya.  
 Ndu eme t'ẹphe  
 meka mu iphe anọdu l'idzu  
 ẹge mu e-shi laa.  
 Ọ bụlephu idzu ẹge ẹphe  
 e-shi dzua ẹjo-ire bẹ ẹphe  
 anọje: eswe l'enyashi.
- 13 Mbẹdua dukwa l'ọ bụ onye  
 ada nkichi, ẹ-ta dudu iphe ọonuje;  
 dukwaphu l'ọ bụ onye te ekfudu okfu,  
 ẹ te nwedu okfu, eshije iya ọnu.
- 14 Mu dulephu l'ọ bụ onye  
 eekfu okfu eyeru;  
 ọphu o yedu ọnu;  
 ke l'ẹ tọ dudu iphe eekfu, ọ nuru.
- 15 Nggube Ojejoje;  
 mu nọduwa ngaberu ngu.  
 Ọ bụ nggube Nnajiufu,  
 bụ Nchileke mu, a-za mu  
 oku, mu eku ngu.

- 16 Mu ekfu; sụ: “Be ekwekwa  
t'ẹphe zụaru mu ukwe;  
m'ọ bụ t'ẹphe kulahaa  
onwẹphe ẹge ẹphe ẹ-ta  
hadu teke ọkpa chiswahuru mu.”
- 17 Ishi iya aburu ẹ mu angawa nganga k'adada.  
Ehu ahuwa mu ọku.
- 18 Mu ekfushiwa iphe dụ ẹji, mu meru.  
Ejo iphe mu meshiru atsụwa mu l'ẹhu.
- 19 Ndu ọhogu mu dukwa l'igwe; shihu ike.  
Ndu kpọru mu ashị  
l'ẹ b'ọ dụ iphe mu meru ẹphe  
ahakwaphu l'igwe.
- 20 Ndu egudeje ejo iphe  
kfua ụgwọ iphe-ọma,  
e meru ẹphe  
anọduje ekfuru mu  
ẹjo-okfu;  
kele mu anọduje eme iphe dụ mma.
- 21 Ba ahakwa mu; nggube Ojejoje!  
Nggube Nchileke mu;  
ba anọdukwa mu ote-ẹnya!
- 22 Mee ẹgwegwa bya agbaaru mu mkpu;  
nggube Ojejoje, bụ onye ndzọfuta mu!

## 39

Egvu-ọma, Dévidi deru nụ onye ishi egvu, bụ  
Jedutunu

- 1 Mu sụru ẹ mu a-kwachafuru onwomu ẹnya;  
tẹ mu be egude ọnu mu kfuta iphe dụ ẹji.  
Mu a-tuje ọnu mu eri teke  
mu ẹ ndu akirishi nọ.
- 2 Teke mu daru ashị;

t'ẹ b'ọ dọ iphe mu e-je  
 ekfukfu; m'o -ruhuru;  
 ọ bọru iphe dọ mma;  
 teke ono;  
 bẹ iphe-ẹhuka mu  
 gbe bya aka nshinu.

- <sup>3</sup> A nọnyaa;  
 obu agbajahulehaa mu agbajahu.  
 Mu arinyale iya phu;  
 to kwehe;  
 mu asanua ọnu wata okfu okfu; sọ:
- <sup>4</sup> “Nggube Ojejoje;  
 menua tẹ mu maru ẹge mu a-nọ-bebe.  
 Koshi nọ mu oge  
 nka-ezekuna nke mu;  
 mbu ẹge ọo-habe; mu achiri ọwa wushi.
- <sup>5</sup> I meru ndzu mu;  
 yọ gbaa sọ-kworongu.  
 Ẹge mu kataberu nka  
 te nwekwa iphe ọ bọ  
 l'ẹke i nọ.  
 Ndzu madzu dulekwaphu l'ọ bọ uphere-  
 ọnu.
- <sup>6</sup> Madzu bọ nwonyonyo mmanu b'ọ bọ.  
 Gbirigbiri ono, aanọduje  
 ada ono bulephu t'ọ bọru.  
 Ọokpaje ẹku dobe;  
 tọ ma onye e-ri ya nọ.
- <sup>7</sup> Nta-a Ojejoje;  
 ?bukpo ngunu; bẹ mu ele ẹnya iya?  
 Ọ bọ nggu; bẹ mu dakoberu.
- <sup>8</sup> Nafuta mu l'emeswe ono,  
 mu mesweru ngu ono!  
 Be ekwekwa tẹ ndu

- eme eswe kweeru mu une!  
 9 Mu shi kpoo ẹka l'agba  
     nọ-kirishia;  
     kẹ l'ọ bụ nggu;  
     bẹ iphe ono, amụkotaru mu nụ ono shi l'ẹka.
- 10 Ba ahùhe nụ mu àhùhù-a, ìhù mu-a;  
     kẹ l'ike agvụakwa mu l'iphe iime mu.
- 11 Ìibajeru madzụ mba;  
     hùà ya àhùhù kẹ iphe dọ ẹji, oome;  
     Ìitakashije iphe dọ mma  
     onye ono nweru l'ọ bụ  
     ẹka-mkpu.  
     Onyemonye ọbule;  
     bẹ ndzụ iya dọlephu l'ọ bụ uphere-ọnu.
- 12 Nnua ekfukfu, mu ekfu  
     anụ ngu nggube Ojejoje!  
     Ngabenu nchị lẹ mkpu,  
     mu echiku ngu!  
     Ba adahụkwa mu nkịchi  
     l'ẹkwa, mu ara araku ngu;  
     kẹle mu bụ onye ije  
     lakfuta ngu;  
     l'ọ bụ ndiche ayi phe.
- 13 Byiko ha mu rụ;  
     k'ọphu mu a-kabẹ nweru nwa ẹhu-ọtso-ẹna  
     m'ọo ujiku lanụ;  
     tẹmanu mu anwuhude.”

## 40

Egvu-ọma, Dévidi deru nụ onye ishi egvu

- 1 Mu takwaru nshi ngaberu Ojejoje;  
     gbururu jeye yọ ngabe nchị; nua olu mu.
- 2 Yọ bya anwufuta mu lẹ nsụ, anyị ishi ẹdzu;

mbụ kufuta mu l'epoto ụra, mu nọ;  
 bya eworu mu kfuḅe l'eli  
 agburanyi mkpuma;  
 mee mu; mu evudoshia ike.

<sup>3</sup> Yọ bya eworu egvu  
 ọphungu ye mu l'ọnu.  
 Mu egude egvu ono wata  
 ọja Nchileke ayi ajaja.  
 Aa-dụ l'igwe phụ iphe meru nụ;  
 wata ọtsu egvu.  
 Ẹphe alaphuta azụ bya adakobe Ojejoje.

<sup>4</sup> Ọnu-ọma bụ k'onye,  
 bụ Ojejoje b'ọ dakoberu;  
 onye ẹ te eledu ndu, eku  
 onwẹphe ekuku ẹnya l'ifu;  
 too tso ndu chiru ụkfu  
 kwẹe l'iphe ẹ-ta dudu iphe ọ bụ.

<sup>5</sup> Nggube Ojejoje,  
 bụ Nchileke mu;  
 iphe dụ biribiri, i meshiru;  
 mẹ iphe ịichi idzu k'omeru ayi;  
 bẹ hakwa l'igwe.  
 Ọphu ọ dudu onye a-dụ ike  
 gushi-geeru ngu iya.  
 Ọ -buru l'ọo tẹ mu gwa ya nanu nanu;  
 bẹ ọo-ga abukwa  
 'aguta aguta.

<sup>6</sup> Iphe agụ ngu nụ ta bukwa  
 t'a gwajẹ ngu agwagwa;  
 m'ọ bụ t'e gwotaru ngu ngweja.  
 Obenu l'ị hawaru mu ẹnu nchị.  
 Ngweja-ukfuru;  
 mẹ ngweja-iphe dụ ẹji

- ta dudu ophu jiru ngu epho.
- 7 Ya ndono; mu asu:  
 “Owaa mu Nchileke!  
 Mu byawaru te mu mee  
 ege e deru ke nke mu le Ekwọ Ekemu.
- 8 Nggube Nchileke mu;  
 iphe du mu mma bu te mu  
 mee iphe bu uche-obu ngu.  
 Ekemu ngu anojele mu phu l'obu teken-  
 teke.”\*
- 9 Mu gudewa onu mu kfuwa  
 k'odobе-eka-ndoo ngu l'edzudzu oha.  
 Nggube Ojejeje;  
 i mawaru le mu te dobedu onu ndoo.
- 10 Mu ta asumijedu  
 odobe-eka-ndoo ngu  
 l'obu mu.  
 Mu ekfukashije l'i bu  
 o-me-g'o-kfuru;  
 buru onye ndzofuta;  
 ophu mu 'ahadu okfuru  
 oha l'ophu ege i yetaberu madzu obu;  
 buru onye ire-lanu.
- 11 Nggube Ojejeje;  
 byiko ba ahakwa mu ophuru imiko.  
 T'o bukwaru n-yemobu  
 yele ire-lanu ngu a-nodu  
 eche mu mkpurumkpuru!
- 12 Iphe-ehuka, bu 'o-nwe-aguta  
 gbaakwaru mu mgburumburu;  
 ejo iphe mu meshiru  
 ano-chiwa mu uzo;

---

\* 40:8 40:6-8 Hіб 10:5-7.

k'ophu bu le mu ta aphuhedu uzo.  
 O ka egbushi, no mu l'ishi l'igwe.  
 Nta-a; be mu ta mahekwa ege mu e-me iya.

13 Nggube Ojejoje;

t'o bunuru uche ngu t'i dzoo mu!  
 Bya nu nta-a; bya eyeru mu eka!

14 Te iphere bukwaru ke ndu achọ ishi mu;

mbu t'ekwo-nji jikwaa ephe.  
 Kpua ephe ifu l'ali; chilala ephe azu;  
 mbu ndu ari t'e b'o duru mu le mma;  
 kpua ephe ifu l'ali;  
 chilala ephe azu.

15 Te iphere bukwaru ke ndu

azuru mu ukwe;  
 t'ehu dakwaa ephe koo.

16 T'iphe bu ndu achọ ngu nu;

bukwaru ndu ehu a-noduje atso ena;  
 ephe anodu ngu l'eka tee eswa.  
 Te iphe ephe a-kpuru l'onu;  
 mbu ndu o du t'a su l'i  
 dzofutaru ephe buru:  
 "Ojejoje du egvu!"

17 Obenu le mbedua bu onye ukpa;

bukwaruphu onye aka eka ikarikari.  
 Obenu le Nnajiufu arile-e oriri ehu mu;  
 mbu l'o bu nggube  
 Nchileke mu bu onye  
 eyejeru mu eka;  
 buru onye adzoje mu nu.  
 Nggube Nchileke nke mu;  
 ba akpokwa ukfu!

## 41

Egvu-ọma, Dévidi deru nụ onye ishi egvu

- 1 Ọnu-ọma bụ k'onye  
eyejeru ndu ụkpa ẹka;  
kele Ojejoje a-dzọfuta iya  
teke ooje iphe-ẹhuka.
- 2 Ojejoje a-kwachi iya;  
dobe iya ndzụ.  
Yọ buru onye a gọru  
ọnu-ọma nụ ọ mgboko.  
Ojejoje te enwuduru iya eye;  
te ndu ọhogu iya mee ya  
ẹge dụ ẹphe mma.
- 3 Ojejoje a-gbaru iya mkpu  
teke ome-l'ẹhu turu iya ye l'ulo;  
mee t'ọ gbakerehu l'iphe bụ ẹhu-ọtsu-ume  
iya.
- 4 Mu asụ: “Nggube Ojejoje;  
phunuaru mu imiko!  
Menua mu te mu koro hu l'iphe eme mu nụ;  
kele mu mewaru ngu ẹji!”
- 5 Ndu ọhogu mu anọduje  
ekfuru mu ejo okfu; sụ:  
“?Bụ teke ole; be mu a-nwuhu;  
t'a zahaa mu ọ mgboko-a?”
- 6 Madzụ -bya mu ajiji;  
yoo kfuru mu iphe, ẹ te shidu iya l'obu.  
Iphe ọ byaru; aburu t'ọ bya  
anuta iphe dụ ẹji l'ẹhu mu.  
Ọ -lufulephu;  
yọ wata edori ẹhu mu.
- 7 Iphe bụ ndu, mu dụ ashi  
anọduje adzụ-phe



- taphatapha l'ekfubyishi mu.  
 Ọ bụlephu iphe, bụ iya  
 katsụkpo ẹji;  
 bẹ aduje ẹphe t'o mee mu.
- 8 Ẹphe asụ: “Tụswekwa!  
 L'ọ kwa 'o-nwe-agwọta byaru mu.  
 L'ọ tụ-ruakwaru mu azụ ali;  
 k'ọphu bụ lẹ mu te  
 egbeshihakwa egbeshi ọdo.”
- 9 Mbụ jeyekpo l'onye ọphu  
 mu ẹya eshi ọkpobe ọnya;  
 bụru onye mu dakoberu;  
 mbụ onye mu l'iya  
 gba mgba ria nri mu;  
 bẹ gbeshiru nụ;  
 chọlahaa ẹge ee-shi t'ọ tsuru mu.\*
- 10 Ọlobu; nggube Ojejoje;  
 phunuaru mu imiko!  
 Meeru tẹ mu gbakerehu;  
 k'ọphu mu a-kfụ ẹphe  
 ụgwọ iphe-a, ẹphe eme  
 mu-wa.
- 11 Mu marua lẹ mu nọ ngu l'obu;  
 kẹ l'ẹ ti kwedu tẹ ndu  
 ọhogu mu mekputa mu.
- 12 Keshinu ọphu ụta ẹ-ta dudu mu l'ẹhu;  
 bẹ ịi-pali mu-a;  
 dobe onwongu l'ifu;  
 tẹ mu nọdu gbururu jeye lẹ tutu yoyo.
- 13 T'e tua Ojejoje ẹpha;  
 mbụ Nchileke kẹ ndu Ízurelu;  
 gbururu jeye lẹ tutu yoyo.

---

\* 41:9 41:9 Jọn 13:18.

Ono kwa ẹge ọ dụ.  
Ono kwa ẹge ọ dụ.

## 42

Ẹvù, a raru nù onye ishi egvu tẹ Ụnwu Kora gụa

<sup>1</sup> Ọ bụ ẹge nne ele anọduje atụ hengu hengu;  
l'achọ nggele ẹke ọo-gụ mini;  
bẹ mu atụ hengu hengu  
l'achọ nggube Nchileke.

<sup>2</sup> Obu Nchileke; dụ mu;  
mbụ Nchileke ọphu nọ ndzụ.  
?Bụ teke ole; bẹ mu e-vudo iya l'ifu?

<sup>3</sup> Ẹnya-mini mu bụwa nri mu: eswe l'enyashi;  
kẹ l'ẹ tọ dudu teke ndiphe ta ajjedu mu:  
“?Ba awe; bẹ Nchileke mu nọ?”

<sup>4</sup> Nta-a, mu tuko iphe nọ mu l'obu ekfushi-a;  
bẹ mu nyataru ẹge mu shi edujeru ndu ọha;  
ayi atuko azụ eje l'ulo Nchileke;  
azụ egvu ẹhu-otso-ena;  
l'ekele Nchileke ekele;  
mbụ ndu ọha, byaru ọgba aji ono.

<sup>5</sup> ?Bụ ngunu meru iphe ẹhu daru mu kọo.  
?Bụ ngunu meru iphe  
ọkpoma akfụ mu nkfụ.  
Mu a-nọdu ele Nchileke ẹnya l'ẹka;  
kẹle mu e-mekochaa jaa ya ajaja;  
mbụ onye bụ iya bụ onye adzofutaje mu nù;

<sup>6</sup> bụru Nchileke mu.  
Ẹhu chihukwaru mu echihu.  
Ọo ya meru iphe mu nọdu  
l'alị Jọdanu nyata ngu;  
mbụ l'alị Hemonu lẹ Ugvu Miza.

<sup>7</sup> Ebo mini akporu ebo mini ibe iya gerugeru.

- Ẹnari ngu; mẹ uphere ngu  
 tsowaru l'ọ bụ mini bya ekpua mu.
- 8 L'eswe bẹ Ojejoje ekoshije mu n-yemobu iya.  
 O -be l'enyashi;  
 mu akpuru egvu iya l'ọnu;  
 l'ekfukfu, mu ekfuje anụ  
 Nchileke, gude ndzụ mu.
- 9 Mu sụru Nchileke,  
 bụ agbara-mkpuma mu:  
 “?Bụ ngunu kparu iphe  
 i zaharu mu?  
 ?Bụ ngunu kparu iphe ndu  
 ọhogu mu akpa mu ẹhu;  
 yọ bụleruphu aphụ; bẹ mu agụ”
- 10 Ndu achi mu nụ anọduje ezi mu okfu; su:  
 “?Nanuhunu Nchileke mu ọbu?”  
 Iphe ono, ẹphe anọduje  
 ekfu ono tükowa ọkpu,  
 nọ mu l'ẹhu amipyashi amipyashi.
- 11 ?Bụ ngunu meru iphe ẹhu daru mu kọo?  
 ?Bụ ngunu meru iphe  
 ọkpoma akfụ mu nkfụ?  
 Mu a-nọdu ele Nchileke ẹnya l'ẹka;  
 kele mu e-mekochaa jaa ya ajaja;  
 mbụ onye bụ iya bụ onye  
 adzofutaje mu nụ;  
 bụru Nchileke mu.

## 43

- 1 Hanuaru mu enge;  
 nggube Nchileke;  
 nggu agbaaru mu ọdzori.  
 Nafuta nụ mu l'ẹka ndu ono,

ẹ ta madu ngu nụ ono!  
 Gbafuta mu l'ẹka ndu ụgho; mẹ ndu  
 akirishi.

- 2 Keshinu ọ bụ nggube  
 Nchileke bụ ike mu;  
 ?nanụ ẹge ọ dụ;  
 b'ị gwọberu mu?  
 ?Bụ ngunu kparu iphe  
 ndu ọhogu mu akpa mu ẹhu;  
 mu eje ogbe-ogbe.
- 3 Menua t'ọ bụru iphoro ngu  
 yele ire-lanụ ngu a-nọdu edu mu.  
 Yo dua mu durua mu  
 ugvu ngu ono, dụ nsọ ono;  
 mbụ t'ẹphe durua mu ẹke  
 i bu gẹdegede.

- 4 Teke ono; bẹ mu a-byaruta  
 ẹnya-ngweja  
 nggube Nchileke;  
 mbụ Nchileke ono,  
 bụ ẹhu-otso-ena mu;  
 bụru onye ono, mu ete ẹswa iya ono.  
 Mu a-kpọ une gude jaa ngu  
 ajaja nggube Nchileke,  
 bụ Nchileke mu.

- 5 ?Bụ ngunu meru iphe ẹhu daru mu kọo.  
 ?Bụ ngunu meru iphe  
 ọkpoma akfụ mu nkfụ?  
 Mu a-nọdu ele Nchileke ẹnya l'ẹka;  
 kele mu e-mekochaa jaa ya ajaja;  
 mbụ onye ono, bụ iya  
 adzofutaje mu nụ;  
 bụru iya bụ Nchileke mu.

## 44

Évù, a raru nù onye ishi egvu tẹ Ụnwu Kora gụa

<sup>1</sup> Nggube Nchileke;

ayi gudewa nchị ayi nua;  
nna ayi oche phẹ akọwaru  
ayi iphe i meshiru  
l'oge nk'ẹphe; teke ndiche.

<sup>2</sup> Ẹphe kọru ayi l'ọo

nggubedua gude ike ngu  
chishia iphe bụ mbakeshi l'alị ẹphe;  
bya eworu ndu nke ngu dzaa l'alị ono.  
Ọhamoha ono b'i mebyishiru;  
bya emee nna ayi oche  
phe;  
ẹphe ajàa ajàjà.

<sup>3</sup> Ẹ tọ bụdu ngwa-ọgu;

bẹ ndu nke ngu gude lụta alị ono;  
tọ bụ l'ike k'ọkpu-ẹka ẹphe.  
Ọ bụ l'ike nke ngu yẹle  
ọkpu-ẹka nke ngu;  
mẹ eswiru ono, i swiru  
ẹphe ono;  
bẹ ẹphe gude lụta iya;  
kẹ l'i yeru ẹphe obu.

<sup>4</sup> Ọ bụ nggu bụ eze mu;

bụru Nchileke mu.  
Ọ bụ nggu emeje t'ụnwu  
Jékọpu lụ-gbua l'ọgu.

<sup>5</sup> Ọ bụ nggu; bẹ ayi anoje l'ẹka;

chị-phu ndu ọhogu ayi azụ.  
Yọ bụru ẹpha ngu;  
bẹ ayi egudeje dzọo ndu  
ọhogu ayi pyakapyaka.

- 6 Mu ta achiḍuru ukfu kwẹe l'akfu, mu chi;  
 ọphu ogu-mbeke mu 'adzodu mu.
- 7 Obenu l'i meru t'ayi lu-gbua ndu ọhogu ayi.  
 Ndu ayi du ashị b'i kpuru ifu le ntụ.
- 8 Ọ bu Nchileke; be ayi egudeje  
 asa nsasa mbọku-mbọku;  
 buru nggube Nchileke;  
 be ayi a-ọdu aja ajaja  
 gbururu jeye le tutu yoyo.
- 9 Obenu le nta-a;  
 b'i jikawaru ayi;  
 bya ekpuwa ayi ifu le ntụ.  
 Ọphu i tsojehedu ndu soja ayi eje ọgu.
- 10 I haru ndu ọhogu ayi;  
 ẹphe achi-phu ayi azu;  
 ndu ayi du eji l'anya abya  
 atuko ẹku ayi gwoo tutua.
- 11 I chi-waru ayi haa l'ọ bu aturu,  
 e doberu k'egbugbu;  
 tufashiwa ayi l'iphe bu mbakeshi.
- 12 I reshiwaru ndibe ngu torotoro;  
 l'ẹ b'ọ du uru, i ritaru l'ishi ẹphe.
- 13 I mewaru ayi; ndu obutobu  
 ayi l'azuru ayi ukwe;  
 l'achi ayi ọchi;  
 l'aja ayi ewena.
- 14 I mewaru ayi; iphe bu  
 mbakeshi egude ayi anma ẹjo ẹtu.  
 Ndiphe -phua ayi;  
 a kpo-yiaru ayi ukuvu.
- 15 Mbọku-mbọku;  
 be aanọduje eme mu  
 iphe-iphere.

- E mewaru mu ifu kpube mu ẹ ntụ;  
 16 kele ndu ọhogu mu;  
     mẹ ndu eme t'ẹphe melata  
     ugwo-iphe e meru ẹphe  
     anọduje azuru mu ukwe;  
     l'ekfubyishikwa mu phu.  
 17 Iphe-a l'ọ ha mekotaru ayi;  
     e guderu l'ayi ta zahabua ngu;  
     tọ bu l'ayi dakajeru ndzụ, ayi ẹ nggu gbaru.  
 18 Obu ayi ta lufubua l'ẹke ịno;  
     ọphu ọ bụdu l'ayi dakajeru ekemu ngu.  
 19 Obenu l'i gweru ayi rakaraka  
     wushiru nkuta-ọswa.  
     I gudewa oke ẹkpuru-ọchi kpuchia ayi.  
 20 Ndege ọ bu l'ayi zaharu Nchileke ayi;  
     wata ọbaru agwa ndu alị ọdo ẹja;  
 21 ?Nchileke ta ga amadunua tọ;  
     keshinu ọ makotaru iphe madzụ arị l'obu?  
 22 Ọ bu l'okfu ẹhu ngu;  
     b'ẹ to nwedu mbọku, anwuhu  
     ta anọdujedu achị ayi.  
     Aanọduje eme ayi l'ọ bu aturu,  
     a chitaru eje egbugbu.\*  
 23 Nnajiufu; ehu nụ etehu!  
     ?Bụ ngunu kparu iphe iiku mgbenya?  
     Tehu etehu; ba ajikashi nụ ayi  
     tugbuwararu!  
 24 ?Bụ ngunu meru iphe  
     ẹ ti yheduru ayi ọnu?  
     ?Bụ ngunu meru iphe  
     ị zaharu iphe-ẹhuka, ayi eje;

---

\* 44:22 44:22 Róm 8:36.

mẹ ẹhu, aakpa ayi?

<sup>25</sup> E mewaru ayi; ayi adaa; nmaa ẹpho l'ali;  
mbu l'ishi ruakwaru ayi ali.

<sup>26</sup> Gbeshi nu yeru ayi ẹka!  
Gude ke n-yemobu ngu gbafuta ayi!

## 45

Évù, a raru nu onye ishi egvu te Unwu Kora  
gua. T'e gude olu egvu "Okfukfulike" gua ya  
egvu ẹswa-nwanyi

<sup>1</sup> Okfu oma jiru mu onu;  
te mu kfuru yeru eze.  
Ire mu dukwa l'o bu  
mkpishi-ekwo onye maru ode ekwo.

<sup>2</sup> ?O nweru onye ka ngu oma mma.  
Okfu, shi ngu l'onu bu iphe-oma;  
kele Nchileke gowaru ngu onu, a-no ojejoje.

<sup>3</sup> Nggube O-gbua-o-turu-ugo;  
wota ogu-mbeke ngu kee l'ukfu!  
Wota odu-biribiri ye  
o-gbu-nwii-nwii yee l'o bu uwe!

<sup>4</sup> Nodu l'ugbo-inya ngu;  
nggu egude o-du-ugvu ngu  
gbaa wugowugo  
luru ire-lanu ogu;  
me owozita onwonye ali;  
me odobe-eka-ndoo.  
Gude ike ngu mee iphe du biribiri.

<sup>5</sup> Te akfu ngu ono, atsụ nkọ ono  
mejelephu ke tsuu le  
meji ndu ohogu nggube eze.  
Te iphe bu mbakeshi  
dajekwaa ngu kpurumu l'ifu.



- 6 Nggube Nchileke;  
 ọ bụ ege ị bụ eze nta-a;  
 bụ ege ịi-buru iya gbururu jeye le tutu yoyo.  
 Ọ bụ ikpe, dụ mma;  
 b'i gude achi.
- 7 Odobe-eka-ndoo aduje ngu mma;  
 akirishi adukwa nu ngu ashi.  
 Oo ya meru iphe Nchileke, bụ Nchileke ngu  
 shi le manu ehu-otso-ena,  
 ọ wuru ngu l'ishi  
 mee t'i kakota ndu ogbo ngu.
- 8 Uwe-eze ngu l'ọ ha;  
 tukoru eshi meeru meeru;  
 l'eshi alowe;  
 l'eshikwaphu kashia kashia.  
 Une, a no l'ufu-eze akpo;  
 emeje t'ehu tsoo ngu ena;  
 mbu ufu-eze, e gude  
 odu-enyi memaa emema.
- 9 Unwanyi ibe ngu,  
 aakwabe ugu;  
 hakwaru buru unwada eze.  
 Ọ bụ l'eka-utara ngu;  
 be eze-nwanyi vudo.  
 Iphe o yeru l'ehu b'e gude  
 okpobe mkpola-ododo,  
 shi Ofi.
- 10 Ngabekwa nchi nggube  
 ada-eze!  
 Byiko; rikwaa iphe-a,  
 mu abya ekfukfu-a ariri!  
 Zahakotakwa ndibe unu;  
 me ndu nna ngu phe!

- 11 Lẹ mma, ịima meekwaru;  
 nggu agụ eze agụgu.  
 Keshinu ọ bụ iya bụ  
 onye nwe-ngu nụ;  
 kwabejekwa iya ugvu!
- 12 Ndu Táya a-byakwa ngu  
 ọnya-ko iphe;  
 ndu nweru iphe awataru  
 ngu omeru ọhuma;  
 ẹge ee-shi t'ẹphe nọdu ngu l'obu.
- 13 Ada-eze bẹ nọ  
 l'o-gbu-nwii-nwii iya;  
 e duba iya l'ulo.  
 Uwe iya b'e gude òwúú  
 mkpọla-ododo kwee.
- 14 E yeru iya uwe,  
 a kwamaru akwama;  
 duru l'ejekfu eze;  
 unwu-mgboko ibe iya etsoru iya.  
 Ẹphebedua bẹ eedukwaphu edujeru eze.
- 15 Ẹhu atsọ ẹphe ẹna; ẹphe ete ẹswa;  
 l'ẹke eedu ẹphe abahun  
 l'obu-eze.
- 16 Nggube eze; ọ bụ unwu ngu  
 a-nọdu l'ozori nna ngu oche phe.  
 Ọ bụ ẹphe; bẹ ii-me t'ẹphe  
 bụru ishi lẹ mgboko mgburumburu.
- 17 Mu e-me t'ẹ ba azahashi  
 ẹpha ngu azaha tsube l'ogbo rua l'ogbo.  
 Ọ ya bụ l'iphe bụ mbakeshi  
 a-nọdu ekele ngu ekele  
 gbururu jeye gbururu.

## 46

Egvu, e deru nụ onye ishi egvu tẹ Ụnwu Kora  
gude olu ụnwu-mgboko gụa ya

- <sup>1</sup> Ọ bụ Nchileke bẹ bụ onye  
ayi nọ l'ẹka ezeru ndzụ;  
bụru iya bụ ike ayi.  
Ooswijeru ayi eswiru  
l'eyeru ayi ẹka teke  
ayi eje iphe-ẹhuka.
- <sup>2</sup> K'ọphu bụ l'ayi ta atsudu egvu;  
m'o -ruhuru;  
mgboko dakashihu;  
ugvu adalashihu l'eze ẹnymu;
- <sup>3</sup> mini, nọ l'eze ẹnymu byalahaa kulakula;  
k'ọphu bụ l'ugvu ugvu  
wataru ọnma jijiji; bẹ ayi ta  
atsudu egvu lẹ phuu.
- <sup>4</sup> O nweru ẹnymu ọphu ọnu.  
Mini, shi iya nụ emeje  
t'ẹhu tsọ mkpukpu kẹ Nchileke ẹna;  
mbụ ẹke dụ nsọ,  
Ọkaribe-Kakọta-Nụ bu.
- <sup>5</sup> Nchileke nọkwa lẹ mkpukpu ono;  
k'ọphu bụ l'ẹ t'ọ dudu iphe eme iya nụ.  
Nchi -bya abọhu;  
bẹ Nchileke agbawaru iya mkpu.
- <sup>6</sup> Iphe bụ mbakeshi etsu ẹka l'ọkpoma.  
Nchileke ewolia olu;  
raaru ẹphe ọra;  
alị-eze ẹphe adakashihu;  
mgboko l'onwiya erushihu.
- <sup>7</sup> Ojejeje, bụ  
Ọkaribe-Kakọta-Ike;

- bẹ ọkwa swiru ayi.  
 Ọ kwa Nchileke kẹ Jékọpu  
 bụ a-gbabe-a-dzuru nk'ayi.
- 8 Byanu bya aphụ iphe Ojejoje meru.  
 Byanu bya aphụ ẹge o meru mgboko;  
 yọ bụru kpurupyata!
- 9 Oomeje tẹ ndiphe haa ọlu ọgu.  
 Ọogba-jishije akfụ; mebyishia arwa;  
 kpọkota ụgbo-inya ọku.
- 10 Ọ sọru: “Unu ọdu nwandoo;  
 maru l'ọ bụ yẹbedua bụ Nchileke.  
 Iphe bụ mbakeshi a-tụ ọnu  
 yẹbe Nchileke lẹ mgboko  
 gbaa mgburumburu lẹ ya ha nshinu.”
- 11 Ojejoje, bụ  
 Ọkaribe-Kakọta-Ike bẹ ọkwa swiru ayi.  
 Ọ kwa Nchileke kẹ Jékọpu  
 bụ a-gbabe-a-dzuru nk'ayi.

## 47

Egvu, e deru nụ onye ishi egvu tẹ Ụnwu Kora gwa

- 1 Unu kua ẹka; unubẹ ndiphe!  
 Unu gude ẹhu-otso-ena  
 chiaru Nchileke  
 mgbe-egvu!
- 2 Ishi iya aburu lẹ Ojejoje, bụ  
 Ọkaribe-Kakọta-Nụ dọ biribiri;  
 bụru iya bụ eze lẹ mgboko mgburumburu.
- 3 O wotawaru iphe bụ  
 mbakeshi ye ayi l'ẹka.
- 4 Ọ bụ yẹbedua fọtaru ayi alị, ayi bu;  
 mbụ alị ono, Jékọpu, bụ  
 onye Nchileke yeru obu

- egudeje eku onwiya ono.
- <sup>5</sup> Nchileke ejewa l'aba-eze iya.  
Eechiwaru iya mkpu  
ẹhu-ọtso-ẹna;  
l'egburu iya ụpyoku.
- <sup>6</sup> Unu gụa egvu gude kele  
Nchileke ekele!  
Unu gụaru iya egvu ekele!  
Unu gụa egvu gude  
kele eze ayi!  
Unu gụaru iya egvu ekele!
- <sup>7</sup> Kẹ l'ọ bụ Nchileke bụ eze  
lẹ mgboko gbaa mgburumgburu.  
Unu raa ẹvù gude jaa ya ajaja!
- <sup>8</sup> Ọ bụ Nchileke bụ eze iphe bụ mbakeshi.  
Ọ nọ l'aba-eze iya, dụ nsọ.
- <sup>9</sup> Ndu nweru ẹnya lẹ mgboko  
dzukobekwaru l'ọ bụ  
ndibe Nchileke kẹ Ébirihamu;  
kẹle ndu eze, achi  
mgboko-a  
bụkwa Nchileke nwe ẹphe.  
Ọ kwa Nchileke;  
bẹ kangokotaru nụ.

## 48

Egvu-ọma, Ụnwu Kora guru

- <sup>1</sup> Ojejoje ha nshinu.  
T'a jakwaa ya phụ ajaja, gbaru iya nụ  
lẹ mkpukpu kẹ Nchileke ayi;  
mbụ ugvu ono, dụ nsọ ono.
- <sup>2</sup> Mkpukpu ono ama ntumatu l'eli ugvu ono;  
bụru iya bụ ẹhu-ọtso-ẹna

- ndiphe mgburumgburu.  
 Ugву Záyọnu nọ l'ụzo  
 isheli Jerúsalemu,  
 bụ mkpụkpu eze,  
 ha nshinu.
- <sup>3</sup> Nchileke nọwa  
 l'ulo ozeru-ndzụ iya.  
 O mewaru t'a maru l'ọo yẹbedua  
 bụ a-gbabe-a-dzuru.
- <sup>4</sup> Ndu eze chikoberu ndu soja  
 ẹphe wuru bya t'ẹphe bya  
 etso mkpụkpu ono ọgu.
- <sup>5</sup> Ẹphe abyaruta bya ebu iya ifu;  
 tsuhu egvu; gbalashia.
- <sup>6</sup> Ẹphe tsuru egvu nshinu l'ẹke ono.  
 Ẹhu ahua ẹphe ọku l'ọ bụ nwanyi, ime eme.
- <sup>7</sup> I mebyishiru ẹphe ẹge pherephere,  
 shi l'ụzo ẹnyanwu-ahata  
 emebyishije ụgbo-mini Tashishi.
- <sup>8</sup> Ọ bụ iphe ayi nuru; be ayi  
 phuru le mkpụkpu Ojejoje,  
 bụ Okaribe-Kakota-Ike;  
 bụ iya bụ mkpụkpu Nchileke ayi;  
 be Nchileke mewaru t'ọ nguru anguru  
 gburu jeye le gbururu.
- <sup>9</sup> Ayi anọduje l'ime eze-ulo nggube Nchileke  
 l'ari k'obu ono, i yeru ayi ono.
- <sup>10</sup> Nggube Nchileke;  
 ọ bụ ẹge ẹpha ngu ngaru  
 ẹkemeke ọbule;  
 bụ ẹge aajaberu ngu ajaja  
 le mgboko gbaa mgburumgburu.

- Ọ bụ ikpe, dị mma;  
b'i gude achi.
- 11 Ẹhu atso Ugvu Záyọnu ẹna;  
l'atsokwaphu ndu Júda;  
kẹ l'iikpeje ikpe nhamunha.
- 12 Unu jepheedu Záyọnu.  
Unu tsophee ya mgburumgburu;  
gụa ọlo-eli, o nweru ọgu!
- 13 Unu anyatakwa kẹ ọpho-mkpuma,  
e gude kpụ-pheta iya mgburumgburu!  
Unu egbukwaaphu igo  
l'ọlo ozeru-ndzụ, nọgbaa ya nụ;  
k'ọphu unu a-kọru iya  
ọgbo ọphu nọ l'ifu.
- 14 Ishi iya aburu l'ọo  
Nchileke a-buru Nchileke  
ayi gburu jeye lẹ gbururu;  
buru iya a-nọdu edu ayi jeye lẹ tutu yoyo.

## 49

Egvu-ọma, e deru nụ onye ishi egvu tẹ Ụnwu  
Kora gụa

- 1 Unubẹ ndiphe;  
unu nụkwaa iphe-a.  
Unu ngabekwa nchi;  
unubẹ ndu bu lẹ mgboko-a.
- 2 Tẹ ndu ha nshinu gebekwa nchi;  
ndu ha nwanshi egebe.  
Tẹ ndu nweru iphe gebekwa nchi;  
ndu ụkpa egebe.
- 3 Okfu, shi mu l'ọnu a-buru  
okfu onye maru iphe;  
iphe mu ritaru l'obu emee t'iphe doo ẹnya.

- 4 Mu e-woru nchị gebe l'etu,  
gude iya; kpoo une  
shi iya koshia iphe etu ono bu.
- 5 ?Bunua ngunu e-me te mu  
tsua egvu teke iphe-ehuka byaru;  
mbu teke ndu, mu du ashi  
no-pheru mu mgburumburu;
- 6 mbu ndu achijeru obu ye  
l'eku, ephe kpataru;  
gude akanya, ephe setaru l'eku onwephe.
- 7 E to dukwa madzu  
nwigbaleke-oma, a-du ike gbafuta ibe iya;  
to du onye a-du ike kfu  
Nchileke aswa ishi onwiya.
- 8 Ishi iya aburu l'iphe aakfuje  
gude gbata ndzu hanukakwa l'uru.  
E to dukwa iphe madzu,  
kfu, dzuru iya nu;
- 9 mbu ugwo, oo-kfu nodu  
ndzu gbururu jeye;  
to nwuhu anwuhu.
- 10 Onyemonye phunuaru-a  
le ndu mmamiphe anwuhuje;  
ndu eswe;  
me 'o-nwe-egomunggo phe  
anwuhujekwaphu;  
haaru ndu odo eku ephe.
- 11 O bu ili ephe a-buru ephe  
ulo gburu jeye.  
Eke ono; be ephe a-no  
jeye le nwanwanwanwanwa;  
e guderu l'ephe shi  
nwetsuaru ali, ephe gushiru onwephe.



- 12 Obenu l'ẹku, madzụ nweru  
 ta akpọshijekwa iya anwụhu.  
 Ọ bụ-a ẹge anụ ẹgu-ẹgbudu  
 anwụhuje bụ ẹge oo-mekochaa nwụhu.
- 13 Phụaru ẹge ọda-kfuje ndu,  
 suru onwẹphe ẹka nahụ;  
 mẹ ẹge ọomujeru ndu awụ etso ẹphe;  
 mbụ ndu iphe ẹphe anọduje ekfu aduje  
 mma.
- 14 Ẹphe e-mekochaa nwụshihu l'ọ bụ aturu.  
 Yọ bụru ndu doberu ẹka  
 ndoo a-bụru ishi l'achi  
 ẹphe; m'ọ -be l'utsu.  
 Ẹphe ereshihu;  
 m'e -shilephu l'ẹgiri ufu ẹphe ono  
 paru ẹphe eje oye nsụ.
- 15 Obenu ẹ mbedua;  
 be Nchileke a-dzọta  
 te mu ba abahụ l'ali-maa;  
 ke l'oo-mekochaa duta mu donyabe onwiya.
- 16 T'ẹ b'ọ tsujekwa ngu l'ẹhu  
 m'ọ -bụru ẹ madzụ nọnyaaru;  
 bya enwee iphe;  
 k'ọphu ndiphe wataru iya  
 ọkwabe ugvu nshinu;
- 17 ke l'ẹ to nwedu iphe oo-gude  
 ala maa teke ọ-nwụhu;  
 ọphu ugvu iya ọbu  
 'etsokwa iya ala l'ili.
- 18 Ọ bụ oswi-okfu ẹ teke ọ nọ ndzụ;  
 b'ọ shi gua onwiya ẹ ndu  
 a ọru ọnu-ọma nụ;  
 ndiphe eshi ajaja iya ajaja;  
 l'ọ bụ onye ẹka atụ atụtu.

- 19 Obenu l'ọ -nwuhulephu;  
 yọ lakfushia ndiche iya phẹ l'ali-maa;  
 ẹke ẹ tọo phudu iphoro jeye ẹ tutu yoyo.
- 20 Onye nweru ẹku; t'ọ ma iphe;  
 bu-a ẹge anụ-ẹgu-ẹgbudu anwuhuje-a  
 bu oo-mekochaa nwuhu.

## 50

Egvu-ọma, Ásafu deru

- 1 Ọ kwa Ọkaribe-Kakọta-Ike,  
 bu Nchileke; mbu Ojejoje be ekfu nu.  
 Ooku ndiphe mgburumburu;  
 tsube l'uzo ẹnyanwu-ahata;  
 rua l'uzo ẹnyanwu-ariba.
- 2 Nchileke no ẹ Záyọnu  
 l'enwu l'ọ bu ọku;  
 mbu Záyọnu ono, ama ntumatu ono.
- 3 Nchileke ayi abyaakwa.  
 Ọbule ẹ tọo dakwa ashị.  
 Ọku, ata chichichi no iya l'uzo ifu.  
 Oke pherephere anọ-phae  
 ya mgburumburu.
- 4 Ooku igwe; l'eku ali;  
 t'ephẹ bya aburu ndu ekebe;  
 phu ẹge ya gude ekpe ndu nk'iya iya ikpe.
- 5 “Unu chikoberu mu ndu,  
 bu ndu nke mu l'ephẹ ha;  
 mbu ndu mu l'ephẹ gude  
 ngweja gbaa ndzu.”
- 6 Imigwe l'ọ ha anọduje atụ onu  
 ẹge Nchileke bu-be onye doberu-eka-ndoo;  
 kele Nchileke l'onwiya bu onye ikpe.
- 7 “Ndu mu; unu ngabẹ nchi;

tẹ mu kfuru yeru unu.

Tẹ mu gbaa unubẹ ndu Ízurelu ekebe.

Ọ kwa mube Nchileke bu Nchileke unu.

<sup>8</sup> E tọ bukwa kẹ ngweja,

unu egwoje anu mu;

m'ọ bu kẹ ngweja-ukfuru,

unu egwojeru mu;

bẹ mu abaru unu mbà iya;

kẹle ndu onanu;

bẹ unu emeje ege gbaru nu.

<sup>9</sup> Mkpa eswi, nọ l'ọka unu ta dukwa mu;

ọphu mkpa egbu unu,

kuru l'odu-egbu unu 'adukwa mu;

<sup>10</sup> kẹ l'iphe bu anu, nọ l'oswa bu nke mu.

Eswi, nọkota l'unukurunu

ugvu aburu nke mu.

<sup>11</sup> Iphe bu nwenu, ephe l'eli;

bẹ mu makotaru l'ọ ha.

Iphe bu anu-egu-egbudu

l'ọ ha abukotaru nke mu.

<sup>12</sup> Ọ -buru l'egu agụ mu;

bẹ mu ta abyakwa unu ọrota nri;

kẹ l'ọo mbedua nwekota

mgboko-a l'ọ ha

yele iphe nọ iya nu.

<sup>13</sup> ?Unu tubesu lẹ mu atajẹ anu eswi.

?Tẹ unu tubesu lẹ mu anguje mee egbu.

<sup>14</sup> Ngweja, unu e-gwojeru nu

mu kwa t'unu kejeje mu ekele.

Unu meje iphe unu

riburu l'unu e-meru mube

Okaribe-Kakota-Nu.

- 15 Unu -kua mu oku l'oge  
 iphe-ẹhuka;  
 bẹ mu a-dzọfuta unu;  
 unu akwabẹ mu uguv.”
- 16 Obenu l'ẹjo madzụ; bẹ Nchileke sụru:  
 “?Nanụ ẹge ọ dụ;  
 bẹ iigudeje ọnu ngu agu  
 ekemu mu ọgu egvu;  
 gude ọnu ngu ephota  
 ọgba-ndzụ mu ephota?
- 17 Ị jikaru tẹ mu ba alọshi ngu ẹka lẹ nchị;  
 nwuru okfu mu l'ọ ha ye l'azụ.
- 18 Ị -phụa onye iphura;  
 nggu eje etsoru iya.  
 Ị -phụa onye eri ogori;  
 nggu l'iya eshilahaa ọnya.
- 19 Iphe eshije unu ọnu bụlephu ẹjo-okfu;  
 ụgho akwọwaru ngu ẹhu.
- 20 Ịinoduje l'ekfubyishi  
 unwunne ngu phẹ ekfubyishi.  
 Yọ bụru nwunne ngu,  
 nggu l'iya shi l'ẹpho lanụ;  
 bẹ ịinoduje ekfuru okfu-azụ.
- 21 Iphemiphe ono;  
 b'i mekotaru;  
 mu adakọta ashị;  
 nggu arià l'ọo ẹge ị dụ;  
 bẹ mu dụ.  
 Ọle mu a-bakwanụru ngu mba;  
 tụa ngu iya too l'ifu.”
- 22 Unu ngabẹ nchị l'iphe-a,  
 mu abya ekfukfu-wa;  
 unubẹ ndu zaharu mụbe Nchileke!

Ọdumeka; bẹ mu a-lakwa unu v̄iriviri;  
t'ọ d̄u onye abya unu adz̄ota.

- 23 Ọ b̄u onye gude ekele mee  
ngweja iya b̄u onye akwabẹ mu ugvu.  
Yọ b̄uru onye doberu ẹka ndoo  
bẹ mu e-koshi l'ọo m̄ube  
Nchileke adzoje madz̄u.

## 51

Egvu-ọma, Dévidi deru n̄u onye ishi egvu  
Teke o deru iya b̄u teke onye nkfuchiru Nchileke,  
b̄u Nétanu byats̄uaru nk'iya bya ekfuaru iya l'o  
meru ẹji lẹ yẹle Betisheba z̄eru

- 1 Ngḡube Ojejoje, ị b̄u onye obu-ọma.

Ẹ tii gbanwejedu agbanwe.

Byiko; ph̄uaru mu imiko.

Gude n̄u k'eze obu-imiko ngu  
fuchafu iphe d̄u ẹji mu!

- 2 Saf̄ukotanu iphe d̄u ẹji mu l'ọ ha;

nggu efufukota mu

ejo iphe, mu meshiru ngu.

- 3 Kele mu maru ẹge mu

ngetaberu ngu ọkpa l'ishi;

ọphu mu azahaj̄edu ejo iphe mu azaha.

- 4 Ọ b̄u ngḡubedua ḡedegede;

bẹ mu mesweru.

Mu mewaru iphe ị s̄uru l'ọ d̄u ẹji.

Ọo ya b̄u l'iswi d̄u ngu

mma l'ikpe, i kperu mu;

uta ta d̄u ngu l'ikpe,

ị nmaru mu.\*

- 5 Mu shiru teke a m̄uru mu

\* 51:4 51:4 Róm 3:4.

- bұтару onye eme eji.  
 Mbụ lẹ mu shiru teke nne  
 mu tsұtaru ime mu bұтару ejo madzұ.
- 6 Iphe iile ẹnya iya lẹ ndzұ  
 madzұ bұ ire-lanұ.  
 Zinua mu mmamiphe ngu.
- 7 Gudenu isopu saa mu;  
 tẹ mu चाहु dengu!  
 Saa mu tẹ mu ka eberugo ọcha ۇcha!
- 8 Menua t'ehu tsọo mu ẹna;  
 mu etee ẹnswa;  
 k'ọphu mube onye ono,  
 i tsuru pyaapyyaa ono e-te ẹnswa.
- 9 Lesweta nұ ejo iphe, mu meshiru;  
 nggu efufukota iphe dұ eji,  
 mu meru l'ọ ha!
- 10 Nggube Nchileke; menua tẹ  
 obu gұa mu iphoro;  
 nggu anұ mu ume ọphungu;  
 k'ọphu mu a-nọdu anұru ngu okfu!
- 11 Ba achifukwa mu l'ifu ngu;  
 ọphu ị nafukwa mu  
 Ume-dұ-Nsọ ngu!
- 12 Menua tẹ ẹhu-otso-ẹna mu laphuta azұ ọdo;  
 mbụ ẹhu-otso-ẹna ono,  
 shi l'adzofuta ono,  
 i dzofutaru mu ono.  
 Nggū emee tẹ ome  
 uche-obu ngu heje mu uhere;  
 k'ọphu mu e-shihu ike.
- 13 Teke ono; mu aduje ike  
 l'akpọ-ziru ndu emeswe  
 ngu nұ ۇzo nke ngu;

- ndu eme ejo iphe aghakọbe lakfuta ngu.
- 14 Dzořfutanu mu l'ikpe ochi, mu gburu;  
 nggube Nchileke;  
 ke l'o bu nggu bu Nchileke,  
 adzořfutaje mu nu.  
 Teke ono; mu araa ya arara  
 l'i bu onye doberu eka ndoo.
- 15 Nggube Nnajiufu; kpuhaa mu onu;  
 k'ophu mu a-jaa ngu ajaja.
- 16 Ndege o bu l'oo ngweja;  
 be iile enya iya; me mu  
 egwokwaaru ngu iya.  
 Obenu le ngweja te  
 emejekwa t'ehu tso ngu ena;  
 m'o -ruhuru; o buru ngweja-ukfuru.
- 17 Ngweja ophu Nchileke  
 anataje bu aphu oji madzu  
 obu  
 ke iphe o meru.  
 Onye aphu jiru obu  
 k'iphe du eji, o meru;  
 bya ataa onwiya uta;  
 be nggube Nchileke  
 ta akpokwa ebo-ebo l'afu.
- 18 Phunuaru Zayonu imiko;  
 mee ya t'o jaa ajaja.  
 Kpunuapho-mkpuma Jerusalemu.
- 19 Teke ono; eegwolaaharu  
 ngu ngweja, gbaru nu;  
 ngweja-ukfuru atsolahaa ngu ena;  
 a wataru ngu ogbushiru  
 oke-eswi l'enya-ngweja ngu.

## 52

Évù, Dévidi raru nù onye ishi egvu. Teke ọ raru évù ono bù teke Dowègu, onye Édọmu byaru bya agbaaru Sọlu ama; lẹ Dévidi nọ lẹ kẹ Ahimeleku

<sup>1</sup> ?Bù ngunu meru iphe iigudeje

    ẹjo iphe, iime l'asa nsasa;

    nggube oke madzụ?

    ?T'ị madu lẹ n-yemobu

    Nchileke a-nọ jeye lẹ gbururu?

<sup>2</sup> Iphe shi ngu l'ọnu bùlephu ọkpụ-akpọhu.

    Ire ngu l'atsulephu nkọ

    l'ọ bù ákwò, a baru ababa.

    Iphe iime ememe l'ọ ha abụkotaru ụgho.

<sup>3</sup> Ị ka oyeru ẹjo iphe obu;

    malẹ iphe dụ mma;

    Ejire aka ngu mma;

    mẹ l'ire-lanụ.

<sup>4</sup> Iphe i yeru obu bù okfubyishi madzụ;

    nggube onye ono,

    adzụ-gbu onwongu l'ẹjo-ire ono!

<sup>5</sup> Nchileke e-mebyishikwa ngu;

    mee ngu t'ị buru kpurupyata

    gbururu jeyewaru.

    Oo-wofu ngu; mee ngu t'ẹ b'i buhe l'ufu ngu.

    Yo fefu ngu l'ọ bù ẹswa; l'alị ndu nọ ndzụ.

<sup>6</sup> Ndu doberu ẹka ndoo -phua ya;

    ẹphe atsuhu egvu;

    chịa ya ọchi; sụ:

<sup>7</sup> “Unu lenu; ọwaa bù onye

    jịkaru lẹ ya te emedu

    Nchileke agbaru-ike iya.

    Ọ chiru ụkfu kwẹe l'ẹku iya;



shi l'omebata ndu ọdo l'eko tsulatsula.”

- 8 Obenu ẹ mbẹdua dụ l'ọ bụ oshi olivu;  
 nọ l'ime eze-ulo Nchileke; aja rikarika.  
 Mu chiwaru ukfu kwẹe  
 ẹ n-yemobu Nchileke jeye ẹ tutu yoyo.
- 9 Mu a-nọdu ekele ngu ekele  
 gbururu jeye ẹ gbururu  
 kẹ iphe i meru.  
 Mu a-nọdukpelephu ele ngu ẹnya l'ẹka;  
 kẹ l'ẹpha ngu dụ mma.  
 Mu anọdukwaphu l'ifu  
 ndibe ngu tua ngu ẹpha.

## 53

Évù, Dévidi raru nọ onye ishi egvu. T'e gude olu-  
 aphụ gụa ya

- 1 Onye eswe anọduje ari ẹ Nchileke ta nọdu.  
 Ẹphe mebyishiwaru onwẹphe.  
 Iphe ẹphe eme aburu akpamara.  
 Ẹ to nwedu m'ọo onye lanu,  
 eme iphe dụ mma.
- 2 Nchileke nọ l'imigwe l'ele  
 ndiphe ẹnya ẹ mgboko-a.  
 Oole tẹ ya maru;  
 ?o nweru onye maru iphe:  
 ?o nweru onye acho Nchileke?
- 3 Ẹphe l'ẹphe ha jephuhuwaru.  
 Ẹphe l'ẹphe ha eyifuwa.  
 Ẹ to nwedu ẹphe; onye eme iphe dụ mma;  
 mbukwa m'ọo onye lanu.\*
- 4 ?Ẹphe te nwedu egomunggo ọo.

\* 53:3 53:3 Egvu 14:1-3; Róm 3:10-12.

Ẹphe anọduje avu ndu  
 ke Nchileke avuvu l'ọ bu ndu avu nri;  
 ọphu ẹphe 'ekfudu anu Nchileke ono;  
 ?ẹphe te nwedu egomunggo ọo.

- 5 Ọ bu l'ẹke ono; b'e jeberu;  
 egvu egude ẹphe k'ẹji;  
 l'ẹke ẹ to nwedu iphe ọtsu egvu no iya nu.  
 Nchileke a-tukashi okpu  
 ndu tsoru ndibe iya ọgu nanu nanu;  
 bya ekpua ẹphe ifu l'ali;  
 kele ọ jikawaru ẹphe.
- 6 Ọ du mu t'e shi le Zayonu;  
 bya adzofuta ndu Izurelu.  
 Jekopu e-te ẹswa;  
 ẹhu atsọ Izurelu ẹna  
 teke Nchileke e-me te ndibe  
 iya, a kpuru le ndzu lata.

## 54

Ẹvù, Dévidi raru nu onye ishi egvu. T'a kporu  
 une ye iya

Teke ọ raru ẹvù ono bu le ndu Zifu jeru je asu  
 Solu le Dévidi domikwaru onwiya l'ali ẹphe

1 Gudenu ike ngu dzofuta mu; nggube Nchileke;  
 nggu egude okpehu ngu haaru mu enge!

2 Nunua ekfufu, mu ekfu anu  
 ngu; nggube Nchileke.  
 Ngabenu nchi; nu iphe shi mu onu.

3 Kele ndu shi eshishi wuru bya mu otso ọgu;  
 ndu ẹjo okpoma l'achọ t'ẹphe wofu mu;  
 mbu ndu ẹ ta adudu iphe  
 ẹphe guberu Nchileke.

4 Obenu l'ọ bu Nchileke bu

- onye eyejeru mu ẹka.  
 Ọ bu Nnajiufu; bu iya gude ndzụ mu.
- <sup>5</sup> Tẹ Nchileke mekwaa tẹ ẹjo  
 iphe ndu ọhogu mu meru  
 mu laphuru ẹphe azụ!  
 Tẹ Nchileke mekwaa t'ẹphe  
 buru kpurupyata;  
 shi ẹge ono koshi lẹ ya bu  
 o-me-g'o-kfuru.
- <sup>6</sup> Mu e-gude ẹhu-ọtso-ẹna  
 gwotaru ngu ngweja.  
 Mu abya etua ngu ẹpha;  
 nggube Ojejoje;  
 ke l'ị dụ mma.
- <sup>7</sup> Ọ bu nggu dzofutaru mu  
 l'iphe bu iphe-ẹhuka,  
 byakfutaru mu nụ.  
 Mu egudewa ẹnya mu phụ  
 l'e mekputawaru ndu ọhogu mu phẹ.

## 55

Évù, Dévidi raru nụ onye ishi egvu. T'a kporu  
 unu ye iya

- <sup>1</sup> Nggube Nchileke;  
 nọaru ekfukfu, mu ekfu anụ ngu.  
 Ba adahụkwa mu nkịchi  
 l'arọro, mu arọ ngu.
- <sup>2</sup> Ngabẹru mu nchi;  
 za mu oku, mu eku ngu.  
 Mgbamuiche ejije mu ẹhu.  
 Yoo meje; meji te egvuru mu egvuru;
- <sup>3</sup> teke mu nuru iphe ndu ọhogu mu ekfu;  
 mẹ ẹge ndu akirishi anọduje ele mu.

- Iphe ephe edzubejeru mu bu ishi-epuhu.  
 Ephe eshije l'iwe; gude onu  
 ephe l'egwe mu egwegwe.
- 4 Obu awa mu awawa;  
 anwuhu l'eyekwa mu phu  
 egvu l'eyeshi mu iya ike.
- 5 Mu atsū egvu l'atsūshi iya ike;  
 ehu l'anma mu anmanma.  
 Ehu anyikwa mu ekpa-oyi.
- 6 Mu asū l'ō dū mu t'a sū lē mu  
 furu ebà l'ō bu ndo;  
 mē mu ephehu je achōo ēke  
 mu a-nōdu tūta ume;
- 7 mbū mē mu ephelephu phemihu  
 je eburu l'echi-egu;
- 8 mē mu abahū-kebe l'ēke mu a-nōdu zee ndzū;  
 l'oke pherephere; mē l'eyii-mini.
- 9 Byiko Nnajiufu;  
 mebyishinua idzu ndu akirishi ono.  
 Menua t'ephe ba amahē  
 iphe ephe ekfu ekfukfu;  
 kele iphe mu phuru lē  
 mkpukpu ono bu iphe-kpaa; mē nseku.
- 10 Ephe anōduje awū-phe lē  
 mkpukpu ono: eswe l'enyashi.  
 Ejo iphe; mē iphe-ehuka  
 atuko ekemeke obule  
 dzuru lē mkpukpu ono.
- 11 Ejo iphe nōduwa l'ēke ono fua eru;  
 ophu mkpamehu; mē ugho  
 'agwudu iya agvugvu.
- 12 Ndege o -bu l'ōo ohogu mu  
 eme mu iphe-iphere;

- mę mu atagbukwaa ya lę nshi.  
 Ọdumeka bụru l'oo onye  
 mu dụ ashị; bę l'eku onwiya  
 o-ji-l'ẹka-togbo l'ẹke mu nọ;  
 mę mu edomikwaaru iya onwomu.
- 13 Obenu l'ọ bụ nggụbedua,  
 bụ onye ẹbo-ọ mu;  
 onye mu l'iya ayị ayịyi;  
 bya aburu ẹgiri ọnya mu;
- 14 mbụ onye mu l'iya nọkpoo lę ndzu;  
 bụru onye mu l'iya achikoje  
 yiru eje l'eze-ulo Nchileke.
- 15 Mbụkwa tę ọnwu tų  
 ndu ọhogu mu ọtu l'ụkfu.  
 T'e likwaa ẹphe lę ndzu;  
 kę l'ejo iphe nmaru ẹphe gidigidi l'ẹhu.
- 16 Obenu lę mbedua bụ  
 Nchileke; bę mu araku;  
 kęle mu maru lę Ojejoje  
 e-mekochaa bya adzofuta mu.
- 17 Ụtsu; eswe; l'enyashi;  
 bụ ẹkwa-aphụ; bę mu adabujeru.  
 Mu marua l'oo-mekochaa nụa olu mu.
- 18 Ọo-gbafuta mu-a l'ẹka ndu  
 l'etso mu ọgu;  
 t'ę b'ọ dų iphe e-me mu nų;  
 mbụ m'o -ruhuru;  
 ẹphe ha l'igwe ihagha mbụ ndu etso mu  
 okfu.
- 19 Nchileke, bụ onye shi  
 l'ede-nwede nọduta  
 l'aba-eze iya a-nụa olu mu;  
 bya anụa ẹphe chikikfuu;

- kẹ l'ẹphe jìkaru agbanwe;  
 ẹphe ta atsù Nchileke egvu lẹ phuu.
- 20 Onye mu l'iya ayị ayịyi  
 gbe tsowaru nù ndu ònyà iya ọgu;  
 shi ẹge ono dakaa ndzù, ẹphe l'iya gbaru.
- 21 Okfu, shi iya l'ọnu kwọru  
 akwọkwo l'ọ bụ manù  
 nshi-lanù;  
 ọbule iphe jiru iya obu bụ iwe.  
 Okfu iya atù atùtu l'ọ bụ elaku;  
 ọbule ọotsu nkọ l'ọ bụ  
 ogu-mbeke, a baru tee ya nkọ.
- 22 Haaru Ojejoje iphe bụ iphe atsù ngu l'ẹhu.  
 Oo-gudeshia ngu-a ike;  
 kẹ l'ẹ t'o nwedu l'ọ haa ndu  
 doberu ẹka ndoo t'ẹphe daa.
- 23 Obenu l'ọo nggùbe Nchileke  
 e-duru ndu ẹjo iya ono duba l'ime ili;  
 ẹke ẹphe a-nọdu rekashihu.  
 Ndu egbu ọchi;  
 mẹ ndu ntuphu-ire; b'ẹ tii  
 kwedu t'ẹphe kaa nka lẹ mgboko-a.  
 Obenu lẹ mbedua bụ nggu bẹ mu dakoberu.

## 56

- Egvu-ọma, Dévidi deru nù onye ishi egvu; t'e  
 gude olu-egvu "Ndo Beru lẹ Achi, nọ ote-ẹnya"  
 gụa ya  
 Teke o deru iya bụ teke ndu Filísutiya guderu iya  
 lẹ Gatù
- 1 Nggùbe Nchileke;  
 phụaru mu rụ imiko;  
 lẹ ndiphe achikwa mu kẹ kpabẹ-kpabẹ.

- Mbọku-mbọku, mụtaru amụta;  
 bẹ ndu ọhogu mu akabajẹ mu ru ọkpa ẹhu.
- <sup>2</sup> Mbọku-mbọku, mụtaru amụta;  
 bẹ ndu ọhogu mu anọduje achi nta mu.  
 Ẹphe dụ l'igwe; mbụ ndu achọ ishi mu.
- <sup>3</sup> Teke mu atsụ egvu bụ nggu bẹ mu dakoberu.
- <sup>4</sup> Ọ bụ Nchileke ono,  
 mu anọduje aja okfu iya ajaja ono;  
 bẹ mu dakoberu.  
 Mu ta atsụdu egvu.  
 ?Bụ ngunu bẹ madzụ mmanu e-me mu.
- <sup>5</sup> Tekenteke; bẹ ẹphe ewojeru  
 okfu mu ghaa igharafu.  
 Iphe ẹphe anọduje arị abuleruphu  
 ẹge ẹphe e-shi mebata mu.
- <sup>6</sup> Ẹphe edzukobeje;  
 domishia onwẹphe;  
 l'ege ẹke mu dzọru ọkpa;  
 k'ọphu ẹphe e-me mu iphe.
- <sup>7</sup> Nggụbe Nchileke;  
 be ekwekwa t'ẹphe nahu.  
 Gudenu oke ẹhu-eghughu  
 ngu chitsushia ndu ono l'ẹphe ha.
- <sup>8</sup> Ị mawaru ẹge iphe ono  
 atsụ-be mu l'ẹhu.  
 Ị mawaru ẹge ọotsu-be mu l'ẹhu.  
 ?I deshiwaru iphe ono l'ẹkwo ngu?
- <sup>9</sup> Mu -rakule ngu phụ;  
 bẹ ndu ọhogu mu a-gha ifu; laphu azụ.  
 Ọphu doru mu ẹnya  
 bụ lẹ Nchileke nọ l'ẹka iya nke mu.
- <sup>10</sup> Ọ bụ Nchileke ono,  
 mu anọduje aja okfu iya ajaja ono;

- mbụ Ojejoje ono,  
 mu anọduje aja okfu iya ajaja ono;  
 11 ọ bụ Nchileke ono; bẹ mu dakoberu.  
 Mu ta atsudu egvu.  
 ?Bụ ngunu bẹ madzụ mmanu e-me mu?
- 12 Nggube Nchileke;  
 iphe mu riburu lẹ mu e-meru ngu  
 bukwa mu b'ọ tukuror l'ishi.  
 Mu a-bya egworu  
 ngweja-ekele nụ ngu.
- 13 Ishi iya aburu l'ị nafutawaru mu l'eka onwu;  
 mekwaaphu tẹ mu ba akpakota iphe daa;  
 k'ophu mu a-dzọ ije l'ifu  
 Nchileke l'ẹke iphoro nọru ndu nọ ndzụ.

## 57

Egvu-ọma, Dévidi deru nụ onye ishi egvu; ishi  
 egvu iya bụ “Be emekwa tẹ ya laa l'iyi”  
 Teke o deru iya bụ teke ọ nahuru Sọlu gbalaa; je  
 anọdu l'ime ọgba

- 1 Nggube Nchileke;  
 phuaru mu rụ imiko!  
 Byiko; phuaru mu rụ imiko;  
 kẹ l'ọ bụ l'eka ngu;  
 bẹ mu nọ l'ezeru ndzụ.  
 Mu a-nọdu lẹ mkpuli ẹbà ngu;  
 zee ndzụ; gbururu jeye  
 teke iphe-ehuka-a, byaru mu nụ-a a-gvu.
- 2 Mu araku Nchileke; mbụ  
 Okaribe-Kakota-Nụ;  
 mbụ Nchileke, atukoje  
 iphe bụ iphe bụ mkpa mu meeru mu.
- 3 Oo-shi l'imigwe zia t'a bya adzofuta mu;



bya emeru iphe-iphere  
 kpua ndu ono, achi mu kpabekpabe ono.  
 Nchileke e-koshi le ya yeru mu obu;  
 buru o-me-g'o-kfuru.

- 4 Mu no l'echi agu;  
 mu zekwa l'echi ejo anu;  
 ndu ezé ephe du l'ọ bu arwa; me akfu;  
 ire ephe atsụ nkọ l'ọ bu ogu-mbeke.
- 5 Koshinu ndiphe ege i hatebe;  
 mbu li no-ghataru  
 akpamigwe anoghata;  
 te ndiphe kpamukpamu  
 phua ege i du-be biribiri.
- 6 Ndu ohogu mu geru ugbu  
 kwaberu mu l'uzo;  
 ehu adaa mu koo.  
 Ephe eje ebua nsu l'uzo, mu eshije.  
 Obu l'e mekocharu;  
 ephe adaba le nsu ono l'onwephe.
- 7 Nngube Nchileke;  
 obu shihukpokwaaru mu ike;  
 obu shihukpokwaaru mu ike;  
 k'ophu bu le mu a-nodu  
 agu egvu etu ngu epha.
- 8 Obu mu; tehu muru enya.  
 Nngube ogumogu mu;  
 me ubo mu; unu tehu muru enya.  
 Mbueda e-gudekwa egvu  
 gu-tee nchi-abohu le mgbenya.
- 9 Mu a-nodu l'ifu ndiphe;  
 kele ngu ekele nngube Nnajiufu;  
 mu anodukwaphu l'ifu  
 iphe bu mbakeshi

- gua egvu gude tua ngu ẹpha.  
 10 Ishi iya aburu ẹ  
     n-yemobu ngu hatabe;  
     k'ophu bu l'o ruru rua imigwe.  
     Ire-lanu ngu edzuru akpamigwe.  
 11 T'e mee ẹpha ngu t'o dee ude;  
     derua ẹke igwe jeberu;  
     odu-biribiri ngu erua ẹke mgboko jeberu.

## 58

Egву-ọma, Dévidi deru nu onye ishi egvu; ishi egvu iya bu “Be emekwa te ya laa l'iyi”

- 1 Unube ndu ogbo ikpe;  
     ?o nwekpooru teke okfu,  
     du mma eshije unu l'onu lufuta?  
     ?To budu ejo ikpe;  
     be unu ekpeje unwu eliphe.  
 2 Wawakwa! Iphe anoje unu  
     l'oriri bulephu ege unu e-shi mee ejo iphe.  
     O bu iphe-kpaa; be unu wolataru ndiphe.  
 3 Ndu akirishi eshije teke ẹphe  
     no l'ẹpho nne ẹphe butaru o-kweru-ike.  
     Epe eshije l'ẹpho oshiswe uto;  
     ejo-ire eshi ẹphe ẹ dedede.  
 4 Era, ẹphe ataje du l'o bu era ejo agwo.  
     Epe swo-chishiru nchi;  
     l'ada nkichi l'o bu oghu;  
 5 mbu oghu, e ta anujedu opu,  
     onye raru iya eka l'ifu egbu;  
     gude ekfuru iya okfu;  
     m'o -ruhuru; o gbua  
     opu ophu igbu-agma.  
 6 Kpaa ẹphe eze, no ẹphe l'onu; nggube Nchileke!

Nggube Ojejoje; swòshinua  
 ẹpyi, nọ agụ ono l'ọnu!

7 T'ẹphe wufukwa l'ọ bu mini, atso atso.  
 Teke ẹphe setaru uta ẹphe k'agbagba;  
 mekwaa te akfu ẹphe kweru dungu.

8 T'ẹphe du l'ọ bu ẹji,  
 gbazehuru agbazehu.  
 T'ẹphe be egudekwa ẹnya  
 ẹphe phua ẹnyanwu  
 l'ọ bu nwata, nwuhuru nne iya l'ẹpho.

9 K'ọphu bu; l'ẹswa, e shiberu  
 ite -bya emeta oku;  
 ngaa ite ono;  
 be Nchileke gudewa  
 oke ẹhu-eghughu iya  
 wofukebe ite ono l'ọ bu oke pherephere;  
 m'o -ruhuru;  
 iphe e shiberu l'ite ono  
 dukwadu onyingu-onyingu;  
 m'ọ bu l'obyawa eghehu.

10 Ndu doberu ẹka ndoo;  
 be ẹhu a-nodu atso ẹna;  
 me ẹphe -phulephu le  
 Nchileke akfuwa ndu  
 ẹjo iya ono ugwo ẹjo iphe, ẹphe meru;  
 m'e gbudelephu ndu ẹjo iya ono pyaapya.

11 Teke ono be ndiphe  
 e-kfulahaa; su:  
 "L'ọ kwa oswi-okfu le ndu  
 doberu ẹka ndoo;  
 be obunggo noru!  
 Mbụ l'ọ kwa ire-lanu  
 l'ọ nweru Nchileke, ekpeje eliphe-a ikpe!"

## 59

Egvu-ọma, Dévidi deru nù onye ishi egvu; ishi egvu iya bụ “Be emekwa tẹ ya laa l'iyi”  
Teke ọ gụru iya bụ teke Sọlu yeru ndu madzụ t'ẹphe je ngge l'ulo, ọ nọ; shi ẹge ono gbua ya

<sup>1</sup> Nafutanu mu l'ẹka ndu

ọhogu mu;

nggube Nchileke mu!

Dzonua mu l'ẹka ndu

wụ-lihuru wụpyabe mu!

<sup>2</sup> Nafutanu mu l'ẹka ndu ẹjo madzụ;

nggu adzọo mu l'ẹka ndu mgbugbu-madzụ!

<sup>3</sup> Nggube Ojejoje;

lewaru ẹge ẹphe domishiru onwẹphe;

kwabe t'ẹphe mee mu iphe.

Ndu oke-apitipa wụ-lihuru

l'achiru mu ẹjo idzu;

lẹ mu ba achọ ẹphe okfu;

l'ẹ b'ọ dụ ẹjo iphe, mu meru.

<sup>4</sup> Ẹphe jikoberu onwẹphe t'ẹphe tso mu ọgu;

l'ẹ b'ọ dụ iphe mu meru ẹphe.

Gbeshinu; bya agbaaru mu mkpu!

Lewaru ẹnya;

phụ ẹge ọnodu mu dụ!

<sup>5</sup> Nggube Ojejoje;

nggube Nchileke,

bụ Ọkaribe-Kakọta-Ike;

nggube Nchileke kẹ ndu Ízurelu;

gbeshinu je ahụ iphe bụ mbakeshi ahùhù!

Ba adukwa ẹphe onye

ii-phuru imiko;

mbụ ndu akirishi ono,

akwabeje ẹnya eme iphe

- a-tsuru ibe ẹphe ono!
- 6 Ọobuje; ẹphe -lata l'urenyashi;  
 ẹphe epyophelaha l'ọ bu nkuta;  
 tsoru mkpukpu l'aghaphe.
- 7 Nụwaru egbe iphe shi ẹphe l'ọnu.  
 Ire ẹphe dụ l'ọ bu  
 ogu-mbeke;  
 ẹphe etubesu l'ẹ tọ dudu  
 onye nuru iphe ẹphe ekfu.
- 8 Obenu l'ọ bu ọchi;  
 bẹ nggube Ojejoje achije ẹphe.  
 Ọ bu ọchi; bẹ ìichije iphe  
 bu mbakeshi ono l'ẹphe ha.
- 9 Nggube Nchileke;  
 ọ bu nggu bu ike mu.  
 Mu chiru ẹnya dobe l'ẹke ì nọ.  
 Ọ bu nggubedua bu  
 a-gbabe-a-dzuru.
- 10 Nchileke, bu onye yeru mu  
 obu e-vutaru mu ọzo.  
 Nchileke e-kwee tẹ mu  
 gude ẹnya mu phụ  
 lẹ ndu achị mu nụ;  
 bẹ ishi kpuru l'alì.
- 11 Be egbukwa ẹphe egbugbu;  
 nggube Ojejoje,  
 bu onye egbochitaje ayi;  
 ọdumeka bẹ ndibe ayi a-zahakwa iya.  
 Gbe gudechia ike ngu;  
 mee t'ẹphe jelehaa mbalogo-mbalogo;  
 nggu eshi ẹge ono lọ-tsuta ẹphe!
- 12 Tẹ ekuku ono, ẹphe anọduje

eku onwẹphe ono bụkwaru ọnya nmata  
 ẹphe.

Iphe shi ẹphe l'ọnu  
 abụkotaje ẹjo okfu;  
 bụru ẹjo iphe.

Okfu l'ẹphe egudeje ọnu ẹphe adzụ ejiru;  
 gude iya atụ ibe ẹphe ọnu;

13 gudenu oke ẹhu-eghughu  
 ngu kee ẹphe l'ọ bụ ọku!  
 Kee ẹphe ọku ono jeye teke ẹphe a-gvụ;  
 Teke ono; ndiphe agbaa  
 mgburumburu; maru l'ọ  
 bụ Nchileke bụ Eze,  
 achị ndu Ízurelu;  
 maru l'ọ bụ eze l'ẹkemeke ọbule lẹ mgboko.

14 Ọbuje; ẹphe -lata l'urenyashi;  
 ẹphe etsoru mkpụkpu;  
 pyophelaha l'ọ bụ nkuta.

15 Ẹphe anọduje awuphe;  
 achọ ẹke ẹphe e-ri nri.  
 Ọ -buru l'ẹphe te rijidu ẹpho;  
 ẹphe abalaha korokoro.

16 Obenu lẹ mbedua a-gụ  
 egvu gude tụa ọnu ẹge ike ngu habe nshinu.  
 Ụtsu mbọku-mbọku; bẹ mu  
 a-nọdu agụ egvu;  
 gude ekoshi ẹge  
 n-yemobu ngu habe nshinu;  
 kẹ l'ọ bụ nggubedua  
 bụ a-gbabe-a-dzuru nke mu;  
 bụru l'ime ngu; bẹ mu  
 agbabaje; zeeru ndzụ  
 teke mu nọ l'iphe-ẹhuka.

17 Nggube ike, nọ mu nụ;  
 mu a-gụ egvu gude kele ngu.  
 Ọ bụ nggube Nchileke;  
 bụ a-gbabe-a-dzuru nke mu;  
 mbụ Nchileke, bụ onye yeru mu obu.

## 60

Egvu-ọma, Dévidi deru nụ onye ishi egvu; t'e  
 gude olu egvu “Okfukfulike Ọgba-ndzụ” gwa ya  
 Teke o deru iya bụ teke ẹphe ẹ ẹ ndu Áramu  
 Naharayimu; mẹ ndu Áramu Zoba luru ọgu;  
 mbụ teke ono, Jóabu laru bya etso ndu Édọmu  
 ọgu; gbua unu soja ukporo l'iri ẹ Nsuda Alì Únú

1 Nggube Nchileke;  
 ị jikawaru ayi; wowaru  
 ayi chikashia nanu nanu.  
 I shi avuru ayi ovuma.  
 Ọle nta-a; be ayi arọ ngu; su:  
 t'i naphutaru ayi azu ọdo.

2 Ọ bụ nggu meru mgboko;  
 yọ nmaa jijiji; bya emee ya;  
 yọ gbawashihu.  
 Mekwazinu ẹke ọ gbatsuaru ọru;  
 ke l'ọnga anganga.

3 Ị hawaru ndibe ngu;  
 ẹphe ejee iphe-ẹhuka;  
 bya echee ayi mee;  
 ayi angwa ya l'akpo galagala.

4 Ị paliwaru ẹkwa-ọhubama  
 ngu doberu ndu atsụ ngu egvu;  
 k'ophu ẹphe a-phụ iya;  
 dzukobe l'ẹkwà-ọhubama ono;

shi iya zeeru akfụ ono.

- <sup>5</sup> Gudenu ẹka-utara ngu dzofuta ayi!  
Nunua ekfukfu, ayi ekfu anu ngu;  
k'ophu ee-shi ẹge ono dzọ ndu i yeru obu.
- <sup>6</sup> Nchileke nọ l'ulo iya, du nsọ; kfuа; sụ:  
“Ya a-nodu atụ okokooko;  
l'eke alị ndu Shékemu;  
bya ewota Nsuda Súkọtu keshia.
- <sup>7</sup> Giledu bu nk'iya;  
Manáse aburu nk'iya.  
Ifuremu bu okpu, ya kpu l'ishi.  
Júda bu mgboro-eze,  
ya apaje l'eka.
- <sup>8</sup> Móabu bu ochi, ya akwoje okpa;  
Édomu aburu eke ya  
eyeshije akpokpa iya dobe.  
Filísutiya be ya twaru okokooko kpua.”
- <sup>9</sup> ?Bu onye e-du mu duba le  
mkpukpu ono, a kpuru  
kpushia ya ike ono?  
?Bu onye e-duru mu duba le Édomu?
- <sup>10</sup> O kwa nggube Nchileke bu onye obu.  
Obenu l'i gbe jika ayi;  
ophu i tsojehedu ndu soja ayi l'eje oгу.
- <sup>11</sup> Yeru ayi eka byiko;  
t'ayi mekputa ndu ohogu ayi;  
ke l'eka ophu ndiphe eye bu iphe-iphoro.
- <sup>12</sup> Obenu l'ayi -noduwa  
Nchileke l'eka; be ayi  
e-mekputa ndu ohogu ayi l'o bu mkparawa.  
Yo buru Nchileke a-dzo  
ndu ohogu ayi pyaapyaа.



# 61

Egvu, Dévidi deru nọ onye ishi egvu; t'a kporu  
une ye iya

- 1 Nnua mkpu, mu echi;  
nggube Nchileke!  
Ngabenu nchi l'ekfukfu,  
mu ekfu anu ngu!
- 2 Mu no l'eke mgboko jeberu; l'echiku ngu;  
kele meji atofu mu atofu.  
Dunuru mu je edobe l'oke mkpuma, ka mu  
l'eli!
- 3 Kele mu gbabawaru l'ime ngu;  
domia onwomu.  
O kwaphu nggubedua bu  
ulo-mgbochi, mu nyihuru;  
nahu ndu ohogu mu.
- 4 Ogukwa mu egu  
te mu buru le nke ngu jeye le tutu yoyo;  
mbu te mu nodujewaru le  
mkpuli ebà ngu; zeeru ndu.
- 5 Kele nggube Nchileke  
nwaru iphe mu riburu;  
le mu e-meru ngu.  
I mewaru te mu tsoru ndu  
akwabe epha ngu egvu;  
keta iphe-oma, imejeru ephe.
- 6 Menua t'eze kaa nka;  
t'o kaa nka;  
shi l'ogbo sweru ogbo!
- 7 Te aba-eze iya nodunu  
Nchileke l'ifu gbururu jeye!  
Te iphe ii-gude eche iya  
nche bukwaru n-yemobu ngu;

mẹ ike ono, iivudoshije l'iphe i kfuru ono.  
 8 Ọo ya bụ ẹge mu agụa egvu;  
 gude jaa ngu ajaja gbururu jeye;  
 mekotaje iphe bụ iphe mu  
 riburu k'ememe  
 mbọku-mbọku.

## 62

Egvu-ọma, Dévidi deru nụ onye ishi egvu, bụ  
 Jedutunu

- 1 Ọ bụ Nchileke nwẹnkinyi;  
 bẹ mu nọdu; ngaberu;  
 ke l'ọo ya bụ onye  
 a-dzọfuta mu nụ.
- 2 Ọ bụ Nchileke nwẹnkinyi iya  
 bụ agbara-mkpuma mu;  
 bụru iya adzoje mu;  
 bukwaru iya phụ bụ  
 a-gbabe-a-dzuru nke mu.  
 ?Bụ onye ha k'onwubata mu enwubata?
- 3 Unu l'unu ha;  
 ?bụ teke ole bẹ unu  
 e-tsuberu madzụ kputukputu;  
 ?mbụ onye ike ta nọhedu;  
 yọ bụwarua egugoru b'o gugoru.
- 4 Iphe unu eshibeje ite iya  
 bụ ẹge unu e-shi nwufu  
 eze madzụ l'ọkwa iya.  
 Ejo-ire bụ iphe aduje unu mma.  
 Unu egudeje ọnu unu  
 l'agoru ibe unu ọnu.  
 Obenu l'ime obu unu;  
 bẹ unu egudeje atụ ẹphe ọnu.

- 5 O bu Nchileke nwęnkinyi iya be mu no l'eka;  
ke l'oo ya bu onye mu ele enya l'eka.
- 6 O bu Nchileke nwęnkinyi iya  
bu agbara-mkpuma nke mu;  
buru iya adzofutaje mu;  
bukwaru iya phu bu  
a-gbabe-a-dzuru nke mu.  
?Bu onye ha ke onwubata mu enwubata.
- 7 L'aa-dzofuta mu;  
me l'aa-kwabę mu ugvu  
bu Nchileke b'ọ no l'eka.  
O bu Nchileke bu  
agbara-mkpuma nke mu;  
bukwaru iya phu;  
be mu no l'eka ezeru ndzu.
- 8 Unu dakobe iya tekenteke;  
unube unwu eliphe!  
Unu gheberu iya obu unu onu.  
L'ọ kwa Nchileke bu onye  
ayi no l'ime iya ezeru ndzu.
- 9 Ndu ophu bu ohu du l'ọ bu udzu, shi l'onu.  
Ndu ophu bu amadu aburu iphe-eswe.  
Teke a toru ephe ebo l'iphe aatoje madzu;  
iphe ephe tuko buru bu  
iphe-iphoro; uphere-onu.
- 10 Unu ba akpokwaru obu ye  
l'ogude ugho l'ana ndu odo iphe;  
ophu unu 'ewokwaru enya tupyoo l'iphura!  
O nwekwaruru ege oo-du;  
eku unu abya aka nshinu;  
ole; unu ba kpokwaru obu yeru iya!
- 11 Nchileke kfuakwaru iphe-a ugbo lanu;  
mbedua anuwa iya ugbo labu;

- l'ọo nggube Nchileke bu onye nwe ike.  
 12 Ọdo aburu l'ọo nggube  
 Nnajiufu be n-yemobu no l'eka.  
 Ọ bu nggube Nchileke  
 e-bu onyemonye nggo l'ege ozi iya du.

## 63

Egvu-ọma, Dévidi deru teke ọ no l'echi-egu Júda

- 1 Nggube Nchileke;  
 ọ bu nggu bu Nchileke mu!  
 Obu ngu egbu mu  
 egbugbu: eswe l'enyashi.  
 Ekpiri ngu akpo mu nkụ.  
 Obu ngu meekwaru;  
 ike agvu mu l'ọ bu onye no l'echi-egu;  
 mbu l'ọ bu onye no l'ali  
 okponku, mini ta ndu.
- 2 Mu ta madu ege mu e-me  
 phua ike ngu;  
 me ọdu-biribiri ngu;  
 ege mu shi aphuje iya l'ulo ngu, du nsọ.
- 3 Mu e-gude onu mu jaa ngu ajaja;  
 kele n-yemobu ngu ka ndzu mma.
- 4 Mu a-ndu ekele ngu ekele  
 jeye teke mu a-no-bebe.  
 Yo buru epha ngu;  
 be mu e-gudeje chilia  
 eka imeli ekfu anu ngu.
- 5 Obu mu; be epho e-ji l'ọ bu  
 onye riru nri, e gude eba anu;  
 me umi-okpu shia.  
 Mu e-gude onu gua egvu  
 ehu-otso-ena, gude tua ngu epha.

- 6 Ọobujeru; mu -zẹru azẹe;  
mu anyata ngu;  
oriri ngu anọdu mu l'obu ẹnyashi ophu.
- 7 Mu nọ lẹ mkpuli ẹbà ngu  
agụ egvu ẹhu-ọtso-ẹna;  
kẹ l'ọ bụ nggu bụ onye eyejeru mu ẹka.
- 8 Mu anọje ngu ntse tekenteke.  
Yọ bụru ike ngu;  
b'i gudeje kwakọbe mu.
- 9 Ẹge ẹphe ha; mbụ ndu achoro  
ishi mu a-lakota l'iyi;  
a chiru ẹphe ye l'ime ali.
- 10 Ee-gbushi ẹphe l'ogu;  
ẹphe aburu nri, a kparu  
wushiru nkuta-oswa.
- 11 Obenu lẹ Nchileke e-me  
t'ẹhu tsoo eze ẹna.  
Iphe bụ ndu egudeje ẹpha  
Nchileke ekwe ukwa a-ja iya ajaja.  
Ole ndu ntuphu-ire phe;  
be onu a-buru kpurukudungu.

## 64

Egvu-ọma, Dévidi deru nù onye ishi egvu

- 1 Nggube Nchileke;  
nunua mkpu, mu echi echiku ngu!  
Mu atsukwa ndu ohogu mu egvu.  
Gbochitanu mu l'ẹka ẹphe.
- 2 Dominua mu t'ẹjo idzu,  
ndu ẹjo madzụ achiru mu;  
be eru mu l'ẹhu.  
Domianua mu l'ẹjo ọzu ono,  
ndu ẹjo madzụ atụ ono.

- <sup>3</sup> Ẹphe abaje ire ẹphe ọba mma;  
 gude ọnu l'agba okfu ọgba akfu.
- <sup>4</sup> Ẹphe anọduje; kwaberu onye  
 ẹ-ta dudu iphe o meru.  
 Onye ono -bya amaru;  
 be akfu buwaru iya l'ẹhu kfuu.  
 E to dudu iphe ẹphe atsu egvu.
- <sup>5</sup> Ẹphe anọduje eyeru onwẹphe ọkpu-ikike  
 t'ẹphe keshia ẹhu l'ome ẹjo iphe.  
 Ẹphe asuje l'ẹphe e-je  
 agbashia ọnya ẹphe l'edomi.  
 Ẹphe asu: “?Bukwanu onye a-phu ẹphe?”
- <sup>6</sup> Ọobuje teke ẹphe chieberu  
 ẹjo idzu ono; ẹphe asu:  
 “Lidzu, ẹphe chiru nta-a;  
 be dukpoo mma nshinu!”  
 Uche madzu; me obu iya  
 bulephu ẹregede kpuu.
- <sup>7</sup> Obenu le Nchileke a-gba ẹphe akfu.  
 Ẹphe -bya amaru;  
 be ẹphe zeshiwa l'ali.
- <sup>8</sup> Ẹphe e-gude ọnu ẹphe  
 kfutaru onwẹphe ọkpu-akpohu.  
 Iphe bu ndu phuru ẹphe,  
 e-kwe l'ishi; su:  
 Hoo! Ege ọo-du ẹphe!
- <sup>9</sup> Ndiphe kpoo-gbaa  
 a-wata ọtsu egvu.  
 Ẹphe arakashilaha iphe  
 Nchileke meru arakash;
- <sup>10</sup> T'ẹhu tsojekwa ndu doberu  
 ẹka ndoo ẹna l'ime Ojejoje!

T'ẹphe gbabakwa l'ime iya  
 je edomia onwẹphe!  
 T'iphe bu ndu obu guru  
 iphoro jakwaa ya ajaja!

## 65

Egvu-ọma, Dévidi deru nu onye ishi egvu

- 1 Nggube Nchileke;  
 ọ du mma t'ayi nọdu ẹ  
 Záyọnu jaa ngu ajaja!  
 Ayi e-medzukotaru ngu  
 iphe ayi riburu l'ayi e-meru ngu.
- 2 Nggube onye, anuje ekfukfu, ayi ekfu anu ngu;  
 ọ bu nggu be madzu  
 kpoo-gbaa; a-wuru wu-kfuta.
- 3 Teke iphe du eji ayi shi kpapyabe ayi;  
 be iguleru-a ayi nvu.
- 4 Onu-ọma bu ke ndu, i fotaru;  
 te nggu l'ẹphe buru l'ogbodufu ngu.  
 Iphe du mma, no l'ẹke  
 i bu; ejije ayi ẹpho;  
 mbu iphe du mma,  
 no l'eze-ulo ngu ono,  
 du nsọ ono.
- 5 Nggube Nchileke;  
 ọ bu nggu adzoje ayi.  
 Igudeje iphe du biribiri,  
 ekoshi l'i bu onye doberu  
 ẹka ndoo zaa ayi oku.  
 Ndu bu l'ẹke igwe jeberu;  
 ali ejebe; me ndu, bu ẹ  
 mgboro eze ẹnyimu,  
 kakota ote-ẹnya; be bu nggu;

- be ẹphe chiru ukfu kwee;  
 6 mbu nggube onye bu ike ngu; b'i gude  
 gvubetsua ugvu l'ẹke ẹphe gvutsuaru.  
 I keru onwongu  
 agburu-ẹhu ẹge eekeje  
 akpo-buleti l'ukfu.
- 7 Iimeje te ekiri eyii-mini  
 eze ẹnyimu tu-buhu;  
 l'emeje te oke pherephere,  
 tso iya nu kfuhi.  
 Utsu, etsu l'iphe bu mbakeshi;  
 be iimeje t'o tsubuhu.
- 8 Ndu bu ote-ẹnya;  
 anoduje anma kwekwekwe;  
 me ẹphe nu k'iphe,  
 du biribiri, iimetsua.  
 Iphe iimeshi emeshi;  
 be ndiphe le mgboko  
 gbaa mgburumgburu  
 gude ẹhu-otso-ena aguru ngu egvu.
- 9 Iigbaje mini le mgboko-a  
 teke i byaru iya agbaphe;  
 shi ẹge ono mee ya;  
 yo buru ali-osa.  
 Ẹnyimu nke ngu b'i meru  
 te mini ji ejiji.  
 I meru t'iphe, ndiphe meberu l'ali mehu;  
 ke l'o bu ẹge ono;  
 b'i meru iya t'o du.
- 10 I chiru mini;  
 yo doru adoru l'enyoro.  
 Nggу abya ayọ teshiteshi  
 gude mee igbo; t'o du ruharuha;



- shi ẹge ono ọoru ọnu-ọma nù iya;  
 mee iphe e meberu iya;  
 t'o vua evuvu.
- 11 I wotaru o-me-l'uko nke ngu  
 ye l'iphe e meberu emebe.  
 Iphe bụ ẹke, i shiru;  
 b'ẹ ta ahojedu nri ahocho.
- 12 Ẹgbudu abya efuchia  
 echi-ẹgu;  
 ẹhu awata ọtso iphe,  
 bụ ugvu ugvu ẹna.
- 13 Ẹgu ẹke eecheje iphe-edobe;  
 be aturu kuru l'ata nri.  
 A bya le nsuda nsuda;  
 iphe jiru iya nù aburu iphe a kọberu akọbe.  
 Iphemiphe ọbule ono  
 chikoru atụ uzu;  
 l'agụ egvu ẹhu-ọtso-ẹna.

## 66

- Egvu-ọma, e deru nù onye ishi egvu
- 1 Unube ndiphe l'unu ha;  
 unu tọaru Nchileke uzu ẹhu-ọtso-ẹna!
- 2 Unu gụa egvu gude tushi iya ẹpha!  
 Unu tushi iya ẹpha; jaa ya ajaja!
- 3 Unu sù Nchileke:  
 “L'iphe bụ iphe ọonoduje  
 eme dukwa biribiri!  
 Ike Nchileke hatabe nshinu;  
 k'ọphu bụ le ndu ọhogu iya  
 adaje iya pẹ l'ifu;  
 l'ẹke ẹphe atsù iya egvu.
- 4 Iphe bụ ndiphe adaje iya

- pẹe l'ifu; baaru iya eja;  
 gua egvu nu iya.  
 Mbụ l'ẹphe aguje egvu gude jaa ya ajaja."
- 5 Unu bya aphụ ozi, Nchileke jeru!  
 Nchileke dukwa biribiri  
 l'iphe oomeru unwu eliphe.
- 6 O meru ẹnйimu; yọ buru ali, kpohuru nku.  
 Ẹphe egude okpa wu-swee ya.  
 Ẹhu atsoo ayi ẹna l'ẹke ono; ke iphe o meru.
- 7 O gude ike nk'iya buru eze gbururu jeye.  
 Ẹnya iya aphukotaje iphe bu mbakeshi!  
 Oo ya bu t'ẹ b'ọ dukwa ndu  
 ono, kwefuru ikè ono,  
 e-je iya otso oгу!
- 8 Unu tua Nchileke ayi ẹpha; unube ndiphe!  
 T'a nunua ajaja, unu aja iya!
- 9 O bu iya doberu ayi ndzu;  
 bya emee te eturu be echi ayi.
- 10 Ishi iya aburu le nggube  
 Nchileke dataru ayi;  
 bya emee ayi; ayi adu mma  
 l'ọ bu mkpola-ocha, a huru l'oku.
- 11 I dutaru ayi ye l'onya;  
 bya eworu oke ivu tukobe  
 ayi l'okpurukpu-azu.
- 12 I meru t'unwu eliphe wee ayi ishi kperekpere.  
 Ayi jeru iphe anwu chiru ayi;  
 mini anmaa ayi.  
 Obenu l'i metsuaru;  
 duta ayi dobe l'ẹke ayi tusaru ehu.
- 13 Mu e-gude ngweja-ukfuru bya l'ulo ngu;  
 mekotaru ngu iphe mu  
 riburu le mu e-meru ngu.

- 14 Mu e-me iphe mu gude ọnu  
mu kfua lẹ mu e-meru ngu;  
teke mu shi eje iphe-ẹhuka.
- 15 Mu a-kputa ebyila, ẹba nọ;  
gude gwooru ngu  
ngweja-ukfuru.  
Mu e-gbushiru ngu  
oke-eswi; gbushiaru eghu.
- 16 Iphe bu unube ndu atsu Nchileke egvu;  
unu byakpọduaphu bya angabe nchi;  
te mu kọoru unu iphe o meru lẹ ndzu mu.
- 17 Mu rakuru iya t'ọ gbaaru mu mkpu;  
bya egude ọnu mu gụa egvu; jaa ya ajaja.
- 18 Ndege ọ -buru l'o nweru  
ejo iphe, mu meru;  
woru iya domia l'obu mu;  
me Nnajiufu ta ga  
angabekwa nchi; nua olu mu.
- 19 Obenu l'ọ ngaberu nchi;  
nua olu mu teke mu kfuru nu iya.
- 20 T'ajaja bukwaru ke Nchileke;  
mbu onye e ta ajikadu ekfukfu,  
mu kfuru nu iya;  
ophu ọ budu l'ọ jikajeru lẹ  
ya te eyeheduru mu obu.

## 67

Egvu-ọma, e deru onye ishi egvu; t'a kporu une  
ye iya

- <sup>1</sup> Te Nchileke menuaru ayi  
eze-iphe-ọma.  
Yo gọoru ayi ọnu;  
muru ayi ọnu-ochi;

- <sup>2</sup> k'ọphu ndiphe a-maru ọzo ngu;  
 me k'ọphu iphe bu  
 mbakeshi a-makwaphu l'ọo  
 nggu adzoje madzu.
- <sup>3</sup> Tẹ ndiphe keleje  
 nggube Nchileke ekele!  
 T'iphe bu madzu  
 kpoo-gbaa jaje ngu ajaja!
- <sup>4</sup> T'ẹhu tsonua iphe bu  
 mbakeshi ẹna; t'ẹphe gua  
 egvu ẹhu-otso-ẹna; kele  
 ndiphe mgburumburu;  
 be ikpeje ikpe,  
 vudo nhamunha.  
 Yo buru nggu anọduje  
 akpo-ziru iphe bu mbakeshi ọzo.
- <sup>5</sup> Tẹ ndiphe keleje  
 nggube Nchileke ekele!  
 T'iphe bu madzu kpoo-gbaa jaje ngu ajaja;
- <sup>6</sup> k'ọphu iphe a kọberu l'alẹ  
 e-mehukwanu emehu;  
 Nnajiufu, bu Nchileke ayi agọoru ayi ọnu.
- <sup>7</sup> Nchileke a-gọru ayi  
 ọnu-ọma;  
 k'ọphu ndiphe jeye l'ẹke  
 mgboko jeberu a-nọdu abaru iya ẹja!

## 68

Egvu-ọma, Dévidi deru nu onye ishi egvu

- <sup>1</sup> Tẹ Nchileke zilihu; tẹ ndu  
 ọhogu iya gbaa nanu nanu!  
 Tẹ ndu ọ du ashị shikwa  
 iya l'ifu gbakashihu!

- <sup>2</sup> T'ọ bụkwaru ẹge pherephere  
 ephekashije ẹnwuru-ọku;  
 bụ ẹge ii-phekashi ẹphe nanu nanu.  
 Mbụ t'ọ buru ẹge umu,  
 a ngaberu l'ọku angazehuje;  
 bụ ẹge ndu akirishi  
 a-lakota l'iyi l'ifu Nchileke.
- <sup>3</sup> Obenu ẹ ndu doberu  
 ẹka ndoo a-nodu ete ẹswa;  
 ẹhu atsọo ẹphe ẹna l'ifu Nchileke.  
 Ẹphe e-gude ẹhu-otso-ena  
 l'ete ẹswa eteshi iya ike.
- <sup>4</sup> Unu gụa egvu nu Nchileke.  
 Unu gụa egvu gude kele iya ekele!  
 Unu kutseje onye ono,  
 nọ l'ugbo-inya iya agba  
 l'urukpu ono ekutse.  
 Ẹpha iya bụ Ojejoje.  
 Unu nọdukwa iya l'ifu tee ẹswa.
- <sup>5</sup> Nchileke nọ l'ufu iya, dụ nsọ;  
 mbụ onye bụ iya bụ nna;  
 ndu nna ẹphe ẹ-ta nọhedu;  
 buru onye agbajeru unwanyi,  
 maa tufuru odzori.
- <sup>6</sup> Nchileke emeje tẹ ndu nọ  
 nkinyi nweru ẹke a-buru ẹphe ufu.  
 Oomeje tẹ ndu a turu mkporo  
 nweru onwẹphe  
 l'ẹhu-otso-ena.  
 Obenu ẹ ndu kwefuru iya  
 ikè bụ l'alị, anwu chinwuru  
 echinwu; bẹ ẹphe ebuje.
- <sup>7</sup> Nggube Nchileke;

- teke i duru ndu nke ngu;  
 je eswee alì, daburu swanmangu;  
 8 be alì nmaru jijiji; igwe achia obaru-ugbo  
 l'ifu nggube Nchileke.  
 Ugvu Sáyinayi anmakota jijiji l'ifu Nchileke;  
 mbu nggube Nchileke ke Izurelu.
- 9 Nggube Nchileke;  
 i meru te mini chia nshinu;  
 gude iya mee te alì ngu  
 shihu ike teke ike gvuru iya;
- 10 ndibe ngu alaa l'alì ono je eburu.  
 Nggube Nchileke eshi l'eze  
 iphe i nweshiru; nu ndu ukpa  
 iphe mkpa iya duru ephe.
- 11 O bu Ojejoje turu ekemu obu;  
 a du l'igwe raa ya arara; su:
- 12 "Ndu eze; me ndu soja ephe; be gbaru igbafu.  
 Ephe gbaru igbafu!"  
 Unwanyi akuru l'ufu;  
 l'eke iphe a kwaru l'okwata.
- 13 Ndu k'unwoke azeru  
 l'odu-aturu, du l'o bu ebà  
 ndo, a wuru mkpola-ocha;  
 bya egude mkpola-ododo;  
 mee ebà iya ono;  
 yo gbu nwijnwii.
- 14 Teke Okaribe-Kakota-Ike  
 chikashiru ndu eze l'alì ono;  
 b'o dulephu l'o bu aka-mini,  
 dashiru le Ugvu Zalomonu.
- 15 Ugvu ke Nchileke b'o bu;  
 mbu Ugvu Bashanu.  
 O bu ugvu, nwegbaaru njakata njakata.

- 16 Unube eze ugvu, nwegbaaru njakata;  
 ?bu ngunu kparu iphe unu  
 ejiru ugvu Nchileke ijimanya;  
 mbu ugvu ono,  
 Ojejoje, bu Nchileke fotaru  
 le ya e-buru; chia ndu  
 nk'ia gbururu jeye le gbururu ono.
- 17 Ugvbo-inya ke Nchileke;  
 bukwa unukurunu.  
 Nnajiufu shi le Sinyinayi  
 gude ugvbo-inya iya ono,  
 bu unukurunu ono bya eke o doberu nsọ.
- 18 Teke o gbeshiru lashia l'imigwe;  
 b'o chitaru igweligwe ndu  
 o lutaru l'ogu; kparuru onwiya.  
 Ndiphe; mbu jeyekpo le  
 ndu shi kwefuru ngu ikè;  
 nushiru iya iphe k'ewoma;\*  
 Ojejoje, bu Nchileke e-bu l'eke ono.
- 19 T'ajaja buru ke Nnajiufu;  
 mbu Nchileke ophu bu onye ndzofuta ayi;  
 onye evutaje ivu ehu ayi mboku-mboku.
- 20 Nchileke ayi bu Nchileke, adzoje ndzu.  
 Yo buru l'eka Ojejoje,  
 bu Nnajiufu ono; be eeshije nahu anwuhu.
- 21 Nchileke e-gwe ndu ohogu iya ishi rakaraka;  
 mbu kpua ephe akpo l'ishi;  
 mbu ndu emekwadu ejo iphe.
- 22 Nnajiufu suru: "Le ya e-je Bashaanu;  
 je eduta ndu ohogu unu.  
 Ya abaa l'ime ebo

---

\* **68:18** 68:18 Éfe 4:8.

- eze ẹnyimu; je eduta ẹphe;  
 23 k'ọphu unu e-gbu ẹphe pyaapya; nkuta unu ekee anu ẹphe ẹge du ẹphe mma.”
- 24 Nggube Nchileke;  
 onyemonye obule phuwaru ẹge ndibe ngu dzeberu awu ala; mbu ẹge ndibe nggube Nchileke, bu eze mu dzeberu awu ala l'ulo ono, du nsọ ono.
- 25 Ndu aguru ẹphe egvu vu uto.  
 Ndu ke nkwa etsoru ẹphe.  
 Ndu ophu bu unwu-mgboko bu osa be ẹphe ayọ.
- 26 Unu jaa Nchileke ajaja l'edzudzu oha!  
 Unu jaa Ojejoje ajaja l'ẹke ndu Izurelu dzuru edzudzu!
- 27 Ndu edu ẹphe bu ndu ikfu Benjaminu, bu ndu ikfu ke nwata.  
 Ndu ishi k'ikfu Jada;  
 ndu ishi k'ikfu Zebulun; me ndu ikfu ke Nafutali awu gidigidi etso ẹphe.
- 28 Nggube Nchileke;  
 rukotanu ẹhu!  
 Koshinu ike ngu Nchileke!  
 Mbu ike ono, i gudehawa mee ire l'okfu ẹhu ayi ono.
- 29 Ndu eze e-gude k'eze-ulo ngu,  
 no le Jerusalemu bya emeeru ngu iphe-oma.
- 30 Baaru ẹjo agiyi ono, no l'ẹji ono mbà:  
 mbu mba ono, achi ndiphe



l'ò bụ oke-eswi, eme ẹnari,  
 achi nwa-eswi ono;  
 jeye teke onyemonye ọbule  
 e-wozita onwiya ali;  
 gudelehaa mkpọla-ọcha wotaru ngu.  
 Chikashia ndu ono,  
 ẹgu ọgu anọduje agụ l'ò bụ ẹgu nri ono!

31 Ndu anọ-chi ẹnya ndu

Íjiputu a-bya;  
 ndu Itiyópiya abya  
 achi-lia ẹka kfuru nụ Nchileke.

32 Unu gụa egvu nụ Nchileke;

unube ali-eze unwu eliphe l'unu ha!  
 Unu gụa egvu gude tua Nnajiufu ẹpha!

33 Unu gụaru iya onye ono,

anọduje l'ugbo-inya iya  
 agba l'urukpu ndiche ono,  
 nọ l'ephekerephe ono;  
 mbụ onye ono, olu iya adaje  
 l'ọbu egbe-igwe ono.

34 Unu raa ya arara;

mbụ ẹge ike Nchileke habe nshinu;  
 mbụ onye ọdu-biribiri iya  
 tukuru Ízurelu sweta;  
 onye bụ akpamigwe  
 ekoshije ẹge ike iya ha.

35 Nggube Nchileke;

ì dụ biribiri l'ulo ngu, dụ nsọ.  
 Ọ bụ nggube Nchileke  
 kẹ ndu Ízurelu anuje ndibe  
 ngu ike mẹ agburu-ẹhu.  
 T'ajaja buru kẹ Nchileke!

## 69

Egvu, Dévidi deru nụ onye ishi egvu; t'e gude olu egvu "Okfukfulike" gụa ya

- 1 Dzoo mu nggube Nchileke;  
kele mini wọwaru mu l'ẹkpiri.
- 2 Mu alawa rerireri l'ime ẹpoto;  
ẹke ẹ tọ dudu iphe okobe nvo, nọ iya nụ.  
Mu daruwaru ohu-alị;  
utso eriwa mu eriri.
- 3 Mu chiwaru mkpu;  
ike agvu mu;  
ẹkpiri agowa mu agogo.  
Mu lenyawaru ẹnya elewaa inyoki-inyoki;  
l'ẹke mu ele ẹnya Nchileke mu.
- 4 Ndu mu du ashị l'ẹ b'ọ du  
iphe mu meru ẹphe  
kakwa ẹgbushi, nọ mu l'ishi.  
Ndu ohogu mu adu l'igwe;  
mbu ndu iphe ẹphe shiberu ite iya;  
bu ẹge ee-shi te mu ba abohe;  
l'ẹ b'ọ du iphe mu meru ẹphe.  
Epe ekebutaje mu;  
te mu kfu ụgwo iphe mu te ezitadu.
- 5 Nggube Nchileke;  
i mawaru ẹge mu emebe eswe:  
E t'ọ dudu ẹke mu mesweru,  
e-ta adabuduru ngu ẹba l'ifu.
- 6 Nggube Nchileke,  
bu Okaribe-Kakota-Ike;  
be ekwekwa t'e gude okfu  
ehu mu mee ndu chiru  
ukfu kwee ngu iphe-iphere!  
Ophu i kwekwa t'e gude

okfu ẹhu mu mechia ndu achọ ngu nọ ifu;  
 nggube Nchileke  
 ke Ízurelu!

- 7 Ke l'ọ bu okfu ẹhu ngu;  
 b'e gude ekfuru mu kulakula;  
 iphere eji mu ifu.
- 8 Ndibe ayi dobewaru mu  
 l'ọ bu onye byaru abyabya.  
 Unwunne mu phe egbe  
 gube-wa mu nọ onye ọhodo;
- 9 ke l'obu, mu yeru ọlo ngu  
 evukwa mu ọku l'ẹhu.  
 Iphe bu iphe-iphere, e meru  
 kpua ngu aburu mu vutaru ọnwu iya.
- 10 Teke mu raru ẹkwa;  
 swia aswiswi;  
 igboma egude iya jaa mu ewena.
- 11 Mu -yee uwe-aphu;  
 ẹphe egude mu tulahaa ntọ-okfu.
- 12 Mu bu-wa iphe ndu  
 dzukoberu l'obu-edukfu gude akọ ọnu;  
 buru iphe ndu me eme  
 l'ẹnya gude agụ egvu.
- 13 Ọlobu nggube Ojejoje;  
 be mu a-nọdu ekfu anu.  
 Gudenu n-yemobu ngu  
 nua olu mu teke du ngu mma;  
 nggube Nchileke;  
 nggu adzọo mu ege  
 i kwehawaru mu ukwa iya.
- 14 Lofutanu mu l'epoto ono;  
 be ekwekwa t'o ria mu!  
 Nafutanu mu l'eka ndu mu du ashị;

- gufuta mu l'echi ebo ono!  
 15 Be ekwekwa t'utso ria mu.  
 Be ekwekwa t'ebo ono ria mu;  
 ọphu i kwekwa t'e kpochia mu ẹja ẹ ndzụ!  
 16 Zanụ mu oku;  
 nggube Ojejoje;  
 kele n-yemobu ngu dụ mma.  
 Gudenu k'obu-imiko ngu; ghaaru mu ifu.  
 17 Ba aghakwaru mube onye ejeru ngu ozi azụ.  
 Zanụ mu oku ẹgwegwa;  
 kele mu nọkwa l'iphe-ẹhuka.  
 18 Kpịritanu ntse bya adzọo mu!  
 Gbafuta mu ru mẹ l'ogvu  
 ndu mu l'ẹphe nọ l'okfu!  
 19 I mawaru ẹge ẹphe chi-beru mu ọchi;  
 bya amakwaruphu ẹge ẹphe  
 meberu mu iphe-iphere.  
 Ndu bu ọhogu mu b'ị makotanuru-a.  
 20 E meekwaru mu  
 iphe-iphere; k'ọphu ẹhu  
 anyihuwa mu nkọ.  
 Nta-a b'o mewaru mu;  
 ike agvụ mu.  
 Mu lewaru ẹnya onye  
 imiko mu a-dụ; to nwe.  
 Mu abya elee ẹnya onye  
 a-dụ mu ike; to nwe.  
 21 Nri, ẹphe doberu mu;  
 be ẹphe yeru mu nshi;  
 bya edoberu mu mẹ,  
 shihuru ụka te mu nguru ye iya.\*

---

\* 69:21 69:21 Mát 27:48; Mak 15:36; Luk 23:36; Jón 19:28-29.

- 22 Tẹ nri, ẹphe doberu k'eriri;  
ghokwaa ọnya-ekobe; hata ẹphe;  
anu, ẹphe gburu k'ogwa  
Nchileke aburu ọnya; nmata ẹphe.
- 23 Tẹ ẹnya kpukwaa ẹphe ishi.  
Tẹ ekwebe nyajikwaa ẹphe ẹbo;  
gbururu jeyewaru.†
- 24 Tukoshinu ẹphe  
ẹhu-eghughu ngu;  
nggu egude oke  
ẹhu-eghughu ngu kee ẹphe l'ọ bu ọku!
- 25 Tẹ ufu ẹphe bukwaru ochobo;  
ọphu ọ dukwa onye e-bu l'ulo ẹphe.
- 26 Kele ndu ẹphe akpa ẹhu;  
bu ndu i chiwaru ẹchachi;  
buru ndu i meshiru iphe ike;  
be ẹphe anọduje ekfubyishi ekfubyishi.
- 27 Dokoberu ẹphe ẹjo iphe,  
ẹphe meshiru edokobe.  
Ọphu i kwekwa t'ẹphe  
keta oke l'odobe-ẹka-ndoo nke ngu.
- 28 Te fufukwa ẹpha ẹphe l'ẹkwo,  
e deru ẹpha ndu nọ ndzụ.  
Ọphu i dekwa ẹpha ẹphe  
l'ẹke e deru ẹpha ndu doberu ẹka ndoo.
- 29 Ehu ahụakwa mu ọku;  
uzo echiwa mu.  
Nngube Nchileke;  
tẹ ndzota nke ngu kwakobenu mu.
- 30 Teke ono; mu agua egvu  
gude jaa Nchileke ajaja;  
gude egvu-ekele mee

---

† 69:23 69:22-23 Róm 11:9, 10.

- ẹpha iya t'o dee ude.  
 31 Onanu a-kakwa Nchileke ọtso ẹna;  
     karia l'a kpọtaru iya eswi;  
     mbụ oke-eswi,  
     mpo iya hagbaa ọ  
     gbagara-gbagara;  
     upyi-ọkpa iya epheshitsua ya epheshi.  
 32 Ndu, aakpa ẹhu -phule iya phụ;  
     ẹhu atsọo ẹphe ẹna.  
     Ndu achọ Nchileke; bẹ ọo-du ike!  
 33 Ojejoje anuje olu ndu,  
     ẹ te nwedu ẹge ọ haru ẹphe;  
     ọphu ọ gbakutajedu ndu  
     nk'iya, a turu mkpọro azụ.  
 34 Tẹ ndu bu l'imigwe yele ndu  
     bu le mgboko jaa ya ajaja!  
     T'enyimu yele iphe bu l'ime iya  
     tukokwaphu jaaa ya ajaja;  
 35 kele Nchileke a-dzofuta Záyọnu;  
     kpukwa-zikota mkpukpu, nọ le Júda.  
     Ndiphe a-la iya je eburu;  
     mee ya; yọ buru iphe ẹphe.  
 36 Ụnwu ndu ejeru iya ozi  
     e-me iya;  
     yọ buru òkè-iphe ẹphe.  
     Iphe bu ndu yeru ẹpha iya obu  
     e-buru l'alì ono.

## 70

Egvu, Dévidi deru nọ onye ishi egvu gude  
 nyataru Ojejoje iphe

- <sup>1</sup> Dzonua mu;  
     nggube Nchileke.

Byanu ẹgwegwa;  
bya eyeru mu ẹka;  
nggube Ojejoje!

<sup>2</sup> T'e mekwaru iphe-iphere;  
kpua ndu achọ ishi mu;  
mekwaaphu t'ẹphe ghahụ beringu.  
T'ẹka gwokwaa ndu  
achi mu nụ ẹji; mbụ ndu,  
iphe byaru mu nụ atso ẹna.

<sup>3</sup> T'e mekwaru iphe-iphere  
kpua ndu azuru mu ukwe;  
t'ẹhu daa ẹphe kọo.

<sup>4</sup> T'iphe bụ ndu achọ ngu nụ;  
bukwaru ndu ẹhu a-tso ẹna;  
ẹphe anọdu ngu l'ẹka ete ẹswa.  
Tẹ ndu ẹhu atso ẹna l'i  
dzofutaru ẹphe kfujekwa  
tekenteke; sụ:

“T'a tua onu Nchileke l'ọ ha nshinu-o!”

<sup>5</sup> Obenu ẹ mbedua bụ onye ukpa;  
l'aka ẹka ịkarikari.  
Byanu ẹgwegwa;  
nggube Nchileke.  
Ọ bụ nggu bụ onye eyejeru  
mu ẹka; bụru nggu;  
bẹ adzoje mu nụ.  
Nggube Ojejoje;  
ba akpokwa ukfu abyabya!

## 71

<sup>1</sup> Nggube Ojejoje; ọ bụ nggu;  
bẹ mu nọ l'ẹka l'ezeru ndzụ.  
Be ekwekwa t'iphere mee mu!

- 2 Eshinu i bu onye  
doberu eka ndoo;  
nafutana mu!  
Yeru mu eka te mu nahu!  
Ngaberu mu nchi;  
dzofuta mu!
- 3 Bunuru mu agbara-mkpuma,  
mu a-gbabaje;  
domia onwomu!  
Tunua ekemu t'a dzoo mu;  
ke l'o bu nggu bu  
agbara-mkpuma mu;  
buru nggu bu  
a-gbabe-a-dzuru nke mu.
- 4 Nggube Nchileke mu;  
gbafuta mu ru; l'eka ndu akirishi;  
mbu l'eka ndu e te dobedu eka ndoo;  
me ndu iwe.
- 5 Ke l'o bu nggube Nnajiufu, bu Ojejoje;  
be mu chiru enya ziaru.  
Keshinu mu bu nwata;  
bu nggu; be mu dakoberu.
- 6 Keshinu ophu a muru mu;  
bu nggu be bu agbarike mu.  
Mu a-nodulephu etu ngu epha  
gbururu jeye le gburu;  
ke l'o bu nggu kufutaru mu l'epho nne mu.
- 7 A duwa l'igwe gude mu anma etu oma.  
Obenu l'oo l'eka ngu;  
bu eke, shihuru ike,  
mu anoduje; ezeru ndzu.
- 8 Eswe l'enyashi;  
be mu anoduje etu ngu epha;



- l'atụ ọnu ẹge ị du-be biribiri.
- <sup>9</sup> Byiko; ba ajikakwa mu nta-a,  
mu buwa ọgurenya-a.  
Be eleswetakwa mu nta-a,  
ike gvụwaru mu-a.
- <sup>10</sup> Kele ndu ọhogu mu  
ekfukwaru mu ẹjo okfu.  
Ndu domishiru onwẹphe;  
kwabẹ t'ẹphe mee mu iphe  
anọkobeje achị idzu ẹhu mu.
- <sup>11</sup> Ẹphe asuje: “Lẹ Nchileke jikawaru mu.  
T'a chĩa mu gude;  
kẹ l'ẹ tọ dukwa onye abya mu agbataru.”
- <sup>12</sup> Ba anọdukwa mu ote-ẹnya; nggube Nchileke.  
Nggube Nchileke nke mu;  
bya ẹgwegwa bya eyeru mu ẹka!
- <sup>13</sup> T'iphe bu ndu ebo mu ibo  
bukwaru ndu iphere e-me t'ẹphe chihu.  
Tẹ ndu ono, eme t'ẹphe  
wofu mu ono bukwaru ndu  
aa-chị ọchi; jaa ewena.
- <sup>14</sup> Obenu lẹ mbẹdua bulephu  
l'ẹke iino; bẹ ẹnya mu a-nọ.  
Mu a-nọdu aka ngu oja ajaja l'eje.
- <sup>15</sup> Mu e-gude ọnu mu ekfu iya mkpụrumkpuru  
l'ekfushi iya ike  
l'ị doberu ẹka ndoo;  
mẹ l'ọ bu nggu adzoje madzu.  
Odobe-ẹka-ndoo ngu;  
mẹ ndzọta nke ngu ono hatabe nshinu  
k'ọphu bu lẹ mu ta  
atukota-ghedu ọnu iya.
- <sup>16</sup> Mu e-gude ike kẹ

nggube Nnajiufu, bu Ojejoje  
 je araa ya arara l'ọ bu  
 nggubedua nwenkinyi ngu;  
 bu onye doberu ẹka ndoo.

- 17 I shikpooru keshinu mu  
 bu nwata zita mu iphe;  
 nggube Nchileke.  
 Iphe du biribiri, iimeje;  
 be mu shilephu teke ono  
 tuta onu iya jeye nta-a.
- 18 Nta-a, mu buwa ogurennya,  
 ewo kpuru mu ishi-a;  
 ba aghakwaru mu azu;  
 nggube Nchileke jeye teke  
 mu akoberu ogbo ophu  
 abyanu ege ike ngu habe nshinu;  
 mbu kooru iya iphe bu  
 ndu ee-mekochaa mu  
 ege ike ngu habe nshinu.
- 19 Odobe-eka-ndoo ngu  
 ruru akpamigwe;  
 nggube Nchileke;  
 mbu nggube onye ono,  
 meshiru iphe paru ẹka ono.  
 ?Bu onye aturu ngu;  
 nggube Nchileke?
- 20 E gudekwaru l'i  
 mewaru mu;  
 mu ejee iphe-ehuka;  
 onu akpu mu uphu;  
 obule mu marua  
 l'ii-me mu-a te mu  
 gbufu bya adu mma odo;

- mbụ kufuta mu l'ime ili; woru mu melia.
- 21 Ii-me t'a ka mu ọkwabe ugvu.  
 Ọ kwaphụ ẹge ono;  
 bẹ ii-dụ mu ike ọdo.
- 22 Nggube Nchileke mu;  
 mu a-kpọ une gude jaa  
 ngu ajaja l'ị bụ onye  
 evudoshije ike l'iphe i kfurū.  
 Mu e-gude ogele gụa egvu;  
 jaa ngu ajaja;  
 nggube Onye dụ Nsọ kẹ Ízurelu.
- 23 Mu a-tụ ụzu ẹhu-ọtso-ena;  
 gụa egvu gude jaa ngu ajaja;  
 mbụ mụbe onye ị gbafutaru.
- 24 Eswe mẹ ẹnyasi;  
 bẹ mu a-nọdu e-kfushi  
 iphe i meshiru gude koshi  
 l'ị doberu ẹka ndoo;  
 kẹle ndu shi achị mu nụ;  
 b'e mewaru iphere kpua;  
 mekwaaphu t'ephe ghahụ beringu.

## 72

Egvu, Sólomọnu deru

- 1 Nggube Nchileke;  
 menua tẹ eze kpeje ikpe ẹge  
 nggubedua ekpe!  
 Menua tẹ nwatibe eze  
 dobe-ẹka-ndoo ẹge  
 nggubedua doberu;
- 2 k'ophu oo-kpeje ndibe ngu ikpe, dụ mma;  
 gbaaru ndu aakpa ẹhu ọdzori.
- 3 Tẹ ugvu ugvu ndu k'eze iya

mee t'ẹhu dų ndiphe agu.  
 Ugvu ugvu ndu kẹ nshì  
 emee t'ẹphe gude umere  
 ẹphe koshi l'ẹphe bų ndu doberu ẹka ndoo.

4 Ndu aakpa ẹhu;

bẹ eze a-gbaru ọdzori;  
 dzọo ụnwegirima ndu  
 ẹ ta dudu ẹge ọ haru ẹphe;  
 dzọpyashia ndu ono,  
 akpa ẹphe ẹhu ono ishi.

5 Ẹphe a-nọdu abaru ngu eja  
 gbururu jeye teke ẹnyanwu;  
 mẹ ọnwa a-nobebe;  
 mbụ tsube l'ọgbo sweru ọgbo.

6 Ọo-dų l'ọ bų mini, achi l'ẹke, a sųru asųsu;  
 mbụ l'ọ bų ẹke igwe  
 ayọru alì teshiteshi mini.

7 Teke ono, ọo-nọdu achi ono;  
 bẹ ndu doberu ẹka ndoo  
 a-jà ajàjà.

Ẹhu-agu achiiko ẹkemekẹ jegbaru;  
 jeye teke ọnwa ta anọhedu.

8 Ọo-bųru eze chia ndiphe  
 tsube l'eze ẹnyimu rua  
 eze ẹnyimu; mbụ tsube lẹ  
 Ẹnyimu Yufurétusu jeye  
 l'ẹke mgboko jeberu.

9 Ndu bu l'echi-ẹgu a-bya  
 ebyiaru iya ikpere l'alì;  
 ndu ọhogu iya achičiaru  
 iya ọnu achičhi l'ẹja.

10 Ndu eze ndu Tashishi;  
 mẹ ndu bugbaa l'ikfuli

- a-nọdu atụ ụtụ anụ iya.  
 Ndu eze ndu Sheba yẹle  
 kẹ ndu Seba e-wotaje iphe bya anụ iya.
- 11 Iphe bụ ndu bụ ndu eze  
 l'ẹphe ha e-byishiru iya ikpere.  
 Iphe bụ mbakeshi e-jeru iya ozi.
- 12 Kẹle ndu ẹ ta dudu ẹge  
 ọ haru ẹphe -rakua ya;  
 bẹ ọo-dzọfuta ẹphe;  
 mbụ ndu iphe-ẹhuka byaru;  
 to nwe onye a-gbaru ẹphe mkpu.
- 13 Ọo-phuru ndu ike ta anọdu;  
 mẹ ndu ẹ ta dudu  
 ẹge ọ haru ẹphe imiko;  
 bya adzọo ndu ẹ ta dudu  
 ẹge ọ haru ẹphe ndzụ.
- 14 Ọo-nafuta ẹphe l'ẹka  
 ndu akpa ẹphe ẹhu;  
 mẹ l'ẹka ndu ẹnya enwu ọku;  
 kẹle ndzụ ẹphe dụ iya mkpa nshinu.
- 15 Tẹ ndzụ eze bukwaru ndzụ ogologo.  
 T'a nujekwa iya  
 mkpọla-ododo ndu Sheba!  
 Tẹ ndiphe kfujekwaru nụ  
 Nchileke l'okfu ẹhu iya;  
 ẹphe agojekwaru iya phụ  
 ọnu mbọku-mbọku.
- 16 T'iphe a kuru akuku tukwaa  
 ụda; tụa nggodo l'alị-a.  
 Tẹ iphe a kọberu l'eli ugvu  
 mehukwa l'ọ bụ iphe  
 e meberu lẹ Lébanonu!  
 Tẹ ndu mkpukpu ono

- zụkwaa l'ọ bụ ẹsua l'igu!  
 17 T'ẹpha eze nọdukwa ojejoje;  
 ụdu iya edzuru ẹkemeke  
 l'ọ bụ ẹnyanwu, nọ l'igwe.  
 Ee-shi l'ẹka iya gọoru  
 iphe bụ mbakeshi ọnu;  
 ndiphe l'ẹphe ha ekua  
 ya ọnye a gọru ọnu.
- 18 T'ajaja bụru ọ  
 Ojejoje, bụ Nchileke;  
 mbụ Nchileke ọ ndu Ízurelu;  
 mbụ ọnye bụwa iya phụ nwenkinyi;  
 be emeje iphe dụ biribiri.
- 19 T'ajaja bụkwaruphu ọ  
 ẹpha iya ono, dụ biribiri  
 ono jeye ọ tutu yoyo!  
 Tẹ biribiri iya chikokwa  
 mgboko dzuru!  
 Ono kwa ẹge ọ dụ.  
 Ono kwa ẹge ọ dụ!
- 20 Ono kwa ishi ẹke Dévidi Jesi  
 kfubeberu nụ Nchileke.

## 73

Egvu-ọma, Ásafu deru

- 1 Ọkpobe okfu bụ ọ  
 Nchileke dụru ndu Ízurelu  
 ọ mma; mbụ ndu,  
 obu ẹphe gụru iphoro.
- 2 Obenu ọ mbẹdua  
 phọdukpooru nwa gẹngu;  
 mẹ ọkpa echifu mu;  
 mbụ l'ọ phọdukpowarua nwanshi;

- mę mu ta aduhe  
 ike vudo l'iphe mu vudo.
- 3 Kele mu wataru ojiru ndu  
 etu onwęphe oke ępha  
 ijimęnya teke mu phuru  
 le ndu akirishi;  
 be iphe duru le mma.
- 4 E to dudu iphe atsụ ęphe l'ęhu.  
 ęphe shihuru ike;  
 ęhu adu ęphe mma.
- 5 Iphe ta atsudu ęphe l'ęhu ege ọotsu ndu odo;  
 ishi, akuje ndu odo ta aku ęphe.
- 6 Yo buru iya meru;  
 ekuku, ęphe eku onwęphe  
 aburu ęphe iphe-olu.  
 Iphe-kpaa aburu uwe,  
 ęphe eye l'ęhu.
- 7 Iphe eshije ęphe l'obu  
 nwęnkinyi bu ęjo iphe.  
 ęjo idzu, ęphe anọduje achi  
 aburu 'onwe nwunne.
- 8 ęphe anọduje achi madzu ọchi;  
 l'anma onye obu kulakula.  
 ęphe egudeje ekuku,  
 ęphe eku onwęphe l'eyeshi madzu egvu  
 iphe ęphe e-me iya.
- 9 ęphe anọduje ekfubyishi  
 Nchileke, bu l'imigwe;  
 l'aharu ndiphe kpaakpaa.
- 10 Oo ya meru iphe ndu nke  
 mu ghakoberu tsoru ęphe;  
 kwetakota iphemiphe obule, ęphe ekfu.
- 11 ęphe asuje: “?Nanu ege

Nchileke e-shi maru?  
 Okaribe-Kakota-Nu;  
 ?o maru ngunu?"

- 12 Owaa ege ndu akirishi du:  
 E to dudu iphe eruje epe l'ehu;  
 o bu l'eku anodujekwanu abyaru epe.
- 13 Mbèdua, haru obu mu t'o gua iphoro-a;  
 ?o bu l'oo eswe b'o bu mu too.  
 Too ege ono, mu sefuru  
 eka l'iphe du eji ono:  
 ?o buwa mu ke mmanu too.
- 14 Iphe bu eswe, mutaru amuta;  
 be iinoduje anu mu aphu;  
 nggube Nchileke.  
 E to nwedu mboku,  
 mu noghajeru;  
 t'iphe-ehuka be dakfuta mu.
- 15 Mu -su le mu e-dokwa;  
 yo du l'o bu mgbamu;  
 mu agba iya unwu Nchileke.
- 16 Oobuje teke mu jeru ome  
 t'iphe ono doo mu enya;  
 yo gbe buru mu iphe-ehuka;
- 17 gbururu jeye mu abya abahu  
 l'ulo nsò ke Nchileke.  
 O bu teke ono b'o doru mu enya;  
 mbu iphe e-mekochaa maru epe;
- 18 iiwojeru epe dobe l'eke echi eturu;  
 gbahaa epe eka; epe abya adashia;  
 buru kpurupyata.
- 19 E ta anodu ophu baru nwishi;  
 epe aburu kpurupyata;  
 kprofu l'o bu eswa.



- 20 Ẹphe aduje l'ọ bu nro;  
 o -be l'utsu; a zahaa ya.  
 Ọ kwaphu ege ono;  
 be epe achihuje l'ifu  
 nggube Ojejoje teke i gbalihuru.
- 21 Teke ono, mu shi agu aphu,  
 iwe jiru obu mu ono;
- 22 be mu shi buru onye eswe;  
 to nwe iphe mu maru.  
 Mu eshikwa du ngu  
 l'ọ bu anu-egu-egbudu!
- 23 Obenu le mu anoje ngu ntse tekenteke;  
 nggu egude eka-utara ngu sekputa mu.
- 24 Ishije l'ike, idu mu l'eduzi mu uzo;  
 k'ophu bu l'e megee;  
 be ii-nabata mu l'odu-biribiri ngu.
- 25 ?Bu onye be mu nweru l'imigwe,  
 abudu nggubedua?  
 E to dukwa iphe no le  
 mgboko-a, egu iya agu mu;  
 gbahaa nggubedua.
- 26 Ike agvuje anu-ehu mu;  
 gvu obu mu.  
 Obenu l'ọ bu Nchileke bu  
 onye emeje te mu shihu ike;  
 buru iya bu okè-iphe mu  
 gbururu jeye le tutu yoyo.
- 27 Ndu no ngu ote-enya a-la l'iyi;  
 ndu e ti gudedu ire epe  
 eka; be ii-me t'epe buru kpurupyata.
- 28 Obenu le mbedua b'ọ du te  
 mu nodu Nchileke ntse.

Mbẹdua wowaru Nnajiufu,  
 bu Ojejoje;  
 mee a-gbabe-a-dzuru nke mu.  
 Oo ya bu le mu a-kokota  
 iphe du mma, iime l'ehu mu.

## 74

Évù, Ásafu raru

<sup>1</sup> Nngube Nchileke;

?bu ngunu kparu iphe  
 i zaharu ayi k'ojejoje ege-a?  
 ?Bu ngunu kparu iphe  
 i wotaru ehu-eghughu ngu  
 kpukpobe ndu nke ngu ege-a?

<sup>2</sup> Nyatakwa igwe oha ono,  
 i kfuru aswa ishi epe l'ede-nwede ono;  
 mbu okpa-ikfu ono,  
 i gbataru l'itumo; mee epe;  
 epe aburu nke ngu ono.  
 Nyatakwa Ugvu Zayonu ono,  
 i bu ebubu ono.

<sup>3</sup> Jeduduphu je aphu ege  
 e mebyishiru iya;  
 mbu ege ndu ohogu  
 meru ulo ngu ono, du nsọ ono.

<sup>4</sup> Ndu ohogu ngu byawaru  
 bya anodu l'ulo-ndzuko ngu l'atu uzu;  
 su l'epe mekputawaru.  
 Epe achiko iphe-ohubama doo ya.

<sup>5</sup> Epe eme l'o bu onye pa  
 ogbu-nku tsoru eke oswa no tugburu;  
 l'egbutsushi iphe bu oshi, o phuru.

<sup>6</sup> Iphe bu iphe a pyiru apyipyi;

bẹ ẹphe gude ogbu-nkụ;  
gude ọngu mebyishikota  
l'ọ ha.

- 7 Ụlo ngu, ụ nsọ bẹ ẹphe  
muru ọku ye; yo tsua ya; yọ buru ntụ.  
Eke ono, ị fọtaru t'ọ buru  
ẹke ii-buru eburu ono;  
bẹ ẹphe farushiru afarushi.
- 8 Ẹphe ekfu l'ime obu ẹphe; sụ:  
“L'ẹphe e-mebyishikota iya  
l'ọ ha kpamukpamu!”  
Ẹphe etsukota ọku l'iphe bu ẹke,  
e shi anọduje abaru Nchileke ẹja.
- 9 Ẹ tọ ụhedu iphe-ọhubama,  
ụ biribiri, eemejekwaduru ayi;  
ọphu ọ ụhedu ndu  
nkfuchiru Nchileke,  
phọdukwaduru nụ;  
ọphu ọ ụdu ayi onye,  
maru teke egbe iphe ọwaa emebebe.
- 10 ?Bụ teke ole; bẹ ndu ọhogu  
ngu e-ngeberu ngu ẹka l'ishi;  
nggube Nchileke?  
?Ẹphe e-gudewaru ẹpha ngu  
l'emebyishi ẹge-a gbururu jeye tọ?
- 11 ?Bụ ngunu kparu iphe ị ị  
byadu bya ebyia ẹphe ẹka?  
Chifuta nụ ẹka l'utakfu  
bya emebyishia ẹphe.
- 12 Obenu l'ọ bu nggube  
Nchileke bu eze nke mu,  
shi lẹ ede-nwede.  
Ọ bu nggu wobataru

- ndzofuta le mgboko-a.
- 13 O bu nggubedua gude ike  
ngu kewaa eze enyimu ebo.  
Ejo-anu, butsua le mini  
b'i gwepnyashiru ishi ephe etsupyashi.
- 14 O bu nggubedua  
dzopyashiru ejo agiyi ishi;  
woru iya nu unwu anu,  
bu l'echi-egu t'o buru iya nri.
- 15 O bu nggu gbafushiru  
ogba me nggele;  
mini eshi iya wata atsotso.  
I meru enyimu, atsotsua  
atsotso; yo tashihu.
- 16 O bu nggu nwe eswe;  
nweru enyashi;  
buru nggu doberu enyanwu;  
me onwa; ephe ekeru jimujimu.
- 17 O bu nggu tubuhawaru  
eke a-buru oke mgboko;  
buru nggu doberu okochi; dobe winta.
- 18 Nggube Ojejoje;  
nyatakwa ege ndu ohogu  
ngu ekfutaberu ngu kulakula;  
mbu ege ndu eswe gude  
epha ngu afa kutukutu.
- 19 Be ewokwaru ndu nke ngu,  
ike e-ta nodu ye l'eka ejo anu-egu-egbudu.  
Ba azahakwa ndibe ngu,  
bu ndu aakpa ehu  
t'ephe noduwaru ege ono gbururu jeye.
- 20 Nyatakwa ndzu, ayi le nggu gbaru;  
ke l'emekwa madzu

- omeliwe l'iphe bu ẹke, gbaru ọchi l'alì-a.
- 21 Be ekwekwa tẹ ndu ono,  
 aakpa ẹhu ono gude iphere tsuphu azu.  
 Tẹ ndu ụkpa; mẹ ndu,  
 ẹ ta dudu ẹge ọ haru ẹphe jaa ẹpha ngu  
 ajaja!
- 22 Gbalihunu nggube Nchileke;  
 kfuchiaru onwongu.  
 Nyatakwa ẹge ndu eme  
 eswe eshije l'utsu nma ngu  
 kulakula jeye ẹnyashi.
- 23 Ba azahakwa hanyihanyi,  
 ndu ì dọ ashì aba;  
 mbu wọwowo,  
 ndu ọhogu ngu anọduje atọ ekpu ngu.

## 75

Egvu-ọma, Ásafu deru nọ onye ishi egvu; ishi  
 egvu iya bu “Be ekwekwa tẹ ya laa l'iyi”

- 1 Ayi ekele ngu ekele;  
 nggube Nchileke.  
 Ayi ekele ngu ekele.  
 Ndu eku ẹpha ngu atọ ọnu  
 iphe dọ biribiri, iimeje.
- 2 Ọ bu nggube Nchileke bẹ sọru:  
 “L'i dobewaru teke ii-kpe ikpe;  
 kpee ikpe, dọ mma.
- 3 Teke mgboko; mẹ iphe bu ndu  
 bu iya nọ anma jijiji;  
 bu nggubedua egudeje  
 itso iya ẹka gudeshia ya ike.
- 4 Ndu eku onwẹphe ekuku  
 b'ì sọru t'ẹphe haa oku onwẹphe.

- Ndu akirishi b'i sūru  
t'ẹphe haa ọnyaru onwẹphe ndu.
- <sup>5</sup> Unu hajee ọnyaru Nchileke ndu.  
Unu ahaa ọsa kpaakpaa.”
- <sup>6</sup> Egbeshi madzū te shidu l'uzo ẹnyanwu-ahata;  
to shi l'uzo ẹnyanwu-ariba;  
ọphu o shikwanu l'uzo echi-egu.
- <sup>7</sup> Ọ bụ Nchileke bụ onye ekpeje ikpe;  
būru iya anmajẹ madzū ikpe;  
būru iya ekpefuje ndu ọdo.
- <sup>8</sup> Ọ bụ Ojejoje; bẹ okoro nọ l'ẹka.  
Iphe jiru okoro ono aburu mee, etsu ọphu.  
Ẹ to nwedu iphe ẹ te eyedu iya;  
gude mee ya t'o shihu ike.  
Yọ buje; ọ nọnyaa;  
yọ gbashia ya.  
Iphe bụ ndu akirishi ẹ  
mgboko-a angua ya jeye teke  
ẹphe a-ngu ngua ọhu iya.
- <sup>9</sup> Obenu ẹ mbedua a-nodu  
ete ẹswa gbururu jeye.  
Mu a-nodulephu agụ egvu  
l'aja Nchileke kẹ Jékọpu.
- <sup>10</sup> Ndu akirishi;  
bẹ mu a-nafu ike ono,  
ẹphe nweru ono;  
mee tẹ ike kẹ ndu doberu  
ẹka ndoo ka.

## 76

Egvu-ọma, Ásafu deru nū onye ishi egvu; t'a  
kpọru une ye iya

<sup>1</sup> A maru Nchileke amaru ẹ Júda.

- Ẹpha iya ede ude lẹ Ízurelu.  
 2 Ẹke ọlọ iya nọ bụ lẹ Salemu.  
 Ẹke o bu ebubu aburu lẹ Ugvu Záyonu.  
 3 Ọ bụ l'ẹke ono b'ọ nyajishiru  
 akfụ, enwu ọku, ndu ọhogu iya agba;  
 nyakwoshia ogu-mbeke  
 ẹphe; mẹ iphe ẹphe  
 egbobeje gude zeeru onwẹphe;  
 mẹ iphe bụ iphe ẹphe egudeje alu ọgu.  
 4 I dụ biribiri; dụ ugvu  
 l'iishi l'ugvu ugvu, ẹke i  
 mekputaru ndu ọhogu ngu alata!  
 5 Ndu ọphu bụ mkparawa  
 l'ime ẹphe b'e gworu iphe ẹphe tụtua atutu.  
 Ẹphe nwushihuru;  
 tọ dụ ẹphe m'ọo onye lanu,  
 ike dụ k'ome ukporo.  
 6 Nggube Nchileke kẹ Jékọpu;  
 ọ bukquadua mbà b'ị baru ẹphe;  
 inya ẹphe; mẹ ndu agba iya nù  
 l'ẹphe ha adashia.  
 7 Ọ bụ nggu nwenkinyi ngu  
 b'ọ gbaru t'a tsuje egvu.  
 ?Bụ onye a-dụ ike vudo ngu l'ifu;  
 mẹ ẹhu wata ngu oghu eghughu?  
 8-9 Nggube Nchileke;  
 teke i shi l'imigwe t'i kpee ikpe;  
 dzofuta ndu aakpa ẹhu lẹ mgboko;  
 b'ị nọ l'imigwe ono bua ikpe;  
 alị atsuhu ngu egvu daa shikongu.  
 10 Eeshije l'oke ẹhu-eghughu  
 ndiphe jaa ngu ajaja;  
 kele ndu ọphu oke

ẹhu-eghughu ngu ono haru;  
a-ruku ngu ẹka.

- 11 Ọ -buru l'unu riburu  
Ojejoje, bu Nchileke unu  
l'owaa iphe unu e-meru iya;  
unu mekwaa iphe ono,  
unu kweru ukwa iya.  
T'iphe bu ndu, bunyabe  
unu byakwa bya emeeru onye lanu ono,  
gbaru t'a tsuje iya egvu ono iphe-oma.
- 12 Oomeje t'obu rua ndu ishi, achi nu ali.  
Ndu, bu eze le mgboko-a l'atsu iya egvu.

## 77

Egву-oma, Asafu deru nu onye ishi egvu, bu  
Jedutunu

- 1 Mu rakuru Nchileke  
t'o gbaaru mu mkpu.  
Mu araku Nchileke  
t'o nua olu mu.  
Yo nua ya.
- 2 Teke mu no l'iphe-ehuka;  
be mu choru Nnajiufu.  
Enyashi mgburumburu;  
be mu chilikotaru ẹka;  
ekfu anu Nchileke.  
Ofu okpoma egvuduru mu egvuru.
- 3 Oobuje; mu rita  
nggube Nchileke;  
mu azua ume.  
Mu gbawaru  
mgbamuiche; ike agvu mu.
- 4 I meru; mgbenya agbalaa mu l'enya.  
Iphe ono tsuta-beru mu l'ehu;



- k'ophu bu l'ọ kporu mu okfu.
- 5 Mu bya egude egomunggo;  
lee ẹnya lẹ teke ndiche;  
mbu teke ohazu.
- 6 Mu abya anyata egbe egvu,  
mu shi anọduje agụ l'enyashi.  
Mu bya awata ọori  
ege iphe shi dụ teke ono.  
A nọnyaa; mu ajia onwomu; sụ:
- 7 “Nnajiufu; ọo-jikawaru ayi  
jeye lẹ gbururu ọo.  
?To nwedu teke  
ọo-nọnyaa; ghakwaduaru ayi ẹnya ọdo ọo?”
- 8 N-yemobu iya ono,  
ẹ ta gvujedu agvugvu ono;  
?too ruhedu ayi ẹka ọdo ọo?  
?O bu l'ẹ too mehedu iphe ono,  
o kweru ayi ukwa iya ono ọo?”
- 9 Nchileke; ọo zahawaru  
obu-imiko iya ono ọo?  
?O gudewa ẹhu-eghughu  
zahaa obu-imiko iya ono ọo?”
- 10 Ya ndono; mu asu: “L'ophu,  
kakwa mu ọtsu l'ẹhu;  
bu lẹ Okaribe-Kakota-Nu;  
be ike ta duhedu.”
- 11 Mu ta azahadu  
iphe-kpangangu, Ojejoje shi emeje.  
Mu a-nyatakota iphe  
biribiri, o shi emeje.
- 12 Mu a-nodu rja oriri  
ke iphe ono, i mekotaru ono;  
mbu eze iphe ono, i shi emeshije ono.

- 13 Nggube Nchileke;  
 ụzo ngu dụ nsọ!  
 ?Nanụ agwa, aa-turu yeru Nchileke ayi?
- 14 Ọ bụ nggu bụ Nchileke,  
 emeje iphe-ophulanya.  
 Iimeje tẹ ndiphe phua  
 ẹge ike ngu habe.
- 15 I gude ike ngu gbafuta ndibe ngu;  
 mbụ unwu Jékpọ;  
 mẹ unwu Jósefu.
- 16 Mini phuru  
 nggube Nchileke;  
 tsua egvu;  
 ebo mini awata onma jijiji.
- 17 Igwe ruru eruru chĩa mini;  
 igwe agbalahaa agbagba;  
 ebemu-igwe ekulahaa ikufu.
- 18 A nuru ọda egbe-igwe,  
 ị tụ l'echi oke pherephere.  
 Ebemu, iiku kẹ  
 meremu meremu aburu  
 iphoro, e gude aphụ ụzo lẹ mgboko.  
 Alị atsulahaa egvu; wata onma jijiji.
- 19 Ị tọru ụzo ngu l'echi eze ọnyimu.  
 I shijaru eze echi-onyimu,  
 ha nshinu sweta;  
 ophu o nwedu ẹke a phuru apata-ọkpa ngu.
- 20 Ị shi l'ẹka Mosisu yele Ẹronu  
 dua ndibe ngu l'ọ bụ onye edu aturu.

## 78

Évù, Ásafu raru

<sup>1</sup> Ndu mu; unu ngabẹ nchi;

- tẹ mu zia unu iphe!  
 Unu ngabe nchị;  
 nua okfu, shi mu l'ọnu!  
 2 Mu e-gude ẹtu ẹtu  
 voshiaru unu iphe,  
 e shi keshinu ndiche  
 domiaru unu edomi.  
 3 Iphe ono bu iphe ayi nuhawaru;  
 buru iphe ayi mahawaru;  
 mbu iphe nna ayi oche phe  
 shi akojehawaru ayi.  
 4 Ayi te edomikwaru iya  
 unwu ayi iphe biribiri;  
 me iphe-ophulenyanya,  
 Ojejoje mekotaru;  
 jeye l'iphe ndu ophu e gude jaa ya ajaja.  
 Ayi a-koru iya ndu ogo  
 ophu nokwadu l'ifu.  
 5 O doberu unwu Jekopu nso,  
 ephe e-tsoje;  
 bya atua ekemu dobe;  
 yo nguru anguru l'ali Izurelu;  
 bya asu ndiche ayi phe  
 t'ephe zikwaa ya unwegirima ephe;  
 6 k'ophu ogo ophu abya nu  
 a-maru iya;  
 mbu ndu ophu e te gbe amudua.  
 Ephebedua egudekwa  
 iya phu zia unwu nk'ephe.  
 7 E shi ege ono; ephe akporu  
 obu yeru Nchileke;  
 k'ophu ephe ta azahadu iphe o meshiru;  
 ephe edobedzua ekemu iya l'o ha.

- 8 Ẹphe taa aduhedu l'ọ bu  
 nna ẹphe oche pẹ,  
 shi buru ndu ẹjo ọkpoma;  
 buru ndu, kwefuru Nchileke ikè;  
 mbu ọgbo, ẹ ta adudu teke  
 ẹphe wozitajeru onwẹphe  
 alì l'ẹke Nchileke nọ;  
 t'ẹ gude ire ẹphe ẹka l'ẹke Nchileke nọ.
- 9 A makwaru-a l'unwoke  
 Ifuremu gude akfụ kwaa  
 onwẹphe ngwa-ọgu.  
 Obenu l'ọgu dalẹruphu;  
 ẹphe eye ọkpa l'ọso; gbalashia.
- 10 Ẹphe dakaru ndzu, ẹphe lẹ  
 Nchileke gbaru;  
 jika ome iphe ọ turu ẹphe l'ekemu.
- 11 Ẹphe zaharu iphe Nchileke meshiru;  
 mbu iphe du biribiri,  
 o meshiru koshi ẹphe.
- 12 O meshiru iphe du biribiri  
 l'ifu nna ẹphe oche l'egu  
 Zowanu lẹ Ijiputu.
- 13 Eze Ẹnyimu b'o meru;  
 yo bokahu ẹbo.  
 Yo dua ẹphe;  
 ẹphe awu-sweta.  
 Yo bya emee mini;  
 yo kpua nmororo l'ọ bu upho-mkpuma.
- 14 Iphe o gude dua ẹphe l'eswe bu urukpu;  
 bya egude iphoro ọku dua  
 ẹphe l'enyashi mboku-mboku.
- 15 Agbara-mkpuma b'ọ  
 gbajahuru ẹbo l'echi-egu;

- mini eshi iya nwufuta  
l'enwu dukuduku l'ọ bu eze ẹnyimu.
- 16 Yọ buru ẹke mkpuma  
gbaru ọru b'o meru;  
mini atsoşshihu; tsolahaa l'ọ bu nggele.
- 17 Obenu l'ẹphe emelee iphe du  
ẹji l'ẹke Nchileke nọ.  
Ẹphe nọlee l'echi-ẹgu ono;  
kwefuleru-a  
Okaribe-Kakota-Nu ikè.
- 18 Ẹphe lebezikpooru ẹnya  
wata ọdata Nchileke;  
mbu kebekpelephu l'ọ  
nu-futaje ẹphe iphe agubebe ẹphe.
- 19 Ẹphe kfuru Nchileke ẹjo okfu: su:  
“?Bu ke nri, Nchileke a-du ike  
nu ẹphe l'echi-ẹgu to?”
- 20 Teke ọ kuru iphe le  
mkpuma ono; be mini,  
shi iya nu tsolahaaru l'ọ bu nggele.  
Olobu; ?oo-nu-ghe ẹphe nri to?  
L'oo du ike nu ẹphe anu, ẹphe a-ta to?”
- 21 Ojejoje anule iya phu;  
voru oku ghua ẹhu;  
gude oku ẹhu-eghughu iya  
kpoberu ndibe Jékọpu;  
bya eworu ẹhu-eghughu  
iya byiberu ndu Ízurelu;
- 22 ke l'ẹphe te kwetadu ke Nchileke;  
ophu ẹphe 'ekwetakwaphu  
l'oo-du ike dzofuta ẹphe.
- 23 Obenu l'ọ kfuru akpamigwe iphe oo-me;  
bya aguhashia ọzo imigwe;

- 24 bya achiaru ndu Ízurelu  
 mana ono l'ò bú mini.  
 Yò buru akpuru iphe  
 shi l'igwe b'ò nuru ephe ege ono.
- 25 Madzù eria nri, unwu ojozi-imigwe erije.  
 O nuru ephe nri;  
 ephe eria ege o guru ephe.
- 26 Pherephere, eshije l'uzo  
 enyanwu-ahata, bú yèbedua  
 tūharu iya uzo imigwe.  
 Yò wata ephephe.  
 Ege ono kwaphu b'o gude  
 ike iya nwufuta ophu eshije  
 l'uzo ohuda.  
 Yò wata ephephe.
- 27 Anu, aata atata b'ò chiru  
 ephe l'ò bú mini;  
 yoo tsu gbigbigbi l'ò bú udzu, nò l'ali.  
 Unwenu, ephe l'eli b'o nwuru nu ephe;  
 yo ghakashihuru ephe l'ò  
 bú eja, kuru l'iku enyimu.
- 28 O meru ephe; ephe  
 ephebatsua l'odu ephe.  
 O shi anoduje ephephe  
 l'ulo-ekwa ephe mgburumburu.
- 29 Ephe eria nri jeye ephe eji ephe;  
 ke l'ò nuru ephe iphe agu ephe.
- 30 Ole t'ephe kwaa rigee nri ono,  
 mbu l'ephe kpukwadu iya l'onu;
- 31 Nchileke atu-koshilaha ephe  
 oke ehu-eghughu iya.  
 Yo woru ndu ophu ike ka l'ephe gbushia;  
 tuko iphe bú ndu

- k'okorọbya ndu Ízurelu mebyishia.  
 32 E metsua; ẹphe emelee iphe ẹphe eme.  
 Yo meshitsua iphe-ọphulanya ono;  
 ẹphe te ekwekwa kẹ Nchileke.
- 33 Ọo ya meru iphe ọgbaje  
 ndzụ ẹphe kwoo;  
 gude iphe-ẹhuka wofu ndzụ ẹphe.
- 34 Yoo buje teke Nchileke  
 haru ẹphe gbushia;  
 ndu ọphu phọduru nụ achọlahaa ya.  
 Ẹphe ataa onwẹphe uta  
 iphe ẹphe meru;  
 kfulahaa l'anụ iya.
- 35 Teke ono; ẹphe anyata  
 l'ọo Nchileke bu  
 agbara-mkpuma ẹphe;  
 nyatakwapụ l'ọo Nchileke ono,  
 bu Ọkaribe-Kakọta-Nụ ono  
 bu onye gbafutaru ẹphe.
- 36 Ọle ọ bu ajaja eli-ọnu;  
 bẹ ẹphe ajajẹ Nchileke;  
 mbụ l'ire-lanụ ta anọjedu  
 ẹphe l'ọnu lẹ phuu.
- 37 Obu ẹphe ta anọjedu l'ẹke ọ nọ;  
 ọphu ẹphe edobejedu ndzụ, ẹphe l'iya  
 gbaru.
- 38 Obenu lẹ Nchileke  
 anọdujele-ẹ l'aphuru ẹphe imiko.  
 Ọogujeru ẹphe nvụ k'iphe  
 dū ẹji, ẹphe meshiru  
 ọphu o mejedu t'ẹphe buru kpurupyata.  
 Tekenteke bẹ ọonoduje ata nshi;  
 too meje ẹphe iphe ẹge o ghutaberu iya.

- 39 Ọnyataje l'ẹphe bụ madzu mmanu;  
l'ẹphe dụ l'ọ bụ pherephere,  
abuje: o -pheswewa;  
too phelatahedu azu.
- 40 Ugbo olemole; bẹ ẹphe  
kwefuru iya ikè teke ẹphe nọ l'echi-egu;  
kpatsua ya iwe l'alị, ono,  
daburu swanmangu ono.
- 41 Tekenteke; bẹ ẹphe shi  
anọduje adata Nchileke adata.  
Ẹphe shi anọduje akpatsu  
onye dụ nsọ kẹ ndu Ízurelu ẹhu-eghughu.
- 42 Ẹphe ta anyatahedu ike iya ono;  
mbu ike ono, o gude  
gbafuta ẹphe l'eka ndu ono,  
shi emegbu ẹphe emegbu ono;
- 43 bụ iya bụ mbọku, o meru;  
a phụ iphe dụ biribiri,  
o meshiru lẹ Íjiputu;  
mẹ iphe dụ egvu, o meshiru l'egu Zowanu.
- 44 Iphe bụ ẹnйimu ẹphe b'o meru;  
yọ ghokota mee;  
to nwehe mini, ẹphe phuru k'angungu.
- 45 Ọ chiru ijiji ye;  
yọ bya anua ẹphe chikikfuu;  
bya achiru mbara ye;  
yo mebyishia alị ẹphe.
- 46 Iphe ẹphe kuru l'alị  
b'ọ chiru óvú ye;  
yo je atapyashia ya;  
bya achiru igube yeru ndu



- ọphu ọ́ru amími;  
 yọ tapyaa ya.
- 47 Oshi sikamo ẹ́phe;  
 b'o gude aka-mini tųpyashia;  
 bya egude iji mebyishia  
 akpuru vayinu ẹ́phe.
- 48 Eswi ẹ́phe b'o gude ẹ́jo  
 aka-mini tų-gbushikota;  
 bya egude egbe-igwe  
 tugbushikota elu ẹ́phe l'ọ ha.
- 49 Ọ chikoru oke ẹ́hu-eghughu  
 iya l'ọ ha byabẹ ẹ́phe;  
 chita ẹ́jo  
 unwu ojozi-imigwe ye  
 t'ọ je anọ ẹ́phe aphụ.
- 50 Ẹ tọ tuzedu ẹ́ka  
 l'ẹ́hu-eghughu iya;  
 ọ́phu o dobedu ẹ́phe ndzụ.  
 Ọ woru ẹ́phe haaru  
 ẹ́jo iphe-ememe ono  
 t'o meghee ẹ́phe emeghe.
- 51 Iphe bụ ndu, bụ ọ́kpara  
 lẹ́ Íjiputu b'o gbukotaru l'ẹ́pha ha;  
 mbụ iphe bụ nwa ọ́dungu ẹ́phe l'alí Hamu.
- 52 Obenu lẹ́ ndibe iya b'ọ́ tọ́ru  
 nwẹ́hu ruta ẹ́ge eerutaje aturu;  
 bya echee ẹ́phe chiriru  
 lẹ́ werere gude swee  
 echi-ẹ́gu ono.
- 53 O duru ẹ́phe domangu lẹ́  
 rimangu t'ẹ́phe ba atşu egvu.  
 Obenu lẹ́ ndu ọ́hogu iya;  
 bẹ́ eze ẹ́nyimu rigbushikotaru.

- 54 Yo shi ẹge ono;  
 dua ẹphe durua ẹke,  
 bu ókè-alì iya, dù nsọ;  
 mbu durua ẹphe l'ugvu ono,  
 o gude ike k'ẹka iya lùta ono.
- 55 Ọ chìshiru ẹphe iphe bu  
 mbakeshi, nọ-chiru ẹphe ọzo;  
 bya eworu alì ẹphe keeru  
 ndu Ízurelu t'ọ buru òkè-iphe ẹphe.  
 Ọ chiru ndu ikfu Ízurelu ye  
 t'ẹphe buchishia alì ẹphe ono.
- 56 Ọle e megeeru;  
 ẹphe abya adata Nchileke;  
 kwefulerua  
 Ọkaribe-Kakọta-Nu íkè;  
 mekota iphe bu iphe ọ sọru t'ẹphe be eme.
- 57 Ọ bu ẹjo ọkpa, nna ẹphe  
 tsoru bẹ ẹphe tsochitaru;  
 bukotaru ndu ẹ te gudedu ire ẹphe ẹka.  
 Onye dakoberu ẹphe dù l'ọ  
 bu onye dakoberu okpete.
- 58 Ẹphe gude ẹke ẹphe agwaje  
 iphe ẹphe doru l'ẹkemeke;  
 kpatsua Nchileke iwe;  
 yo kolahaaru ntẹkpe,  
 ẹphe pyìshiru okopho.
- 59 Teke Nchileke phuru iya;  
 bẹ ẹhu ghuru iya eghughu nshinu.  
 Yo gude k'ono jìka-ghee  
 ndu Ízurelu teteretengu.
- 60 Ọ gwọberu ọlo-ékwa iya  
 ono, nọ lẹ Sháyilo ono;

- mbu ulo-ékwà ono,  
 o kpoberu; bua l'ẹke, madzu bu ono.
- 61 O haru ndu ohogu; ẹphe evuta  
 Okpoko Ogba-ndzu iya;  
 mbu Okpoko Ogba-ndzu,  
 bu iya ekoshije  
 ẹge ike iya habe nshinu;  
 bukwaruphu iphe ekoshije  
 ẹge o du-be biribiri  
 b'o paru haaru ndu ohogu iya.
- 62 O paru ndibe iya haa;  
 e gbushia ẹphe;  
 kele ndu nk'iya ono meru;  
 ẹhu eghulaha ya eghughu.
- 63 Unwu-okorobyia ẹphe  
 b'e gbugeru l'ogu.  
 Unwu-mgboko ẹphe akwashia;  
 to du onye a-lu ẹphe.
- 64 Ndu achijeru ẹphe aja;  
 b'e gbushiru;  
 ophu unyomu ẹphe 'aradu m'oo ẹkwa ẹphe.
- 65 A -nonyaa; Nnajiufu ezilihu  
 l'o bu onye shi eku mgbenya;  
 mbu kwolihu l'o bu onye  
 nguru mee t'o phohuwa iya l'enya;
- 66 bya achia ndu ohogu iya ichifu;  
 mee ẹphe iphe-iphere,  
 bu 'azaha azaha.
- 67 Eri Josefu l'o ha b'o jikakotaru;  
 to fota ndu ikfu Ifuremu.
- 68 Obenu l'o fotararu ndu ikfu Juda;  
 bu iya bu Ugvu Zayonu  
 ono, o yeru obu ono.

- 69 Yọ bya eworu ọlo iya,  
 ọdu nsọ kpua;  
 yọ ha l'ọ bu eze ugvu;  
 mbu kpua ya;  
 yọ du l'ọ bu ali, o meru;  
 yọ buru iphe a-nọ jeye le tutu yoyo.
- 70 O fọtaru nwozi iya, bu Dévidi;  
 dufuta iya l'ẹke o nọ  
 l'odu-aturu.
- 71 O dufutaru iya l'ẹke ooche aturu  
 t'ọ bya eleta ndibe iya,  
 bu iya bu unwu Jékọpu ẹnya;  
 mbu t'ọ kpọ-zijeru unwu Ízurelu,  
 bu okè-iphe iya ọzo.
- 72 Dévidi gudekpelephu obu,  
 guru iphoro leta ephe ẹnya;  
 gude okpobe mmamiphe chikota ephe.

## 79

Egvu-ọma, Ásafu deru

- 1 Nggube Nchileke;  
 phuwaru le ndu ohodo  
 nwubataakwaru l'ali-a,  
 bu okè-iphe ngu-wa.  
 Ephe farushiakwaru  
 eze-ulo ngu ono, du nsọ ono;  
 bya emewaa Jerúsalemu;  
 yọ buru ikpọzu.
- 2 Odzu ndu ejeru ngu ozi;  
 be ephe togbogbaaru  
 unwenu, ephe l'eli t'o ria;  
 mbu l'odzu ndu nsọ ngu;  
 be ephe wowaru tularu

- anụ-ẹgu-ẹgbudu t'ẹphe ria.
- <sup>3</sup> Jerúsalemu mgburumgburu;  
 ẹ ẹphe wụaru mee madụ l'ọ bụ mini.  
 Ẹ to nwehekwa onye,  
 phọduru nụ, e-li ndu ono,  
 e gbushiru ono.
- <sup>4</sup> Ndu obutobu ayi pẹ;  
 mẹ ndu bupheru ayi mgburumgburu  
 tükowa azuru ayi ukwe; l'achi ayi ọchi.
- <sup>5</sup> ?Bụ teke ole ẹ ẹhu  
 e-ghubebe ngu eghughu;  
 nggube Ojejoje?  
 Ẹhu; ?oo-ghuwa ngu rụ jeyewaru tọo.  
 ?Bụ teke ole ẹ oke  
 ẹhu-eghughu ngu  
 e-nwubebe l'ọ bụ ọku jeye?
- <sup>6</sup> Wonuru ẹhu-eghughu  
 ngu tukoshi ndu ọhodo ono,  
 ẹ ta madu ngu nụ ono!  
 Tukoshikwa iya phụ alị-eze ono,  
 ẹ-te ekujedu ẹpha ngu ono;
- <sup>7</sup> kẹ l'ẹphe gbuwaru ndu eri Jékoṣu pyaapya;aa;  
 bya emebyishiwa ufu iya.
- <sup>8</sup> Be emekwa t'ayi nwụa ọnwu  
 iphe dụ ẹji,  
 nna ayi oche pẹ meru!  
 Phunuaru ayi imiko ẹgwegwa;  
 kẹ l'ayi ta mahedu ọzo ayi e-shi iya.
- <sup>9</sup> Yeru ayi ẹka  
 nggube Nchileke,  
 bụ onye ndzofuta ayi;  
 k'ọphu ee-shi ẹge ono  
 kwabẹ ẹpha ngu ugvu.

- Guderu k'ẹpha ngu nafuta ayi;  
 nggu aguaru ayi nvu  
 l'iphe dụ eji ayi meshiru.
- 10 ?Bụ ngunu meru iphe  
 iphe bụ mbakeshi aji ẹke Nchileke ayi nọ?  
 Nọdunu ayi l'ifu mee t'iphe  
 bụ mbakeshi maru  
 l'ị gwataru ụgwọ ọchi mee  
 ndu ono, ejeru ngu ozi,  
 ẹphe gbushiru ono.
- 11 Tẹ ude, ndu nọ l'ọka mkpọro  
 atsụ runua ngu l'ẹhu!  
 Gudenu agburu-ẹhu ngu  
 mee tẹ ndu e kperu  
 nkfugbu nweru onwẹphe.
- 12 Kfua ndu obutobu ayi pẹ  
 ụgwọ iphe dụ eji,  
 ẹphe meru ngu ugbo ẹsaa;  
 mbụ iphe-iphere, ẹphe  
 mekotaru kpua  
 nggube Ojejoje;
- 13 k'ọphu ayibe ndibe ngu;  
 mbụ ayibe aturu ono,  
 iiche nche ono etua ngu ẹpha  
 jeye lẹ tutu yoyo;  
 mbụ l'ayi e-tu ngu ẹpha  
 shita l'ogbo sweru ogbo.

## 80

Egvu-ọma, Ásafu deru nù onye ishi egvu; t'e  
 gude olu egvu "Okfukfulike Ogba-ndzụ" gụa ya  
 1-2 Ngabẹnuru ayi nchị;  
 nggube onye eche Ízurẹlu

l'ọ bụ onye eche aturu;  
 bụru onye anọduje achi  
 ndibe Jósefu l'ọ bụ onye  
 chi igwe aturu l'eje nri.  
 Tẹ nggube onye ono,  
 sugaru lẹ cherobimu ono  
 chinua l'ọ bụ anwu l'ifu  
 ndu ikfu Ífuremu;  
 mę kę ndu Bénjaminu yele kę ndu Manáse!  
 Byiko rukotanu ike ngu bya adzọfuta ayi!

<sup>3</sup> Dobephunu ayi azu l'onodu ayi;  
 nggube Nchileke!

Munuaru ayi onu-ochi;  
 k'ophu aa-dzofuta ayi.

<sup>4</sup> Nggube Ojejoje;  
 nggube Nchileke,  
 bu Okaribe-Kakota-Ike;  
 ?bukpo teke ole; be ehu  
 e-ghuberu ngu eghughu;  
 ke t'e b'i nuje ekfukfu,  
 ndibe ngu ekfu anu ngu?

<sup>5</sup> Nta-a b'i mewaru ephe;  
 enya-mini aburu ephe nri;  
 mee ephe; ephe anga enya-mini,  
 jiru njaka-onu.

<sup>6</sup> I mewaru; ndu obutobu ayi;  
 ephe aja ayi ewena;  
 mee ndu ohogu ayi l'achi ayi ochi.

<sup>7</sup> Dobephunu ayi azu l'onodu ayi;  
 nggube Nchileke,  
 bu Okaribe-Kakota-Ike!  
 Munuaru ayi onu-ochi;  
 k'ophu aa-dzofuta ayi.

- 8 Ọ bụ nggu shi ị Ịjiputu  
gbuta vayinu wolata;  
bya achiko ndu ọhodo  
chishia l'alị ẹphe; woru iya dzabe.
- 9 Ọ bụ nggu gude ẹka ngu  
gbuchashia ẹke ị dzaberu iya.  
Yọ bya agbaa ọgbaragba,  
chikoru alị ono l'ọ ha jegbaru.
- 10 Yọ jaa ajaja jachikota iphe bu ugву;  
mbụ l'ẹkali iya halephu l'eli  
l'ọ bụ eze oshi sida.
- 11 Ẹkfukala iya jeruru eze ẹnyimu.  
Ógbaragba iya atuko  
ẹkemeke ọbule dzuru;  
mbụ jeye ị  
Enyimu Yufurétusu.
- 12 ?Nanu ẹge ọ dụ;  
b'i fọkashiru mgbabu iya;  
k'ọphu iphe bụ onye esweta nụ  
ejeje je awọ akpuru iya ege ọ dụ iya?
- 13 Ezi-ọswa, shi l'ẹgbudu  
awukfuta iya bya atakwoshia ya.  
Ụnwu anumanu aburu iya;  
be ẹphe gude azụ onwẹphe.
- 14 Latanụ azụ lakfuta ayi;  
nggube Nchileke,  
bụ Ọkaribe-Kakọta-Ike!  
Shinu l'imigwe lee ẹnya  
phukpoduaphu iphe amụ nụ.  
Byiko letanu vayinu ngu-a ẹnya;
- 15 mbụ vayinu, bụ nggubedua  
gude ẹka ngu dzabe iya;  
mbụ nwata nwoke,



- bụ nggụbedua gude ẹka ngu zụa ya zụfuta.  
 16 Vayinu ngu ono; b'e gbutsuakwaru.  
 Ọku dzụkotaakwaru iya.  
 Mba, ị baru ndibe ngu  
 meekwaru t'ẹphe laa l'iyi.  
 17 Kwakọbenu nwoke ono,  
 bụ nggụbedua gude ẹka ngu fọta iya ono;  
 mbụ onye ono,  
 bụ nggụbedua gude ẹka  
 ngu zụfuta iya ono.  
 18 Ọo ya bụ k'ọphu ayi ta aghaduru ngu azu.  
 Menua tẹ ndzụ buru nk'ayi;  
 ẹge ayi a-wata oku ẹpha ngu ọdo.  
 19 Dobephunu ayi azu l'ọnodu ayi;  
 nggube Nchileke,  
 bụ Ọkaribe-Kakọta-Ike!  
 Mụnuaru ayi ọnu-ọchi;  
 k'ọphu aa-dzọfuta ayi.

## 81

Egvu, Ásafu deru nụ onye ishi egvu; t'e gude  
 ngwa-egvu gítitu gụa ya

- 1 Unu gụa egvu ẹhu-ọtso-ẹna nụ Nchileke;  
 onye bụ iya bụ ike ayi!  
 Unu gude ẹhu-ọtso-ẹna  
 tụa uzu l'ifu Nchileke kẹ Jékọpu!  
 2 Unu watanụ ọgu egvu;  
 unu eye iya nkwa!  
 Unu kpọoru iya ogumogu; mẹ une!  
 3 Unu gbua ụpyoku;  
 m'ọ Ọnwa Ọphungu fụlephu!  
 Unu gbukwaa ya phụ;  
 m'ọnwa dzulephu edzudzu;

- 4 l'iphe ono bukwa ome-l'ali,  
 a turu doberu ndu Ízurelu;  
 mbu l'ọo iphe Nchileke ke Jékoṗu  
 ọtu ọkpa iya; su t'e tsoje.
- 5 Ọ bu ekemu, ọ tuṛu;  
 yo shihu ike;  
 bya asu te Jósefu meje  
 teke ono, o tsoru ndu Íjiputu ọgu ono;  
 mbu l'ẹke ono, mu nuru  
 okfu ẹ te dodu mu ẹnya ono.
- 6 Okfu ono suru: “Ọo yẹbedua  
 pafuru ẹphe oke ivu, shi nọdu ẹphe l'ishi;  
 bya ezia ẹphe nkata ivu ono,  
 ẹphe shi vuru ono.
- 7 Teke unu nọ l'iphe-ẹhuka;  
 be unu kuru iya oku.  
 Ya anọdu l'urukpu;  
 gude egbe-igwe za unu oku;  
 bya adzofuta unu.  
 Ya gude mini Meriba data unu.
- 8 Unube ndibe iya;  
 unu ngabekpoduaphu;  
 te ya loo unu ẹka le nchi!
- Unube ndu Ízurelu;  
 unu ngabekpodaru iya phu nchi!
- 9 Tẹ b'ọ dukwa iphe ọdo,  
 unu e-dobe; l'agwa  
 agwagwa l'ẹke unu nọ;  
 ọphu ọ dukwa iphe ọdo,  
 unu a-bajeru ẹja.
- 10 Ishi iya buru l'ọo yẹbedua bu  
 Ojejoje; buru Nchileke unu.

- Ọo yẹbedua bụ onye  
 dufutaru unu ị Ịjiputu.  
 Unu kpuhaa ọnu unu ekpuhaa;  
 tẹ ya nụa unu nri.
- 11 Obenu ị ndibe iya  
 ta angaduru iya nchị;  
 mbụ ị Ịzurelu te ekwedu nọdu iya l'ẹka.
- 12 Tọ dụ iya bụ; ya eworu ẹphe  
 haaru ejo ọkpoma ẹphe;  
 t'ẹphe tsowaruru iphe ẹphe ritaru l'obu  
 ẹphe.
- 13 Ndege ndibe yẹbe Nchileke  
 a-ngaberu iya nchị;  
 ọ -buru ị ndu Ịzurelu e-tso ụzo, ya tọru  
 ẹphe;
- 14 m'ẹ tọ ga atsukwa iya l'ẹhu  
 mbụ omekputa ndu ọhogu ẹphe.  
 Ya ga egude ike iya chịa  
 ndu ẹphe dụ ashị ọkpụ-akpọhu.
- 15 Ndu Ojejoje dụ ashị  
 wozifutaje onwẹphe alị l'ifu iya;  
 ya ahụa ẹphe àhùhù jeye ị tutu yoyo.
- 16 Obenu l'unubedua;  
 bẹ ya e-gude ọkpobe witu nụa nri;  
 gude manụ-ẹngu,  
 shi l'agbara-mkpuma nụ-jia unu ẹpho."

## 82

Egvu-ọma, Ásafu deru

- 1 Nchileke batawaru ị  
 ndzuko ndu ikpe;  
 nọdu l'ẹke ono;

- tẹ ya kpee ẹphe ikpe.
- <sup>2</sup> Ọ sọru ẹphe: “?Bụ teke ole;  
bẹ unu a-ha okpe ẹjo ikpe;  
haa okpe l'eyeru ndu akirishi?”
- <sup>3</sup> Unu hanọaru ndu ụkpa;  
mẹ ndu a tọru ogbe enge.  
Unu ekpeje ikpe, dọ mma l'ẹhu ndu ụkpa;  
mẹ ndu, aakpa ẹhu.
- <sup>4</sup> Unu gbafuta ẹphe l'ẹka ndu akirishi!”
- <sup>5</sup> Ẹ to nwedu iphe ẹphe maru;  
tọ dọ iphe edoje ẹphe ẹnya.  
Ẹphe anọduje adakpu  
adakpu l'ẹkpuru-ọchi.  
Ẹke a tọru ọkpa-alị  
mgboko l'ọ ha tọkookwaru anga anganga.
- <sup>6</sup> Mu sọru: “L'unu bọtsukwa chi l'ẹhu l'ẹhu;  
unu l'unu ha bọkota unwu  
Ọkaribe-Kakọta-Nu.
- <sup>7</sup> Obenu l'unu e-mekochaa  
nwuhu ẹge madzọ  
mmakanu anwuhuje.  
Unu e-mekochaa dashia ẹge  
ndu ishi ọdo adashije.”
- <sup>8</sup> Gbalihu nggube Nchileke;  
kpee mgboko ikpe;  
kẹ l'iphe bọ mbakeshi  
bọkota òkè-iphe ngu.

## 83

Egvu-ọma, Ásafu deru

- <sup>1</sup> Nggube Nchileke;  
ba dahukwa nkichi.  
Ba anọdushinu nwangijingiji;

- nggube Nchileke;  
 ba dashinu riḡbidingu.
- <sup>2</sup> ?I phụwaru ẹge ndu  
 ọhogu ngu aphụ temutemu;  
 me ẹge ndu i dụ ashị  
 etsuru ngu ẹka l'ọkpoma.
- <sup>3</sup> Ẹphe gude ẹregede  
 l'achị idzu ndibe ngu;  
 mbụ l'achị iphe ẹphe  
 e-me ndu nọ ngu l'obu.
- <sup>4</sup> Ẹphe suru t'ẹphe bya  
 t'ẹphe lua ọha ono;  
 t'ẹphe mee t'ẹ b'ọ duche  
 onye a-nyatakwadu ẹpha Ízurelu ọdo.
- <sup>5</sup> Idzu bụ ẹphe nanu  
 t'ẹphe mee ngu ẹjo iphe.
- <sup>6</sup> Ndu ono bụ ndu Édomu;  
 ndu Ishimeḷu;  
 ndu Héga; ndu Móabu;
- <sup>7</sup> ndu Gibalu; ndu Amọnu;  
 me ndu Amaleku.  
 Ndu Filísutiya yikwa iya phụ;  
 ndu Táya ayiru iya.
- <sup>8</sup> Ndu Asiriya byawaru bya etsoru ẹphe  
 t'ẹphe buru agbaru-ike ndibe Lótu.
- <sup>9</sup> Menua ẹphe iphe i meru Mídiya.  
 Mee ẹphe ẹge i meru Sizéra  
 yeḷe Jabinu l'iku Ẹnyimu Kishonu;
- <sup>10</sup> mbụ ndu ono, i meru;  
 ẹphe aburu kpurupyata le Énu-Dọ;  
 mee ẹphe; ẹphe aburu ọzu wushiru l'alì  
 ono.
- <sup>11</sup> Menua ndu oke amadu ẹphe

- iphe i meru Orebu;  
 mę Zębu;  
 nggu emekwaaphu ndu  
 ishi ęphe iphe i meru Zeba;  
 mę Zalumuna;
- 12 mbu ndu ono, sujeru:  
 “T'ęphe luta ali Nchileke nweru ono.”
- 13 Nngube Nchileke mu;  
 menua ęphe t'ęphe du l'ọ bu uphuku;  
 mbu t'ęphe du l'ọ bu ęswa ereshi,  
 pherephere zikashiru.
- 14 T'ọ buru ęge ọku anọduje  
 adzu phophopho l'ọswa;  
 m'ọ bu ęge ọku adaja taphutaphu l'ugvu
- 15 buru ęge ii-da phukaphuka  
 l'ọ bu oke pherephere chia ęphe ọso;  
 nggu egudekwaphu  
 oke pherephere ngu ono yee ęphe egvu.
- 16 Menua t'iphere ji ęphe ifu;  
 k'ophu ndiphe a-wata ọcho  
 ọzo, ęphe e-shi maru ępha nngube Ojejoje.
- 17 T'e meje ęphe iphe-iphere;  
 meru ọtsu egvu ye ęphe l'ęhu tekenteke.  
 T'ęphe tsokwaa iphere laa maa.
- 18 Ęphe amakwanuru l'ọ bu  
 nngube onye ono, ępha  
 bu Ojejoje ono  
 bu Okaribe-Kakota-Nu  
 le mgboko mgburumburu.

## 84

Egvu-ọma, e deru nu onye ishi egvu t'unwu Kora  
 gua; t'e gude ngwo egvu gititu gua ya

- <sup>1</sup> Iphe ẹke i bu amakwanu;  
 nggube Ojejoje, bu Ọkaribe-Kakota-Ike.
- <sup>2</sup> Ọogushi mu ẹgu ike; meji l'atofu mu atofu;  
 te mu nodu l'eze-ulo Nchileke.  
 Obu mu; me ẹhu mu l'ọ ha  
 ara l'araku Nchileke ono, no ndzu ono.
- <sup>3</sup> Ọkpaleboku nwetsuaru ẹke  
 oobugbaa l'eze-ulo ngu ono;  
 ẹsa enwekwaruphu ẹke  
 ọokpaje ẹkfuna; nodu zushia unwu.  
 Ẹke ono bu l'iku  
 ẹnya-ngweja  
 nggube Ojejoje,  
 bu Ọkaribe-Kakota-Ike;  
 mbu nggube Eze mu, bu Nchileke mu.
- <sup>4</sup> Ọnu-oma bu ndu bu ebubu l'eze-ulo ngu;  
 ke l'ephẹ anọduje etu ngu ẹpha tekenteke.
- <sup>5</sup> Ọnu-oma bu ke ndu bu nggu  
 bu agbaru-ike ẹphe;  
 mbu ndu bu ẹge ẹphe e-me  
 jerua Ugvu Zayonu bu iphe  
 uche iya echije ẹphe ẹhu.
- <sup>6</sup> Ọobuje; teke ẹphe esweta  
 le nsuda nsuda Baka;  
 yo du ẹphe l'ọ bu ẹke mini awu;  
 dukwaphu ẹphe l'ọ bu ẹke  
 mini udzu-mini chishiru ike;  
 ẹkemeke aburu okpuru.
- <sup>7</sup> Ẹphe anọduje aka oshihu ike l'eje;  
 gbururu jeye teke ẹphe  
 e-jekfu Nchileke le  
 Ugvu Zayonu.
- <sup>8</sup> Nggube Ojejoje;

nggube Nchileke,  
 bu Ọkaribe-Kakọta-Ike;  
 nūnua iphe mu ekfu anu ngu!  
 Ngaberu mu nchi;  
 nggube Nchileke ke Jékọpu!

9 Ọ bu nggu bu onye ono,  
 egbochitaje ayi ono  
 nggube Nchileke!  
 Lenua onye ono, i wuru  
 manu l'ishi ono enya t'ọ baa ngu l'obu.

10 Onye nọru ujiku lanu  
 l'eze-ulo ngu kakwa  
 onye nọru unu afa labu  
 l'ukporo afa iri l'eke odo mma.  
 Ọ kakwa mu mma te mu  
 buru onye nche l'onu-uzo  
 ulo Nchileke; karia le mu  
 bu l'ulo ejo madzu;

11 kele Ojejoje, bu Nchileke  
 du l'ọ bu enyanwu;  
 buru onye egbochitaje ayi.  
 Ọ bu Ojejoje emejeru  
 ndiphe eze-iphe-oma;  
 l'emeje t'a kwabe madzu egvu.  
 E to dudu iphe du mma,  
 o kejeru eka ngvu l'e to  
 ndu iya ndu uta e-ta nodu le ndzu ephe.

12 Nggube Ojejoje,  
 bu Ọkaribe-Kakọta-Ike;  
 onu-oma bu k'onye bu nggu b'ọ dakoberu.



## 85

Egvu-ọma, e deru nụ onye ishi egvu t'ụnwu Kora  
gụa

- 1 I koshiru l'alì ngu nọ ngu l'obu  
nggube Ojejoje;  
bya emee t'iphe duru  
ndibe Jékọpu lẹ mma ọdo.
- 2 Ejo iphe ndibe ngu meshiru;  
b'ì gụkotaru ẹphe nvu;  
bya eworu iphe kpube  
l'iphe dụ ẹji, ẹphe meshiru l'ọ ha.
- 3 I chikowaru oke  
ẹhu-eghughu ngu l'ọ ha gwọbe;  
pakotaru ẹhu-eghughu ono,  
ata kfukfukfu ono haa.
- 4 Dophunu ayi azu l'ọnodu ayi;  
nggube Nchileke,  
bụ onye ndzofuta ayi;  
nggu achiru iphe bụ  
iphe egwu ngu nụ l'ẹke ayi nọ wushi!
- 5 Iphe ayi meru; ?l'oo-ghuwa  
ngu ru egwu gbururu jeye ọdo.  
Mbụ; ?ii-hawaru  
ẹhu-eghughu ngu ono  
t'o shi l'ogbo sweru ogbo.
- 6 ?T'ii mehedu t'ayi jakerehu ọdo ọdo;  
k'opu ẹhu a-nodu atsoshi  
ndibe ngu ẹna l'ẹke i nọ?
- 7 Koshinu ayi ẹge i yeberu ayi obu;  
nggube Ojejoje.  
Dzofutanu ayi.
- 8 Mu a-ngabẹ nchi nua iphe  
Nchileke, bụ Ojejoje ekfu.

L'o kweru ụkwa ịe ya e-me  
t'ẹhu dụ ndibe iya agu;  
mbụ ndu, duru iya ịe nsọ.  
Obenu l'iphe ẹphe a-kwabe  
ẹnya bụ t'ẹphe ba alaphuhe  
azụ l'ome eswe ọdo.

- <sup>9</sup> Iphe doru ẹnya bụ ịe  
ndu atsụ Ojejoje egvu;  
be ọobyakwa adzofuta;  
k'ọphu o-gbu-nwji-nwji ya  
a-bya l'alị ayi ọdo.
- <sup>10</sup> N-yemobu yele ire-lanụ  
a-gba onwẹphe ndzuta.  
Odobe-ẹka-ndoo yele  
nchị-ọdu-ndoo anmaa onwẹphe akpa.
- <sup>11</sup> Ire-lanụ e-shi l'alị mifutatsua.  
Odobe-ẹka-ndoo eshi l'imeli  
pyofu ẹnya l'ele mgboko.
- <sup>12</sup> Ojejoje bụ iphe dụ mma;  
be ọo-nụduje anụ madzụ;  
bya emee t'iphe ayi meberu  
l'alị ayi mehu emehu.
- <sup>13</sup> Odobe-ẹka-ndoo e-vutajeru iya ụzo;  
je akpaziaru iya ẹke,  
ọo-nọdu aha ọkpa eshi.

## 86

Dévidi ekfu anụ Nchileke

- <sup>1</sup> Ngabenu nchị;  
nggube Ojejoje; za mu oku;  
kele mu bụ onye ụkpa,  
ẹ te nwedu ẹge ọ haru iya.
- <sup>2</sup> Letanu mu ẹnya;

- kele mu yeru ngu obu.  
 Ọ bu nggu bu Nchileke mu;  
 dzofutanu mube nwozi ngu,  
 dakoberu ngu nu.
- <sup>3</sup> Phunuaru mu imiko;  
 nggube Nnajiufu;  
 ke l'ọ bu nggu;  
 be mu anoduje  
 akpo-ku mkpulumkpuru.
- <sup>4</sup> Menua t'ehu tsoo mube nwozi ngu ena;  
 ke l'ọ bu nggube Nnajiufu;  
 be obu mu kpamukpamu akpo-ku.
- <sup>5</sup> Nggube Nnajiufu;  
 i bu onye oma; bya aburu  
 onye agujeru madzu nvu.  
 Iphe bu ndu arakuje ngu nu;  
 be iyejeru obu nshinu.
- <sup>6</sup> Ngabe nchi; naru iphe  
 mu ekfu anu ngu;  
 nggube Ojejoje!  
 Ngabenu nchi;  
 nua mkpu, mu echiku ngu  
 t'i meeru mu eze-iphe-oma!
- <sup>7</sup> Teke iphe atsụ mu l'ehu;  
 be mu akpo-kuje ngu;  
 kele mu maru l'ii-nu-a olu mu.
- <sup>8</sup> A -bya l'iphe bu agwa;  
 b'e t'o nwedu ophu du  
 l'ọ bu nggube Nnajiufu;  
 ophu o dudu iphe epe eme,  
 aa-turu yeru ophu iime.
- <sup>9</sup> Iphe bu mbakeshi ono,  
 bu nggu gude aka ngu

mee ẹphe ono  
 e-mekochaa bya abaaru  
 nggube Nnajiufu ẹja;  
 jaa ngu ajaja.

- 10 Onanu aburu ẹ l'ị ha nshinu;  
 l'anọduje eme iphe,  
 ọ bụ biribiri.  
 Ọ bụ nggubedua  
 nwẹnkinyi ngu bụ  
 Nchileke.
- 11 Nggube Ojejoje;  
 kpọ-ziaru mu ọzo ngu;  
 k'ọphu mu a-nọdu etso  
 ọzo ire-lanụ ngu ono.  
 Menua t'ọriri mu buru nanụ l'ẹke ị nọ;  
 k'ọphu mu a-nọdu atụ ẹpha ngu egvu.
- 12 Mu e-gude obu mu l'ọ ha  
 kele ngu ekele;  
 nggube Nnajiufu,  
 bụ Nchileke mu.  
 Mu a-nọdu aja ngu ajaja jeye ẹ tutu yoyo;
- 13 ẹ l'ị yenukaru mu obu eyenuka;  
 bya anafutawa ndzụ mu l'alị maa.
- 14 Nggube Nchileke;  
 ndu eku onwẹphe ekuku  
 wụ-lihuakwaru bya etso mu okfu.  
 Ndu ẹ ta phujeduru madzụ  
 imiko edzukobe l'achị nta ishi mu;  
 mbụ ndu ono, ẹ te nwedu  
 iphe ẹphe guberu nggube Nchileke ono.
- 15 Obenu ẹ nggube Nnajiufu,  
 bụ Nchileke aphujeru madzụ imiko;

l'emejeru madzu  
 eze-iphe-ọma.  
 Ẹhu te eghujedu ngu  
 eghughu ẹgwegwa.  
 N-yemobu ngu;  
 be iyeje yee ya k'etsutu iya.  
 I bukwaphu  
 o-me-g'o-kfuru.

16 Ghanuaru mu ifu;  
 phua mu ru imiko!  
 Menua te ike nodu mube  
 nwozi ngu l'ehu!  
 Dzonua mube nwatibe,  
 nwanyi ono,  
 ejeru ngu ozi ono!

17 Koshinu mu iphe-ohubama,  
 e-me te mu maru l'i du  
 mma; k'ophu bu;  
 ndu ohogu mu -phua ya;  
 iphere egude ephe;  
 kele nggube Ojejoje  
 gbawaru mu mkpu bya adua mu obu.

## 87

Egvu-ọma, unwu Kora guru

1 Ojejoje tawaru okpa-ali  
 ulo iya l'eli ugvu, du nsọ.

2 Ojejoje yeru Zayonu obu;  
 karia ege o yeru iphe  
 bukpo eke odo,  
 unwu Jekopu bu.

3 Nggube eze mkpukpu ke Nchileke;  
 e kfukashitsua k'iphe biribiri ngu:

- 4 “Ndu Réhabu; mę ndu Bábyilonu;  
 bę mu guakwaru ye lę ndu maru mu nų.  
 Ndu Filisutiya; ndu Táya;  
 mę ndu Kúshi;  
 bę mu gukobekwaru iya phų.  
 Ndu ono l'ęphe ha;  
 bę aa-gukotaru ye lę ndu a mųru lę Záyọnu.”
- 5 Aa-nọdu ekfu kę Záyọnu; sų:  
 “L'onye ọwaa yęle onye ọphu;  
 b'a mųkwaru lę Záyọnu.  
 O bų Ọkaribe-Kakọta-Nų  
 l'onwiya e-me iya t'ọ ngųru angųru.”
- 6 Ojejoje e-de l'ękwo, o deru ępha ndiphe; sų:  
 “L'onye ọwaa b'a mųru lę Záyọnu.”
- 7 Ndu agų egvu; mę ndu ete iya  
 etete a-tųko gųa egvu; sų:  
 “O bų lę Záyọnu; bę mini ndzų  
 shi l'atsọfutaru ęphe!”

## 88

Egvu-ọma; ẹvù, Hemanu, bų o-shi-l'eri Zera raru  
 nų onye ishi egvu tę Ụnwu Kora gųa. T'e gude  
 olu-aphų gųa ya

- 1 Nggube Ojejoje,  
 bų Nchileke, adzoje mu nų;  
 mu anọduje ngu l'ifu;  
 eswe l'ęnyashi;  
 l'akwa ękwa onwomu.
- 2 Tę ekfukfu, mu ekfu anų ngu ruaru ęke ị nọ.  
 Ngabenu nchị l'ękwa,  
 mu akwa;
- 3 kęle ndzų mu l'ọ ha;  
 bę iphe-ęhuka jiru iya;

- oge ọnwu mu atụwa kperere-kperere.
- 4 A gụwaru mu ịe ndu  
 aabyawa okpochi ẹja.  
 Mu dụwa l'ọ bụ nwoke,  
 ike gvuru.
- 5 E wowaru mu nwuhaaru ndu nwuhuru  
 anwuhu.  
 Mu dụwa l'ọ bụ onye  
 e gburu ọtọbo l'ime ili;  
 mbụ l'ọ bụ ndu ono,  
 ẹ tii nyatahedu ono;  
 mbụ ndu ono, unu l'ephe bukahuru;  
 ọphu iiletahedu ephe ẹnya ono.
- 6 I chewaru mu l'ili, katsukpo ogvu;  
 buru iya kakọta ọgba ọchi.
- 7 I wowaru oke ẹhu-eghughu ngu byabẹ mu.  
 I gudewa akpara-mini  
 nke ngu nwuru mu ye l'ime mini.
- 8 I natawaru mu ndu mu l'ephe  
 shi eshi ọkpobe ọnyà.  
 I mewaru; ephe anọduje  
 ebu ubara eyeru mu.  
 I gubudowaru mu l'ẹke  
 mu ta alufuta-ghehedu.
- 9 Mu jewaru iphe-ẹhuka jeye  
 ẹnya agbahu mu ọchi.  
 Mbọku-mbọku;  
 bẹ mu anọduje eku  
 nggube Ojejoje.  
 Lekwa ẹka mu ẹbo-ẹbo ẹge  
 mu chiliru ngu iya.
- 10 ?Iimeje iphe dụ biribiri  
 koshi ndu nwuhuwaru anwuhu ọtọ?

- Ndu nwuhuru anwuhu;  
 ?ephe e-gbeshi jaa ngu ajaja ọtọ?
- 11 ?Aanọduje l'ime ili atụ onu  
 ẹge i yeberu madzụ obu ọtọ?  
 ?T'aanọduje l'ẹke eegwe  
 madzụ urrekfu kfu l'ị bu  
 o-me-g'o-kfuru?
- 12 ?Bụ l'ẹke gbaru ọchi;  
 bẹ aanọduje amaru iphe dụ biribiri,  
 iimeebe?  
 T'aanọduje l'alị ẹke ẹ ta nyatajedu  
 onye laru iya nụ;  
 kfu ẹge ị bụta-be onye  
 doberu ẹka ndoo?
- 13 Obenu lẹ mu araku  
 nggube Ojejoje  
 t'ị bya agbaaru mu mkpu.  
 Iphe bụ utsu, sweru esweswe;  
 bẹ mu ekfukotaje anụ ngu.
- 14 ?Bụ ngunu kparu iphe  
 ị jikaru mu  
 nggube Ojejoje?  
 ?Bụ ngunu kparu iphe  
 i sweru mu ẹnya tengu?
- 15 Eshinu mu bụ nwata;  
 b'e shi kpata mu ẹhu;  
 k'ophu mu nọwaa  
 dzee dzee ndzụ.  
 Ị kpawaru mu ẹhu;  
 ike agvụwa mu;  
 mu ta amahẹ ụzo,  
 mu e-shi iya.
- 16 Oke ẹhu-eghughu ngu



dzuwaru mu ẹhu.  
 I yetawaru mu egvu;  
 k'ọphu bu ẹ mu buwa  
 iphe mmanu.

17 Mbọku-mbọku;  
 be ẹphe ekephetaje mu  
 l'ọ bu onye utso ribudoru.  
 Ẹphe rikputawaru mu erikputa.

18 I nafuwaru mu ndu mu  
 l'ẹphe shi ayi;  
 me ndu yeru mu obu.  
 Nta-a buwa ẹkpuru-ọchi  
 bu ẹgiri ọnya mu.

## 89

Évù, Etanu, bu o-shi-l'eri Zera raru

- 1 Mu a-gu egvu gude kfu a ẹge  
 n-yemobu Ojejoje habe.  
 Mu a-gu iya jeye ẹ tutu yoyo.  
 Mu e-gude ọnu mu kfu a  
 t'ogbo, nonu maru l'i bu  
 o-me-g'o-kfuru.
- 2 Mu a-ra iya arara;  
 ẹ n-yemobu ngu a-ọ jeye ẹ tutu yoyo.  
 O bu ẹge-a akpamigwe ngu ru anguru-a  
 bu ẹge iphe i kfuru angujeru.
- 3 I suru l'onye i ọtaru;  
 be nggu l'iya gbawaru ndzu;  
 l'i riru Dévidi, bu nwozi ngu angu; su:
- 4 "L'ii-me awa iya t'ẹ b'ọ chihu  
 achihu jeye ẹ tutu yoyo;  
 nggu emee aba-eze iya  
 t'ọ ngu ru anguru tsube

- l'ogbo sweru ogbo.”
- 5 Imigwe l'ọ ha atụ ọnu  
 ẹge ị dụ-be biribiri  
 nggube Ojejoje.  
 Ookoshikwaphu l'ị bụ  
 onye evudoshije ike l'ẹke  
 ndzuko ngu nọ.
- 6 Mbu; ?bụ onye ị ndu,  
 bụ l'imigwe ị aa-turu yeru Ojejoje.  
 ?Bụ onye ị ndu nọ l'imigwe;  
 ị aa-turu yeru Ojejoje?
- 7 Ẹke ndu dụ nsọ k'imigwe  
 dzukoru ị aatsujekwa Nchileke egvu.  
 Ọ kakọta ndu nọ-pheru iya  
 mgburumgburu ọdu egvu.
- 8 Nggube Ojejoje;  
 nggube Nchileke,  
 bụ Ọkaribe-Kakọta-Ike;  
 ?bụ onye dụ l'ọ bụ nggubedua.  
 Ị ha nshinu;  
 nggube Ojejoje.  
 Ẹge ono ị ovudoshi ike  
 l'iphe ị vudo nọ-pheru ngu mgburumgburu.
- 9 Oke eyii eze ẹnйimu bụ nggu b'ọ nọ l'ẹka.  
 Ejo akpara-mini bụ nggu atụzitaje iya.
- 10 Réhabu b'i gudewaru;  
 yọ daburu l'ọ bụ onye  
 e gburu egbu.  
 I gudewa ike ngu chịa  
 ndu ọhogu ngu;  
 ẹphe agbaa nanu nanu.
- 11 Igwe l'ophu bụ nke ngu.  
 Eliphe l'ophu aburu nke ngu.

- Ọ bụ nggụbedua tūru ọkpa  
 mgboko l'ọ ha;  
 yẹle iphe bụ iphe nọ iya nū.
- 12 Ụzo isheli; l'uzo ọhuda bụ  
 nggụbedua meru iya dobe.  
 Ugvu Tábo yẹle  
 Ugvu Hemonu anọduje  
 agụ egvu ẹhu-ọtso-ena  
 teke ẹphe nūru ẹpha ngu.
- 13 Oshi-ẹka ngu bụ agburehu kpūu.  
 Ẹka ngu shihuru ike;  
 ẹka-utara ngu aka.
- 14 Odobe-ẹka-ndoo yẹle ikpe,  
 vudo nhamunha b'e gude  
 tọo ntọ-l'alị aba-eze ngu.  
 I kpajeru n-yemobu;  
 mẹ ovudoshi ike l'iphe  
 i kfulu ye;  
 yo vutaru ngu ụzo l'iphe bụ iphe iime  
 ememe.
- 15 Ọnu-ọma bụ kẹ ndu,  
 mụtawaru t'ẹphe kpọ-kuje ngu;  
 mbụ ndu bụ iphoro,  
 shi l'ẹke nggụbe Ojejoje nọ;  
 bẹ ẹphe egudeje eje.
- 16 Ẹphe egudeje ẹpha ngu ete  
 ẹswa mkpurumkpuru.  
 Ẹphe anọduje akpọ-ku ngu  
 l'ị bụ onye doberu ẹka ndoo.
- 17 Kẹ l'ọ bụ nggu bụ ike,  
 dū biribiri, ẹphe nweru.  
 Ọ bụ okfu l'ayi nọ ngu l'obu  
 meru iphe iimeje tẹ ike ayi kangoo.

- 18 Nggube Ojejoje; ọ bu nggu;  
 be nuru ayi onye mgbochita.  
 O bu onye nsọ ke ndu  
 Ízurelu; be eze ayi shi l'eka.
- 19 O nweru teke i gude àphù  
 zia ndu nke ngu ozi;  
 sù: "L'i mewaru tẹ  
 agburu-ẹhu kalẹru onye soja lanu."  
 Nggu abyawa l'ẹke ndibe  
 ngu nọ; bya afọta onye lanu;  
 mee ya t'ọ buru onye  
 ndiphe a-nọdu akwabe ugvu.
- 20 L'i phuwaru nwozi ngu,  
 bu Dévidi.  
 L'i wowaru manụ ngu,  
 du nsọ wua ya l'ishi.
- 21 Su l'ọ bu ẹka ngu;  
 be ii-gude mee ya;  
 yọ nguru anguru;  
 mbu l'ọ kwa nggube Nchileke  
 emeje tẹ ike ka iya adudu.
- 22 Ẹ to nwedu ndu ohogu iya,  
 a-du ike kebuta iya t'ọ tujeru ephe utu;  
 ophu ndu akirishi 'ahadu iya.
- 23 Ndu achị iya nù;  
 be ii-nọdu iya l'ifu dzopyashia;  
 chitsushikota ndu ọ du ashị.
- 24 N-yemobu ngu yele ovudoshi ike  
 l'iphe i kfulu; be e-swijeru iya.  
 Yọ buru epha ngu;  
 be oo-gude ike iya kangoo.
- 25 Ali-ezi iya; be ii-me tọ jaa ajaja;  
 mbu t'ọ shi lẹ eze enyimu;

- saa jeye ẹ Ẹnyimu Yufurétusu.
- 26 Ọo-nọduje araku ngu; sụ:  
 “L'ọo nggu bụ nna iya;  
 bụru Nchileke iya;  
 bụkwaruphu  
 agbara-mkpuma, adzọfutaje iya nụ.”
- 27 Nggubedua l'onwongu  
 e-me iya; t'ọ bụru ọkpara ngu;  
 mbụ t'ọ bụru iya a-katsua  
 l'iphe bụ ndu eze, nọ ẹ mgboko-a.
- 28 N-yemobu ngu l'ẹke, ọono a-buru ojejoje.  
 Ọgba-ndzụ nggu l'iya ta  
 byadụ bya amịng a mịng a.
- 29 Awa iya bẹ ii-me;  
 t'ẹphe bā achihu achihu  
 gbururu jeye ẹ gbururu.  
 Alì-eze iya bụ ẹge igwe  
 a-nọ-bebe bụ ọo-nọ-bebe.
- 30 “Ọ -buru l'unwu iya  
 jìkaru ome ekemu ngu;  
 jìka otso iphe ì turu ọkpa iya;
- 31 ọ -buru l'ẹphe dakaru ome-l'alì,  
 ì turu doberu ẹphe;  
 jìka ome iphe ì sùru t'ẹphe meje;
- 32 bẹ ii-gude mgboro-ìgwè  
 hùà ẹphe àhùhù;  
 mbụ gude ẹchachi hùà ẹphe  
 k'iphe dụ ẹjì, ẹphe eme.
- 33 Ọle tìi hakwanu ẹphe oyeru obu;  
 ọphu ìi-hadu ovudoshi ike,  
 l'iphe ì kfuru l'ii-me.
- 34 L'ẹ ndzụ, nggu l'ẹphe gbaru b'ẹ tii mebyidu;  
 ọphu ìigba-nwedu iphe

- shiwa ngu l'ọnu lufuta.
- 35 L'i gudewa ke l'i du nso  
ria angu ugbo lanu sefu eka;  
le to nwedu l'i dzuaru Dévidi ejo-ire;
- 36 l'awa iya a-ọ gbururu jeye gbururu;  
l'ọ bu ege enyanwu a-ọ-bebe;  
bu ege ali-eze iya a-ọ-bebe.
- 37 L'ii-me iya t'ọ ọọ gbururu  
jeye le gbururu l'ọ bu ọnwa,  
bu iphe agba ekebe  
l'akpamigwe l'i bu  
o-me-g'o-kfuru.”
- 38 Obenu l'onye ono,  
i wuru manu l'ishi ono;  
b'i jikawaru; gbado iya.  
Ehu eghuwa ngu  
eghughu l'eke ọono.
- 39 I jikawaru ndzu,  
nggu le nwozi ngu gbaru;  
wotawa okpu-eze iya gwọo l'ali.
- 40 Upho-mkpuma iya l'ọ ha;  
b'i tsukposhikotawaru;  
tsuwaa ọlo-mgbochi iya yogiriyogiri.
- 41 Ndu l'eswe esweswe  
gwowaru iphe ya tutu-a.  
Ndu obutobu iya bu-wa iya;  
be ephe egudeje eme iphe ọchi.
- 42 I mewaru te ndu ọhogu iya mekputa iya.  
I mewaru t'ehu tso ndu ọhogu iya ẹna.
- 43 I mewaru; ogu-mbeke ya;  
yo swikobe aswikobe;  
bya emee t'oo dujehe ike  
vudoshia ike l'ifu ọgu.

- 44 I meru; ugvu, o nweru arushihu;  
 mewa aba-eze iya;  
 yọ gwọo l'alị.
- 45 I meru iya;  
 yọ kahụ lẹ nwokoro;  
 bya emeru iphere  
 kpua ya l'ọ bụ  
 uwe-nlọkpuru.
- 46 Nggube Ojejoje;  
 ?bụ teke ole;  
 bẹ ọo-dụ ege-a dụ-bebe.  
 ?li-domiwaru onwongu jeyewaru tọ?  
 ?Bụ teke ole;  
 bẹ ẹhu-eghughu ngu e-nwu  
 l'ọ bụ ọku nwubebe?
- 47 Byiko; nyatakwa ege  
 ndzụ mu dụ-be mkpirikpi;  
 kele madzụ, i meru, bụ iphe mmakanụ.
- 48 ?Bụ onye a-nọ ndzụ  
 t'ẹ b'ọ nwuhuhe anwuhu?  
 ?Bụ onye a-dụ ike dzọo  
 onwiya; t'ẹ b'ọ laa maa.
- 49 Nggube Nnajiufu;  
 ?bụ awe b'i dobehunuru  
 eze n-yemobu obu ngu ono;  
 mbụ n-yemobu ono,  
 i gude kẹ l'ị bụ  
 o-me-g'o-kfuru ribuaru  
 Dévidi l'angu ono?
- 50 Nnajiufu; nyatakwa ege  
 e metabewaru nwozi ngu iphe-iphere;  
 mẹ ege mu tatabewaru nshi  
 l'ọchi, ndiphe achị mu;

- 51 mbụ ewena, ndu ọhogu  
 nggube Ojejoje anọduje aja onye ono,  
 ị wụru manu l'ishi ono  
 ewena l'ekemeke ọbule,  
 ọ tūru ọkpa iya.
- 52 T'ajaja bụru kẹ Ojejoje jeye lẹ tutu yoyo!  
 Ono kwa ẹge ọ dū;  
 bụru ẹge ono b'ọ dū.

## 90

Ekfukfu, Mósisu onye kẹ Nchileke kfuru nū  
 Nchileke

- 1 Nggube Ojejoje;  
 keshinu k'ede-nwede;  
 bụ nggu bẹ ayi nọhawa l'ẹka.
- 2 Tẹmanu tẹ ugvu ugvu nọdu;  
 mbụ tẹmanu t'i mee eliphe; mẹ mgboko;  
 b'ị bụha Nchileke;  
 bụru Nchileke ono;  
 bẹ ịi-bụ jeye lẹ tutu yoyo.
- 3 Iimeje tẹ madzụ ghọo ẹja.  
 Ịisuje ayi t'ayi nwuhu;  
 ghọo ẹja ọdo.
- 4 Kẹ l'ụnu afa labụ l'ụkporo afa iri dule ngu-a  
 l'ọ bụ ujiku lanụ;  
 mbụ l'ọ bụ nwa-njibu-ẹnya l'enyashi lanụ.
- 5 Iigudeje anwuhu kpofu madzụ  
 l'ọ bụ onye kpofuru ẹswa;  
 kele madzụ dū l'ọ bụ iru ẹwu.
- 6 L'utsu; bẹ ọonoduje aja pulapula.  
 O -be l'urenyashi;  
 yọ kpọo nkụ; kụlashihu.
- 7 Oke ẹhu-eghughu ngu



- adzuwa ayi l'ọ bu ọku;  
 Ẹhu-eghughu ngu mewaru ayi;  
 meji atoshihu ayi.
- 8 Ẹjo iphe ayi meshiru;  
 b'i doru ayi giriri l'ifu.  
 Ẹjo iphe ayi meru l'edomi;  
 b'i mewaru t'ọ daburu ngu ẹba l'ifu.
- 9 Ndzu ayi mgburumburu  
 bulephu oke ẹhu-eghughu ngu ejije iya.  
 Ndzu ayi l'ọ ha abujelephu ude ude.
- 10 Iphe ayi anọ-beje bu ukporo afa ẹto l'afa iri.  
 Ọ -buru onye karu nka;  
 yọ nọo ukporo afa ẹno.  
 Obenu l'iphe ejije iya nu;  
 abukotaje iphe-ẹhuka; me aphu.  
 Ọphu o nwedu ẹge aanọ-beje;  
 yọ buru iya ayi.
- 11 ?Bu onye maru ẹge  
 ẹhu-eghughu ngu shihuberu ike.  
 ?Bu onye b'o doru ẹnya;  
 mbu ẹge oke ẹhu-eghughu ngu habe nsh-  
 inu;  
 k'ọphu ọo-nọdu atsụ ngu egvu?
- 12 Menua te ayi maru onu-ọgu  
 uboku ayi le mgboko;  
 k'ọphu ayi e-shi iya maru iphe.
- 13 Nggube Ojejoje;  
 tushihuru okpoma.  
 Egbe iphe owaa;  
 ?bu teke ole b'ọ nọ-behunu?  
 Phunuaru ayibe ndu ozi ngu imiko!
- 14 Te n-yemobu ngu jijenu ayi ẹpho l'utsu;  
 k'ọphu ayi a-nọduje agụ egvu;

- l'ete ẹswa teke ayi nọkwadua ndzu.
- 15 Menua t'ẹhu-ọtso-ẹna ayi  
 yẹle iphe-ẹhuka phụ,  
 i meru; ayi ejee phụ hako.  
 Menua tẹ afa ẹhu-ọtso-ẹna ayi  
 yẹle afa olemole phụ, ayi taru  
 chichichi phụ; dụgbalephu.
- 16 Menua tẹ ayibe ndu ozi ngu;  
 phụ iphe iimeshi;  
 nggu emee t'unwu ayi;  
 phụ ẹge ike ngu dụ-be biribiri.
- 17 Menua t'ayi tẹba ngu l'obu;  
 nggube Nnajiufu,  
 bụ Nchileke ayi.  
 Menua t'iphe bụ iphe  
 ayi byiberu ẹka bụru ayi upete.  
 Iyee! Mee tẹ iphe bụ iphe  
 ayi byiberu ẹka nweru ishi.

## 91

- 1 Onye nọ lẹ mkpuli  
 Ọkaribe-Kakọta-Nụ  
 a-nọdu l'agu  
 Ọkaribe-Kakọta-Ike tuta ume.
- 2 Mu e-kfuru Ojejoje: "L'ọo ya  
 bụ ẹke mu nọ l'ezeru ndzu;  
 bụru iya bụ  
 a-gbabe-a-dzuru nke mu.  
 Ọ bụ yẹbedua bụ Nchileke, mu dakoberu."
- 3 Ọ kwa iya a-dzofuta ngu;  
 t'ẹ b'ị nma l'onya, ndu achi  
 nta ngu gbaberu ngu.  
 Ọ kwa iya phụ a-dzofuta

- ngu l'ejo iphe-ememe, dzuru ekemeke.
- 4 O bu ebà iya be oo-gude kpuchita ngu;  
 buru le mkpuli nku iya;  
 be ii-gbabe; zeeru ndzu.  
 Oo-gude kele ya bu  
 o-me-g'o-kfuru gbochita ngu;  
 t'e b'o du iphe e-me ngu nu.
- 5 Ejo iphe anoduje eye madzu  
 egvu l'enyashi b'e ti tsuhedu egvu;  
 ti tsu iya iphe-kpaa,  
 anoduje eme l'eswe.
- 6 Ejo iphe-ememe, anoduje  
 aphu kojokojo l'echi-abali  
 ta dudu ophu iitsukwadu egvu;  
 mbu jeyekpo le ndu ophu  
 anoduje egbushi madzu l'echi oke-eswe.
- 7 Unu umadzu labu l'ukporo  
 madzu ugbo iri a-dashi l'iku  
 eke ino; unukurunu  
 anwushihu ngu l'uzo  
 eka-utara.  
 Ole e t'o dudu ophu uphere iya e-ru ngu  
 l'ehu.
- 8 Ndu akirishi;  
 be ii-gudeje enya ngu ele  
 l'eke aahu ephe ahuhu.
- 9 Keshinu ophu i nowa  
 Okaribe-Kakota-Nu l'eka;  
 mbu Ojejoje ophu bu  
 a -gbabe; a dzuru nke mu
- 10 b'e to dukwa iphe eme ngu nu;  
 ophu o dudu iphe a-bya  
 t'o bya akpakaaru ngu ufu;

- 11 kele Ojejoje e-zi unwu  
 ojozi-imigwe iya t'ephe  
 l'eche ngu nche;  
 l'iphe bu eke, iishi.
- 12 Ephe e-gbobe eka;  
 wota ngu t'ukfu ba du ngu.\*
- 13 Agu; me oghu;  
 be ii-dzopyabeje l'okpa;  
 mbu gude okpa dzo-gbua  
 oke agu; me ejo-agwo.
- 14 Ojejoje suru: "L'iphe bu  
 onye yeru iya obu;  
 be ya a-nodu anafutaje.  
 Ya a-nodu egbochita iya  
 t'e b'o du iphe e-me iya nu;  
 ke l'o guberu epha yebe Ojejoje iphe.
- 15 Teke onye ono kuru iya;  
 be ya a-za iya.  
 O -nodu l'iphe-ehuka;  
 be ya e-swiru iya eswiru.  
 Ya a-nafuta iya; kwabe iya ugvu.
- 16 Ya e-me t'o kaa nka lilihu alilihu;  
 gude koshi iya le ya adzoje madzu."

## 92

Egvu-oma mboku otu-ume

- 1 O du mma t'a jaje Ojejoje ajaja;  
 t'e gudeje egvu tua nggube  
 Okaribe-Kakota-Nu epha;
- 2 mbu t'e gbeshije l'utsu;  
 raaru iya ndiphe arara l'i yeru ephe obu.

---

\* 91:12 91:12 Mat 4:6.

Teke o beru l'enyashi;  
e kfuaru ẹphe l'ì bú  
o-me-g'o-kfuru.

<sup>3</sup> Ọo-nọdu ada l'egvu l'ọ bú  
une, e gude ọdo iri kpaá;  
mẹ ogele, ada gengugengu;

<sup>4</sup> kẹle nggube Ojejoje  
gudewa iphe dú mma;  
mee t'ẹhu tsoje mu ẹna.  
Mu aguje egvu  
ẹhu-ọtso-ẹna  
k'iphemiphe ọbule,  
i gude ẹka ngu emee.

<sup>5</sup> Nggube Ojejoje; lewaru ẹge  
iphe iimeshi habe nshinu.  
Ege ono; bẹ ọriri ngu  
dụkwaphu ogvu.

<sup>6</sup> Onye ẹ te nwedu  
egomunggo ta madu  
ẹge ọ dú;  
ọphu oo-dokwa nọ onye eswe ẹnya;

<sup>7</sup> A makwarua lẹ ndu akirishi  
anọduje arishi l'ọ bú ẹta;  
iphe bú iphe ndu eme ẹji  
byiru ẹka; yọ búru ọpete.  
Ọbule ẹphe emekochaa  
búru kpurupyata gbururu jeye.

<sup>8</sup> Obenu lẹ nggube Ojejoje  
a-nọdu ede ude jeye lẹ tutu yoyo.

<sup>9</sup> Ndu ọhogu ngu; nggube Ojejoje;  
ndu ọhogu ngu a-búru kpurupyata.  
Achikashia ndu akirishi  
l'ẹphe ha; ẹphe agbaa nanu nanu.

- 10 Obenu l'i mewaru  
t'agburu-ẹhu mu dụ l'ọ bụ k'atsu.  
Nggụ abya eworu manu,  
eshi kwẹkwẹkwe wụa mu l'ishi.
- 11 Mu gudewa ẹnya mu  
phụ lẹ ndu ọhogu mu phẹ  
b'e mekputawaru.  
Mu gudewa nchị mu nua  
lẹ ndu nọru mu l'ẹjo oshi; b'a vụwaru l'ọgvu.
- 12 Ndu doberu ẹka ndoo  
a-nọdu aja ajaja l'ọ bụ nkfu.  
Ẹphe a-nọdu evu l'ọ bụ  
oshi sida k'ugvu ugvu Lébanọnu,
- 13 e yeru l'ime ọlo kẹ Ojejoje.  
Ẹphe a-nọdu l'ogbodufu  
Nchileke ayi aja rikarika.
- 14 Ẹphe -kahụkpoonu  
m'ọo akahụ; bẹ ẹphe  
a-nọdu amile-e nebyi.  
Ẹphe adule-ẹ  
nongini-nongini; shihu ike;
- 15 k'ophu ẹphe e-shi ẹge ono  
koshi lẹ Ojejoje bụ onye doberu ẹka ndoo;  
bụru Agbara-Mkpuma nke mu;  
to nwe iphe ẹ te vudodu  
nhamunha, ooyeje ẹka.

## 93

- 1 Ọo Ojejoje bụ eze.  
O yeru ọdu-biribiri oye uwe;  
bya egude agburẹhu kwaa  
onwiya ọkwa ngwa.  
Mgboko b'o meru kfube;

- yọ nguru anguru.  
 E to nwedu l'ọo-nonyaa  
 bya afo-woo afo-wo.
- <sup>2</sup> Aba-eze ngu nguhawaruru  
 anguru tsube l'ede-nwede;  
 nggubedua eshiru l'ojejoje.
- <sup>3</sup> Nggube Ojejoje;  
 iphe bu eze enyimu gbeshiakwaru.  
 Iphe bu eze enyimu  
 enwuakwa ke dukuduku.  
 Iphe bu eze enyimu edeekwa ekiri.
- <sup>4</sup> Obenu le Ojejoje,  
 bu l'igwe ha nshinu;  
 k'ophu bu l'olu iya  
 adaghataje mgbeka,  
 eze enyimu anoduje echi;  
 okpehu iya aka k'oke  
 eyii eze enyimu nshinu.
- <sup>5</sup> Nggube Ojejoje;  
 iphe i turu okpa iya; su  
 t'e meje b'e ta amingadu aminga.  
 Iphe meru ulo ngu;  
 yo du ugvu bu l'o du nsọ;  
 yo buru ege ono;  
 be o-du jeye le tutu yoyo.

## 94

- <sup>1</sup> Nggube Ojejoje,  
 bu Nchileke,  
 agwataje ugwo iphe!  
 Nggube Nchileke,  
 a gwataje ugwo iphe;  
 nwunua phoo l'o bu oku.

- 2 Gbalihunu nggube onye  
ekpeje mgboko ikpe;  
kfuа ndu eku onwephe  
ekuku ugwo iphe ruberu ephe.
- 3 Nggube Ojejoje;  
?bu teke ole be ndu  
akirishi a-ha otu  
okokooko-o, ephe atu-a?
- 4 Ndu eme ejo iphe anoduje  
atu onu onwephe ege ephe e ta ahadu.  
Ephe ekfunukaje okporokpo okfu;  
l'asaphe oke nsasa.
- 5 Ndibe nggube Ojejoje;  
be ephe egweje ogwe uri.  
Ndu ono, bu okè-iphe ngu ono;  
be ephe anoduje akpapyashi ishi.
- 6 Ephe egbushije unwanyi, maa tufuru;  
me unwegirima,  
a toru ogbee;  
l'egbushikwaphu ndu mbyamumbya.
- 7 Ephe -nodu; ephe asu:  
“Le Ojejoje ta dukwa iphe ophuje;  
le Nchileke ke Jekopu ta  
dukwa iphe okpaje ishi iya.”
- 8 T'owaa dokwaa unu enya;  
unube ndu ono,  
egomunggo swehuru l'eke, madzu no ono;  
mbu unube ndu ono, eme eswe ono;  
?bu teke ole be unu  
a-makporu iphe.
- 9 Onye ono, bu iya  
kfuBERU madzu nchi ono;  
?oda nkichi to.



- Tọo onye ono, bu iya  
 moberu madzụ ẹnya ono;  
 ?tọo phudu ụzo tọo.
- 10 Tọo onye ono, bu iya  
 ahùje iphe bu mbakeshi àhùhù ono;  
 ?tọo hùdu unubèdua tọo?  
 Mbụ; onye ono, bu iya  
 anọduje ezi madzụ mmamiphe ono;  
 ?bu yèbedua te gbe madu iphe tọo.
- 11 Ojejoje makotaru iphe madzụ arị.  
 Ọ maru l'oriri ephe bukota mkpokoro oriri.
- 12 Ọnu-ọma bu k'onye  
 nggube Ojejoje ahùje àhùhù;  
 mbụ onye iigudeje ekemu ngu ezi iphe.
- 13 Onye ono be jinuje ike,  
 oo-gude tagbua iphe-ehuka le nshi;  
 jeye teke ee-gwu nsu te ndu akirishi nwu-  
 lahu.
- 14 Kele Ojejoje ta ahadu ndu nk'iya.  
 E tọo gbadodu ndu,  
 bu okè-iphe iya.
- 15 Kele ndu ikpe a-wata okpe  
 ikpe, du maa.  
 Yo buleruphu ndu obu  
 guru iphoru bu ndu  
 a-du ike tsokota ikpe ono.
- 16 ?Bu onye e-gbeshi je aluru mu ndu akirishi?  
 ?Bu onye e-vudo l'ekiya  
 nke mu; je aluru mu ndu ejo iya ono?
- 17 Ndege Ojejoje ta gbaru mu mkpu;  
 m'a ga azahawa mu ru teke teru etete.
- 18 Teke mu chiru mkpu le mu adaakwa;  
 be nggube Ojejoje gude ke

- l'i yeru mu obu wọta mu.
- 19 Teke mu wataru ọri oke ọri; b'i duru mu ike; mee; ẹhu atsọlahaa mu ẹna.
- 20 ?Ii-kwe tẹ nggu lẹ ndu ishi, ẹ tẹ emedu iphe vudo nhamunha emegba iphe tọ; mbu ndu ono, egudeje ekemu l'emegbu ndu ẹphe achi emegbu ono?
- 21 Ẹphe edzukobeje; chia idzu ẹge ẹphe e-shi kpapya ndu doberu ẹka ndoo ishi. Ẹphe ekpee kpee onye ẹ ta dudu iphe o meru nkfugbu.
- 22 Obenu l'ọ bu Ojejoje bu egbochitaje mu nu. Oo Nchileke bu Agbara-mkpuma ono, mu agbabaje; je edomia onwomu ono.
- 23 Oo ya a-kfu ẹphe ugwo iphe du eji, ẹphe eme; mee t'ẹphe buru kpurupyata k'ejo iphe ono, ẹphe eme ono. Oo Ojejoje, bu Nchileke ayi e-me t'ẹphe buru kpurupyata.

## 95

- 1 Unu bya t'ayi gva egvu ẹhu-otso-ẹna gude jaa Ojejoje! Unu t'ayi tua uzu ẹhu-otso-ẹna gude kwabe iya ugvu;

- mbụ onye ono,  
 bụ Agbara-Mkpuma,  
 adzofutaje ayi ono!
- <sup>2</sup> Unu t'ayi gude egvu ekele bya l'ifu iya!  
 Unu t'ayi gude egvu-ọma meeru iya uzere!
- <sup>3</sup> Kẹ l'ọ bụ Ojejoje, bụ Nchileke;  
 buru onye eze, kakọta iphe bụ  
 ọmarali, nọ mgboko-a nshinu.
- <sup>4</sup> Ọ bụ yẹbedua bẹ mgboko  
 mgburumgburu nọ l'ẹka.  
 Iphe bụ oke ugvu aburu iya nwe iya.
- <sup>5</sup> Eze Enyimu bụ nk'iya;  
 kẹ l'ọ bụ iya meru iya.  
 Yọ buru iya gude ẹka iya  
 meta ọgbodo-alị ọkponku.
- <sup>6</sup> Unu bya t'ayi fozita;  
 baaru iya ẹja;  
 t'ayi byishiru Ojejoje ono ikpere,  
 bụ iya meru ayi ono;
- <sup>7</sup> kẹ l'ọ bụ iya bụ Nchileke ayi.  
 Ayịbedua aburu ndu ooche  
 l'ọ bụ onye eche aturu;  
 mbụ unwu aturu, nọ iya l'ẹka.  
 Oo ya bụ; teke unu nuru  
 olu iya ntanụ ọwaa;
- <sup>8</sup> unu ba anmakwa ọkpoma  
 kpụ-gbungu ẹge unu  
 nmaru iya lẹ Meriba;  
 mẹ ẹge unu nmaru iya  
 lẹ Masa l'echi-egu;
- <sup>9</sup> mbụ ẹke ono, ndiche unu phe  
 nọru hụa Nchileke ama  
 bya adatakwa iya phụ;

l'ẹphe gudetsua ẹnya ẹphe phu iphe ya meru.

10 Ụkporo afa ẹbo mgburumgburu;  
be ọgbo ono kpatsukotaru iya iwe.  
Ya asu l'egomunggo  
sweshihuru ẹphe;  
ọphu ẹphe 'ekwedu oshi  
uzo, ya koshiru ẹphe.

11 Tọ dọ iya bu; ya egude  
ẹhu-eghughu ribua ya:

“L'ẹphe ta abahudu l'ẹke ya nọ; tuta ume.”\*

## 96

1 Unu gvaru Ojejoje egvu ọphungu.

Tẹ ndiphe kpoo-gbaa  
gvaru Ojejoje egvu.

2 Unu gvaru Ojejoje egvu;  
jaa ya ajaja!

Unu rajẹ iya arara  
mbọku-mbọku l'ọ bu  
Ojejoje bu onye adzoje madzọ!

3 Unu kfukashiaru iphe bu  
mbakeshi k'iphe dọ biribiri, oomeebe.  
Unu ekfuaru ndiphe k'iphe  
dọ biribiri, oomeje.

4 Kele Ojejoje ha nshinu;  
ọ gbakpọoru t'a jaje iya ajaja.  
T'a tsujekwa iya phu egvu;  
ke l'ọ kakọta iphe bu agwa l'ọ ha.

5 Agwa iphe bu mbakeshi  
bukota iphe e gude ẹka mee.  
Obenu l'ọ bu Ojejoje gude ẹka iya mee igwe.

\* 95:11 95:11 Hіб 3:7-11; 4:3-11.

- 6 Ûgvù; mẹ o-gbu-nwji-nwji; bẹ nọ iya l'ụzo ifu.  
Ike; mẹ ọdu-biribiri aburu  
iphe jiru ụlo iya, dụ nsọ.
- 7 Unubẹ ikfu, nọgbaa lẹ  
mgboko;  
unu kwabẹ Ojejoje ugву.  
Unu kfua ẹge ọ du-be  
biribiri; mẹ ẹge ike iya habe nshinu.
- 8 Unu tụa ọnu ẹge Ojejoje  
du-be biribiri; kẹ l'ọ gbaru iya.  
Unu gude iphe bya anụ iya l'ogbodufu iya.
- 9 Unu yee uwe, dụ nsọ;  
dụ biribiri gude baaru Ojejoje ẹja.  
T'ẹhu nmajẹ unu anmanma  
l'ifu iya; unubẹ ndiphe l'unu ha.
- 10 Unu kfuru iphe bụ mbakeshi  
l'ọo Ojejoje bụ eze.  
Mgboko b'e meru;  
yo shihu ike;  
k'ophu bụ l'ẹ tọo fọ-wodu afọ-wo.  
Yọ buru Ojejoje  
e-kpe ndiphe ikpe,  
vudo nhamunha.
- 11 Tẹ akpamigwe l'ọ ha  
tee ẹswa;  
ẹhu atsọo ndiphe ẹna.  
T'eze ẹnyimu;  
mẹ iphemiphe ọbule,  
nọ iya nụ tükokwa zee igidi.
- 12 Tẹ ẹgu ẹke, e meberu iphe;  
mẹ iphemiphe ọbule,  
nọ iya nụ tee ẹswa.  
Teke ono; iphe bụ oshi,

- nọ l'oswa agwa egvu; tee eswa.  
 13 Ephe a-guru Ojejoje egvu  
 ke l'obyawa okpe ndu eliphe ikpe.  
 Oo-gude odobe-eka-ndoo  
 kpee mgboko  
 mgburumburu ikpe;  
 bya egude ire-lanu kpee ndiphe ikpe.

## 97

- 1 O kwa Ojejoje bu eze;  
 t'ehu tsoo ndiphe ena.  
 Te ndu bugbaa l'ikfuli  
 eze enyimu tee eswa!
- 2 Urukpu; me ekpuru-ochi  
 no-pheru iya mgburumburu.  
 O bu odobe-eka-ndoo;  
 me ikpe, du maa  
 b'o gude nodu l'aba-eze iya; l'achi.
- 3 Oku evutajeru iya uzo;  
 je ekegbushikota ndu  
 ohogu iya l'ekemeke obule.
- 4 Ebemu, o loru be iphoro,  
 iya ngashikotaru mgboko.  
 Iphe bu onye -phuru iya nu;  
 ephe anmahu jijiji.
- 5 Ugvu dazehuru l'o bu umu l'ifu Ojejoje;  
 mbu l'ifu Nnajiufu, bu iya  
 nwe mgboko gbaa mgburumburu.
- 6 Akpamigwe l'o ha atu onu iya  
 l'o bu onye doberu eka ndoo.  
 Ndiphe l'ephe ha l'elewaa ege  
 biribiri iya habe nshinu.
- 7 Iphe bu ndu, abaru iphe

a pyiru apyipyi ẹja;  
mbu ndu gude nte asa nsasa;  
b'e mekotaru iphe-iphere.  
Unubẹ nte l'unu ha;  
unu baaru Nchileke ẹja!

<sup>8</sup> Ndu Záyọnu nuru ẹge  
nggube Ojejoje egudeje  
ekpe ikpe; telahaa ẹswa.  
Ndu kẹ Júda b'o meru t'ẹhu tsọ ẹna.

<sup>9</sup> Kẹ l'ọ bu nggube Ojejoje  
bu Ọkaribe-Kakọta-Nu  
lẹ mgboko  
gbaa mgburumgburu.  
E woliru ngu;  
nggu akakọta iphe bu agwa,  
nọ lẹ mgboko-a l'ọ ha nshinu.

<sup>10</sup> Tẹ ndu yeru Ojejoje obu  
kpọkwaa ẹjo iphe-ashi;  
kẹ l'ọ kwa ndu yeru iya  
obu bẹ ooletaje ẹnya.  
Yọ buru ẹphe;  
bẹ ọnafutaje l'ẹka ndu iwe.

<sup>11</sup> Iphoro b'e meru t'ọ duru  
ndu doberu ẹka ndoo.  
Ndu obu guru iphoro  
b'e meru tẹ ẹhu-ọtso-ẹna buru nk'ẹphe.

<sup>12</sup> Unu nọdu Ojejoje l'ẹka tee ẹswa;  
unubẹ ndu doberu ẹka ndoo.  
Unu tua ya ẹpha; l'ẹpha iya dọ nsọ.

## 98

Egvu-ọma

<sup>1</sup> Unu gọaru Ojejoje egvu ọphungu;

- kẹ l'o meru iphe dọ biribiri.  
 Ọ bọ ike iya;  
 mẹ ẹka iya ono,  
 dọ nsọ ono b'o gude mekputa.
- <sup>2</sup> Ọjejoje mewaru t'a maru  
 l'ọodzofutaje madzọ;  
 bya emee tẹ iphe bọ  
 mbakeshi maru l'ọ bọ  
 onye doberu ẹka ndoo.
- <sup>3</sup> Ọ nyataru obu, o yeru,  
 ndu ọnu-ọlo Ízurelu;  
 mẹ kẹ l'oomeje iphe o kfuru l'ẹke ẹphe nọ.  
 Mgboko gba  
 mgburumgburu  
 phọ-dzuwaru ẹge Nchileke  
 ayi egudeje adzọ madzọ.
- <sup>4</sup> Unu tọ ọzu ẹhu-ọtso-ẹna  
 gude kwabẹ Ọjejoje ugvu;  
 unubẹ ndiphe l'unu ha.  
 Unu gọ ẹgvu-ọma;  
 gushia ya ike; gude jaa Ọjejoje!
- <sup>5</sup> Unu gude une gọ  
 ẹgvu-ọma;  
 jaa Ọjejoje ajaja.  
 Unu egudekwaphu une;  
 mẹ ẹgvu-ekwekwe jaa ya.
- <sup>6</sup> Unu gude opu; gude ọpyoku  
 tọ ọzu ẹhu-ọtso-ẹna;  
 gude kwabẹ Ọjejoje,  
 bọ eze ugvu.
- <sup>7</sup> T'eze ẹnyimu; mẹ iphemiphe ọbule,  
 nọ iya nọ tọkokwa zee igidi.  
 Tẹ mgboko l'ophu;



mẹ iphemiphe ọbule,  
bu iya nù t̄ya ọzu.

- 8 Tẹ iphe bu ẹnyimu, nonu k̄ya ẹka.  
Iphe bu egvu, nonu aḡya  
egvu ekoshi l'ẹhu at̄sọ ẹphe ẹna.
- 9 T'ẹphe t̄uko n̄odu l'ifu Ojejoje ḡya egvu;  
kẹ l'ọobyawa okpe mgboko ikpe.  
Ndu mgboko l'ẹphe ha;  
bẹ oo-kpe ikpe, d̄y maa;  
hakwaaruphu ndiphe l'ẹphe ha  
enge, vudo nhamunha.

## 99

- 1 Ọ kwa Ojejoje bu eze;  
tẹ ndiphe nmahukwa jijiji.  
Ọ nọ l'aba-eze iya l'eli cherobimu.  
Tẹ mgboko mgburumgburu  
nmahukwa kpakpakpa.
- 2 Ojejoje hakwa nshinu;  
mbu onye ono, bu lẹ Záyonu ono.  
E woliru iya; yọ ka  
iphe bu mbakeshi nshinu.
- 3 T'ẹphe jaa ẹpha ngu,  
ha nshinu ajaja;  
mbu ẹpha ngu ono,  
ndiphe at̄sọ egvu ono.  
Ọ d̄y nsọ.
- 4 Eze ọbu ha nshinu.  
Iphe aduje iya mma bu ikpe,  
vudo nhamunha.  
Ome iphe t'ọ vudo  
nhamunha b'i meru;  
yọ nguru anguru.

L'ẹhu ụnwu Jékoṣu b'i  
meru iphe vudo nhamunha;  
buru iphe du mma.

<sup>5</sup> Unu mejee tẹ Ojejoje,  
bu Nchileke ayi dee ude.  
Unu noḍu iya l'iku okpa; baaru iya ẹja.  
Ọ du nsọ.

<sup>6</sup> Mosisu me Ẹronu shi  
tsoru le ndu achijeru Nchileke ẹja.  
Sámelú eshi tsoru le ndu shi  
akpo-kuje ẹpha iya.  
O shi abuje; ẹphe -kpọ-ku  
ẹpha Ojejoje; yọ za ẹphe.

<sup>7</sup> O shi anoduje l'urukpu,  
kpuru rogbodongu kfuru yeru ẹphe.  
Ẹphe eshi edobeje ekemu iya;  
l'eme iphe o toru ẹphe okpa iya.

<sup>8</sup> Nggube Ojejoje,  
bu Nchileke ayi;  
i shi azaje ẹphe teke ẹphe kpọ-kuru ngu.  
I shi ahuje ndu Ízurelu  
àhùhù teke ẹphe shisweru ọzo ngu.  
Obenu l'i shi buru ẹphe Nchileke,  
agujeru onye meru ẹji nvu.

<sup>9</sup> Unu mejee tẹ Ojejoje,  
bu Nchileke ayi dee ude.  
Unu noḍu l'ugvu iya,  
du nsọ; baaru iya ẹja;  
kele Ojejoje, bu Nchileke ayi du nsọ.

## 100

Egvu-ọma, e gude ekele Ojejoje ekele

<sup>1</sup> Unu tya uzu ẹhu-otso-ena;

- gude kwabẹ Ojejoje ugvu;  
unubẹ ụnwu eliphe l'unu ha.
- <sup>2</sup> Unu gude ẹhu-ọtso-ẹna;  
jeeru Ojejoje ozi.  
Unu gude egvu  
ẹhu-ọtso-ẹna bya iya l'ifu.
- <sup>3</sup> Unu makwaru l'ọ kwa  
Ojejoje bụ Nchileke.  
Ọ bụ iya keru ayi;  
ayi aburu nk'iya.  
Ayi bụ ndibe iya;  
mbụ aturu, ooche nche.
- <sup>4</sup> Unu gude egvu-ekele  
bahụ l'ọnu-nggamgbo iya.  
Unu egude egvu-ajaja  
jerua ogbodufu iya.  
Unu kele iya ekele;  
jaa ya ajaja;
- <sup>5</sup> kele Ojejoje bụ onye ọma.  
Obu, o yeru madzụ abuje ojejoje.  
Ọobujeru o-me-g'o-kfuru  
tsube l'ogbo sweru ogbo.

## 101

Egvu-ọma, Dévidi deru

- <sup>1</sup> Mu a-gụ egvu ke n-yemobu ngu  
yele ikpe ngu, vudo nhamunha.  
Mu a-gụ egvu gude jaaa  
ngu ajaja; nggube Ojejoje.
- <sup>2</sup> Ndzụ mu; be mu a-tọ nwehu  
mee t'ẹ b'ọ dụ ẹka ụta a-dụ iya.  
?Bụ teke ole be ịi-kpakfuta mu?  
Mu e-gude obu, ụta ẹ ta dudu

buru lẹ nke mu.

- 3 Ẹ tọ dudu iphe du eji,  
mu ekwe t'o shita mu ifu.  
Umere ndu ẹ te etsodu  
okpobe okfu ono du mu ashị;  
ophu 'o nwedu iphe mu l'ephe emegba.
- 4 Ndu ọzo ephe gberu nggọ;  
be mu edobeje ote-anya.  
E t'ọ dudu iphe mu l'ejo iphe gba.
- 5 Ndu anọduje ekfuru ibe ephe okfu-azụ;  
be mu e-me t'ephe yifu.  
Ndu etu onwephe iphe igwe charu;  
me ndu eku onwephe ekuku;  
be mu ta atakwaru nshi.
- 6 Ndu, bu o-me-g'o-kfuru  
l'ali-a;  
be mu a-nodu eleta anya;  
k'ophu mu l'ephe  
e-buwaruru jeye.  
Onye uta ẹ ta dudu l'iphe  
oome e-mekochaa l'ejeru mu ozi.
- 7 Ẹ tọ dudu ndu ẹregede;  
m'ọo onye lanu, mu ekwe  
t'o buru lẹ nke mu.  
Ophu o dukwa ndu ntumatu  
m'ọo onye lanu, mu ekwe  
t'o vudo mu l'ifu.
- 8 Utsu mboku-mboku;  
be mu e-meje t'iphe bu  
ndu akirishi, no l'ali-a gvụ.  
Mu a-tuko iphe bu ndu ejo iphe  
bufu lẹ mkpukpu ke Ojejoje.

**102**

Ekfukfu, onye eje iphe-ẹhuka ekfu anụ Nchileke  
Okfu, o kfulu teke ike agvụ iya agvugvu; ọruru  
aphụ, nọ iya l'obu nụ Ojejoje

- 1 Nnua ekfukfu, mu ekfu  
anụ ngu nggube Ojejoje;  
te mkpu, mu echi runua ngu nchi.
- 2 Ba aghakwaru mu azu  
teke mu nọ l'iphe-ẹhuka-a.  
Ngabekwa nchi;  
za mu oku egwegwa  
teke mu kuru ngu;
- 3 kele ndzu mu ephukahuwa  
l'ọ bu enwuru-oku.  
Ehu mu l'ọ ha enwukota  
mu phuraphura l'ọ bu icheku-oku.
- 4 E mewaru mu;  
mu akpoo nkụ l'ọ bu eswa.  
O mewaru; ẹkpiri nri echihu mu.
- 5 Oke ude, mu anọduje  
atsụ mewaru; mu agvụ.  
O buwa okpu wushiru.
- 6 Mu du l'ọ bu udele l'echi-egu;  
mbu l'ọ bu mgbashi,  
beru l'eke egbara kfulu.
- 7 Mu -zeru; muru enya;  
be mu aduje l'ọ bu nwenu,  
beru nkinyi iya l'eli okpotsu-ulo.
- 8 Ndu ohogu mu anọduje aja  
mu ewena mkpurumkpuru.  
Mu buwa iphe ndu mu du  
ashi gude akọ onu.
- 9 O bu ntụ be mu erije;

- yọ buru mu nri.  
 Mu ewojeru ẹnya-mini  
 gwakọbe l'iphe mu angu angungu.
- 10 Iphe kparu iya nọ aburu  
 l'ẹhu gbanwuhuru ngu ọku;  
 ke l'i paliru mu imeli imeli; buhaa mu ẹka.
- 11 Ndzu mu dụwa l'ọ bu  
 nwa onyonyo urenyashi.  
 Mu nwukotawaru kpaa l'ọ bu ẹswa.
- 12 Obenu le nggube Ojejoje  
 a-nọ l'aba-eze ngu gbururu jeye le gbururu;  
 ọphu 'o nweđu l'a azaha  
 ngu azaha tsube l'ogbo sweru l'ogbo.
- 13 Ii-gbeshikwa-a phuru Záyonu imiko;  
 ke l'o ruwaru teke ọo-tuba ngu l'obu;  
 mbu l'oge teke ono, a ọtaru  
 afota dobe ono ruwaru;
- 14 kele mkpuma iya du  
 ndu ejeru ngu ozi mkpa.  
 Ọobuje; o -kpo udzu tuu;  
 imiko iya adu ẹphe nshinu.
- 15 Iphe bu mbakeshi a-nodu  
 atsu nggube Ojejoje egvu.  
 Iphe bu ndu eze, nokota le  
 mgboko l'ẹphe ha a-nodu  
 akwabe ọdu-biribiri ngu ugvu;
- 16 kele Ojejoje e-gude ẹka iya  
 kpukwazi Záyonu;  
 gude ọdu-biribiri iya lufuta.
- 17 Ọo-nu ekfukfu, ndu ẹ ta  
 dudu ege ọ haru ẹphe ekfu anu iya;  
 ọphu oolephudu aroro,  
 ẹphe arọ iya l'ẹnya.

- 18 T'e dee ọwaa l'ẹkwo doberu  
 ọgbo ọphu abya nụ;  
 k'ọphu ndu ọphu, ẹ te  
 egbe atsütadua ime ẹphe  
 e-tu Ojejoje ẹpha.
- 19 Lẹ Ojejoje shikwa l'eze-ulo  
 iya l'ephekerephe;  
 o shi l'imigwe gbua igo lẹ mgboko;
- 20 tẹ ya nua ude, ndu mkporo atsü;  
 shi ẹge ono tufu ndu  
 e kperu nkfugbu.
- 21 Ọo ya bu t'a raa kẹ  
 Ojejoje arara lẹ Záyọnu;  
 jaa ya ajaja lẹ Jerúsalemu
- 22 teke iphe bu mbakeshi;  
 mẹ alì-eze ndiphe l'ọ ha  
 e-dzukobe t'ẹphe baaru Ojejoje ẹja.
- 23 Nchileke nafuwaru mu ike l'okorọbya;  
 ọ nafuwaru mu ndzụ l'ike.
- 24 Tọ dụ iya bu; mu asụ:  
 Nggube Nchileke mu;  
 be ewofushinu nụ mu;  
 l'ẹ b'ọ dụ ẹge mu nọ-bewaru;  
 lẹ nggubedua a-nọkwa  
 tsube l'ọgbo sweru ọgbo.
- 25 Lẹ mbulembu kpọ bu  
 nggubedua turu ntọ-l'alì mgboko l'ọ ha.  
 Yọ bukwaru ngu phụ;  
 bẹ gude ẹka ngu mee igwe.
- 26 Iphe ono l'ọ ha e-mekochaa laa l'iyi.  
 Obenu lẹ nggubedua l'a-dụ ẹge ị dụ.  
 L'ẹphe ha e-mekochaa  
 kashihu l'ọ bu uwe.

Yọ buru ẹge-a aagbanweje uwe-wa;  
 bẹ ii-mekochaa gbanwee ẹphe;  
 nk'ẹphe agvụ.

- 27 Obenu lẹ nggubedua  
 bụlephu onye ị bụ b'ị bụ;  
 nọduwa ẹge ịi-nọ jeye lẹ tutu yoyo.
- 28 Ụnwegirima, ndu ejeru  
 ngu ozi l'e-buru l'ẹke ịino;  
 awa ẹphe nguru anguru l'ifu ngu.

## 103

Egvu, Dévidi deru

- 1 Tẹ mbẹdua jaa Ojejoje ajaja.  
 Tẹ iphe bụ iphe nọ mu l'ẹhu;  
 jaa onye ono, ẹpha iya dụ nsọ ono ajaja.
- 2 Tẹ mbẹdua jaa Ojejoje ajaja;  
 k'ọphu ẹ t'ọ dudu uru,  
 eeritaje iya l'ẹka m'ọo nanụ, mu a-zaha:
- 3 Ọogujeru mu nvụ l'ẹjo iphe mu meru l'ọ ha;  
 l'emeje tẹ mu ka mma l'iphe  
 bụ iphe eme mu nụ.
- 4 Ọogbafutaje mu; shi ẹge ono dobe mu ndzụ.  
 Ọogudeje n-yemobu iya;  
 mẹ obu-imiko iya gbaa mu mgburumgburu.
- 5 Ọogudeje iphe dụ mma  
 nụ-jia mu ẹpho;  
 l'emeje tẹ mu laa azụ  
 lẹ nwẹpa l'ọ bụ ugo.
- 6 Ojejoje ekpeje eyeru ndu l'aakpa ẹhu;  
 l'emeje tẹ iphe gbaru ẹphe rube ẹphe.
- 7 O meru tẹ Mosisu maru iphe  
 bụ uche-obu yẹbe Ojejoje;  
 bya emee tẹ ndu Ízurelu



- maru iphemiphe obule, oome.
- 8 Ojejoje bu onye aphuje imiko;  
bya aburu onye emeje  
eze-iphe-oma.  
Ehu te eghujedu iya  
eghughu egwegwa.  
Ooyejeru madzu obu yeru  
iya eya k'etsutsu iya.
- 9 E to o bajedu mbà tekenteke;  
ophu ovujedu ovuma jeyawaru.
- 10 E too mejedu eyeru ayi  
l'ege ejo iphe ayi meru ha;  
ophu okfujedu ayi ugwo  
iphe du eji, ayi emebe;
- 11 ke l'o bu ege igwe no-bebe  
ali oreke-imeli bu ege o habe nshinu;  
mbu n-yemobu, o yeru ndu atsụ iya egvu.
- 12 Yo buru ege uzo  
enyanwu-ahata teberu enya  
l'uzo enyanwu-ariba;  
bu ege eke o wofuru emeswe,  
ayi mesweru iya je edobe  
teberu enya l'eke ayi no.
- 13 O bu ege nna aphujeru unwu iya imiko;  
bu ege Ojejoje aphujeru  
ndu atsụ iya egvu imiko;
- 14 ke l'o bu iya maru ege e gude mee ayi.  
Oonyataje l'o bu eja mmanu be ayi bu.
- 15 Madzu be ndzu iya du l'o bu eswa.  
Oonoduje evu rikarika  
l'o bu okoko, no l'egu.
- 16 Pherephere -pheshile iya phu nwanshi;  
yo phukashihu; eke o shi nodu

- ta anyatahędu iya ọdo.
- 17 Obenu lę ndu atsu Ojejoje egvu;  
 bę Ojejoje eyejeru obu  
 tsube l'ede-nwede rua ede-nwede.  
 Odobe-ęka-ndoo ya  
 adujekwaruphu ndu ọphu  
 jeye lę nwanwanwanwanwa;
- 18 mbu lę ndu ọphu edobeje ọgba-ndzu iya;  
 nyata dobe ekemu, ọ turu doberu ęphe.
- 19 Ojejoje mewaru t'aba-eze iya  
 nguru anguru l'imigwe.  
 Abubu, ọ bu eze b'ọ bu rua ękemeke.
- 20 Unube unwu ojozi-imigwe  
 ke Ojejoje; unu jaa ya ajaja;  
 mbu unube ndu ike du;  
 bya aburu ndu eme okfu iya.
- 21 Unu jaa Ojejoje ajaja;  
 unube unwu imigwe l'unu ha;  
 mbu unube ndu ozi iya,  
 eme iphe bu uche obu iya.
- 22 Unu jaa Ojejoje ajaja;  
 unube iphe o meru ememe  
 dobe l'ęke ọ bu eze.  
 Te mbędua jakwaa Ojejoje ajaja.

## 104

- 1 Te mbędua jaa Ojejoje ajaja.  
 Nggube Ojejoje,  
 bu Nchileke mu;  
 i ha nshinu.  
 I gude ugву yele  
 ọdu-biribiri nmaa  
 onwongu l'ọ bu onye nmaru ękwa.

- 2 Iphoro b'i yeru l'ọ bụ onye yeru uwe.  
 Imigwe l'ọ ha bụ  
 nggubedua phushiru iya l'ọ bụ ọlo-ékwa;
- 3 bya eworu uko ọlo ngu gbaa l'eli mini.  
 I meru urukpu; yọ bụru ugbo-inya ngu;  
 Nngu atukojeru pherephere l'ébà ephe.
- 4 I meru pherephere;  
 yọ bụru nwozi ngu;  
 bya emee ọ-ta-chichichi ọku;  
 yọ bụru onye, iizije ozi.
- 5 Ọ bụ nggu toru ntọ-l'alì mgboko l'ọ ha;  
 k'ọphu bụ l'ẹ to nwedu l'e  
 nwungaa ya enwunga jeye lẹ tutu yoyo.
- 6 I woru eze ẹnyimu yee  
 mgboko l'ọ bụ uwe;  
 k'ọphu bụ lẹ mini  
 kpukotaru iphe bụ ugvu ekpukpu.
- 7 Obenu l'ọo mbà b'ì baru mini;  
 yọ gbaa mgbalanu.  
 Ọ nuleruphu ọra, ì nọ  
 l'imigwe raa; gbalaa.
- 8 Yo shi l'iphe bụ ugvu ono;  
 kekashia lẹ nsuda lẹ nsuda;  
 tsokwaseru l'oswa ẹke,  
 ì toru iya t'o shije.
- 9 Ì kpawaru iya oke ẹke ẹ tọo tsọ-swetajedu;  
 k'ọphu bụ l'ẹ t'o nwedu l'o  
 rimia mgboko erimi ọdo.
- 10 I mewaru tẹ mini shije  
 l'ọgba gbaa geregere  
 kwaseru ọkpa-ugvu.  
 Ootsojeru tugbua mgbaku mgbaku ugvu.
- 11 Yọ bụru iya echebeje unwu anu,

- bu l'ẹgbudu mini angungu l'ẹphe ha.  
 Ọ kwa iya phụ bẹ  
 nkakfụ-igara-ọswa egudeje  
 gboo onwiya ẹgu mini.
- 12 Ụnwenu, ẹphe l'eli anọduje  
 l'iku mini ono kpaa ẹkfunu.  
 Ẹphe ebepheje l'ẹkali-oshi ono l'agụ egvu.
- 13 Ọonoduje l'ẹke, o bu l'achiru  
 iphe bụ ugvu ono mini.  
 Mgboko l'ọ ha bẹ iphe oome dū mma.
- 14 Ẹwu b'o meru; yoo fushije;  
 k'ọphu elu a-tajẹ nri;  
 bya emee iphe-akọko dobe  
 tẹ madzụ kojee; kọbe iphe l'alị;
- 15 gude iya kuta mee, madzụ  
 a-nguje t'ẹhu tsọ iya ẹna;  
 bya emeta manụ, emeje tẹ  
 ifu mụ madzụ amumu;  
 mẹ nri, madzụ erije nọdu ndzụ.
- 16 Oshi Ojejoje bẹ ọogbaje mini ọhuma;  
 mbụ oshi sida ọphu nọ  
 l'ugvu ugvu Lébanonu,  
 bụ oshi ọphu o yeru l'onwiya.
- 17 Yọ bụru l'eli ẹke ono;  
 bẹ nwenu akpajẹ ẹkfunu.  
 Ọku-eswi-uda eworu oshi  
 payinu mee ufu iya.
- 18 Iphe butsua l'iphe bụ  
 oke-ugvu ono bụ  
 eghu-ọswa.  
 Ndu ọphu, bụ ọgba  
 mkpuma aburu ẹke  
 nchi-ògbà anọduje ezeru ndzụ.

- 19 O meru ọnwá dóbè t'è gúde íyá gújè ógè.  
 Ọ́phú, bú ẹ́nyánwú amáru teke yá á-ríba.
- 20 Ọ́obujè; teke í meru tẹ́ ọ́chí gbáá;  
 yọ́ búru íyá bú lẹ́ nchí ejíhú.  
 Íp'hé bú anụ́, bú l'ọ́swá eshí  
 l'ẹ́kè ọ́ nọ́ wúfuta jeshia ọ́chọ́ íp'hé oo-ri.
- 21 Agụ́ anọ́dujè ede ekiri; l'achọ́ nri, oo-ri;  
 mbụ́ nri, shi Nchileke l'ẹ́ka.
- 22 Ẹ́nyánwú -halẹ́phú;  
 ẹ́p'hé anyígobè; lashiá;  
 jẹ́ eworú onwẹ́p'hé  
 domishia l'ọ́gba ẹ́p'hé.
- 23 Madzụ́ egbeshi teke ono jeshia l'ẹ́gú.  
 Yọ́ nọ́du l'ẹ́gú jee ozi jeye l'urẹ́nyashi.
- 24 Nggube Ojejoje;  
 ozi, iijekota búkwa 'agụ́ta agụ́ta.  
 Íp'hémíphé ọ́bule ono  
 búkota mmámíphé nke ngu  
 b'í gúde mekota íyá;  
 mbụ́ lẹ́ mgboko l'ọ́ há;  
 bẹ́ íp'hé jírú íyá nụ́ búkota  
 íp'hé nggúbedua gúde ẹ́ka ngu mee.
- 25 Eze Ẹ́nyímú há nshínú;  
 byá áhá úsá.  
 Yọ́ búru l'ime íyá;  
 bẹ́ unwú anụ́, bú 'agụ́ta agụ́ta bú;  
 mbụ́ íp'hé nọ́ ndzú;  
 ndú ọ́phú há nshínú;  
 mẹ́ ndú ọ́phú há nwanshí.
- 26 Ọ́ bú l'elí miní ono;  
 bẹ́ ugbo-miní ono eshíjè.  
 Búkwarú íyá phụ́;  
 bẹ́ ejó agiyí ono, bú nggú

- gude ẹka ngu mee ya;  
 yọ nọdu iya ebu nggada.
- 27 Iphemiphe ọbule ono;  
 bu nggu be ẹphe chiko ele ẹnya l'ẹka  
 t'i nuje ẹphe nri l'oge iya.
- 28 Teke i nuru iya ẹphe;  
 ẹphe achikobe iya l'onwẹphe.  
 Teke i musaru ẹka;  
 iphe du mma enwushihu;  
 ẹphe egude iya rijia ẹpho.
- 29 Teke i gharu ẹphe azu;  
 ẹphe atsulahaа egvu.  
 I -nata ẹphe ume, ẹphe atu;  
 ẹphe anwushihu; buru ẹja ali.
- 30 Teke i kuru Ume ngu ye iya l'ẹhu;  
 yọ buru iphe e meru k'ophungu.  
 Iimeje mgboko l'onwiya  
 t'o du ophungu ophungu.
- 31 Te ọdu-biribiri Ojejoje  
 dukwa ẹge o du jeye tutu yoyo.  
 Te ozi, Ojejoje gude ẹka iya jee  
 mekwa te ẹhu tsoo ya ẹna;
- 32 mbu onye abuje;  
 o -lee mgboko ẹnya;  
 yọ nmahu kpakpakpa.  
 Teke o byaru ẹka l'eli ugву;  
 ugву ọbu akpuhu tututu.
- 33 Mu a-nọduje agu egvu anu  
 Ojejoje le ndu mu mgburumgburu.  
 Mu a-nọduje agu egvu aja  
 Nchileke mu ajaja jeye teke mu a-nọ-bebe.
- 34 Te ke nk'iya-a, mu ari-a tsokwaa ya ẹna;

ke l'iphe Ojejoje eme emeje t'ehu tsoo mu  
ena.

- 35 Te ndu ejo iya chihu le  
mgboko gbaa mgburumgburu;  
ophu ndu akirishi  
'anohekwa anono ophu.  
Te mbedua jakwaa Ojejoje ajaja.  
T'ajaja buru ke Ojejoje.

## 105

- 1 Unu kele Ojejoje ekele;  
unu akpo-kua epha iya.  
Unu mee t'iphe bu  
mbakeshi maru iphe o meshiru.
- 2 Unu guku iya l'egvu.  
Unu gua egvu  
gude jaa ya ajaja.  
Unu kfukashia k'iphe  
bu iphe du biribiri, onoduje eme.
- 3 Unu gude epha iya,  
du nsọ ngaa unga.  
T'iphe bu ndu achọ  
Ojejoje tee eswa.
- 4 Unu wojeru enya dabe le  
Ojejoje yele agburu-ehu iya!  
Unu achọje ifu iya  
mkpurumkpuru!
- 5 Unu nyatakwa iphe biribiri;  
me iphe-ophulenyaa,  
o meshiru;  
yeru ikpe, o kpeshiru;
- 6 unube eri nwozi iya,  
bu Ebirhamu;

- unube unwu Jékoṗu,  
 bu ndu o gude ẹka iya fọta.
- 7 Ọ kwa iya bu Ojejoje;  
 buru Nchileke ayi.  
 Ikpe iya chiko mgboko  
 vọo kfurukfuru.
- 8 Ndzu ono, o gbaru ono;  
 be oodobeje jeye le tutu yoyo.  
 Iphe o kweru ukwa iya;  
 be oomeje shi l'ogbo sweru ogbo.
- 9 Ndzu ono yele Ebirihamu  
 gbaru ono; me angu ono,  
 o rifuru Ayizaku ono
- 10 b'o meru; yo buru ekemu l'ehu Jékoṗu;  
 buru ogba-ndzu, a-duru  
 ndu Izurelu jeye le tutu yoyo.
- 11 Ọ suru ephe: "L'oo ephe;  
 be ya a-nu ali Kénanu  
 t'o buru okè-iphe ephe ketaru."
- 12 ?Ephe shi du ole teke ono.  
 Ephe shi habe ahabe;  
 bya aburu ndu  
 mbyamumbya l'ali ono.
- 13 Ephe shi etsojeru iphe bu  
 mbakeshi aghaphe.  
 Ephe -shi l'ali-eze owaa;  
 ephe akfufu lashia ali-eze odo.
- 14 Ophu o dudu onye  
 o kweru t'o kpaa ephe ehú.  
 O bu okfu ehú ephe;  
 b'o shi egudeje baaru ndu eze mba;
- 15 su ephe t'ephe be



- edenyikwa ndibe iya ono,  
ya fотaru afота ono ẹka;  
t'ẹ b'ọ dukwa iphe ẹphe  
e-me ndu ekfuchiru iya nụ.
- 16 O mebyishikotaru iphe  
bụ nri, ẹphe nweru enweru;  
shi ẹge ono mee t'ẹjo-ẹgu bya l'eliphe.
- 17 Yọ bya eye nwoke lanụ  
t'o vuru ẹphe ụzo.  
Nwoke ono бү Jófẹfu;  
mbụ onye ono,  
e reru l'ọ бү ohu ono.
- 18 Ẹphe turu iya mkpọro l'ọkpa;  
fubashia ya ọnya l'ọkpa;  
bya eworu ajaba ígwè tụa ya l'olu;
- 19 gbururu jeye teke okfu iya vuru.  
Okfu, Ojejoje kfuru emee  
t'a maru l'ọ бү onye  
ire-lanụ.
- 20 Ya ndono; eze ezia t'e je atọfu iya.  
Onye бү ishi ọha atọfu iya; yo nweru  
onwiya.
- 21 Yo woru iya mee onye ishi l'ufu iya:  
t'o letajeru iya ẹnya l'ẹku iya l'ọ ha;
- 22 sụ iya t'ọ hụje ndu ishi  
àhùhù teke dụ iya mma.  
Yo zije ndu бү ọgurennya  
l'alì-eze iya mmamiphe.
- 23 Tọ dụ iya бү; ndu Ízurelu alashia Íjiputu.  
Ndibe Jékọpu ejenu je  
aburu ndu, laru alala l'alì Hamu.
- 24 Ojejoje abya emee ndibe iya;  
ẹphe azùà azùzù; ha l'igwe;

- shi ẹge ono kapyabẹ ndu ọhogu ẹphe.
- 25 Yọ bya emee ndu Íjiputu;  
 ẹphe abya akpọo ndu Ízurelu ashì;  
 chilahaaru ẹphe ẹjo idzu.
- 26 Yọ bya ezi nwozi;  
 mbu Mósísu; mẹ Éronu,  
 bu onye ọ fọtaru;
- 27 ẹphe eje emeshia  
 iphe-ọphulenyanya nk'iya l'ẹke ẹphe nọ;  
 bya ekoshigbaa ẹphe iphe  
 du biribiri ke Ojejoje le Hamu.
- 28 O meru t'ochi je gbaa l'alì  
 ono mgburumgburu;  
 kele ndu Íjiputu kwefuru okfu Nchileke ikè.
- 29 Yọ bya emee mini, nọ l'alì ẹphe;  
 yọ ghọkota mee.  
 Ẹma, nọ iya nọ anwushihukota.
- 30 Mbara abya eji alì ẹphe;  
 mbu bya akwọtsua nkwọ;  
 bahọtsua l'ẹke ndu ishi ẹphe azeje.
- 31 Ọ bua okfu b'o kfulu;  
 ijiji etsulaha gbigbigbi;  
 mkpurúmkpuru abya atuko alì ono tua.
- 32 Yo wota mini, ọoga anọdu  
 achiru ẹphe l'alì ono mee;  
 yọ ghọọ aka-mini; mẹ egbe-igwe;
- 33 tųpyashia vayinu ẹphe;  
 mẹ oshi figu ẹphe;  
 mebyishikota iphe bu oshi, nọ l'alì ono l'ọ ha.
- 34 Yo gbeshikwa ọdo bya  
 ekfua okfu; igube awata ephephe.  
 Ogu, etsu gbigbigbi aburu 'aguta aguta;

- 35 bya atuko iphe bu iphe no  
 ndzu, nweru ekwo l'ali ephe tagbua;  
 mbu tuko iphe ephe  
 meberu l'ali l'o ha tapyashia.
- 36 Yo bya teke ono bya atuko  
 iphe bu unwu ephe; ndu ophu,  
 bu ephe ime-odungu l'ali ono gwepya;  
 mbu tuko unwu ephe ndu  
 ophu, bu okpara gbugee.
- 37 Yo bya edufuta ndu Izurelu;  
 kpota mkpola-ocha  
 yele mkpola-ododo kpojia ephe aka.  
 T'o nwe unwu ke ndu  
 Izurelu; m'oo onye lanu,  
 a choru achochu.
- 38 Ehu atsuo ndu Ijiputu  
 ntumatu le ndu Izurelu tugbutsuaru;  
 ke l'ephe shiwa atsuo ndu Izurelu ono egvu.
- 39 Yo bya egesaarua ephe  
 urukpu gude kpuchita ephe;  
 bya edoberu ephe oku  
 t'ephe gude phu iphoro l'enyashi.
- 40 Ephe suru t'a nu ephe nri;  
 Ojeje abya achiru okwa nu ephe;  
 gude nri, shi l'igwe nu-jia ephe epho.
- 41 Yo kpuhaa oke mkpuma;  
 mini eshi iya tsoshihu;  
 l'atsuo l'o bu nggele l'echi-egu ono;
- 42 ke l'o nyataru ukwa iphe du nso,  
 o kweru nwozi iya, bu Ebirhamu.
- 43 Yo dufuta ndibe iya;  
 ehu atsuo ephe ena;

mbụ ndu ono, ọ fọtaru ono.

44 Yo woru alị ndu ọhodo woru nụ ẹphe.

Yọ bụru ẹke ndu ọdo  
riru aphụ iya; be ẹphe wotaru;  
yọ bụru òkè-iphe ẹphe;

45 k'ọphu ẹphe a-wata ome  
ome-l'alị Ojejoje;  
dobelaha ekemu, shi iya l'ẹka.  
T'ajaja bụru kẹ Ojejoje.

## 106

1 T'ajaja bụru kẹ Ojejoje.

Unu kele Ojejoje ekele;  
kẹ l'ọ bụ onye, dụ mma;  
kẹle n-yemobu nk'iya  
anoje jeye l'ojejoje.

2 ?Bụ onye a-dụ ike  
tụa ọnu ẹge iphe  
Ojejoje eme habe nshinu?  
Tọo; ?nanụ onye a-dụ ike  
tukota Ojejoje ẹpha iphe oomeebe.

3 Ọnu-ọma bụ kẹ ndu eme  
iphe vudo nhamunha;  
mbụ ndu ono,  
anọduje eme iphe dụ  
mma tekenteke ono.

4 Nggube Ojejoje;  
nyatakwa mu teke ịi-wata  
okoshi lẹ ndibe ngu nọ ngu l'obu.  
Gbakwaaru mu mkpu  
teke ịi-bya ẹphe adzofuta;

5 k'ọphu mu a-phụ k'ọma,  
i doberu ndu ị fọtaru;

tsokwaru phụ mba ono,  
 bụ nke ngu ono tee ẹswa;  
 mbụ tsoru ndu ono,  
 bụ òkè-iphe ngu ono jaa ngu ajaja.

- 6 Ayi meekwaru iphe dụ eji  
 ẹge nna ayi oche phẹ meru.  
 Ayi mewaru iphe dụ eji;  
 mee iphe ẹ ta dudu mma.
- 7 Teke nna ayi oche phẹ  
 shi nọdu lẹ Ịjiputu  
 bẹ iphe dụ biribiri,  
 i meshiru te shidu doo ẹphe ẹnya;  
 ọphu ọ dudu ikpoto  
     iphe-ọma ngu,  
 ono nweru ọphu ẹphe nyataru.  
 Ẹphe kwefuru ngu íkè  
 lẹ Eze Ẹnyimu Uswe.
- 8 Obenu l'ọ gude k'okfu ẹpha iya; dzọfuta ẹphe;  
 k'ọphu aa-maru l'ọkpehu iya ha nshinu.
- 9 Ọ baru Eze Ẹnyimu Uswe mba;  
 mini, nọ iya nọ atashihu.  
 Yo dua ẹphe swee echi mini  
 l'ọ bụ onye eswe l'echi-egu.
- 10 Ọ dzọfutaru ẹphe l'ẹka ndu ọhogu ẹphe;  
 gbafuta ẹphe l'ẹka ndu ẹphe dụ ashị.
- 11 Mini rigbushikotaru ndu ọhogu ẹphe;  
 tọ dụ m'ọo bụ onye lanu, waru nụ.
- 12 Ọ bụ teke ono; bẹ ẹphe  
 kwetaru l'iphe o kweru ụkwa  
 ememe bẹ oomeje.  
 Ẹphe abya agụa egvu gude jaa ya ajaja.
- 13 Iphe ono b'ẹ ta nọdu ọphu baru ishi;

- ẹphe azahaa iphe ono,  
 o meru ono;  
 ọphu ẹphe ejebua ya ọkpata ishi.
- 14 Ẹphe erua l'echi-ẹgu ono;  
 wata ome iphe ẹgu iya agụ ẹphe.  
 Yọ buru l'alị ono,  
 daburu swanmangu ono;  
 be ẹphe dataru Nchileke.
- 15 Yọ nūnu ẹphe iphe ẹphe sūru t'a nū ẹphe;  
 nūtsua ya ẹphe; bya evuru  
 ẹjo iphe-ememe byabẹ ẹphe.
- 16 L'ọdu ndu Ízurelu;  
 l'echi-ẹgu ono;  
 b'o nweru ndu wataru  
 ogvuru Mósísu yẹle Éronu  
 ẹnya-kfúrukfuru;  
 mbụ ndu ono, Ojejoje  
 fọtaru dobe iche ono.
- 17 Ya ndono; alị ekejahu ẹbo  
 lee Detanu;  
 bya atụko Ebiramu yẹle  
 ndu tso iya nū lia lẹ ndzụ.
- 18 Ọku enwulihu;  
 dzụkota ndu etsoje ẹphe.  
 Ọku ono atụko ndu akirishi ono dzụkota.
- 19 Ẹphe erua l'ugvu Hórebu;  
 je egude mkpọla-ododo  
 kpụa nweswi dobe;  
 balahaaru iya ẹja l'ọ bụ nte.
- 20 Ẹphe egude ọdu-biribiri kẹ Nchileke  
 gbanweta iphe a kpuru;  
 yọ dū l'ọ bụ eswi, atajẹ ẹwu.
- 21 Ẹphe azahaa Nchileke ono,

- dzofutaru ephe ono;  
 mbu onye ono, meru  
 iphe ha nshinu l'ali Ijiputu;  
 22 bya emee iphe du biribiri l'ali Hamu;  
 bya emekwaaphu iphe du  
 egvu le Eze Enyimu Uswe ono.  
 23 To du iya bu; Nchileke asu  
 le ya e-mebyishi ephe.  
 Obenu le Mosisu, bu onye o fotaru;  
 jeru je akfu-chia uwara,  
 o shi abya; t'e b'o gude  
 oke ehu-eghughu iya  
 mebyishikota ephe l'ephe ha.  
 24 E metsua; to nwehe iphe  
 ephe guberu egiri ali ono.  
 Ephe te kwe le Nchileke  
 e-mekwadu iphe o kweru ukwa iya.  
 25 Ephe anoshia l'ulo-ekwa ephe;  
 wata ugu aphu; jika ome  
 iphe Ojejoje suru t'ephe mee.  
 26 To du iya bu; yo ribua le ya  
 e-me t'ephe nwushihu l'echi-egu ono;  
 27 temanu ya abya eruta  
 unwu ephe je eye ndu ohogu ephe l'eka.  
 Ephe achikashia ephe;  
 ephe agbaa nanu nanu;  
 dzuru ekemeke obule.  
 28 Ephe egbeshi je eworu  
 onwephe go le Balu-Peyo;  
 bya awata ori iphe e gude  
 gwaaru agwa, e ta nodu ndzu.  
 29 Ephe emee;  
 Ojejoje avulahaa ovuma

- k'ẹjo iphe, ẹphe eme.  
Mgbonwu adakfutanu ẹphe.
- 30 Ọle Finehasu gbeshiru bya egboo oḡu ono;  
shi ẹge ono mee tẹ  
mgbonwu ono kfushi.
- 31 A ɔaruu iya ẹya  
l'odobе-ẹka-ndoo, e-shi l'ẹhu iya  
sweru eri iya tsube l'oḡbo sweru oḡbo.
- 32 L'ẹphe ruru lẹ mini Meriba;  
bẹ ẹphe kpatsuru Ojejoje iwe.  
Mosisu eshi ẹphe l'ẹka  
kpata kpube onwiya.
- 33 Ọ bụ okfu l'ẹphe kwefuru  
Ume Nchileke ikẹ meru iphe  
Mosisu kfuru iphe ẹ tọ ga ekfudu.
- 34 Ẹphe ajika l'ẹphe ta  
alụ-gbudu ndu ono,  
ẹphe jekfuru l'alị ono;  
ẹge Ojejoje turu ẹphe ekemu;  
sụ t'ẹphe lụa ẹphe.
- 35 Iphe ẹphe mechiaru bụ  
l'ẹphe lẹ ndu ono bya  
alụ-gbalahaa nwanyi.  
Ẹphe l'ẹphe abya agbaa  
ẹghirigha; ẹphe awata ome ome-l'alị ndu  
ono.
- 36 Ẹphe awata oḡbaru agwa ndu ono ẹja.  
Iphe ono emekochaa buru onya; nma ẹphe.
- 37 Ẹphe egude unwu ẹphe  
ndu k'unwoke lẹ ndu kẹ unwanyi;  
wata oḡwa ẹjo maa.
- 38 Ẹphe awata oḡbushi unwu  
ẹphe, ẹ ta dudu iphe ẹphe meru;



- gude l'agwa nte ndu Kénanu.  
 Èphe egude mee unwu  
 èphe ono merushia alì ono;
- 39 bya eshikwaphu ège ono  
 merushia onwèphe;  
 shi ège ono dù l'ò bù  
 nwanyi è te gudedu ire iya  
 èka l'èke Nchileke nõ.
- 40 Oo ya meru iphe èhu  
 ghulaharu Ojejoje eghughu  
 l'èke ndibe iya nõ;  
 yò kpò-yilahaaru ndu ono,  
 bù òkè-iphe iya ono ukuvu.
- 41 Yò chiru èphe ye l'èka ndu òhodo.  
 Ndu èphe dù ashì aburu eze; chilahaa èphe.
- 42 Ndu òhogu èphe akpalahaa èphe èhu.  
 Ndibe Nchileke abya anòdu èphe l'èka.
- 43 Ugbo olemole; b'ò dzòfutaru èphe.  
 O bù l'èke uche adujee èphe  
 bù ège èphe e-shi kwefuru Ojejoje ikè.  
 Èphe eshi ège ono kwaa  
 l'èjo iphe èphe; nõdu iya yifu.
- 44 Oìe oòbuje; iphe-èhuka  
 -byakfuta èphe; èphe -raku Nchileke;  
 yo rua ya l'èhu ègwegwa;  
 yò nua olu èphe.
- 45 Yo gude okfu èhu èphe  
 nyata oògba-ndzù iya;  
 gude kè l'o yeru èphe obu selaa èka azu;
- 46 mee t'iphe bù ndu kpuru  
 èphe lè ndzù phuaru èphe imiko.
- 47 Nggube Ojejoje,  
 bù Nchileke ayi;

dzofutanu ayi.  
 Shinu l'iphe bu mbakeshi  
 ono chilata ayi odo;  
 k'ophu ayi e-tu ngu epha;  
 nggube onye ono, du nsọ ono.

- 48 T'ajaja buru ke Ojejoje;  
 bu Nchileke ke ndu Izurelu  
 gbururu jeye le gbururu.  
 T'onnyemonye obule sukwa: "Ono ege o du!"  
 T'ajaja buru ke Ojejoje!

## 107

- 1 Unu kele Ojejoje ekele;  
 ke l'o bu onye, du mma.  
 N-yemobu nk'iya anoje jeye le tutu yoyo.
- 2 Te ndu Ojejoje gbafutaru kfu ya;  
 mbu ndu o gbataru l'eka ndu epe du ashi;
- 3 ndu ono, o shi l'iphe bu  
 mbakeshi chikobe ono;  
 mbu ndu ono, o jeru l'uzo  
 enyanwu-ahata; jee l'uzo enyanwu-ariba;  
 jee l'uzo isheli; jee l'uzo  
 ohuda je erukobe ono.
- 4 O nweru ndu ophu bu  
 l'echi-egu be epe tsoru l'aghaphe;  
 mbu l'ali, daburu  
 swanmangu, e ta dudu iphe no iya nu.  
 Ophu epe amadu uzo,  
 epe e-shi jerua mkpukpu, epe e-buru.
- 5 Egu guru epe; mini agua epe.  
 Epe anodu l'eke ono  
 leswee enya le ndzu.
- 6 To du iya bu; epe araku

- Ojejoje teke ono, ẹphe nọ l'iphe-ẹhuka ono;  
 yọ bya anafuta ẹphe.
- 7 Yọ bya edua ẹphe shia ọzo,  
 vudo nhamunha;  
 durua ẹphe mkpukpu ẹke, ẹphe e-buru.
- 8 T'ẹphe kele Ojejoje ekele  
 l'o yenukaru ẹphe obu;  
 mẹ kẹ l'oonoduje emeru  
 unwu eliphe iphe dụ biribiri;
- 9 kẹ l'onye mini agụ;  
 bẹ ọonuje mini t'ọ ngua.  
 Yo gude iphe dụ mma  
 nụ-jia onye, ẹgu agụ ẹpho.
- 10 O nweru ndu ọphu shi nọdu  
 l'ẹke gbaru ọchi; ọzo echishihu ẹphe:  
 buru ndu, nọ lẹ mkpọro;  
 l'ẹje iphe-ẹhuka l'ẹke e gude  
 mkpa kee ẹphe ẹgbu.
- 11 Ishi iya aburu l'ẹphe kwefuru ikè;  
 jịka ome okfu Nchileke.  
 Ẹphe eworu ẹgiri idzu,  
 Ọkaribe-Kakọta-Nụ chiru ẹphe fua l'alị.
- 12 Tọ dụ iya bụ;  
 yọ paru ẹphe haa;  
 ẹphe ejelahaazi ozi mkponwehu.  
 Ẹphe ejee ya jeye;  
 ẹphe ebehuje ebehu daa.  
 Tọ dụ onye, gbaru ẹphe mkpu.
- 13 Tọ dụ iya bụ; ẹphe araku  
 Ojejoje teke ono, ẹphe nọ l'iphe-ẹhuka ono.  
 Yọ bya anafuta ẹphe.
- 14 Yọ bya edufuta ẹphe l'ẹke ono,  
 agba ọchi, ọzo chishihuru ẹphe ono;

- bya agbabushia mkpa ono,  
e shi gude kee ephe egbu ono.
- 15 T'ephe kele Ojejoje ekele  
l'o yenukaru ephe obu;  
me ke l'oonoduje emeru  
ndiphe iphe du biribiri;
- 16 ke l'onyakashije  
ogu-nggamgbo, a kparu l'igwe;  
bya egbubushia  
mgboro-igwe,  
e gude gbachishia uzo.
- 17 O nweru ndu ophu wataru ome eswe.  
Mkpata iya aburu l'ephe  
kwefuru Nchileke ikè.  
E menwuwa ephe ehuru;  
okfu l'ephe meru iphe du eji.
- 18 Yo kpo ephe nri;  
k'ophu bu l'o phoduwaru-a  
nwinyi-nvo; me ephe anwushihu.
- 19 To du iya bu; ephe araku  
Ojejoje teke ono, ephe no l'iphe-ehuka ono.  
Yo bya anafuta ephe.
- 20 Yo buru okfu b'o kfu  
nwenkinyi;  
ehu akokota ephe mma;  
shi ege ono dobe ephe ndzu.
- 21 T'ephe kele Ojejoje ekele  
l'o yenukaru ephe obu;  
me ke l'oonoduje emeru  
unwu eliphe iphe du biribiri;
- 22 T'ephe gwoo ngweja-ekere nu iya.  
Ephe agwa egvu ekele  
gude mee t'a maru ege iphe oome habe.

- 23 O nweru ndu ophu gude  
 ugbo-mini tsoru  
 eze enyimu; l'agba ngho.
- 24 Ndu onanu phuru ozi, Ojejoje jeru;  
 ephe phuru ozi, du biribiri,  
 o jeru l'echi ebo mini;
- 25 ke l'o bu-a okfu b'o kfu l'onu;  
 oke pherephere awata ephephe.  
 Yo shi ege ono mee;  
 oke eyii awata atutu.
- 26 Ugbo-mini ephe ephelihuje  
 oreke-imeli;  
 yo bya bya atsua otsu l'echi ebo.  
 Oke iphe-ehuka ono,  
 ephe eje ono emee;  
 obu azashihukota ephe.
- 27 Ephe angalahaa anganga;  
 l'akpo garigari l'o bu ndu me guderu.  
 Mmamiphe ephe l'o ha  
 aburu ephe o-la-l'iyi.
- 28 Ya ndono; ephe araku  
 Ojejoje teke ono, ephe no  
 l'iphe-ehuka ono;  
 yo bya anafuta ephe.
- 29 O meru oke eyii mini ono; yo dazita.  
 Yo bya abaaruu oke pherephere mba;  
 yo daa shikongu.
- 30 Ehu atsolahaa ephe ena l'o dazitaru ono.  
 Yo dua ephe jeye ephe  
 ejerua odu ugbo-mini l'eke ephe eje.
- 31 T'ephe kele Ojejoje ekele  
 l'o yenukaru ephe obu;  
 me ke l'onoduje emeruu

- ụnwu eliphe iphe ụ biribiri;  
 32 T'ẹphe kutsee ya ekutsee l'edzudzu ọha.  
 Ẹphe etua ya ẹpha l'ẹke  
 ndu ụ ọgurenya ọru.
- 33 Ẹnyimu b'o meru;  
 yọ ghoọ echi-ẹgu;  
 bya emee nggele;  
 yọ ụru alị, ọkponku.
- 34 O meru alị, ụ alị-ọtsu;  
 yọ ụru kpakiri kpakiri  
 alị-únú;  
 kele ndu shi buru iya nụ  
 menukaru ẹjo iphe.
- 35 Echi-ẹgu b'o meru;  
 yọ ụru okpuru, mini jiru ejiji;  
 bya emee alị ọkponku;  
 yọ ghoọ ishi nggele.
- 36 Yọ ụru ẹke ụ ẹge ono;  
 b'o dutaru ndu ẹgu agu  
 je edobe t'ẹphe buru.  
 Ẹphe anọdu l'ẹke ono;  
 ụru mkpukpu nk'ẹphe.
- 37 Ẹphe abya akọo okfu;  
 bya akushia akpuru vayinu l'ẹke ono;  
 yọ mịa iphe ụ egvu.
- 38 O gọru ẹphe ọnu-ọma;  
 ẹphe abya azua zụ-jia ẹgu;  
 ọphu o kwedu tẹ elu ẹphe laa alị.
- 39 Olee e mekocharu;  
 Ojejoje egude mkpamehu;  
 mẹ iphe-ẹhuka yẹle aphụ lọ-zita ẹphe.  
 Ẹphe awata ọla alị.
- 40 Onye ono, ewodaje ndu

- a maru ẹpha ẹphe alì ono;  
 emee ẹphe;  
 ẹphe aghaphelaha l'alì,  
 daburu swanmangu,  
 ẹ ta dudu ọzo, nọ iya nù.
- 41 Obekwanu lẹ ndu ẹ-ta dudu  
 ẹge ọ haru ẹphe;  
 b'ọ setaru l'ẹka;  
 sefuta l'iphe-ẹhuka, ẹphe eje.  
 Yọ bya emee; ndibe ẹphe;  
 ẹphe azushilaha l'ọ bụ aturu.
- 42 Ndu obu ẹphe gụru iphoro abuje;  
 ẹphe -phụa iphe ono;  
 ẹphe etee ẹswa.  
 Obenu lẹ ndu eme iphe ẹ-te  
 vudodu nhamunha abuje;  
 ẹphe -phụa ya; yọ kpọọ ẹphe okfu.
- 43 Tẹ ndu maru iphe wokwaru  
 iphe-a kwakọbe l'ime obu ẹphe.  
 Ẹphe arije k'ẹge n-yemobu  
 Ojejoje hatabe nshinu!

## 108

Egvu-ọma, Dévidi deru

- 1 Nggube Nchileke;  
 obu shihukwaru mu ike;  
 k'ọphu bụ lẹ mu e-gude  
 obu mu l'ọ ha gụa egvu; kuaru ngu nkwa.
- 2 Unu tehu mụru ẹnya;  
 unube ogumogu; mẹ ọbo;  
 kẹle mbẹdua e-gudekwa  
 egvu gụ-tee nchi-abọhu lẹ mgbenya.
- 3 Mu a-nọdu l'ifu iphe bụ

- mbakeshi jaa ngu ajaja; nggube Ojejoje.  
 Mu anodukwaphu  
 l'edzudzu oha guaru ngu egvu;  
 4 kele n-yemobu ngu ha nshinu.  
 O tuko imigwe l'ọ ha kakota l'eli.  
 Abubu, i bu o-me-g'o-kfuru  
 atuko akpamigwe dzuru.
- 5 Koshinu ndiphe ege i hatebe nshinu;  
 mbu l'i no-ghataru  
 akpamigwe anoghata;  
 te ndiphe mgburumgburu  
 phu ege i du-be biribiri.
- 6 Gudenu agburu-ehu ngu  
 dzofuta ayi.  
 Nngu aza ayi oku;  
 k'ophu ee-shi ege ono dzoo ndu i yeru obu.
- 7 Nchileke nowa l'ulo iya,  
 du nsọ kfu okfu; su:  
 "Le ya a-tu okokooko  
 gude kee ali ndu Shékemu;  
 bya ewota nsuda Súkotu washia.
- 8 Giledu bu nk'iya;  
 Manase aburu nk'iya  
 Ifuremu bu okpu, ya kpu l'ishi.  
 Juda aburu mgboro-eze,  
 ya apaje l'eka.
- 9 Móabu bu efere, ya akwoje okpa;  
 Edomu aburu eke ya  
 eyeshije akpokpa iya dobe.  
 Ndu Filisutiya;  
 be ya a-turu okokooko kpua."
- 10 ?Bu onye e-duru mu



- je edobe ẹ mkpụkpu ono,  
 a kpuru kpụshia ya ike ono?  
 ?Bụ onye e-duru mu duba ẹ Édọmu?
- 11 Ọ kwa nggube Nchileke ọ onye ọbu.  
 Obenu l'ị jikawaru ayi.  
 Ọphu iitsojehedu ndu soja ayi l'eje ọgu.
- 12 Yenuru ayi ẹka; t'ayi  
 mekputa ndu ọhogu ayi;  
 ke l'ẹka ọphu ndiphe  
 eyetaru madzu kwa iphe mmanu b'ọ bu.
- 13 Obenu ẹ Nchileke -nođuwa  
 l'ẹke iya nk'ayi;  
 be ayi e-mekputa-a ndu ọhogu ayi.  
 Yo dzoo ndu ọhogu ayi ono pyakapyaka.

## 109

Egvu-ọ ma, Dévidi deru nu onye ishi egvu

- 1 Nggube Nchileke,  
 bu onye mu anọduje aja ajaja;  
 byiko; ba adahukwa mu nkichi;
- 2 kele ndu akirishi;  
 me ndu ẹregede gbabewaru mu ejo okfu;  
 l'atu ntumatu ekpu mu.
- 3 ẹphe gudewa okfu ndumashi  
 gbaa mu mgburumgburu.  
 ẹphe abya etso mu okfu;  
 l'ẹ b'ọ du iphe mu meru ẹphe.
- 4 Teke mu mekoshiru ẹphe l'ọ  
 bu ndu ọnyà mu;  
 ẹphebedua ebolaha mu ibo.  
 Obenu ẹ mbedua bu  
 onye anọduje ekfu anu  
 Nchileke; l'ekfushi iya ike.

- 5 Ẹphe egudeje ejo iphe  
 kfuà mu ụgwo iphe-ọma, mu meru ẹphe.  
 Mbèdua wotaru ẹphe l'ọ bụ ndu ònyà mu.  
 Ẹphebedua egude ashị,  
 ẹphe kpọru mu l'akfụ mu ụgwo iya.
- 6 Yenu ẹjo madzụ t'ọ je ekechia ya ụzo.  
 Zinua onye a-nọdu agba iya  
 ire t'ọ je evudo iya l'ifu gbaa ya ekebe.
- 7 Teke e kperu iya ikpe;  
 t'ọ nmakwa iya.  
 Tẹ Nchileke gụkwaru ekfukfu,  
 ookfu anụ iya ye l'iphe dụ ẹji, o meru.
- 8 Tẹ ndzụ iya gbakwaa kwoo.  
 T'onye ọdo nọ-chikwaa  
 ẹnya iya l'ọje ozi, o shi eje.\*
- 9 T'ọ tọkwaa ụnwu iya ogbe;  
 haa nyee ya l'ulo-maa.
- 10 T'ụnwegirima iya  
 kwakwaa l'esu-uzo;  
 l'arọ arọ.  
 T'a chifukwa ẹphe  
 l'ọkpụ-ufu ẹke ẹphe bu!
- 11 Tẹ ndu o ji ụgwo byakwa  
 bya egwoo iphe o nweru l'ọ ha.  
 Tẹ ndu ẹ ta madu ẹke  
 ẹphe shi tükokwa akanya,  
 ọ seru esese gwota.
- 12 T'ẹ b'ọ dükwa onye  
 e-meru iya iphe-ọma.  
 Ọphu ọ dükwa onye  
 a-phuru ụnwegirima,  
 ọ tọru ogbe imiko.

---

\* **109:8** 109:8 Ndu 1:20.

- 13 T'awa iya chihukwa.  
T'ephe bukwaru ndu,  
a zaharu azaha l'ogbo ophu abya nu.
- 14 Te Ojejoje ba azahakwa  
ejo iphe, nna iya oche phe meshiru.  
Ophu o fufukwa iphe du eji,  
nne iya meru efufu le phuu.
- 15 T'ejo iphe, ephe meshiru  
nodukwa Ojejoje l'ifu tekenteke;  
k'ophu oo-me t'ephe chihu  
le mgboko; t'e ba  
anyatahe ephe anyata ophu;
- 16 ke l'e to rijedu ke  
t'o meeru madzu iphe-oma.  
Iphe ooshibejechia ite iya  
bu ege oo-me t'e wofu ndu ukpa;  
ndu e-ta dudu ege o haru ephe;  
me ndu obu tofuru atofu.
- 17 Keshinu iphe aduje iya mma  
bu oburu madzu onu;  
te yebedua bukwaru onye a turu onu.  
Keshinu ogoru madzu onu aduje iya eji;  
t'e b'o dukwa onye a-goru iya onu.
- 18 Keshinu o bu ege oye uwe  
du iya ntse bu ege oburu madzu onu du iya;  
te mburonu ono tsokwaru  
iya phu l'o bu mini tsoba iya l'epho;  
mbu tsoo l'o bu manu tsoba iya l'okpu.
- 19 T'a phukpukwaa ya eya l'o  
bu onye a phukpuru ukpo.  
E kee ya eya l'o bu onye  
e keru akpo l'ukfu jeye le gbururu.
- 20 T'iphe ono, mu gushiru ono

bụkwaru ụgwọ,  
 Ojejoje a-kfụ ndu ono,  
 anọduje ebo mu ibo ono;  
 mbụ ndu ono, anọduje  
 ekfuru mu ẹjo-okfụ ono.

- 21 Obenu nggube Ojejoje,  
 bụ Nnajiufu mu;  
 gudenu k'okfụ ẹpha ngu meeru mu ọhuma.  
 Gudenu kẹ n-yemobu ngu ono,  
 dụnukaru mma ono nafuta mu;
- 22 kẹle mu bụ onye ụkpa;  
 bya aburu onye ẹ ta dudu ẹge ọ haru mu.  
 E mewaru mu iphe ruru mu lẹ meji.
- 23 Mu nọkwa inyoki-inyoki  
 l'ọ bụ nwonyonyo urenyashi;  
 a nmakofuwaru mu l'ọ bụ  
 onye anmakofu igube.
- 24 Ikpere mu ta dūhedu ọphu  
 shihuru ike l'ẹke ẹgu eme mu.  
 Mu lawaru ẹhu bụwarua ọkpu.
- 25 Nta-a bẹ ndu ebo mu ibo;  
 nọ l'ezi mu okfụ.  
 Ẹphe -phụa mu;  
 ẹphe ekwe l'ishi;  
 sụ mu họo.
- 26 Yenuru mu ẹka nggube  
 Ojejoje, bụ Nchileke mu.  
 Gudenu kẹ n-yemobu ngu;  
 dzọo mu.
- 27 Menua t'ẹphe maru  
 l'ọo nggu b'o shi l'ẹka;  
 mbụ t'ẹphe maru l'ọo nggube Ojejoje;  
 bẹ meru iya nụ l'onwongu.

- 28 Ẹphe a-nọdukwaru eburu mu ọnu;  
 obenu lẹ nggubedua a-nọdu agọru mu ọnu.  
 Ẹphe -tso mu ọgu;  
 bẹ ee-mee ẹphe iphe-iphere.  
 Obenu lẹ mube nwozi ngu  
 buplephu ẹswa bẹ mu a-nọdu ete.
- 29 Ndu anọduje ebo mu ibo;  
 bẹ ee-ye iphere l'ọ bụ onye yeru uwe.  
 A phukpua ẹphe iphere  
 l'ọ bụ onye a phukpuru ukpo.
- 30 Mu e-gude ọnu mu kutsee  
 Ojejoje ọkpobe ekutse;  
 mbụ nọdu l'edzudzu ọha jaa ya ajaja;
- 31 kẹ l'oovudoje onye ẹ-ta dudu  
 ẹge ọ haru iya l'azu;†  
 dzọọ ya l'ẹka ndu ekpe iya nkfugbu.

## 110

Egvu-ọma, Dévidi deru

- 1 Nchileke sọru Nnajiufu mu:  
 “Nọdu iya l'ẹka-utara;  
 jeye teke ya e-me ndu ọhogu ngu  
 t'ẹphe bụru iphe  
 ii-dzọpyabe l'ọkpa.”\*
- 2 Ojejoje a-nọ lẹ Záyọnu;  
 nụ ngu mgboro,  
 ekoshi ẹge ike ngu habe nshinu.  
 Ọo-sụ ngu: “T'ị bụru Eze

† **109:31** 109:31 Iphe a kwata dee l'ẹke-a bụ l'oovudoje onye ẹ-ta dudu ẹge ọ haru iya l'ẹka-utara. \* **110:1** 110:1 Mát 22:44; 26:64; Mak 12:36; 14:63; 16:19; Luk 20:42-43; 22:69; Ndu 2:34; 1 Kọr 15:25; Éfe 1:20; Kọl 3:1; Híb 1:3, 13; 10:12-13; 12:2.

- chịa ndu ọhogu ngu!”
- <sup>3</sup> Ndu soja ngu; bẹ ọo-nọdu  
ehe uhere oje ọgu teke ọgu daru.  
Ọ bụ ẹge iji nchi-abọhu  
anọduje ada;  
bụ ẹge ụnwu-okorọbya ngu  
a-wụ-kfuta ngu l'ugvu ono, dụ nsọ ono.
- <sup>4</sup> Ojejoje ribuwaru iya;  
ọphu ọogba-nwehedu iphe o kfuru.  
Ọ suru: “L'ii-buru onye  
achijeru Nchileke ẹja jeye ẹ tutu yoyo  
ẹge Melikizedeku bụ iya.”†
- <sup>5</sup> Nnajiufu nọ nggube Ojejoje l'ẹka-utara.  
Ndu eze bẹ oo-gwe  
rakaraka mbọku,  
iphe e-ghu iya eghughu.
- <sup>6</sup> Oo-kpe iphe bụ mbakeshi ikpe;  
kua odzu madzụ l'ikpo;  
bya achiko ndu achi  
mgboko l'ephe ha gwee ogwe ujimu.
- <sup>7</sup> Ọ bụ ẹ nggele,  
nọ l'iku esu-uzo;  
bẹ ọo-ngụ mini;  
shi iya;  
mee ya t'ọ palia ishi.

## 111

- <sup>1</sup> T'ajaja buru kẹ Ojejoje.  
Mu e-gude obu mu l'ọ ha kutsee Ojejoje.  
Mu e-kutse iya l'ẹke ndu  
obu guru iphoro nọ;

† **110:4** 110:4 Hіб 5:6, 10; 6:20; 7:11, 15, 21.

- kutsee ya l'ẹke ẹphe nọ ndzukoru.
- <sup>2</sup> Iphe bụ iphe Ojejoje eme;  
     bẹ paru apaa.  
     Iphe bụ ndu ọ dū mma  
     anọduje ari iya ari.
- <sup>3</sup> Iphe bụ iphe Ojejoje eme;  
     bẹ dū egvu; dū biribiri.  
     Odobe-ẹka-ndoo nk'iya  
     anoje jeye lẹ tutu yoyo.
- <sup>4</sup> O mewaru t'a nyata iphe dū biribiri, oome.  
     Ojejoje emejeru madzū  
     eze-iphe-oma; l'aphuru madzū imiko.
- <sup>5</sup> Ndu atsū iya egvu;  
     bẹ ọonoduje anū nri.  
     Ọgba-ndzū iya;  
     bẹ ọonyataje jeye lẹ tutu yoyo.
- <sup>6</sup> O koshiwaru ndibe iya ẹge ike iya habe;  
     kẹ l'ọ nataru ndu ọhodo  
     alị ẹphe woru nū ẹphe.
- <sup>7</sup> Iphe bụ iphe o gude ẹka iya  
     eme bụ ire-lanū;  
     buru iphe vudo nhamunha.  
     Ekemu iya l'ọ ha te nwejedu ntupo.
- <sup>8</sup> Ekemu ono a-nọ gbururu jeye lẹ gbururu.  
     E gude obu, gūru iphoro;  
     mẹe ire-lanū l'etso iya.
- <sup>9</sup> Ndu nk'iya b'ọ gbafutaru;  
     bya atūa ekemu;  
     sū tẹ ọgba-ndzū iya buru ojejoje.  
     Epha iya dū nsọ; dū egvu.
- <sup>10</sup> Ọ kwa ọtsu Ojejoje egvu;  
     bū ẹke mmamiphe adubeje.  
     Iphe bụ ndu etso ekemu iya;

bẹ iphe edoje ẹnya.  
T'e tua ya ẹpha jeye ẹ gbururu.

## 112

- 1 T'ajaja buri ẹ Ojejoje.  
Onu-oma bu k'onye  
atsu Ojejoje egvu;  
onye ekemu iya anoduje atso ẹna nshinu.
- 2 Unwu iya a-buru ndu ike du l'ali ono.  
Onu-oma bu k'unwegirima  
ndu obu guru iphoro.
- 3 Iphe-enweru; me ẹku a-buru nk'iya;  
odobe-eka-ndoo nk'iya aburu ojejoje.
- 4 Jeyekpo l'ẹke ochi gbaru;  
bẹ iphoro a-hataje l'o bu ẹnyanwu  
l'ehu onye obu iya guru iphoro;  
mbu onye emeje  
eze-iphe-oma;  
l'aphuru madzu obu-imiko;  
bukwaruphu onye doberu  
eka ndoo l'ifu Nchileke.
- 5 O bulephu k'oma a-nodu etso onye  
bu o-me-l'uko, ejeje madzu ugwo;  
swee ya ẹnya; mbu onye  
iphe bu iphe oome;  
bẹ oomeje; k'ophu aa-haru iya enge.
- 6 Onye ono te nwekwa l'o daa.  
Onye doberu ẹka ndoo;  
bẹ aa-nodujelephu anya jeye ẹ gbururu.
- 7 E -zia ya ẹjo nzi;  
b'ẹ t'o gbe atsudu egvu.  
Obu eshihuje iya ike;  
ẹ l'onye o dakoberu bu Ojejoje.



- 8 Obu eshihuje iya ike;  
 ọphu ọ tsudu egvu;  
 jeye teke oo-gude ẹnya iya  
 phụ l'e mekputawaru ndu ọhogu iya.
- 9 Ọojáje ẹka ajájá nụ ndu ẹ-ta  
 dudu ẹge ọ haru ẹphe iphe.  
 Odobe-ẹka-ndoo nk'iya  
 a-nọ je asuru asuru.  
 Ee-me t'o nweru ike; nweru ugву.
- 10 Ejo madzụ -phụa ya;  
 ẹhu awata iya oghu eghughu.  
 Yo gude iphe-eghughu;  
 taa ikirize; laa ẹhu; wufu.  
 Iphe agụ iya nụ; ta byakwa bya eru iya ẹka.

## 113

- 1 T'ajaja buru kẹ Ojejoje.  
 Unubẹ ndu ejeru Ojejoje ozi;  
 unu jaa Ojejoje ajaja.
- 2 T'a jaa Ojejoje ajaja;  
 tsube nta-a jeye lẹ tutu yoyo.
- 3 T'a jaa Ojejoje ajaja;  
 tsube l'ẹke ẹnyanwu ahatajẹ  
 jeye l'ẹke ọdaje.
- 4 E woliru Ojejoje;  
 yọ kakọta iphe bụ mbakeshi;  
 ọdu-biribiri iya  
 anọ-ngokota imigwe l'ọ ha.
- 5 ?Bụ onye bẹ aatụ eyeru  
 Ojejoje, bụ Nchileke ayi;  
 mbụ onye nọ l'aba-eze iya l'imigwe:
- 6 mbụ onye ẹnya eruje alị;  
 t'ọ phụ iphe eme l'igwe;

- mẹ ọpһu eme lẹ mgboko?  
 7 Ọokwo-lije onye ụkpa  
 l'ẹke ọ gwọru l'ẹja;  
 palia onye ẹ ta dudu ẹge  
 ọ haru iya l'ikpọzu ẹke ọ daburu.  
 8 Yọ bya eworu ẹphe dobe;  
 ẹphe le ndu oke amadu  
 abya aha ẹnya-nhamunha;  
 mbu ndu ishi ndu ali iya.  
 9 Nwanyi, e-ta atsudu ime;  
 be ọokwabeje ugvu l'ufu nji iya;  
 mee ya; yọ buru nwanyi,  
 ẹhu du agu, mụshiru unwu l'igwe.  
 T'ajaja buru ke Ojejoje.

## 114

- 1 Teke ndu Ízurelu shi lẹ Íjiputu lufuta;  
 mbu teke ono, ndu eri Jékọpu  
 shi l'ali ndu ọha-ntsu lufuta ono;  
 2 be ndu Júda byaru bya aburu  
 ndu, duru Nchileke lẹ nsọ.  
 Ndu Ízurelu abya aburu  
 ndu o nwe enwenwe.  
 3 Oke ẹnyimu phuru iya;  
 ye ọkpa l'ọso;  
 Ẹnyimu Jódanu aghachia lashia azu.  
 4 Eze ugvu akfutsua  
 kitimukitimu l'ọ bu ebyila.  
 Ugvu ke nshii l'akfutsua  
 kitikiti l'ọ bu nwaturu.  
 5 Nggube oke ẹnyimu;  
 ?i gbaru ngunu.  
 Nggube Jódanu;

- ?bụ ole bụ k'ọla azụ.  
 6 Unube oke ugvu;  
   ?bụ ngunu meru iphe  
   unu akfutsua l'ọ bụ ebyila.  
   Unube ugvu nshii;  
   ?buhunu ole;  
   bẹ unu akfutsua l'ọ bụ nwaturu.  
 7 Nmakwaa jijiji l'ifu Nnajiufu;  
   nggube eliphe;  
   mbụ l'ifu Nchileke kẹ Jékọpu,  
 8 bụ onye adazeje mkpuma;  
   yọ buru okpuru;  
   bya eworu alì-ekfu mee;  
   yọ buru ogba-mini.

## 115

- 1 Ẹ tọ bụkwa ayi;  
   bẹ aa-kwabe ugvu,  
   gbaru nggube Ojejoje.  
   Ẹ tọ bụkwa ayi.  
   Ọ kwa nggubedua nwẹnkinyi;  
   bẹ gbaru t'a kwabeje ngu ugvu.  
   Ono kẹ l'i yenukaru ayi obu;  
   bya aburu o-me-g'o-kfuru.  
 2 ?Bụ ngunu meru iphe ndu  
   ọhodo aji; sụ:  
   “?Nanụ Nchileke ayi?”  
 3 Nchileke ayi nọnu l'imigwe.  
   Yọ buru iphe dụ iya mma;  
   bẹ oomeje.  
 4 Obenu l'agwa ephe bụ  
   mkpọla-ọcha yẹle  
   mkpọla-ododo;

- mbu iphe, bu madzu  
gude eka mee ya.
- <sup>5</sup> Epe nweru onu;  
epe te ekfu okfu;  
nweru enya;  
epe ta aphu uzo.
- <sup>6</sup> Epe nweru nchi;  
epe ta anu iya iphe;  
nweru imi; epe te egude  
iya l'akpo egburu iphe.
- <sup>7</sup> Epe nweru eka;  
epe egude iya ewota iphe;  
nweru okpa; epe te eje ije;  
epe te ekfu okfu.
- <sup>8</sup> Ndu agwa iya nu;  
me ndu dakoberu iya nu  
a-du ege agwa ono du.
- <sup>9</sup> Unube ndibe Izurelu;  
unu dakobe Ojejoje;  
ke l'o bu iya eyejeru  
unu eka bya aburu iya  
egbochitaje unu.
- <sup>10</sup> Unube ndibe Eronu;  
unu dakobe Ojejoje;  
ke l'o bu iya eyejeru  
unu eka bya aburu iya  
egbochitaje unu.
- <sup>11</sup> Unube ndu atsụ Ojejoje egvu;  
unu dakobe Ojejoje;  
ke l'o bu iya eyejeru  
unu eka bya aburu iya  
egbochitaje unu.
- <sup>12</sup> Ojejoje anyataje ayi;

ọo-gọru ayi ọnu-ọma.  
 Ọo-gọru ọnu-ọma nù  
 ndu ọnu-ọlo Ízurelu;  
 gọru ọnu-ọma nù ndu  
 ọnu-ọlo Éronu.

13 Ọo-gọru ọnu-ọma nù  
 ndu atsù Ojejoje egvu;  
 ndu ukfu; lẹ ndu n̄t̄à.

14 Tẹ Ojejoje mekwaa t'unu  
 jáá ájaja ka l'igwe;  
 unubẹdua l'onwunu;  
 mẹ l'unwegirima unu.

15 Tẹ Ojejoje gọkwaaru  
 unu ọnu; mbù onye ono,  
 bụ iya meru igwe;  
 mee mgboko ono.

16 Imigwe l'o ha bụkota  
 kẹ Ojejoje.  
 Obenu lẹ mgboko b'o  
 wowaru nù madzù.

17 Ẹ tọ bụkwa ndu  
 nwùhuru anwùhu ajajẹ Ojejoje ajaja;  
 mbù ndu lawaru alì ono,  
 bụ e -rua ya; a daa ashì ono.

18 Ọ kwa ayibedua a-nọdu  
 ekutse Ojejoje.  
 Ayi a-nọdu ekutse iya  
 nta-a;  
 kutsewa iya rù jeyewaru.  
 T'ajaja bụru kẹ Ojejoje.

## 116

<sup>1</sup> Mu yeru Ojejoje obu;

ke l'ọ nụwaru olu mu.  
 Ọ nuru mkpu, mu chikuru iya;  
 sụ t'o meeru mu  
 eze-iphe-ọma.

<sup>2</sup> Keshinu ọ ngabere mu nchi;  
 be mu a-ndujelephu  
 akpo-ku iya jeye ege mu  
 a-nd-bebe.

<sup>3</sup> Anwuhu shiwa ye mu eri l'ekpiri.  
 Ekpa-oyi ali-maa  
 eshiwa anwu mu ehu kpaa.  
 Iphe-ehuka; me aphu  
 shiwa nd-pee mu  
 mgburumburu.

<sup>4</sup> To du iya bu; mu bya  
 araku Ojejoje; su iya:  
 "Nngube Ojejoje; dzonua mu!"

<sup>5</sup> Ojejoje bu onye emeje  
 eze-iphe-ọma;  
 buru onye doberu eka ndoo.  
 Nchileke ayi bukwa  
 onye aphuje imiko.

<sup>6</sup> Ndu e te nwedu ege  
 ephe maru iya bukwa  
 Ojejoje anduje eleta ephe enya.  
 Teke mu shi ndu  
 l'oke mkpa bu iya dzofutaru mu.

<sup>7</sup> Te obu runua mu ali;  
 kele Ojejoje eletakpoo mu enya.

<sup>8</sup> Nngube Ojejoje nafutawaru  
 mu l'eka anwuhu.  
 I fuchawaru mu enya-mini;  
 bya egbochita mu

- te mu ba akpakota iphe daa;  
 9 k'ophu mu a-nodu ejephe  
 ege du mu mma l'ifu  
 Ojejoje l'alì ndu, no ndzu.
- 10 Mu wolekwarua onwomu  
 ye Nchileke l'eka;  
 jeyekpo me teke mu  
 suru l'ishi ruakwaru mu ali.
- 11 Mu gude k'iphe byaru mu nu; su:  
 "Le ndiphe mgburumgburu  
 bukota ndu ntuphu-ire."
- 12 ?Nanu ege mu e-shi kfu  
 Ojejoje ugwo iphe,  
 o mekotaru mu l'o ha?
- 13 Mu e-wota ngweja-mee;  
 bya anu Ojejoje;  
 gude kua ya epha  
 ke adzodo, o dzoru mu.
- 14 Iphe, bu iphe mu riburu  
 le mu e-meru Ojejoje;  
 be mu a-nodu l'ifu ndibe iya  
 l'ephe ha meeru iya.
- 15 Ojejoje be anwuhu ndu  
 duru iya nsu erujekwa l'ehu nshinu;
- 16 Nngube Ojejoje;  
 mu bukwa okpobe nwozi ngu.  
 Mu bukwa nwozi ngu;  
 bya aburu nwatibe,  
 nwanyi ono, ejeru ngu ozi ono.  
 I tofuwaru mu l'egbu ono,  
 anwuhu shi kee mu ono.
- 17 Mu e-gworu ngu ngweja-ekele;  
 mu abyakwaphu bya

akpọ-kua ẹpha nggube Ojejoje.

- 18 Iphe, bu iphe mu riburu;  
 ẹ mu e-meru Ojejoje;  
 be mu a-ọdu l'ifu ndibe iya  
 l'ẹphe ha meeru iya.
- 19 Ẹke, mu a-ọdu mee ya;  
 bu l'okpoku eze-ulo Nchileke  
 l'ifu unube ndu Jerúsalemu.  
 T'ajaja buru ke Ojejoje.

## 117

- 1 Unu jaa Ojejoje ajaja;  
 unube mbakeshi.  
 Unu kutsee ya;  
 unube ndiphe l'unu ha;
- 2 ke l'o yeru ayi obu  
 yenuka iya eyenuka.  
 Odo aburu ẹ Ojejoje  
 bu o-me-g'o-kfuru  
 ege o bu iya jeye ẹ tutu yoyo.  
 T'ajaja buru ke Ojejoje.

## 118

- 1 Unu kele Ojejoje ekele  
 l'o bu onye, du mma;  
 kele n-yemobu iya  
 anoje jeye ẹ tutu yoyo.
- 2 Te ndu Ízurelu tuko su:  
 “Le n-yemobu iya anoje jeye ẹ tutu yoyo.”
- 3 Te ndibe Éronu tukokwaphu; su:  
 “Le n-yemobu iya anoje jeye ẹ tutu yoyo.”
- 4 Te ndu atsù Ojejoje egvu sukwaphu:  
 “Le n-yemobu iya anoje jeye ẹ tutu yoyo”



- 5 Teke mu eje iphe-ẹhuka;  
 ẹ mu rakuru Ojejoje.  
 Yọ za mu oku bya emee mu;  
 mu enweru onwomu.
- 6 Ojejoje nọwa swiru mu eswiru;  
 mu te gbe atsudu egvu.  
 ?Bukwanu ngunu;  
 ẹ madzọ mmanu eme mu?
- 7 Ojejoje nọwa swiru mu eswiru;  
 ọo yẹbedua agbajẹru mu mkpu.  
 Mu e-mekochaa gude ẹnya mu;  
 phọ l'e mekputaru ndu mu dọ ashị.
- 8 Ọnodu l'ime Ojejoje domia  
 onwonye kakwa mma;  
 mẹ l'ọda-kobe madzọ.
- 9 Ọnodu l'ime Ojejoje domia  
 onwonye kakwa mma;  
 mẹ l'ọda-kobe ndu ishi.
- 10 Iphe bọ mbakeshi  
 gbaru mu mgburumgburu;  
 ọle mu gude ẹpha Ojejoje  
 mekputakota ẹphe l'ẹphe ha.
- 11 Ẹphe nọ-pheru mu  
 mgburumgburu  
 ẹka ẹbo-ẹbo;  
 ọle mu gude ẹpha  
 Ojejoje mekputakotaru ẹphe l'ẹphe ha.
- 12 Ẹphe ripyaberu mu l'ọ bọ ẹngu;  
 ọle ẹphe meleruphu ẹgwegwa;  
 nwushihu l'ọ bọ ogvu ọkponku,  
 ọku dzọpyashiru.  
 Yọ buru ẹpha Ojejoje;  
 ẹ mu gude mekputakota ẹphe l'ẹphe ha.

- 13 E nwuru mu daphungu;  
nwuphu mu azu;  
mu abya adaa.  
Obenu le Ojejoje yeru mu eka.
- 14 O bu Ojejoje bu ike mu;  
buru onye mu agu-ku l'egvu.  
O bu iya bu onye adzofutaje mu nu.
- 15 Uzu ehu-otso-ena  
yele okokooko,  
ndu mekputaru emekputa atu  
ada l'ufu ndu doberu eka ndoo.  
Ephe tuko ekfu; su:  
"Le agburu-ehu ke Ojejoje;  
meekwaru iphe ha nshinu.
- 16 Ojejoje koshiakwuru agburu-ehu iya.  
Agburu-ehu iya ono  
meekwaru iphe ha nshinu."
- 17 Mu ta anwuhukwa.  
Mu a-nodu chia ndzu  
raa iphe Ojejoje meru mu  
arara t'a nukota iya.
- 18 Ojejoje hwaru mu ahuhu  
hushia mu ike.  
Ole e to kwedu te mu nwuhu.
- 19 Guhuanaru mu onu-oguzo  
eze-ulo Nchileke;  
te mu shi iya bahu  
je etua Ojejoje epha.
- 20 Owaa bu onu-nggamgbo Ojejoje.  
Ono bu eke ndu doberu eka ndoo eshije  
abahu.
- 21 Mu e-kele ngu ekele;  
ke li zaru mu oku.

- Ọ bụwa nggu;  
 bụ onye adzọfutaje mu nụ.
- 22 Mkpuma ono, ndu akpụ ụlo jikaru ono;  
 be mekochaaru bya aburu itso, gude ụlo.
- 23 Ono aburu iphe Ojejoje meru.  
 Ọ dụ ayi biribiri l'anya.
- 24 Ntanụ bụ mbọku,  
 Ojejoje meru.  
 Unu t'ẹhu tsoo ayi ẹna;  
 tẹ ayi tee ẹswa.
- 25 Nggube Ojejoje;  
 dzọfutanu ayi!  
 Nggube Ojejoje;  
 menua t'iphemiphe obule,  
 ayi eme bụru ayi upete.
- 26 Onye a goru onu-oma nụ;  
 b'ọ bụ;  
 mbụ onye ono, gude ẹpha Ojejoje l'abya ono.  
 Ayi nọ l'ulo Ojejoje agoru ngu onu-oma.
- 27 Ọ kwa Ojejoje bụ Nchileke.  
 O meekwaru tẹ iphoro iya nwaru ayi.  
 Unu tụa anụ, unu gude  
 abya ogworu Ojejoje ngweja eri;  
 kputa bya l'iku mpo,  
 a maberu l'anya-ngweja iya.
- 28 Ọ bụ nggu bụ Nchileke mu;  
 mu a-nodu ekele ngu ekele.  
 Ọ bụ nggu bụ Nchileke mu;  
 mu a-nodu ekutse ngu.
- 29 Unu kele Ojejoje ekele  
 l'ọ bụ onye, dụ mma;  
 kele n-yemobu iya anoje jeye lẹ tutu yoyo.

**119**

- 1 Ọnu-ọma bụ ọ́ ndu ẹ́-te  
emejedu iphe aa-ta ẹ́phe ọ́ta;  
ndu etsolephu ekemu, Ojejoje tọ́ru.
- 2 Ọnu-ọma bụ ọ́ ndu  
etso iphe ọ́ tọ́ru l'ekemu;  
bya egude obu ẹ́phe  
l'ọ́ ha achọ́ iya l'achọ́shi iya ike.
- 3 Ndu, dụ́ ẹ́ge ono;  
te eyejedu ẹ́ka l'iphe dụ́ ẹ́ji.  
Ọ́ bụ́lephu ọ́zo, Ojejoje  
tọ́ru bẹ́ ẹ́phe anọ́duje etso.
- 4 Ị́ kawaru ayi iphe ị́ sọ́ru  
t'e meje merua l'ishi.
- 5 Ọ́ dụ́ mu t'asụ́ lẹ́ mu  
evudoshije ike l'ome iphe  
ono, ị́ tọ́ru ekemu; sụ́  
t'e emeje ono;
- 6 k'ọ́phu ẹ́ to nwedu  
iphe-iphere iya bya eme mu;  
kẹ́le mu lezitaru ẹ́nya  
l'iphemiphe ọ́bule ị́ sọ́ru t'e meje.
- 7 Mu e-gude obu, gọ́ru iphoro jaa ngu ajaja;  
keshinu ọ́phu mu amụ́  
ị́kpe ngu ono, vudo  
nhamunha ono amụ́mu.
- 8 Mu a-nọ́du etso iphe  
ị́ tọ́ru ọ́kpa iya sụ́ t'e tsoje.  
Byiko ba agbadokwa mu.
- 9 ?Nanụ́kpoo ẹ́ge nwokorọ́bya  
e-shi mee ndzụ́ iya t'ẹ́ b'o nwe ntụ́po?  
Ọ́ bụ́ l'ome iphe e deru l'okfu ngu.
- 10 Mu gude obu mu l'ọ́ ha achọ́ ngu.

- Be ekwekwa tẹ mu dakaа ekemu ngu.
- 11 Okfu ngu bẹ mu domiwaru l'ime obu mu;  
k'ophu mu te emedu iphe dụ ẹji kpua ngu.
- 12 T'ajaja buru nke ngu nggube Ojejoje.  
Byiko; zinua mu ekemu  
ngu t'o doo mu ẹnya.
- 13 Ekemu ngu l'ọ ha; bẹ mu vukwa l'ishi;  
gude ọnu mu l'asa iya.
- 14 Ẹhu anọduje atso mu ẹna  
teke mu eme iphe ị turu l'ekemu  
ẹge ono, ọotsoje onye  
kparu ẹku nshinu ono.
- 15 Mu atoje nwehu l'ari  
iphe ị suru t'e mee ariri.  
Mu adabekwaphu ẹnya  
l'uzo, ị toru t'e shije.
- 16 Ekemu, ị turu tẹ emeje dụ mu mma;  
ophu 'onwedu lẹ mu azahaa okfu ngu.
- 17 Menuaru mubẹ nwozi ngu iphe dụ mma;  
k'ophu mu e-shi ẹge ono  
nọdu ndzụ meje okfu ngu.
- 18 Menua tẹ ẹnya mu kpuhaa;  
k'ophu mu a-phuje iphe  
dụ biribiri, nọ l'ekemu ngu.
- 19 Mu bukwa onye laru alala lẹ mgboko-a.  
Ba adukwa iphe bu iphe  
ị suru t'e meje ophu  
ii-domiru mu edomi.
- 20 Oogushi mu ẹgu ike  
tẹ mu majeru iphe bu  
ekemu ngu tekenteke.
- 21 Ndu etu onwephe oke ẹpha;  
buru ndu a turu ọnu;

- be ìibajeru mba;  
 mbu ndu ono, ahaje iphe  
 ì sùru t'e meje ono; l'eme iphe odo.
- 22 Menua t'è b'a ajahe mu ewena;  
 l'adzò mu okpa l'ishi;  
 ke l'ò kwa iphe bu iphe,  
 ì turu l'ekemu ngu;  
 be mu anoduje eme.
- 23 A makwaru-a le ndu ishi  
 edzukobeje achiru mu ejo idzu.  
 Obenu l'iphe mube nwozi ngu  
 anoduje ari bu ege mu e-me  
 mee iphe bu iphe ì turu  
 l'ekemu ngu; su t'e meje.
- 24 Onoduje atso mu ena ome  
 iphe ì turu l'ekemu ngu.  
 O bu iya anoduje akpo-ziru  
 mu uzo iphe mu e-me.
- 25 E mewaru mu; ishi erua mu  
 ali okpobe eruru.  
 Gudenu ke okfu ono,  
 shi ngu l'onu ono;  
 mee te ndzu dzua mu.
- 26 Mu wotaru ege uzo mu du dooru ngu;  
 nggu angaberu mu nchi.  
 Zinua mu iphe ì toru okpa iya; su t'e tsoje.
- 27 Menua t'o doo mu enya;  
 mbu ekemu, ì turu t'e meje;  
 k'ophu mu a-to nwehu;  
 ria k'iphe du biribiri, iimeshi.
- 28 Mu guwaru aphu jeye  
 t'o nwehe uvo, no mu nu.  
 Byiko menua t'ike du mu

- ęge ono, i kfuru ono.  
 29 Be ekwekwa tẹ mu ye ọkpa l'ụzo ẹregede.  
 Menuaru mu eze-iphe-ọma;  
 zia mu ekemu ngu.  
 30 Mu hatawaru ome ire-lanụ;  
 wowaru ekemu ngu dobe  
 onwomu l'ọkpoma.  
 31 Iphe mu anọduje eme  
 l'emeshi iya ike bụ iphe  
 nggube Ojejoje turu l'ekemu.  
 Be ekwekwa t'e mee mu iphe-iphere.  
 32 Ụzo, mu a-nọdu etso bụ ụzo  
 k'ome iphe ị sụru t'e meje;  
 kẹ l'ii-me tẹ iphe ka mu odo ọnya.  
 33 Nggube Ojejoje;  
 zinua mu ęge mu e-shije  
 eme iphe ị tọru ọkpa iya; sụ t'e tsoje;  
 k'ọphu mu a-nọdu eme iya jeye l'ikperazu.  
 34 Menua t'iphe dojee mu ọnya;  
 k'ọphu mu ee-dobeje ekemu ngu ono;  
 gude obu mu l'ọ ha l'eme iya ememe.  
 35 Koshi mu ụzo, mu e-shije eme  
 iphe ị sụru t'e meje;  
 kẹ l'ọ bụ iya bụ iphe  
 atsoje mu ọna ememe.  
 36 Swi-zia obu mu;  
 t'ẹ b'ọ gha ifu l'ụzo rita-rita;  
 t'o ghachia ifu l'ome iphe  
 ị turu l'ekemu.  
 37 Mee tẹ mu be eworu ọnya  
 chabẹ l'iphe-mmanu.  
 Gudenu kẹ okfu ono,  
 shi ngu l'ọnu ono;

- mee tẹ ndzụ dzua mu.
- 38 Menuaru mu iphe i kweru  
 ụkwa l'ii-meru mụbe nwozi ngu;  
 k'ọphu aa-wata ngu ọtsu egvu.
- 39 Wofunuru mu iphe-iphere ono,  
 mu atsụ egvu iya ono;  
 kẹ l'ekemu ngu dụ mma.
- 40 Iphe ị sụru t'e meje agụ mu agụgu ememe.  
 Gudenu kẹ odobe-ẹka-ndoo nke ngu;  
 mee tẹ ndzụ dzua mu.
- 41 Koshinu mu n-yemobu ngu nggube Ojejoje.  
 Dzořutanu mu; kẹ l'ọ bụ  
 iphe i kweru ụkwa l'ii-meru mu.
- 42 Ọo ya bụ ẹge mu amaru  
 iphe mu a-saru ndu aja mu ewena;  
 kẹ l'ọ bụ okfu ngu bẹ mu dakoberu.
- 43 Ba anafukwa mu ire-lanụ,  
 nọ mu l'ọnu;  
 kẹ l'ọ bụ l'ekemu ngu;  
 bẹ mu chiru ẹnya dobe.
- 44 Ọ bụ iphe ekemu ngu kfuru;  
 bẹ mu a-nọdu eme jeye lẹ tutu yoyo.
- 45 Mu a-tusakpooru ẹhu;  
 l'eye ẹge ẹhu dụ mu;  
 kẹ l'ọo iphe ị sụru t'e mee;  
 bẹ mu anọduje eme.
- 46 Mu e-vudo l'ifu ndu eze  
 kfu kẹ ekemu ngu;  
 iphere ta adụ mu.
- 47 Iphe aduje mu mma bụ ome  
 iphe ị sụru t'e meje;  
 kẹle mu yeru iya obu.
- 48 Mu achilije ẹka mu ẹbo ẹbo



- nabata ekemu ngu;  
 kẹ l'ọ dọ mu mma nshinu.  
 Mu atoje nwehu l'ari  
 iphe ị sụru t'e mee ariri.
- 49 Nyatakwa iphe i kфuru mube nwozi ngu;  
 kẹ l'i mewaru; mu elelahaa ẹnya iphe.
- 50 Iphe aduje mu ike teke mu  
 eje iphe-ehuka bu ukwa,  
 i kweru mu l'ii-dobe mu ndzu.
- 51 Ndu eku onwephe; anoduje achị mu ochi.  
 Ole ẹ too mejedu mu tẹ mu  
 haa ome iphe ekemu ngu kфuru.
- 52 Nngube Ojejoje; obojuje;  
 mu -nyata ekemu ngu ono,  
 shiru teke ndiche ono;  
 yo mee tẹ obu shihu mu ike.
- 53 Iphe eghuje mu eghughu;  
 olobu bu ndu akirishi akpaje iya;  
 mbu ndu ono, jikaru odobe ekemu ngu ono.
- 54 Iphe ị toru okpa iya; sụ t'e  
 tsoje abujeru ishi egvú mu  
 l'iphe bu ulo, eke mu  
 dobewaru ishi l'ije mu-a.
- 55 L'enyashi; be mu anyataje  
 epha; nngube Ojejoje.  
 Yo mee mu tẹ mu dobe ekemu ngu.
- 56 O buwa ura, raru mu nu;  
 tẹ mu meje iphe ị sụru t'e mee.
- 57 O bu nggu bu okè-iphe mu; nngube Ojejoje.  
 Mu kwewaru ngu ukwa  
 le mu a-nodu eme okfu ngu.
- 58 Mu gudewa obu mu l'ọ ha choo ifu ngu.  
 Menuaru mu eze-iphe-oma,

- bụ iphe i kweru ụkwa iya.
- 59 Mu lewaru ụzo mu ọnya  
l'uswe; lee ya l'ogologo;  
bya eshiwa iya lufuta;  
wata ome iphe ị tūru l'ekemu.
- 60 Mu e-me ẹgwegwa;  
mu ta akpọdu ụkfu ome ekemu ngu.
- 61 Ẹ to nwedu m'o -ruhuru;  
ndu akirishi kee mu ẹgbu;  
mu ta azaha ekemu ngu azaha.
- 62 Ọobuje; o -be l'echi-abali;  
mu egbeshi kele ngu ekele  
k'ekemu ngu ono, vudo nhamunha ono.
- 63 Iphe bụ ndu atsụ ngu egvu;  
bẹ mu l'ephe eshikota ọnya l'ephe ha;  
mbụ ndu ono, tukuru iphe  
ị sūru t'e meje l'ọ ha l'eme ono.
- 64 Mgboko gbaa mgburumgburu;  
bẹ nggube Ojejoje yekotaru obu.  
Byiko; zinua mu iphe ono,  
ị tōru ọkpa iya; sụ t'e tsoje ono.
- 65 Nggube Ojejoje;  
i mewaru mube nwozi ngu iphe-oma,  
bụ iya bụ ẹge ono, i kfuru ono.
- 66 Zinua mu mmamiphe;  
nggu ezia mu ẹge eeshije  
ekpe ikpe nhamunha;  
kele mu kwewaru ome iphe ekemu ngu  
kfuru.
- 67 Tẹmanu nggu alode mu ẹka  
lẹ nchị bẹ mu pūhawaru ụzo.  
Obenu lẹ nta-a; bẹ mu  
kwewaru ome okfu ngu.

- 68 I du mma; l'emejekwaphu iphe du mma.  
Zinua mu ome iphe i toru  
okpa iya; su t'e tsoje.
- 69 A makwaru-a le ndu eku  
onwephe anoduje adzushi  
ejo-ire ekpu mu.  
Obenu le mu gudelephu  
obu mu l'o ha emekota iphe i suru t'e meje.
- 70 Ndu ono be imiko madzu ta adujedu.  
Obenu le mbedua be  
oduje mma ome iphe ekemu ngu kfuru.
- 71 O dukwa mma; mbu aka ono,  
a loru mu le nchi ono;  
k'ophu mu a-muta otso  
iphe i toru okpa iya.
- 72 Ekemu, shi ngu l'onu;  
be mu kakwa ogube iphe  
me l'unubuku mkpola-ocha;  
me mkpola-ododo.
- 73 O bu aka ngu b'i gude kpua mu;  
mee mu ege mu a-gba.  
Menua t'iphe doje mu enya;  
k'ophu mu a-muta iphe bu  
ekemu ngu; meje iya.
- 74 Te ndu atsu ngu egvu  
tekwaaw eswa me ephe phua mu;  
ke l'iphe mu chiru enya  
tukobe bu okfu nke ngu.
- 75 Nngube Ojejoje;  
mu makwaru-a l'ikpe ngu vudo nhamunha.  
I gudewa ke li  
bu o-me-g'o-kfuru loo mu aka le nchi.
- 76 Te n-yemobu ngu bunuru

iphe a-nọduje adu mube nwozi ngu ike;  
keshinu o bu iphe i kweru mu ukwa iya.

- 77 Phunuaru mu imiko;  
k'ophu mu a-nodu ndzu;  
ke l'iphe aduje mu mma bu ekemu nke ngu.
- 78 T'e menuru iphere kpua ndu  
eku onwephe ekuku;  
ke l'ephe mesweru mu;  
le b'odụ iphe mu meru ephe.  
Obenu le mbedua  
anodujelephu l'ari k'ekemu ngu ariri.
- 79 Te ndu atsụ ngu egvu  
byakfutajekwa mu;  
mbu ndu, iphe i turu  
l'ekemu doru enya.
- 80 T'e b'odukwa eke uta  
a-du mu l'ehu le k'ekemu ngu;  
k'ophu e te shidu ege ono  
mee mu iphe-iphere.
- 81 Ike agvụakwa mu l'eke mu  
eche t'i dzofuta mu.  
Obenu l'eke obu mu no bu l'okfu ngu.
- 82 Mu lenyaakwaru enya;  
mu ta amahę iphe mu ele;  
l'eke mu ele enya teke ii-me  
iphe i kweru ukwa iya.
- Mu ajije; su: “?Bu teke ole be  
ii-du mu ike obu?”
- 83 A makwaru-a le mu du l'odụ bu akpo,  
a miberu l'enwuru-oku;  
mbu akpo, eeyeje mee.  
Obenu le mu ta azahajekwa  
iphe i toru okpa iya su t'e tsoje.

- 84 ?Bụ teke ole; bẹ mụbe nwozi  
 ngu a-tabebe nshi?  
 ?Bụ teke ole; bẹ ịi-hù ndu  
 akpa mu ẹhu àhùhù?
- 85 Ndu, eku onwẹphe ekuku  
 egvuje nsụ doberu mu tẹ mu dalahụ;  
 mbụ iphe ono, ị tųru ekemu  
 t'ẹ b'e emejeshi ono.
- 86 Iphe, bụ iphe, ị sųru t'e meje;  
 bẹ dabukwaru adaburu.  
 Yenuru mu ẹka;  
 kẹ lẹ ndu mgboko akpa mu  
 ẹhu l'ẹ b'ọ dų iphe mu meru ẹphe.
- 87 Ọ phọduaru-a nwanshi;  
 mẹ ẹphe emee tẹ mu chihu le mgboko-a.  
 Obenu lẹ mu ta hakwanu  
 ome iphe ị sųru t'e meje.
- 88 Gudenu kẹ n-yemobu ngu;  
 mee tẹ ndzų dzua mu;  
 k'ọphu mu e-meje ekemu ono,  
 i gude ọnu ngu tųa ono.
- 89 Okfu nggube Ojejoje  
 l'a-nọ jeye lẹ tutu yoyo.  
 Ẹ tọ mịngadu amịnga l'imigwe.
- 90 Ịinoduje bųru  
 o-me-g'o-kfuru;  
 tsube l'ọgbo sweru ọgbo.  
 I meru mgboko dobe;  
 yọ dų ẹge i doberu iya.
- 91 Iphe bụ iphe i kfuru l'ọ ha;  
 bẹ dųkota ẹge i kfuru iya jeye ntanų-a;  
 kẹ l'iphemiphe ọbule l'ejeru ngu ozi.
- 92 Ndege ekemu ngu te shiru

- l'ọdungu dụ mu mma;  
 mẹ mu alakwa l'iyi teke ono,  
 mu shi eje iphe-ẹhuka ono.
- 93 Ẹ to nwedu ẹ mu azahaa  
 ome iphe ị sụru t'e meje;  
 ọ ẹ l'ọ bụ iya b'i gude dobe mu ndzụ.
- 94 Dzonua mu; ọ ẹ mu bụ nke ngu;  
 bya akpakọwa iphe ị sụru  
 t'e meje l'ọ ha makọtaru.
- 95 Ndu akirishi kwagebewaru  
 akwagebe t'ẹphe mebyishia mu.  
 Ọle mu a-tuko iphe ị turu  
 l'ekemu kwakọbe l'ime obu mu;  
 l'arị iya arịri.
- 96 Iphe bụ iphe a sụru l'ọ  
 dụ-geru mma;  
 bẹ mu phukwaru l'ọ  
 nwetsuaru ẹke ọ phoduru.  
 Obenu l'ekemu ngu te  
 nwedu ẹke ọ ghoduru iya.
- 97 Ekemu ngu bẹ mu yekwaru obu nshinu.  
 Mu evujeru iya l'obu mkpụrumkpuru.
- 98 Ekemu ngu emeje tẹ mu ka  
 ndu ọhogu mu ọmaru iphe;  
 ọ ẹ l'ooşwijeru mu eswiru mkpụrumkpuru.
- 99 Ẹnya gbe kakwa mu oru l'iphe;  
 ma ẹ ndu ezi mu iphe;  
 ọ ẹ ọ ẹ ekemu ngu anọduje  
 mu l'obu tekenteke.
- 100 Mu ka ndu bụ ọgurennya ọmaru iphe;  
 ọ ẹ mu anọduje eme ekemu ngu.
- 101 Mu wofukotaru ẹka l'iphe bụ iphe dụ ẹji;  
 k'ọphu mu e-meje okfu ngu.

- 102 Mu ta gbadobukwaa  
ekemu ngu; kẹ l'ọ bụ  
nggụbedua l'onwongu  
ziru mu iya.
- 103 Ege okfu atso-bekwanu mu ẹna!  
Ọ kakwa mu manụ-engu otso ẹna.
- 104 Uru, mu eritaje l'ome  
ekemu ngu bụ l'oomeje tẹ mu kwaa ẹnya.  
Oo ya meru iphe ugho dụ  
mu ashị; m'o -ruhuru;  
ọ dụ idagha.
- 105 Okfu ngu bụ urọku, mu gude  
aphụ ẹke mu a-dzo okpa;  
bya aburu iphoro, nọru mu l'uzo.
- 106 Mu riwaru angụ; kpebua ya l'obu mu;  
lẹ mu a-nodu eme iphe ekemu ngu ono,  
vudo nhamunha ono kfu.
- 107 Mu jenukawaru iphe-ehuka.  
Gudenu kẹ okfu ono,  
shi ngu l'onu ono; mee  
tẹ ndzụ dzua mu; nggube Ojejoje.
- 108 Nggube Ojejoje;  
natanu ajaja-wa, mu gude  
obu mu aja ngu-wa.  
Nngu ezikwaa mu phụ ẹge ekemu ngu gbaru.
- 109 A makwaru-a lẹ mu  
achijeru ndzụ mu l'eka tekenteke;  
obenu l'ẹ t'o nwedu lẹ mu  
azahaa ekemu ngu.
- 110 Ndu akirishi gbaaru mu ọnya.  
Obenu lẹ mu te eshibua  
l'ekemu ngu yeswee okpa.
- 111 Ekemu ngu bụ òkè-iphe mu jeye lẹ tutu yoyo.

- Ọ bụ iya emeje tẹ ẹhu atso mu ẹna.
- 112 Iphe mu kpeburu l'obu mu  
bụ tẹ mu meje iphe ekemu ngu kfuru  
jeye teke mu a-nọ-bebe.
- 113 Ẹphe aduje mu ashi;  
mbu ndu, anọduje abọ obu ẹbo.  
Obenu l'ekemu ngu; bẹ mu yekwaru obu.
- 114 Ọ bụ nggu bụ ẹke mu  
edomije onwomu;  
bya aburu ọlo ndzụ mu.  
Ọ bụ l'okfu ngu;  
bẹ ayi chiru ụkfu kwẹe.
- 115 Unu pakwaru mu haa;  
unubẹ ndu iphe dụ ẹji;  
k'ophu mu a-nọdu eme  
ekemu kẹ Nchileke mu.
- 116 Gudeshia mu ike ẹge  
i kweru mu ụkwa iya;  
k'ophu mu a-nọdu ndzụ.  
Be ekwekwa tẹ iphe ono,  
mu ele ẹnya iya ono buru mu kẹ mmanu.
- 117 Gudeshinua mu ike;  
k'ophu aa-dzofuta mu.  
Tekenteke kpọ;  
bẹ mu a-nọdu akwabẹ  
ekemu ngu ono ugvu.
- 118 Ijikaje ndu, haru ekemu ngu;  
wata ome iphe ọdo;  
kẹ l'eregede, ẹphe agba  
te enweduru ẹphe ishi.
- 119 Iphe bụ ndu akirishi,  
nọ lẹ mgboko; bẹ iikpofuje l'ọ bụ ntụ.  
Ọo ya meru iphe mu yeru ẹhu l'ekemu ngu.



- 120 Ẹhu amakọta mu jijiji l'ẹke mu atsù ngu egvu.  
Mu atsùkwaphu ekemu ngu egvu.
- 121 Mu mewaru iphe gbaru nù;  
bùru iphe vudo nhamunha.  
Byiko; ba apakwaru mu  
haaru ndu akpa mu ẹhu.
- 122 Byiko; kwenua nwozi ngu  
ùkwa l'ii-nọdu eleta mu ẹnya.  
Be ekwekwa tẹ ndu eku  
onwẹphe ekeku kpaa mu ẹhu.
- 123 Mu lenyaakwaru ẹnya;  
mu ta amahẹ iphe mu ele;  
l'ẹke mu ele ẹnya t'ì bya adzọfuta mu;  
bù iya bù iphe nggùbe  
onye doberu ẹka ndoo  
kweru mu ùkwa iya.
- 124 Menuru yeru mubẹ nwozi  
ngu l'ẹge n-yemobu ngu dù;  
nggu ezia mu iphe ì tọru  
ọkpa iya sù t'e tsoje.
- 125 Mbẹdua bù nwozi ngu;  
byiko menua t'iphe dojee mu ẹnya;  
k'ọphu iphe ì tọru l'ekemu e-do mu ẹnya.
- 126 Nggùbe Ojejoje;  
ọ gbaakwaru teke ii-me ire;  
kẹ l'ekemu, ì tọru b'ẹ tee tsohekwa.
- 127 Ọ bù okfu lẹ mu yeru ekemu ngu obu  
karia ẹge mu yeru iya  
ọkpobe mkpọla-ododo;
- 128 bùru okfu lẹ mu kwetaru  
l'ekemu ngu ono vudo nhamunha;  
meru iphe iphe bù ụgho dù mu ashì.
- 129 Iphe ì tọru l'ekemu dù biribiri;

- Ọ bụ iya meru iphe mu  
 gude obu mu l'ọ ha  
 l'etso iya l'o ruberu iya.
- 130 Teke a kọwaru iphe okfu  
 ngu bụ b'ọ nuje iphoro;  
 l'emeje tẹ ndu eswe maru iphe.
- 131 Mu ghecharu ọnu l'atụ hēnguhengu;  
 l'ẹke ọogu mu tẹ mu meje  
 iphe ị tūru l'ekemu ngu.
- 132 Lenua ẹnya l'ẹke mu nọ;  
 meeru mu eze-iphe-ọma;  
 bụ iya bụ ẹge iimejeru  
 ndu yeru ngu obu.
- 133 Gude nū okfu ngu duzije mu ụzo;  
 k'ọphu iphe dū ẹji ta  
 abyadū bya aburu eze lẹ ndzū mu.
- 134 Gbafuta mu l'ẹka ndu l'akpa mu ẹhu;  
 k'ọphu mu a-nọdu edobe ekemu ngu.
- 135 Mwaru mube nwozi ngu ọnu-ọchi;  
 nggu ezia mu iphe nọ l'ekemu ngu.
- 136 Ẹnya-mini awushi mu l'ẹnya;  
 kele ndiphe te etsodu ekemu ngu.
- 137 Ị bụ onye doberu ẹka ndoo nggube Ojejoje;  
 ikpe ngu vudo nhamunha.
- 138 Iphe ị tushiru l'ekemu dobe  
 vudokota nhamunha;  
 bukotaru ire-lanū.
- 139 Obu, mu yeru ngu rimiwaru mu ishi;  
 kele ndu ọhogu mu ta  
 gubedu okfu ngu iphe.
- 140 Ụkwa, i kweshiru b'a  
 tọwaru nwehu datakọta.  
 Mube nwozi ngu b'ọ dū mma ntumatu.

- 141 A marua ẹ mu bu iphe-mmanu;  
t'ọ du iphe a guberu mu.  
Obenu ẹ mu ta azahadu  
ome iphe ekemu ngu kfu ru.
- 142 Odobe-ẹka-ndoo nke ngu;  
be a-no jeye ẹ tutu yoyo;  
ekemu ngu aburu ire-lanu.
- 143 Iphe-ẹhuka byawaru mu; aphu abyaru mu.  
Obenu l'ekemu ngu ehele mu-a uhere.
- 144 Iphe i turu l'ekemu dobe;  
be vudo nhamunha jeye ẹ tutu yoyo.  
Menua t'iphe doje mu ẹnya;  
k'ophu mu a-nodu ndzu.
- 145 Mu gude obu mu l'ọ ha  
l'eku ngu; zanu mu oku nggube Ojejoje;  
k'ophu mu a-nodu eme  
iphe i turu l'ekemu.
- 146 O bu nggubedua be mu  
eku; dzonua mu;  
k'ophu mu a-nodu eme iphe i turu l'ekemu.
- 147 Mu egbeshije temanu nchi abohu;  
wata ochi mkpu t'e yeru mu ẹka;  
ẹke ẹnya mu no aburu l'okfu ngu.
- 148 Ẹnya ebuje mu sasarasangu  
ẹnyashi mgburumburu;  
k'ophu mu a-to nwehu  
ria oriri l'ukwa i kweshiru.
- 149 Gudenu ke n-yemobu ngu nua olu mu.  
Gudenu ke ikpe ngu,  
vudo nhamunha;  
mee te ndzu dzua mu; nggube Ojejoje.
- 150 Ndu anoduje achi ejo idzu nokwa ntse.  
Obenu l'ephe te emejedu

- iphe ekemu ngu kfuru.
- 151 Ịnokwa ntse;  
nggụbe Ojejoje;  
ekemu ngu l'ọ ha tųkokwa bųru ire-lanų.
- 152 Teke, tehakpowaru etete;  
bẹ mu shi l'ekemu ngu maru  
l'ị tųru iya dobe tọ nọo jeye lẹ tutu yoyo.
- 153 Lenua ẹnya l'iphe-ẹhuka, mu eje; dzọo mu;  
kẹle mu ta gbadobukwaa ekemu ngu ono.
- 154 Hanuaru mu enge; gbafuta mu;  
Gudenu kẹ ụkwa,  
bụ nggụbedua kweru iya;  
mee tẹ ndzụ dzua mu.
- 155 Ndzofuta nọ ndu akirishi ụzenya;  
kẹ l'ẹphe te esejedu ẹge  
ẹphe e-me maru iphe  
ị tọru ọkpa iya sụ t'e tsoje.
- 156 Obu-imiko nke ngu;  
nggụbe Ojejoje paru apaa.  
Gudenu kẹ ikpe ngu,  
vudo nhamunha; mee tẹ ndzụ dzua mu.
- 157 Ndu, bụ ndu ọhogu mu,  
l'akpa mu ẹhu hakwa l'igwe.  
Ọle ẹ to nwedu ẹge ọo-dụ;  
tẹ mu gbe bya agbado ekemu ngu.
- 158 Ndu ẹ -te gudedu ire ẹphe  
ẹka bẹ agbaruje mu meji  
teke mu phuru ẹphe;  
kẹ l'ẹphe te emejedu iphe okfu ngu kfuru.
- 159 Phụwaru ẹge mu yeberu  
obu l'eme iphe ị tųru l'ekemu.  
Gudenu kẹ n-yemobu ngu;  
mee tẹ ndzụ dzua mu; nggụbe Ojejoje.

- 160 Okfu ngu l'ọ ha bụ  
     ọkpobe okfu;  
     ikpe ngu ono,  
     vudo nhamunha ono aburu ojejoje.
- 161 Ndu ishi anọduje akpa mu ẹhu;  
     l'ẹ b'ọ dụ iphe mu meru ẹphe.  
     Obenu l'okfu ngu anọdje  
     anma mu ẹhu anmanma.
- 162 Okfu ngu emeje t'ẹhu tsọ mu  
     l'ọ bụ onye lұtaru iphe ha nshinu l'ọgu
- 163 Ugho dụ mu ashi;  
     mu akpọ-yijeru iya ukuvu.  
     Obenu l'ọphu bụ ekemu ngu;  
     bẹ mu yekwanuru obu.
- 164 Ugbo ẹsaa l'uboku;  
     bẹ mu ajajẹ ngu ajaja  
     k'ikpe ono, iikpeje nhamunha ono.
- 165 Ndu yeru obu l'ekemu ngu;  
     bẹ ẹhu aduje agu nshinu;  
     t'ọ bụ l'o nweru iphe bya  
     a-buru ọkfu kpọ ẹphe.
- 166 Mu nọ ngaberu nggube Ojejoje  
     t'ị bya adzofuta mu.  
     Ọ bụ iphe bụ ekemu ngu;  
     bẹ mu anọduje etso.
- 167 Mu emeje iphe ị turu l'ekemu;  
     kele mu yeru iya obu yeshia ya ike.
- 168 Mu anọduje eme iphe bụ  
     iphe ị turu l'ekemu;  
     kẹ l'iphemiphe ọbule,  
     mu eme b'ị makotaru.
- 169 Tẹ mkpu, mu echi runua ngu nchi;  
     nggube Ojejoje.

- Menua tẹ iphe doje mu  
 ẹnya, bu iya bu iphe  
 i kweru ukwa iya.
- 170 Byiko tẹ arọro, mu arọ ngu runua ngu nchị.  
 Nafutanu mu ẹge ono,  
 i kweru ukwa iya ono.
- 171 Mu a-nọduje aja ngu ajaja tekenteke;  
 kẹ l'i ziru mu iphe i tọru  
 okpa iya; sù t'e tsoje.
- 172 Mu e-gude onu mu gụa okfu ngu l'egvu;  
 kẹ l'ekemu ngu l'ọ ha  
 vudokota nhamunha.
- 173 Kwagebejenu akwagebe; oyeru mu ẹka;  
 kẹle mu hataru otso ekemu ngu.
- 174 Iphe agụ mu nù bu t'i  
 dzofuta mu;  
 nggube Ojejoje.  
 Ekemu ngu anọduje ehe mu uhere.
- 175 Hanua mu tẹ mu nọdu ndzụ;  
 k'ophu mu a-jajẹ ngu ajaja.  
 Menua tẹ ekemu ngu ono  
 gudeshia ndzụ mu.
- 176 Mu kpaphuhuwaru l'ọ bu  
 aturu, tufahuru etufahu.  
 Byiko; chonua mube nwozi ngu;  
 kẹle mu ta agbadokwa ekemu ngu ono.

## 120

Egvu, aagujẹ teke eeje Jerúsalemu

- <sup>1</sup> Mu rakuru Ojejoje  
 teke mu nọ l'iphe-ẹhuka;  
 yọ nua olu mu.
- <sup>2</sup> Nggube Ojejoje;

dzọfutanu mu l'ẹka ndu ntuphu-ire;  
mẹ l'ẹka ndu ẹregede.

- <sup>3</sup> Unubẹ ndu ẹregede;  
?bụ ngunu bẹ unu ari  
lẹ Ojejoje e-me unu.  
Mbụ; ?bụ ngunu;  
bẹ unu ari l'ọo iphe  
oo-gude byakfuta unu.
- <sup>4</sup> Oo-zi ndu soja; ẹphe egude  
akfu, tųpyishiru ọnu  
bya ahùà unu àhùhù.  
Ẹphe e-me unu;  
unu adaburu l'ẹke ono,  
l'ata kfukfukfu l'ọ bụ icheku-ọku.
- <sup>5</sup> Nshọbukwaa mụ;  
kẹle mu bu l'alị Mésheku.  
Nshọbukwaa mụ;  
kẹle mu bu l'ụlo-ékwa ndu Kéda.
- <sup>6</sup> O tewaru ẹnya teke mu  
lẹ ndu kporu ẹhu-agu ashị shi butaru.
- <sup>7</sup> Obenu lẹ mbẹdua bụ onye  
anọduje achọ ụzo ẹhu-agu.  
Ọ -buje teke mu ekfuru  
ẹphe okfu bebebe;  
ẹphe eme t'ẹphe tso mu ọgu.

## 121

Egvu, aaguje teke eeje Jerúsalemu

- <sup>1</sup> Mu paliru ẹnya;  
lee l'ugvu ugvu ono;  
bya aji:  
“?Bụ awe bẹ ee-shi gbaaru mu mkpu?”
- <sup>2</sup> Ọ bụ Ojejoje, bụ iya meru igwe;

- mee mgboko a-gbaru mu mkpu.  
<sup>3</sup> Ẹ too kwekwa t'ẹturu chia ngu.  
 Onye ono, eche ngu nche ono;  
 bẹ mgbẹnya te erokwa.  
<sup>4</sup> Onye ono, eche ndu Ízurẹlu nche ono  
 te enwekwa lẹ mgbẹnya abya iya l'ẹnya;  
 k'ọphu ọ buru k'ekuru iya.  
<sup>5</sup> Ọ bụ Ojejoje eche ngu nche;  
 buru iya bụ agu, kpuchitaru ngu nụ.  
<sup>6</sup> Ẹ to nwedu iphe anwụ eme ngu l'eswe;  
 to nwe iphe ọnwa eme ngu l'ẹnyashi.  
<sup>7</sup> Ojejoje e-me t'ẹ b'ọ dụ iphe  
 e-me ngu nụ;  
 buru iya a-nọdu eche ndzụ ngu.  
<sup>8</sup> Ojejoje a-nọdu edu ngu l'ejeje;  
 l'edu ngu l'alala;  
 tsube nta-a jeye lẹ tutu yoyo.

## 122

Egву, aagụje teke eeje Jerúsalemu; onye deru iya  
 nụ bụ Dévidi

- <sup>1</sup> Ẹhu tsọru mu ẹna  
 teke ẹphe sụru mu:  
 “T'ayi je l'eze-ulo Nchileke!”  
<sup>2</sup> Nta-a bẹ ayi vudowa  
 l'obu-edukfu nggube Jerúsalemu.  
<sup>3</sup> Jerúsalemu bụ mkpụkpu,  
 a kpuru; yọ tuga onwiya atuga.  
<sup>4</sup> Ọ bụ l'ẹke ono; bẹ iphe bụ  
 ikfu anọduje awụ ala;  
 eje oja Ojejoje ajaja;  
 mbụ ndu ikfu kẹ Ojejoje;  
 bụ iya bụ iphe ị turu



- l'ekemu doberu ndu Ízurelu.
- <sup>5</sup> Ọ bụ l'ẹke ono;  
 bẹ aba-eze, aanọ ekpe ikpe nọ;  
 mbụ aba-eze, shi l'ụlo Dévidi.
- <sup>6</sup> Unu kfuru nụ Nchileke  
 tẹ nchị dụ Jerúsalemu ndoo:  
 “Ndu yeru ngu obu; t'iphemiphe ọbule;  
 bukwaru ndu yeru ngu obu akputo  
 l'ọborotu.
- <sup>7</sup> Tẹ nchị dukwa ndu ụlo ngu ndoo;  
 ẹhu-agu aburu kẹ ndu mkpukpu unu.”
- <sup>8</sup> Mu gude okfu ẹhu unwunne mu;  
 mẹ lẹ ndu ọnyà mu phẹ l'ekfu; sụ:  
 “Tẹ nchị dukwa nggube  
 Jerúsalemu ndoo!”
- <sup>9</sup> Mu gude okfu ẹhu  
 eze-ulo Nchileke,  
 bụ Nchileke ayi acho  
 tẹ iphemiphe ọbule  
 bụru akputa yẹle ọborotu lẹ Jerúsalemu.

## 123

Egvu, aaguje teke eeje Jerúsalemu

- <sup>1</sup> Mu paliru ẹnya mu lee  
 l'ẹke ị nọ;  
 mbụ l'ẹke ị nọ nggube  
 onye ono, nọ l'aba-eze ngu l'imigwe ono.
- <sup>2</sup> Ọ bụ ẹge ono nwoke,  
 bụ ohu anọduje ele nnajiufu iya ẹnya l'ẹka;  
 mbụ ẹge ono nwanyi,  
 bụ ohu anọduje ele nwanyi,  
 nwe iya nụ ẹnya l'ẹka ono;  
 bụ ẹge ayịbedua a-nọdu ele Ojejoje,

bụ Nchileke ayi ẹnya l'ẹka  
jeye teke ọo-phuru ayi imiko.

<sup>3</sup> Phuaruru ayi imiko;

nggube Ojejoje.

Phuaruru ayi imiko.

L'ayi tataakwaru nshi

l'iphe ndu ọdo anọduje ekfu

l'ẹ to nwedu iphe ayi bụ.

<sup>4</sup> Ayi tataakwaru nshi

kẹ ọchi, ndu eku onwẹphe

ekuku anọduje achị ayi;

mẹ k'ẹge ndu etu

onwẹphe oke ẹpha

anọduje ekfu l'ẹ t'o nwedu iphe ayi bụ.

## 124

Egву, aaguje teke eeje Jerúsalemu; onye deru iya  
nụ bụ Dévidi

<sup>1</sup> Tẹ ndu Ízurelu tuko kfuа ya; sụ:

Lẹ ndẹge Ojejoje ta nọ swiru ayi;

<sup>2</sup> ndẹge Ojejoje ẹ tọ nọ

swiru ayi teke ono,

ndiphe tsoru ayi ọgu ono;

<sup>3</sup> mbụ teke ono, ẹhu nwuhuru

ẹphe ọku l'ẹke ayi nọ ono;

mẹ ẹphe elekwaa ayi lẹ ndzụ.

<sup>4</sup> Ẹphe ge erikwa ayi l'ọ bụ utso;

mbụ bụru ọchoku-mini tsọta ayi tughua;

<sup>5</sup> mbụ bụru ukporo-mini

kpotа ayi;

ayi eje aburu ọ-la-l'iyi.

<sup>6</sup> T'ajaja bụru kẹ Ojejoje,

bụ onye ono, ẹ te kwedu  
t'ẹphe gude eze  
takashia ayi atakashị ono.

- <sup>7</sup> Anahụ, ayi nahuru ẹphe  
duwa l'ọ bụ nwenu,  
nahuru onye agba ọnya ẹnu.  
Ọnya ọbu swewaru ìphòró;  
ayi anahụ gbalashia.
- <sup>8</sup> Ọ bụ Ojejoje, bụ iya meru  
igwe; mee mgboko;  
bẹ eeshije l'ẹka agbaru ayi mkpu.

## 125

Egvu, aaguje teke eeje Jerúsalemu

- <sup>1</sup> Ndu dakoberu Ojejoje  
dụ l'ọ bụ Ugvu Záyonu,  
bụ 'enwubata enwubata.  
Ọ bụ ugvu, a-no jeye  
lẹ tutu yoyo.
- <sup>2</sup> Ọ bụ ẹge-a, ugvu no-pheru Jerúsalemu  
mgburumgburu-wa;  
bụ ege Ojejoje a-no-pheje  
ndibe iya;  
tsube nta-a gbururu jeyewaru.
- <sup>3</sup> Ndu akirishi ta abugbukwaru ishi l'alị ono;  
mbụ alị ono, e ketaru nù  
ndu doberu ẹka ndoo ono.  
Odumeka bẹ ndu ono,  
doboru ẹka ndoo ono  
e-yekwa ẹka l'ome iphe dụ ẹji.
- <sup>4</sup> Nggube Ojejoje;  
menuaru ndu ọma ọhuma;  
mbụ ndu ono, obu gūru iphoru ono.

5 Ọ bụ l'iphe bụ ndu eshi ụzo,  
 ẹ-te vudodu nhamunha  
 be Ojejoje a-tuko ẹphe ẹ  
 ndu eme iphe ụ ẹji l'ali-a wofukota.  
 Te ẹhu-agu bukwaru ke Izurelu.

## 126

Egvu, aaguje teke eeje Jerúsalemu

1 Teke Ojejoje dulataru ndu ono,  
 a kpuru ẹ ndzu ono azu ẹ Záyonu  
 b'ọ duru ayi l'ọ bụ nrọ.

2 Ayi muru onu-ochi;  
 gu ẹgvu ẹhu-otso-ena.  
 Ndu ohodo ekfulahaa; su:

“Le Ojejoje meekwaru ẹphe iphe ha nshinu.”

3 Ojejoje meekwaru ayi iphe ha nshinu.  
 Yo buru iya meru;  
 ẹhu atso ayi ẹna.

4 Nngube Ojejoje;  
 menua t'iphe duru ayi ẹ mma  
 ẹge ono, nggele atsoje  
 atsotso bya agbaa mini l'ali okponku ono;

5 k'ophu ndu gude ẹnya-mini  
 mebe iphe l'ali e-gude egvu  
 ẹhu-otso-ena kpata iya akpata.

6 Mbụ l'onye ono, gude  
 ẹnya-mini mebe iphe l'ali;  
 a-gude egvu ẹhu-otso-ena  
 vuru iphe ọ kpataru l'okfu iya lata.

## 127

Egvu, aaguje teke eeje Jerúsalemu; onye deru iya  
 nu bụ Sólomonu

- 1 Ọ -bụru lẹ Ojejoje  
 ta kpudu ụlo l'onwiya;  
 kwa aphụ bẹ ndu akpụ iya nụ eri.  
 Ọ -bụru lẹ Ojejoje  
 te chedu mkpukpu;  
 kwa aphụ bẹ ndu eche iya nụ eri.
- 2 Ọ kwa kẹ mmanu;  
 bẹ iitehuje lẹ nchi-abọhu;  
 bya alasweta alasweta;  
 ẹke iise akanya nri, ii-ri;  
 kẹle ndu Ojejoje yeru obu  
 abuje: ẹphe zẹkwadurua lẹ mgbenya;  
 yo wotawaru ẹphe iphe ẹphe e-ri.
- 3 Ụnwegirima bụ ọkè-iphe shi Ojejoje l'ẹka;  
 Ọtsu ime aburu obunggo, shi Ojejoje l'ẹka.
- 4 Ụnwegirima, a mụru  
 l'okoroḅya adu l'ọ bụ akfu,  
 nọ l'ẹka mkparawa.
- 5 Ọnu-ọma bụ k'onye chị iya chị-jia ẹkpa iya.  
 Iphere te emedu iya teke  
 yẹle ndu ọhogu iya  
 aswo uswo l'obu-edukfu mkpukpu.

## 128

Egву, aaguje teke eeje Jerúsalemu

- 1 Ọnu-ọma bụ k'iphe  
 bụ ndu atsụ Ojejoje egvu;  
 mbụ ndu bụ ụzo iya;  
 bẹ ẹphe etso.
- 2 Onye ono a-nọdu ndzụ;  
 ria iphe o setaru l'akanya;  
 ẹhu-otso-ena; mẹ k'ọma aburu nk'iya.
- 3 Nyee ngu a-nọdu lẹ nke ngu;

du l'ọ bu oshi vayinu, amị amimi.  
 Ụnwu ngu adu l'ọ bu  
 ẹkali-oshi olivu;  
 no-pee ngu mgburumgburu.

- <sup>4</sup> Ono bu ege onye a goru  
 onu-oma nu a-du;  
 mbu onye atsu Ojejoje egvu.
- <sup>5</sup> Te Ojejoje shikwa le Zayonu  
 goru onu-oma nu ngu;  
 nggu anodu phu ege uba  
 Jerusalemu a-habe jeye  
 l'oge nka-ezekuna nke ngu.
- <sup>6</sup> Ii-no ndzu; phu unwu  
 nwanwanwanwanwa ngu.  
 T'ehu-agu bukwaru ke ndu Izurelu.

## 129

Egvu, aaguje teke eeje Jerusalemu

- <sup>1</sup> Te ndu Izurelu tuko kfua ya; su:  
 Le epe shi mu okpa ehu  
 teke mu bu nwata.
- <sup>2</sup> Keshinu teke mu bu nwata;  
 be epe shi mu okpa ehu;  
 obenu l'epe te mekputadu mu.
- <sup>3</sup> Epe gudewa echachi chia mu;  
 kpachaa mu akpacha.  
 Onya, epe chishiru  
 ye mu l'okpurukpu-azu  
 du l'ọ bu eke a waru oswa.
- <sup>4</sup> Obenu le Ojejoje bu  
 onye doberu eka ndoo.  
 O towaru mu l'egbu,  
 ndu akirishi shi kee mu;

- mu enwewaru onwomu.  
<sup>5</sup> T'iphe bụ ndu Záyọnu  
     dụ ashị  
     bụkwaru ndu e-gude iphere laphu azu.  
<sup>6</sup> T'ẹphe dukwa l'ọ bụ ẹwu,  
     furu l'eli ẹswulo, abuje:  
     Ọ -bya bya evuta;  
     anwụ ewowaru iya chigbua.  
<sup>7</sup> Ẹwu ono ahatabeje nwanshị;  
     k'ọphu bụ l'onye jeru iya  
     egbuta abuje; o -gbua nta gbua imo;  
     too gbutadu ọphu e-ji iya ogbogbo-ẹka;  
     k'ọphu ọ bụru ọphu e-dzu ọchileka.  
<sup>8</sup> Ọphu ndu esweta esweta 'asujekwa nù ẹphe:  
 "Tẹ Ojejoje gọkwaaru unu ọnu;  
     l'ẹphe gude ẹpha Ojejoje l'agọru ẹphe ọnu."

## 130

- Egvu, aaguje teke eeje Jerúsalemu  
<sup>1</sup> Mu nọ l'echi ebo iphe-ẹhuka raku ngu;  
     nggube Ojejoje.  
<sup>2</sup> Byiko Nnajiufu;  
     nụnua olu mu.  
     Ngabẹnuru mu nchị  
     lẹ mkpu, mu echi anụ ngu.  
<sup>3</sup> Ndege nggube Ojejoje;  
     akwakọbeje ẹjo iphe  
     onyemonye ọbule eme;  
     Nnajiufu; ?bụ onye a-dụ ike vudo ngu l'ifu?  
<sup>4</sup> Obenu l'ìgugje nvụ.  
     Yọ bụru iphe ono  
     meru iphe aatsụ ngu egvu.  
<sup>5</sup> Mu nọwa ngabẹru Ojejoje.

Mu nọwa l'ele ọnya iya.  
 Yọ buru l'okfu iya;  
 bẹ mu daru ngabẹru.

<sup>6</sup> Mu nọwa ele ọnya Nnajiufu  
 karia ẹge onye nche  
 anọduje eche tẹ nchi  
 bọhu-kebe;  
 mbụ lẹ mu ka ole ọnya  
 Ojejoje mẹ l'ẹge ndu nche  
 anọduje elebe ọnya  
 nchi-abọhu.

<sup>7</sup> Byiko Ízurelu;  
 t'ọnya unu nọdulwa l'ẹke Ojejoje nọ;  
 kẹ l'ọ bụ iya bụ onye eyeje  
 obu yenuka iya eyenuka;  
 buru iya agbafutaje madzụ  
 l'iphe dụ ẹji iya l'ọ ha.

<sup>8</sup> O bụ yẹbedua l'onwiya  
 a-gbafutakota ndu Ízurelu  
 l'iphe dụ ẹji, ẹphe meshiru l'ọ ha.

## 131

Egvu, aagụje teke eeje Jerúsalemu; onye deru iya  
 nụ bụ Dévidi

<sup>1</sup> Nggube Ojejoje;  
 mu te ekukwa onwomu ekuku;  
 ọphu mu 'egvujekwaaru  
 madzụ ọnya kfurukfuru.  
 Mu ta ayọjekwa ọshi  
 l'iphe ẹka mu ẹ-te rudu;  
 ọphu mu ejejekwa okobe  
 ẹka l'iphe ka mu nụ.

<sup>2</sup> Iphe doru mu ọnya bụ



ẹ mu dobekpeleruphu  
 onwomu nwandoo.  
 Ọ bụ ẹge nwata,  
 a mifuru ọnu l'era anoje  
 nwandoo l'ẹhu nne iya  
 bụ ẹge mbẹdua nọkpelephu nwandoo.

3 Byiko; unube ndu Ízurelu;  
 tẹ ẹnya unu nọdunu l'ẹke Ojejoje nọ;  
 tsube nta-a jeye ẹ tutu yoyo.

## 132

Egву, aaguje teke eeje Jerúsalemu

- 1 Nggube Ojejoje;  
nyatanu Dévidi;  
nggu anyata iphe-ẹhuka,  
o jeberu.
- 2 Ọ guru ẹnwa;  
ria nte l'ifu Ojejoje;  
mbụ ribua l'ifu Ọkaribe kẹ Jékọpu:
- 3 “Lẹ ya ta atudu ọkpa l'ulo iya;  
ishi te eru iya l'oshi;
- 4 ya te ekwe tẹ mgbenya bya iya l'enya;  
mbụ t'enya mee ya  
gadzugadzu kẹ mgbenya;
- 5 jeye ya aphua ẹke a-buru kẹ Ojejoje;  
mbụ ẹke Ọkaribe kẹ Jékọpu e-buru.”
- 6 Ayi nwaru l'ọ nọ ẹ Efuratu;  
tugbuja je aphua ya ẹ  
mgbegu Kiriyatu-Jerimu.
- 7 Ayi asu: “Unu t'ayi jenu  
l'ulo-ẹkwà Nchileke.  
Unu t'ayi jenu je anodu iya  
l'ọkpa; baaru iya ẹja.

- 8 Gbeshinu; nggube Ojejoje;  
 bya l'ogbodufu ngu;  
 nggu ọ Okpoko  
 Ọgba-ndzụ ngu ono,  
 ekoshi ẹge ike ngu habe ono.
- 9 Tẹ ndu achijeru ngu ẹja  
 yenua odobe-ẹka-ndoo l'ọ bụ uwe.  
 Ndu yeru ngu obu agụa  
 egvu ẹhu-otso-ena."
- 10 Gudenu okfu ẹhu Dévidi,  
 bụ nwozi ngu  
 nyata onye ono,  
 ị wụru manụ l'ishi gude mee ya;  
 yọ buru eze ono.
- 11 Ojejoje riburu Dévidi angụ;  
 mbụ angụ, ẹ ta amingadu aminga;  
 to nwe l'ọo-nonyaa;  
 to vuhedu ire.  
 Ọ sụru iya: "L'onye lanụ ọ  
 awa ngu bẹ ya e-me t'ọ  
 nọdu l'aba-eze ngu.
- 12 Ọ -buru l'ụnwu ngu doberu  
 ndzụ, ẹphe l'iya gbaru;  
 l'eme iphe ya tūru l'ekemu;  
 ọo ya bụ; l'ụnwu ẹphe  
 a-nọwaru l'aba-eze ngu  
 gbururu jeyewaru."
- 13 Ojejoje gudewa ẹka iya fọta Záyọnu;  
 kẹ l'ẹke ono dū iya mma  
 tẹ ya buru iya eburu;  
 kẹ l'ọ sụru:
- 14 "Ọ bụ ẹke-a; bẹ ya e-me ufu  
 iya jeye ọ tutu yoyo;

- buru l'ẹke-a bẹ ya e-dobe aba-eze iya;  
 kẹ l'ọ bu ẹge ọ dụ iya mma ndono.
- 15 Ya a-gọru ọnu nọ iya t'ọ  
 nweru iphe nweru k'etsubo iya.  
 Ndibe iya ndu ndu k'ụkpa;  
 bẹ ya a-nọdu anụ-ji ẹpho.
- 16 Ndibe iya, achijeru Nchileke ẹja;  
 bẹ ya e-ye ndzọfuta l'ọ bu onye yeru uwe.  
 Ndibe iya, yeru Ojejoje obu  
 a-gụ egvu ẹhu-ọtso-ẹna.
- 17 Yọ buru ẹke ono; bẹ ya  
 e-shi l'ọnu-ulo Dévidi;  
 nọ onye lanụ ike;  
 mọru ọku ye l'urọku onye  
 ya wuru manụ l'ishi gude chia ya eze.
- 18 Ya e-me t'iphere gude ndu ọhogu iya.  
 Obenu lẹ yẹbedua; bẹ ya  
 e-kpube okpu-eze, acha pemu-pemu.”

## 133

Egvu, aaguje teke eeje Jerúsalemu; onye deru iya  
 nọ bu Dévidi

- 1 Lewaru ẹge ọ dụ-be mma;  
 bya adụ ugvu;  
 tẹ unwunna bukobe;  
 tẹgbabe buru nanụ.
- 2 Ọ dulephu l'ọ bu  
 ọkpobe manụ, eshi mkpọ,  
 a wuru Éronu l'ishi;  
 yo shi iya l'ishi tsọfuta iya l'ẹji-agba;  
 gbaa ya gorogoro tsọfuta l'olu uwe iya.
- 3 Ọ dukwaphu l'ọ bu ẹke iji

Ugву Hẹmonu ada ẹ  
 Ugву Záyọnu.  
 O bụ l'ẹke ndu dụ ẹge ono;  
 bẹ Ojejoje agojeru ọnu nk'iya nụ;  
 mbụ ọnu ọphu bụ ndzụ gbururu jeye.

## 134

Egву, aagụje teke eeje Jerúsalemu

- <sup>1</sup> Unu jaa Ojejoje ajaja;  
 unubẹ ndu ozi Ojejoje l'unu ha;  
 unubẹ ndu anọduje ejeru  
 Ojejoje ozi l'ụlo iya l'enyashi.
- <sup>2</sup> Unu palia ẹka unu imeli  
 l'ụlo, dụ nsọ kẹ Ojejoje; kele iya ekele!
- <sup>3</sup> Tẹ Ojejoje, bụ onye meru  
 igwe mee mgboko  
 shikwa ẹ Záyọnu gọoru ngu ọnu.

## 135

- <sup>1</sup> Unu jaa Ojejoje ajaja.  
 Unu tua Ojejoje ẹpha.  
 Unu jaa ya ajaja;  
 unubẹ ndu ejeru Ojejoje ozi;
- <sup>2</sup> mbụ unubẹ ndu eje ozi l'ụlo Ojejoje;  
 mẹ l'ọma ufu Nchileke ayi.
- <sup>3</sup> Unu tua Ojejoje ẹpha;  
 kele Ojejoje dụ mma.  
 Unu gua egву gude jaa ya ajaja; kẹ l'ọ bụ  
 iphe gbaru nụ ndono;
- <sup>4</sup> kele Ojejoje fọtawaru Jékọpu t'ọ bụru nk'iya;  
 mbụ l'ọ hatawaru Ízurelụ t'ọ  
 bụru ndu yẹbedua gẹdegede nwe.
- <sup>5</sup> O doru mu ẹnya ẹ

- Ojejoje ha nshinu;  
mbu lẹ Nnajiufu ayi kakọta iphe, bu agwa.
- 6 O bu iphe du Ojejoje mma;  
be oomeje l'imigwe;  
me lẹ mgboko.  
Yo buru iphe du iya mma;  
be oomeje l'eze enyimu; me l'ebo, no iya nu.
- 7 O bu iya emeje te urukpu shi  
l'eke mgboko beru dube eruru.  
Oomeje t'egbe-igwe gbaa teke o chi mini;  
l'emeje te pherephere shi  
l'ulo eke o tu-chiru iya wata ephephe.
- 8 Iphe bu okpara lẹ Ijiputu b'o chigbushiru;  
mbu iphe bu okpara lẹ madzu; me l'elu.
- 9 O gude iphe-ophulenyia;  
me iphe-ophubama,  
dugbaa biribiri mekoshi unube ndu Ijiputu.  
Yo buru iphe o gude  
huta Fero yele ndu ozi iya ahuhuhu.
- 10 Mbakeshi, du l'igwe b'o chitsushiru;  
bya egbushikwaaphu ndu  
eze, shihugbaaru ike.
- 11 O gburu Sihonu, bu eze ndu Amoru;  
bya egbua Ogu, bu eze ndu Bashaanu;  
bya egbushikota eze ndu Kenanu l'ephe ha.
- 12 Yo woru ali ephe washiaru  
ndu nk'iya, bu Izurelu;  
t'o buru okè-iphe ephe.
- 13 Epha nggube Ojejoje  
anoje jeye lẹ gbururu.  
Ophu a byadu bya azaha  
ngu azaha dube l'ogbo sweru ogbo;

- 14 kele Ojejoje a-haru ndibe iya enge;  
gude ẹge ono ɗua ndu ejeru iya ozi obu.
- 15 Agwa ndu ọhodo bɗtsua  
mkpola-ododo yele mkpola-ọcha;  
bɗ iphe madzɗ gude ẹka mee.
- 16 O nweru ọnu;  
ọle ẹ too kfudu okfu;  
nweru ẹnya;  
ọphu ọ phɗu ɗzo.
- 17 O nweru nchi;  
ọphu 'onudu iya iphe.  
To nwe ume ndzɗ, nọ iya l'ẹhu.
- 18 Ndu eme iya nɗ;  
a-dɗ ẹge ọ dɗ;  
mewaru iphe bɗ ndu dakoberu iya nɗ.
- 19 Unube ndibe Ízurelu;  
unu jaa Ojejoje ajaja.  
Unube ndibe Éronu;  
unu jaa Ojejoje ajaja.
- 20 Unube ndibe Lívayi;  
unu jaa Ojejoje ajaja.  
Unube ndu atsu Ojejoje egvu;  
unu jaa Ojejoje jajaja.
- 21 T'e shikwa le Záyonu  
jaa Ojejoje jajaja;  
mbu onye ono, bu le Jerúsalemu ono.  
Unu jaa Ojejoje ajaja.

## 136

- 1 Unu kele Ojejoje ekele;  
ke l'ọ bu onye, dɗ mma.  
N-yemobu iya anọje jeye le tutu yoyo.
- 2 Unu kele Ojejoje ọphu

- kakota iphe, bu agwa.  
 N-yemobu iya anoje jeye le tutu yoyo.
- <sup>3</sup> Unu kele Nnajiufu, bu iya  
 bu ishi ke ndu, bu nnajiufu.  
 N-yemobu iya anoje jeye le tutu yoyo.
- <sup>4</sup> Onye, bu yebedua nwenkinyi iya  
 emeje iphe-ophulenyia, ha nshinu.  
 N-yemobu iya anoje jeye le tutu yoyo.
- <sup>5</sup> Onye, bu mmamiphe iya b'o gude mee eligwe.  
 N-yemobu iya anoje jeye le tutu yoyo.
- <sup>6</sup> Mbu onye, woru mgboko-a  
 l'o ha phushia l'eli mini.  
 N-yemobu iya anoje jeye le tutu yoyo.
- <sup>7</sup> Onye, bu iya meshiru  
 eze iphoro-a, dutsua biribiri-a.  
 N-yemobu iya anoje jeye le tutu yoyo.
- <sup>8</sup> Onye, bu iya meru enyanwu t'o chije l'eswe.  
 N-yemobu iya anoje jeye le tutu yoyo.
- <sup>9</sup> Onye, bu iya meru onwa;  
 me mkpo-kpodo t'o chije l'enyasi.  
 N-yemobu iya anoje jeye le tutu yoyo.
- <sup>10</sup> Unu kele onye chigbushiru  
 iphe, bu iphe waru nne iya oswa le Ijiputu.  
 N-yemobu iya anoje jeye le tutu yoyo.
- <sup>11</sup> Onye, shi le Ijiputu dufuta unwu Izurelu.  
 N-yemobu iya anoje jeye le tutu yoyo.
- <sup>12</sup> Yo buru l'agburu-ehu iya  
 b'o gude dufuta ephe.  
 N-yemobu iya anoje jeye le tutu yoyo.
- <sup>13</sup> Unu kele onye, bu iya  
 kekahuru Eze Enyimu Uswe ebo.  
 N-yemobu iya anoje jeye le tutu yoyo.

- 14 Onye, duru ndu Ízurelu; ephe eswee ya.  
N-yemobu iya anoje jeye le tutu yoyo.
- 15 Yo kpota Fero yele ndu  
soja iya l'ephe ha kporu ye  
le Eze Enyimu Uswe ono.  
N-yemobu iya anoje jeye le tutu yoyo.
- 16 Unu kele onye, bu iya  
duru ndibe iya ije l'echi-egu.  
N-yemobu iya anoje jeye le tutu yoyo.
- 17 Onye, chigbushiru ndu eze, nweru ike.  
N-yemobu iya anoje jeye le tutu yoyo.
- 18 Onye, gbushikwaruphu  
ndu eze, a maru epha ephe.  
N-yemobu iya anoje jeye le tutu yoyo.
- 19 O gburu Sihonu, bu eze ndu Amoru.  
N-yemobu iya anoje jeye le tutu yoyo.
- 20 Yo bya egbua Ogu, bu eze ndu BASHANU.  
N-yemobu iya anoje jeye le tutu yoyo.
- 21 O woru ali ephe nu onye  
odo t'o buru okè-iphe iya.  
N-yemobu iya anoje jeye le tutu yoyo.
- 22 O bu nwozi iya; mbu Ízurelu b'o nuru iya.  
N-yemobu iya anoje jeye le tutu yoyo.
- 23 Onye, bu iya nyataru ayibe  
ndu e ta dudu iphe ayi bu.  
N-yemobu iya anoje jeye le tutu yoyo.
- 24 O nafutaru ayi l'eka ndu achì ayi.  
N-yemobu iya anoje jeye le tutu yoyo.
- 25 Yo bukwaru iya phu  
azukota iphemiphe obule, no ndzu.  
N-yemobu iya anoje jeye le tutu yoyo.
- 26 Unu kele Nchileke k'imigwe ekele.



N-yemobu iya anoje jeye ẹ tutu yoyo.

## 137

- 1 Ọ bụ l'iku ẹnyimu Bábyilonu  
bẹ ayi byaru bya adọru;  
raa ẹkwa; l'ayi nyataru Záyọnu.
- 2 Ayi eworu une ayi kobe-gbaa  
l'ẹkali-oshi wilo l'ẹke ono;
- 3 kẹ l'ayi ruru ẹke ono;  
ndu, kpuru ayi ẹ ndzụ asụ  
t'ayi gụaru ẹphe egvu.  
Ndu ono, eme ayi  
ome-l'iwe ono asụ t'ayi  
guaru ẹphe egvu ẹmerema.  
Ẹphe asụ t'ayi chọo egvu  
ndu Záyọnu nanụ gụaru ẹphe!
- 4 Ọ bụ; ?nanụ ẹge ayi e-shi  
wota egvu, e gude ekutse Ojejoje  
gulahaa l'alị ndu ọhodo.
- 5 Ọ -bụru ẹ mu zaharu nggube Jerúsalemu;  
tẹ ẹka-utara mu nwuhukwa mu.
- 6 T'ire nyakwaru mu l'akpo;  
m'ọ -bụru ẹ mu ta nyatadu ngu;  
mbụ; m'ọ -bụru l'ẹ tọ bụdu  
nggube Jerúsalemu;  
bẹ mu meru mkpukpu,  
emeje t'ẹhu kagee mu ọtso ẹna.
- 7 Nggube Ojejoje;  
nyatakwa iphe ndu Édọmu  
meru mbọku, ndu ọhogu nataru  
Jerúsalemu.  
Ẹphe turu ọzu; sụ t'e tsukposhia ya.  
T'e tsukposhia ya;

tsurua ẹke a t̄uru ọkpa-ulo iya.

- <sup>8</sup> Unubē ndu Bábyilonu;  
 iphe n̄oru unu kwa ọ-la-l'iyi.  
 Ẹhu-otso-ena bu k'onye  
 a-kfu unu ugwo iphe-a, unu meru ayi-wa;  
<sup>9</sup> mbu onye a-nata unu  
 unwegirima unu, angu ẹra  
 t̄upyashia lẹ mkpuma.

## 138

Egву, Dévidi deru

- <sup>1</sup> Nggube Ojejoje;  
 mu e-gude obu mu l'ọ ha jaa ngu ajaja.  
 Mu a-nodu l'ifu agwa gua  
 egvu gude jaa ngu ajaja.  
<sup>2</sup> Mu e-byishi ikpere l'uzo  
 eze-ulo ngu, du nso;  
 baaru ngu ẹja.  
 Mu a-ja ẹpha ngu ajaja;  
 ke l'i bu onye n-yemobu;  
 buru o-me-g'o-kfuru;  
 ke l'i meru ẹpha ngu  
 yele okfu ngu; yo kakota  
 iphemiphe obule l'eli.  
<sup>3</sup> Teke mu rakuru ngu;  
 b'i zaru mu.  
 I meru; ike adu mu;  
 bya emee mu; mu anyalaha ndu.  
<sup>4</sup> Iphe bu eze unwu eliphe  
 l'ẹphe ha a-ja ngu ajaja; nggube Ojejoje;  
 me ẹphe -nua okfu, shi ngu onu.  
<sup>5</sup> T'ẹphe gude uzo ke Ojejoje  
 gua l'egvu; ke l'odu-biribiri iya ha nshinu.

- 6 A makwaru-a lẹ Ojejoje nọ oreke-imeli;  
 obenu l'ẹnya iya anọkotaje  
 l'ẹke ndu ẹnya ẹphe laru alì nọ.  
 Ndu eku onwẹphe ekuku;  
 bẹ ọonoduje ote-ẹnya maru.
- 7 Ẹ to nwedu m'o -ruhuru;  
 iphe-ẹhuka gbaa mu mgburumgburu;  
 iídobejele mu-a ndzụ;  
 t'ẹ b'ọ dụ iphe e-me mu nụ.  
 Iigudeje ike ngu nwulala ẹphe azụ;  
 mbụ ndu gude iwe l'achì mu.  
 Yọ buru ike ngu ono;  
 bẹ iigudeje dzọfuta mu.
- 8 Nchileke, a-chìko iphe bụ  
 mkpa mu meeru mu.  
 Nggube Ojejoje;  
 n-yemobu ngu anọje jeye lẹ tutu yoyo.  
 Byiko; ba ahakwa ozi ono,  
 i gude l'ẹka ono.

## 139

Egву-ọma, Dévidi deru nù onye ishi egvu

- 1 Nggube Ojejoje;  
 ì vọwaru mu ọkpoma;  
 maru ẹge mu gbaru.
- 2 Ị maru teke mu nọdu anọdu;  
 maru teke mu gbeshiru egbeshi.  
 Ịnroduje ote-ẹnya maru iphe mu arì l'obu  
 mu.
- 3 Ị maru teke mu gbeshiru l'eje iphe;  
 maru teke mu zẹ azẹe.  
 Iphe bụ ọzo mu l'ọ ha  
 dokotaru ngu ẹnya.

- 4 Ọobuje; okfu -bya eshi mu l'ọnu lufuta;  
 b'ị makotawaru iphe mu  
 abya ekfukfu;  
 nggube Ojejoje.
- 5 Ị nọ-pheru mu  
 mgburumgburu: ifu l'azụ.  
 I wowaru ẹka ngu byabẹ mu l'ishi.
- 6 Amama ono, ị maru mu ono  
 dukwa mu biribiri;  
 ọ bụlephu l'ẹ to dodu mu ẹnya.
- 7 ?Bụ awe bẹ mu a-nọdu,  
 bụ ẹke Ume ngu ta nọdu?  
 ?Bụ awe bẹ mu a-gbaru laa,  
 bụ ẹke ẹ tii phudu mu?
- 8 Mu -pheru lashia l'imigwe;  
 b'ị nọwa l'ẹke ono.  
 Mu -tugbua; je agbaa  
 oshi-azẹe mu l'alị-maa zẹru; b'ị nọkwa iya  
 phụ.
- 9 Mu -phehu pheru phesweta  
 ụzo ẹnyanwu-ahata tugbua;  
 m'ọ -bụ pheru pherua ẹke  
 ẹnyimu tsọ-beru gburu;
- 10 l'ẹke ono bẹ ii-nọdulekwaa edu mu;  
 gude ike ngu l'eyetaru mu ẹka.
- 11 Mu -sụ lẹ mu marua l'ọchi e-domi mu;  
 l'iphoro a-buru-a ẹnyashi;  
 nọ-pee mu anọ-phe;
- 12 bẹ ii-koshile-e l'ọchi ono  
 ta bụdu ọchi l'ẹke ị nọ.  
 Ẹnyashi ono a-nọdu  
 echile-e swachaswacha l'ọ bụ echi eswe;  
 kele nggubedua bẹ ọchi

- dùle-ẹ l'ọ bụ iphoro.
- 13 Kẹ l'iphemiphe ọbule,  
 nọ mu l'ime ẹhu bụ nggu meru iya;  
 bụru nggu dzekfuru mu  
 teke mu nọ nne mu l'ẹpho.
- 14 Mu aja ngu ajaja;  
 kẹ l'i meru mu l'uzo,  
 dụ egvu bya adụ biribiri.  
 Iphe doru mu ẹnya ọhuma  
 bụ l'ozu ngu dụ biribiri.
- 15 Okpu, nọ mu l'ẹhu l'ọ ha  
 ta dudu ọphu e domiru ngu  
 edomi teke ono, eeme mu l'edomi ono.  
 Teke a nọ l'ẹke miru emimi  
 dzekfua mu; mu aburu nanu;
- 16 b'i gudehawa ẹnya ngu phua  
 ugwehu mu ọphu ẹ tii  
 dzekfudua ẹge ọo-dụ.  
 Tsuberu ẹ mbọku k'odungu;  
 b'a tubuhawaru ru ujiku ole,  
 mu a-nọ ẹ mgboko-a;  
 mbu dehawa iya ru l'ekwo ngu.
- 17 Oriri ngu dukwa mma; nggube Nchileke.  
 A -chikobe iya achikobe; b'ọ hakwa nshinu.
- 18 O -buru te mu wata iya agugu;  
 b'ọ kakwa ẹja, nọ l'alị l'igwe.  
 Mu -kua mgbenya; tehu;  
 be mu ẹ nggu nokwaa ẹge ayi nọ.
- 19 Nggube Nchileke;  
 ọ dụ mu t'a sụ l'i chiko ndu akirishi gbushia.  
 Unu paru mu haa;  
 unube ndu ono, ogbu ọchi  
 anọduje agụ l'ọ bụ onye mini agụ ono.

- 20 Ndu ono anọduje ekfubyishi  
 ẹpha ngu ekfubyishi;  
 chịta onwẹphe koga-beru  
 ngu k'ome iphe dọ ẹji.
- 21 Iphe bụ ndu nggube Ojejoje dọ ashi;  
 bẹ dukwa mu phụ ashi.  
 Iphe bụ ndu etso ngu okfu;  
 bẹ mu a-nọdu akpọ-yiru ukuvu.
- 22 Ẹphe aduje mu ashi dushia mu iya ike;  
 mbụ ẹ mu agukobeje ẹphe ẹ ndu ọhogu  
 mu.
- 23 Vọchanua mu ọkpoma;  
 nggube Nchileke;  
 maru iphe nọ mu l'obu.  
 Datanu mu;  
 maru ẹge ọriri mu gbaru.
- 24 Lenua mu ẹnya maru;  
 ?m'o nweru ẹke ọzo  
 kpọ-swehuru mu.  
 Ọ -bụru l'o nweru;  
 t'i dulata mu azụ l'ọzo kẹ ndzụ ojejoje.

## 140

Egву-ọma, Dévidi deru nụ onye ishi egvu

- 1 Nafutanu mu l'ẹka ndu  
 akirishi; nggube Ojejoje.  
 Letanu mu ẹnya;  
 tẹ mu ba daba l'ẹka ndu  
 anọduje eme madzụ iphe kpangangangu;
- 2 mbụ ndu, bụlephu ẹjo iphe;  
 bẹ ẹphe anọduje l'ọriri iya.  
 Ọ bụ ọgu bẹ anọduje  
 l'akpali mbọku-mbọku.

- <sup>3</sup> Ẹphe emeje ire ẹphe;  
 yọo tsu nkọ l'ọ bụ ire agwọ.  
 Okfu, shi ẹphe l'ọnu  
 egbu egbugbu l'ọ bụ ẹra ogiji.
- <sup>4</sup> Gudeshinua mu ike;  
 nggube Ojejoje;  
 tẹ mu ba adalahụ l'ẹka ndu akirishi.  
 Gbochitanu mu l'ẹka ndu  
 anọduje eme madzụ  
     iphe-kpangangangu;  
 mbụ ndu achọ ụzo, ẹphe  
 e-shi chikota mu ọkpa.
- <sup>5</sup> Ndu eku onwẹphe ekuku  
 gbawaru mu ọnya.  
 Ẹphe gebetsuaru ụgbu; kwabẹru mu;  
 gbashia ọnya; dooru mu l'ụzo.
- <sup>6</sup> Iphe mu ekfujeru;  
 nggube Ojejoje bụ l'ọo  
 nggu bụ Nchileke mu.  
 Nggube Ojejoje; genua nchị  
 lẹ mkpu ono, mu echiku ngu ono.
- <sup>7</sup> Nggube Ojejoje, bụ Nnajiufu mu;  
 nggube onye ike, adzọfutaje mu nụ;  
 nggube onye egbochitaje mu teke ọgu darụ;
- <sup>8</sup> Nggube Ojejoje;  
 be emekwaru ndu akirishi  
 iphe ono, agụ ẹphe ono.  
 Be ekwekwa t'idzu ree l'ẹge ẹphe achị iya.  
 Ọdumeka; bẹ ẹphe  
 a-watakwa ọhu dulingu.
- <sup>9</sup> T'iphe a-dakfuta ndu ono,  
 gbaru mu mgburumgburu ono  
 bukwaru iphe-ẹhuka,

- ẹphe gude ire ẹphe kpataru onwẹphe.
- 10 Tẹ icheku-ọku, ata  
 kfukfukfu kpukwaa ẹphe ishi.  
 T'a chikwaru ẹphe ye l'ọku, enwu  
 phophopho;  
 mbu l'ime nsu, ẹphe ta alufutadu alufuta.
- 11 Tẹ iphe ndu ẹjo-okfu eme;  
 be ekekwaru ekeru l'ali-a.  
 Tẹ iphe du ẹji chikwaa nta  
 ndu ono, anọduje eme madzu  
 iphe-kpangangu ono.
- 12 Mu makwaru-a lẹ Ojejoje  
 ahajeru ndu ukpa enge;  
 l'emejekwaphu tẹ ikpe laaru  
 ndu ẹ-te nwedu ẹge ọ haru iya.
- 13 Tẹ mu rakwaa ya arara;  
 ndu doberu ẹka ndoo  
 a-jakwa ngu ajaja;  
 ndu obu ẹphe guru iphoru eburu lẹ nke ngu.

## 141

Egvu-ọma, Dévidi deru

- 1 Nggube Ojejoje;  
 mu araku ngu.  
 Gbanuaru mu mkpu ẹgwegwa.  
 Nnua olu mu teke mu rakuru ngu.
- 2 Tẹ ekfukfu, mu ekfu anu ngu  
 shikwa ngu mkpo l'ọ bu insensu.  
 Tẹ ẹka, mu chiliru imeli l'ekfu anu ngu  
 dukwa ngu l'ọ bu anu,  
 e gburu gude egworu ngu  
 ngweja l'uzo-urenyashi.



- <sup>3</sup> Yetanuru mu ẹka;  
     nggube Ojejoje;  
     tẹ mu dobe ọnu ndoo.  
     Menua tẹ mu daa ashi.
- <sup>4</sup> Be ekwekwa t'ẹgu ome  
     ejo iphe wata mu agugu;  
     ọphu mu 'etsokwaru ndu  
     akirishi wata ome ejo iphe.  
     Be ekwekwa tẹ mu tsoru  
     ẹphe ria iphe ẹphe kwakọberu.
- <sup>5</sup> T'onye doberu ẹka ndoo chia mu ru iphe.  
     Ọo-dụ mu ru l'ọ bu  
     iphe-ọma; yo meeru mu iya.  
     T'ọ baaru mu ru mba.  
     Ono e-gberu dụ mu l'ọ bu  
     manu, eshi mkpọ be ọowu mu l'ishi.  
     Ọo-nọduru atso mu ntumatu.  
     Obenu lẹ mu a-nọdujelepһu ekfu anu ngu;  
     su t'i mee t'ejo idzu ndu akirishi ba avu.
- <sup>6</sup> Ndu ishi ẹphe; be ee-shi  
     l'ọnungonu ẹke ẹphe nọ nwutsushia.  
     Teke ono; ndu akirishi  
     amaru l'iphe mu kfuru bu oswi-okfu.
- <sup>7</sup> Ẹphe asu: "L'ọ bu ẹge eegvukposhije ali;  
     kọo ọkori-a bu ẹge a tukashiru ọkpu  
     ayi nanu nanu l'ikiri-kpọo."
- <sup>8</sup> Obenu lẹ mbedua bu l'ẹke  
     i nọ be mu doberu ẹnya;  
     nggube Ojejoje, bu Nnajiufu mu.  
     Ọ bu l'ime ngu; be mu gbabaru  
     tẹ mu nọdu zeeru ndzu.  
     Byiko; be enwukwaru mu haaru ọnwu.
- <sup>9</sup> Menua tẹ mu ba adalahu

l'onya, ephe gbaru mu;  
mbu l'igbudu, ndu akirishi  
gbaru doberu mu.

- 10 Te ndu akirishi nmakwaa  
l'ugbu, ephe geberu.  
Te mbedua sweta;  
t'e b'ọ du iphe e-me mu nu.

## 142

Évù, Dévidi raru teke ọ nọ l'ogba ekfu anu  
Nchileke

- 1 Mu chiru mkpu chishia ya ike chiku Ojejoje.  
Mu chikuru Ojejoje;  
t'ọ phuru mu imiko.
- 2 Mu wotaru mkpu, mu echi wushiru iya;  
wota iphe-ehuka, mu l'ọ ha togboru iya.
- 3 Teke ike agvwa mu agvugvu;  
be nggubedua boru mu ọzo.  
Ndiphe gbashileru mu phu  
onya l'uzo t'ọ nma mu.
- 4 Lewa mu ru enya l'azu;  
nggu aphu l'e t'ọ dudu onye akpa mu ishi.  
Mu te nwedu eke bu:  
mu -gbaba iya; mu anodu iya zee ndzu;  
ke l'e to dudu onye akpa mu ishi.
- 5 Yo buru nggube Ojejoje be mu chikuru; su:  
“O bu l'ime ngu; be mu  
anoduje ezeru ndzu;  
buru nggu bu okè-iphe mu l'ali ndu no  
ndzu.”
- 6 Ngabenu nchi; nua mkpu, mu echi;  
ke l'o nweru iphe atsụ mu l'ehu.  
Byiko; nafutanu mu l'eka ndu achi mu nu;

ke l'ephe ka mu ike.

- <sup>7</sup> Gbafutanu mu le mkporo-a,  
mu no-wa; k'ophu mu a-ja ngu ajaja;  
ndu doberu eka ndoo  
ano-pee mu mgburumgburu;  
ke l'i yeru mu enya nshinu.

## 143

Egvu-oma, Dévidi deru

- <sup>1</sup> Nggube Ojejoje;  
nunua ekfukfu, mu ekfu anu ngu.  
Ngabenu nchi; nua mkpu,  
mu echi; phuru mu imiko.  
Keshinu i bu onye  
doberu eka ndoo;  
buru o-me-g'o-kfuru;  
zanua mu oku!
- <sup>2</sup> Byiko; be ekpekwa mube nwozi ngu ikpe;  
kele e to dudu madzu,  
no ndzu, doberu eka ndoo l'ifu ngu.
- <sup>3</sup> Onye ohogu mu chiru mu gude mu tua l'ali;  
bya emee mu; mu anodu  
l'eke gbakotaru ochi;  
l'o bu ndu nwuhuru  
anwuhu teke ndiche.
- <sup>4</sup> O bu iya meru iphe ike  
wataru mu agvugvu;  
obu awata mu oku akuku.
- <sup>5</sup> Mu nyataru ege o shi aduje teke ndiche.  
Mu abya anodu;  
rilahaa iphe i mekotaru ayi l'o ha;  
bya elefua enya l'iphemiphe obule,  
i gude eka ngu mee.

- 6 Mu achiliaru ngu ẹka mu labu l'imeli.  
 Obu ngu emelaha mu  
 ẹge ono, ẹgu mini anọduje  
 agu ali-ọkponku ono.
- 7 Zanu mu oku ẹgwegwa; nggube Ojejoje;  
 l'ike gvakwaru mu.  
 Be edomikwa onwongu l'ẹke mu no.  
 Odumeka; be mu le ndu,  
 a tuwaru ẹja a-bukwaru nanu.
- 8 Te nchi-abohu botaru mu  
 okfu, a-nodu akoru mu ke n-yemobu ngu;  
 ke l'o bu nggu be mu dakoberu.  
 Byiko; koshinu mu uzo,  
 mu e-shi;  
 ke l'o bu ẹke i no be obu mu no.
- 9 Nafutanu mu l'eka ndu  
 ohogu mu phe; nggube Ojejoje;  
 ke l'o bu l'ime ngu; be mu domiru onwomu.
- 10 Zinua mu iphe bu uche-obu ngu te mu meje;  
 ke l'o bu nggu bu Nchileke mu.  
 Menua te Ume ngu,  
 bu Ume oma duru mu shia  
 uzo, vudo nhamunha.
- 11 Gudenu k'epha ngu; nggube Ojejoje;  
 mee te ndzu dzua mu.  
 Gudenu odobe-eka-ndoo  
 nke ngu nafuta mu  
 l'iphe-ehuka-wa, mu eje-wa.
- 12 Gudenu ke n-yemobu ngu;  
 mee te ire kpuru ndu ohogu mu l'uga.  
 Nggu atuko iphe bu ndu  
 achi mu nu l'ephe ha mee  
 t'ephe buru kpurupyata;

kele mu bu onye ejeru ngu ozi.

## 144

Egву, Dévidi deru

<sup>1</sup> T'a jaa Ojejoje, bu

Agbara-Mkpuma mu ajaja.

Ọo yebedua anọduje ezi mu

t'eka shihu mu ike l'ogu.

<sup>2</sup> O yeru mu obu; bya aburu

iya bu a-gbabe-a-dzuru

nke mu.

Ọ bu iya bu ọlo-mgbochi mu;

bya aburu iya bu onye adzofutaje mu nu;

mbu onye egbobutaje mu nu;

onye mu agbabaje l'ime iya; zeeru ndzu;

bya aburu onye emeje

unwu eliphe t'ephe ndu mu l'eka.

<sup>3</sup> Nggube Ojejoje;

?bu ngunu be madzu bu;

ke t'i rivuje iya l'oriri.

?Bu ngunu be madzu mmanu bu;

ke t'i letaje iya enya?

<sup>4</sup> Madzu dulephu l'ọ bu udzu onu.

Ndzu iya adu l'ọ bu agu oshi, abuje;

ọ -noo nwanshii;

a phu-buhu iya.

<sup>5</sup> Nggube Ojejoje;

chijanua igwe tarara;

shi l'eke ono nyizita;

k'ophu iphe, bu egvu, nonu

a-wata okpo enwuru-oku.

<sup>6</sup> Tunua egbe-igwe gude

chikashia ndu ohogu ngu;

- nggu egude akfu ngu gbagbushia ephe.
- 7 Shinu l'ephekerephe eke ono,  
 i no ono machia eka; dzofuta mu!  
 Nafuta mu l'echi eze mini ono.  
 Nafuta mu l'eka ndu ohodo,
- 8 ezi-okfu e-te shijedu onu;  
 ndu, amaje l'iphe ephe eme bu ugho;  
 ephe anodu l'ime iya ria nte ye iya.
- 9 Mu a-guru ngu egvu ophungu;  
 nggube Nchileke.  
 Yo buru ogele, a kparu l'udo iri;  
 be mu a-ku gude gvaru ngu egvu ono;
- 10 mbu nggube onye emeje  
 t'eze lua ogu lu-gbua;  
 mbu onye anafutaje nwozi  
 iya, bu Davidi t'e b'e egude  
 ogu-mbeke gbua ya.
- 11 Byiko dzofutanu mu!  
 Nafutanu mu l'eka ndu ohodo,  
 ezi-okfu e-te shijedu onu;  
 ndu, amaje l'iphe ephe eme bu ugho;  
 ephe anodu l'ime iya ria nte ye iya.
- 12 Mee t'unwegirima ayi ndu  
 ke unwoke; teke ephe bu  
 unwu-okorobya;  
 t'ephe vua; shihu ike; l'o bu oshi,  
 e letaru enya okpobe eleta.  
 Nggu emee unwegirima ayi  
 ndu ke unwanyi;  
 t'ephe du l'o bu ufu-eze,  
 a kpuru; yoo ma mma;  
 e gude iya mee ufu-eze.
- 13 Mekwaaphu te nri,

dùtsua iche iche ji ọba ayi.  
 Nggụ emekwaaphu t'aturu ayi  
 zụa azuzu nshinu;  
 k'ọphu oo-gudeje unubuku  
 aturu ka nshinu afa l'afa l'egu iya.

- 14 Mekwaaphu t'eswi ayi shihu ike;  
 l'e evu evuvu.  
 Tẹ kẹ omebyishi mkpukpu ayi;  
 ba aduhekwa ọdo.  
 Tọ dūhe mbụ kẹ ọkpu ayi  
 lẹ ndzụ laa mkpukpu ọdo.  
 Ọphu ọ dūhe iphe e-me  
 t'a raa ejo ẹkwa  
 l'ogborogbo ụzo ndu ndu-ayi ọdo.
- 15 Ọnu-ọma bụ kẹ ndu bụ  
 ẹge ono b'ọ dū l'ufu ẹphe.  
 Ọnu-ọma bụ kẹ ndu  
 Nchileke ẹphe bụ Ojejoje.

## 145

Egvu-ekele, Dévidi deru

- 1 Mu a-nọdu ekutse nggube  
 Nchileke mu, bụ eze.  
 Mu a-nọdu aja ngu ajaja jeye lẹ tutu yoyo.
- 2 Mu a-nọdu aja ngu ajaja mbọku-mbọku;  
 l'ekutse ẹpha ngu jeye lẹ tutu yoyo.
- 3 Ojejoje ha nshinu;  
 bụru iya gbaru t'a kagee ya ọja ajaja.  
 Ege nshinu iya habe;  
 ta dukwa onye a-dụ ike amakotaru iya.
- 4 Iphe bụ ọgbo, nonu a-nọduje  
 aturu ọgbo ọphu etso iya nụ  
 ọnu iphemiphe ọbule, iime.

- Ephe a-nòdu akòru ephe  
 iphe dughaa biribiri, ìinoduje eme.
- 5 Ephe a-nòdu atụ onu ege  
 iigbutabe nwiinwii;  
 me ege okwabe ugvu ngu habe nshinu.  
 Mbèdua a-nòdu nwa nggujungguji;  
 ria ege iphe iime du-bebe biribiri.
- 6 Ephe a-nòdu atụ onu ege ike  
 ngu dubebe l'ozì, du egvu, iije.  
 Iphe, iime, du egvu; be mu a-ra arara.
- 7 Ephe l'ephe ha ekfukashia  
 ege udu ngu habe nshinu.  
 Ephe egude ehu-otso-ena  
 gua odobe-eka-ndoo ngu l'egvu.
- 8 Ojejoje bu onye emeje  
 eze-iphe-oma; bya aburu onye  
 aphujeru madzu imiko.  
 Ehu te eghujedu iya eghu egwegwa;  
 ole n-yemobu iya be ooyeje yee k'etsutsu iya.
- 9 Ojejoje muberu onyemonye obule enya.  
 Iphemiphe obule, o keru  
 ekeke be oophujeru imiko.
- 10 Iphemiphe obule, i keru  
 ekeke a-nòdu aja ngu ajaja; nggube Ojejoje.  
 Ndu yeru ngu obu a-nòdu ekutse ngu ekutse.
- 11 Ephe a-tu onu ege eke i bu  
 eze du-bebe biribiri;  
 bya atua onu ege  
 agburu-ehu ngu habebe nshinu;
- 12 k'ophu onyemonye obule  
 a-makotaru iphe ha nshinu, iimeje;  
 makwaruphu ege eke,  
 i bu eze du-be akpabiri.



- 13 Ii-buru eze jeye ẹ tutu yoyo;  
 bya achia tsube l'ogbo sweru ogbo.  
 Iphe bu iphe Ojejoje kweru  
 ukwa; be oomeje.  
 O kwaphu ege ono;  
 b'o yeru iphemiphe obule,  
 o keru ekeke obu.
- 14 Iphe bu ndu daru iko;  
 be Ojejoje abujeru agbarike;  
 l'apalije ndu e wozitaru ali.
- 15 Onyemonye obule achikoje ele ngu enya l'eka;  
 nggubedua l'anujekwanu ephe nri l'oge iya.
- 16 Imusaje eka ngu;  
 mee t'epho ji iphemiphe obule, no ndzu.
- 17 Ojejoje bu onye doberu eka  
 ndoo l'iphemiphe obule oome;  
 bukwaruphu onye yeru  
 iphemiphe obule, o keru ekeke obu.
- 18 Ojejoje anoduje iphe bu  
 ndu rakuru iya nu ntse;  
 mbu ndu gude ire-lanu raku iya.
- 19 Ndu atsụ iya egvu;  
 be oomejeru iphe agu ephe.  
 Onuje mkpu, ephe echi;  
 je adzofuta ephe.
- 20 Onyemonye obule,  
 yeru Ojejoje obu;  
 be onoduje eche nche.  
 Obenu ẹ ndu akirishi;  
 be oo-me t'ephe buru kpurupyata.
- 21 Mu a-noduje aja Ojejoje ajaja tekenteke.  
 Te iphemiphe obule,  
 o keru dobe ẹ mgboko

jajẹkwa ẹpha iya ono,  
 ẹdu nsọ ono jeye ẹ tutu yoyo.

## 146

- 1 Tẹ mu jakwaa Ojejoje ajaja.  
 Byiko; tẹ mu jakwaa Ojejoje ajaja.
- 2 Mu a-nọdu aja Ojejoje ajaja  
 jeye teke mu a-nọ-bebe.  
 Mu a-nọdu agụ egvu,  
 mu gude aja Nchileke mu  
 ajaja gbururu jeyewaru.
- 3 Ba akpọkwaru obu yeru ndu ishi;  
 mbụ madzụ mmanu,  
 ẹ-ta adzụdu ike adzọta madzụ.
- 4 Teke ẹphe nwuhuru;  
 ẹphe ala azụ je aburu ẹja.  
 Ọ bụ mbọku ono gẹdegede;  
 bẹ iphe, bụ iphe, ẹphe chiru  
 k'ememe atukoje gvụ.
- 5 Ọnu-ọma bụ k'onye,  
 bụ Nchileke kẹ Jékọpu eyejeru iya ẹka;  
 mbụ onye, bụ l'ẹke Ojejoje,  
 bụ Nchileke iya nọ;  
 bẹ ọochijeru ẹnya dobe;
- 6 mbụ Nchileke ono, bụ onye  
 meru igwe mee alị;  
 bya emee eze ẹnyimu;  
 mẹ iphemiphe ọbule nọ iya nù;  
 bya aburu onye evudoshije ike  
 l'ire-lanụ jeye ẹ tutu yoyo.
- 7 Ndu aakpa ẹhu bẹ ọohajeru enge;  
 l'anuje ndu ẹgu agụ nri.  
 Ojejoje emeje tẹ ndu a turu

mkpọro nweru onwẹphe.

- <sup>8</sup> Ojejoje emeje tẹ ndu atsu ishì wata ọphu ọzo.  
 Ookulije ndu e wozitaru alì;  
 l'eyejeru ndu doberu ẹka ndoo obu.
- <sup>9</sup> Ojejoje bu iya anọduje eche  
 ndu, laru alala nche;  
 l'eche unwegirima, a toru ogbe;  
 yele unwanyi, nji ẹphe ta nọhedu.  
 Obenu lẹ ndu akirishi bẹ ọogbachije ọzo.
- <sup>10</sup> Ojejoje a-buru eze jeye lẹ tutu yoyo;  
 mbu lẹ Nchileke kẹ nggube  
 Záyonu a-buru eze chĩa  
 tsube l'ọgbo sweru ọgbo.  
 Unu jaa Ojejoje ajaja.

## 147

- <sup>1</sup> Unu jaa Ojejoje ajaja.  
 Ọ dọ mma t'a guje egvu  
 gude jaa Nchileke ajaja.  
 Ọ bu iphe ẹhu-otso-ena;  
 buru iphe ruberu iya nu t'aajaje ya ajaja!
- <sup>2</sup> Ọ bu Ojejoje gude ẹka iya akpu Jerúsalemu.  
 Ọochikobewa ndu Ízurelu,  
 a kpuru lẹ ndzu l'achilata azu.
- <sup>3</sup> Oomeje tẹ ndu obu tofuru  
 atofu shihu ike;  
 l'asaje ẹphe ọnya l'ẹke  
 e mekaru ẹphe iphe.
- <sup>4</sup> Ọ bu iya aguje mkpo-kpodo ọgu;  
 maru ole, ọo-du.  
 Tẹmanu; yọ bya agukota  
 iya ẹpha l'ẹhu l'ẹhu.
- <sup>5</sup> Ojejoje nk'ayi ha nshinu;

- ike iya aburu ike, nyiberu ayibe.  
 Iphe-odo-nya nk'iya ta  
 dudu onye atụ-ghe ọnu ẹge ọ habe nshinu.
- 6 Ọ bụ Ojejoje gude ndu ndu  
 wozitaru onwephe ali.  
 Obenu le ndu akirishi;  
 be ọochitaje tya l'ali.
- 7 Unu gwa egvu gude kele Ojejoje ekele.  
 Unu gudenu une kwaru  
 Nchileke ayi nkwa.
- 8 Ọo ya gude urukpu kwechia  
 akpamigwe l'ọ ha.  
 Ọochijeru eliphe mini;  
 l'emeje t'eswa fushia l'eli ugву.
- 9 Ọ bụ iya anuje elu nri;  
 buru iya anuje unwu  
 ọphegu nri m'ọ -raa ọra iya.
- 10 E tọ budu agburu-ehu,  
 nọ l'inya emeje t'ehu tsoo Ojejoje ẹna;  
 ọphu ọ budu apata-ọkpa  
 madzu emeje t'ehu tso iya ẹna.
- 11 Ndu emeje t'ehu tsoo Ojejoje  
 ẹna kwa ndu, atsụ iya egvu;  
 mbu ndu, bu eke ẹnya ephe  
 anoje bu le n-yemobu ke Nchileke.
- 12 Nggube Jerúsalemu; kutsenua Ojejoje.  
 Janua Nchileke ngu ajaja; nggube Záyonu;
- 13 ke l'ọo Ojejoje bu onye  
 emeje t'iphe igudeje tu-chia  
 ọnu-nggamgbo ngu shihu ike;  
 buru iya agojeru unwu ngu ọnu.
- 14 Oomeje te nchi du ndo  
 l'oke-ali ngu l'oha;

- l'egudeje ọkpobe witu azu-ji ngu ẹpho.
- 15 Ọ o iphe ọ sọru t'o mee  
l'eliphe bẹ emeje nu.  
Okfu iya abuje;  
ọ -kpukwaduru iya-a l'ọnu ekfu;  
yọ tuko mgboko l'ọ ha ngakọta.
- 16 Ọ bu onye ewojeru mini suno  
phushia l'ọ bu onye phushiru ukpo;  
bya eworu iji phekaa;  
yo dzuru ekemeke ọbule  
l'ọ bu onye wushiru ntụ.
- 17 Ookpotaje aka-mini ghaa l'ọ  
bu onye gharu eja.  
?Bu onye a-du ike ọdu  
t'oyi aka-mini ono tsua ya?
- 18 Ọle ọobuje; o -kfua okfu;  
aka-mini ono adazehu.  
Oomeje tẹ pherephere wata ephephe.  
Pherephere -phedelephu;  
aka-mini adazehu wata ọtso atsotso.
- 19 Okfu iya b'o kpuhawaru koshi Jékọpu;  
mbu l'ikpe, o kperu yele  
iphe ọ tọru ọkpa iya;  
su t'e tsoje b'o kpuhawaru koshi Ízurẹlu.
- 20 Ẹ tọ dudu ọhodo,  
o mejewaru ẹge ono.  
Ndu onanu ta madu ke  
ekemu, ọ tuhawaru dobe.  
Unu jaa Ojejoje ajaja.

## 148

- 1 Unu jaa Ojejoje ajaja.  
Unu shi l'imigwe jaa Ojejoje ajaja.

- Unu nọdu l'ẹke kagee l'eli jaa ya ajaja.
- <sup>2</sup> Unube ụnwu ojozi iya l'unu ha;  
unu jaa ya ajaja.  
T'iphe bu ndu soja imigwe; jaa ya ajaja.
- <sup>3</sup> Unu jaa ya ajaja;  
unube ẹnyanwu; me ọnwa.  
Unu jaa ya ajaja;  
unube mkpo-kpodo, egbu zamuzamu.
- <sup>4</sup> Unu jaa ya ajaja;  
unube akpamigwe;  
mekpo unube mini,  
no-ngoru akpamigwe ano-ngo.
- <sup>5</sup> Unu tuko l'unu ha jaa Ojejoje ajaja;  
ke lo bu iya suru t'unu nodu;  
meru iphe unu no.
- <sup>6</sup> Oo yebedua dobetsuaru unu l'ẹke unu a-nodu.  
Yo buru eke ono,  
o dobetsuaru unu t'unu  
nodu ono; be unu notsua.  
Yo buru eke ono; be unu  
a-no jeye le tutu yoyo.  
Iphe ono, o toru okpa iya ono  
te nwedu lo chihuru echihu.
- <sup>7</sup> Unu nodunu le mgboko  
jaa Ojejoje ajaja;  
unube iphe dutsua biribiri,  
o meshiru dobe l'eze ẹnyimu;  
me ophu notsua le mini ime-ali.
- <sup>8</sup> Unu jakwaaphu Ojejoje ajaja;  
unube egbe-igwe; me aka-mini;  
me urukpu; me oke pherephere,  
emeje iphe o kfulu.
- <sup>9</sup> Unube oke ugву;

- mẹ ugву кẹ nshji;  
 iphe бұ oshi-ọmi;  
 мө iphe бұ oshi sida;  
 unu jakwaa ya phụ ajaja.
- 10 Tẹ anụ-ẹgu-ẹgbudu:  
 iphe бұ elu; ụnwehu;  
 мө ụnwenu, ephe l'eli;  
 unu tuko jaa ya ajaja.
- 11 Unubẹ ndu eze кẹ eliphe ọwaa;  
 unubẹ iphe бұ mbakeshi;  
 unubẹ ndu ishi;  
 мө iphe бұ ndu achi mgboko l'ọ ha;
- 12 unubẹ ụnwu-okorọbya;  
 unubẹ ụnwu-mgboko;  
 unubẹ ndu бұ ọgurennya;  
 мө унwegirima;  
 unu jajekwaa ya phụ ajaja.
- 13 Unu tuko l'unu ha jaa Ojejoje ajaja;  
 кẹ l'ọ бұ ẹpha iya  
 nwenkinyi бұ ẹpha, kakota nụ.  
 Ọdu-biribiri iya swetaru  
 mgboko mgburumgburu  
 bya esweta imigwe.
- 14 O meru tẹ onye ike дұ  
 lufutaru ndu nk'iya.  
 Onye ono бө ndu Ízurelu,  
 бұ ndu yeru iya obu anọduje aja ajaja;  
 mbụ ndu ono, nọ iya l'obu ono.  
 T'ajaja buru кẹ Nchileke.

## 149

- 1 Unu jaa Ojejoje ajaja.  
 Unu gụa egву ọphungu nụ Ojejoje.

- Unu gụa egvu gude jaa ya  
ajaja l'ẹke ndu nk'iya dzuru.
- <sup>2</sup> Tẹ ndu Ízurelu tee ẹswa l'ẹke  
onye meru ẹphe nọ.  
Tẹ ẹhu tsọo ndu Záyonu  
ẹna l'ẹke onye eze ẹphe ono nọ.
- <sup>3</sup> T'ẹphe tee egvu gude jaa ya.  
Ephemede nkwa; mẹ une gụa egvu nọ iya;
- <sup>4</sup> kẹle Ojejoje bẹ ndibe iya nọ l'obu.  
Ndu wozitaru onwẹphe alị;  
bẹ oogudeje k'ọma bua nggo.
- <sup>5</sup> Tẹ ndibe Nchileke tee ẹswa  
l'egbe egvu ọwaa,  
a kwabẹru ẹphe-a.  
Ephemede agujekwaphu egvu  
ẹhu-otso-ẹna teke ẹphe  
zẹ azẹ l'ugboshi ẹphe.
- <sup>6</sup> Tẹ oja Nchileke ajaja buru  
iphe ẹphe a-kpọjeru l'ọnu.  
T'ẹphe patajẹ ogu-mbeke,  
atsọ nkọ ifu labu l'ẹka;
- <sup>7</sup> gude iya je agwata ndu  
ọhodo ugwo iphe ẹphe meru ẹphe;  
gudekwa iya phu nọ unwu eliphe aphu.
- <sup>8</sup> T'ẹphe kekwa ndu eze ẹphe ẹgbu;  
mbu tọ ndu nweru ẹnya mkpọro;
- <sup>9</sup> shi ẹge ono medzua iphe  
onye ikpe deru l'ẹkwo; sọ:  
t'ẹphe mee ndu ọhogu ẹphe ono.  
Ono bu iphe o gude kwabẹ  
ndu nk'iya ono egvu.  
Unu jaa Ojejoje ajaja.



**150**

- 1 Unu jaa Ojejoje ajaja.  
 Unu nọdu l'ulo Nchileke,  
 dụ nsọ jaa ya ajaja.  
 Unu jaa ya ajaja k'ike,  
 o gude meshikota iphe nọkota l'imigwe.
- 2 Unu jaa ya ajaja k'eze iphe,  
 o mekotaru.  
 Unu jaa ya ajaja;  
 kele nshinu ọphu yẹbedua  
 dụ nyịberu anyịbe.
- 3 Unu gbua ụpyoku gude jaa ya ajaja.  
 Unu egude une; gude  
 ogumogu jaa ya ajaja.
- 4 Unu kụa nkwa; tee egvu gude jaa ya ajaja.  
 Unu kpọo ụbo; phụa opu gude jaa ya ajaja.
- 5 Unu kụa eze ogele  
 gude jaa ya ajaja.  
 Unu kụa ogele,  
 ada gengugengu gude jaa ya ajaja.
- 6 Tẹ iphemiphe ọbule, bu iphe  
 atụ ume jaa Ojejoje ajaja.  
 Unu jaa Ojejoje ajaja.

cccxxxviii

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb